

$$\frac{20}{25}$$



B. 11. 148

COMMENTAIRES

DE MESSIRE

Blaise 1765
BLAISE DE MONTLUC

Mareschal de France.

Où sont décrits tous les Combats , Rencontres , Escarmouches , Batailles, Sièges, Assauts, Escalades , Prises ou Surprises de Villes & Places fortes : Deffenses des assaillies & assiégées : Avecque plusieurs autres faits de guerre signalez & remarquables, esquels ce grand & renommé guerrier s'est trouué durant cinquante ou soixante ans , qu'il a porté les Armes.

Ensemble diuerses instructions , qui ne doiuent estre ignorées de ceux qui veulent paruenir par les Armes à quelque honneur , & sagement conduire tous exploits de Guerre.

TOME SECOND




A PARIS,

Chez GANEAU , rue S. Jacques , vis-à-vis S. Yves ,
à Saint Louis.

M. DCC. XLVI.

Avec Approbation & Permission.





COMMENTAIRES
DE MESSIRE
BLAISE DE MONTLUC,
Mareschal de France.

LIVRE TROISIEME.



EPENDANT que la guerre Le Pied-
mont es-
cole des
gens de
guerre.
se faisoit en Piedmont, com-
me i'ay escrit cy-dessus, sous
ce grand guerrier monsieur
le Mareschal de Brissac, qui y establit
vne tres-belle discipline militaire,
aussi pouuoit-on dire que c'estoit la
plus belle escolle de l'Europe : on ne
dormoit pas du costé de Picardie,
Champagne, & Mets, qui fut assiegé
par l'Empereur. Ce fut là où ce grand ^{1552.}
Duc de Guyse acquist vne gloire im-
mortelle. Je n'ay eu iamais plus grand
regret, que de n'auoir veu ce siege :
Mais on ne peut estre en tant de lieux.

*Sienn
pour les
François
le cin-
quieme
Aoust.*

1552.

*Le sieur
de Strossy
Lieute-
nant du
Roy en
l'Estat de
Sienn.*

Le Roy qui desiroit troubler les affaires de l'Empereur en Italie , fit tant par les pratiques & menées de quelques Cardinaux ses partisans , & de monsieur de Termes , qu'il fit reuolter les habitans de la ville de Sienn , qui est vne tres-belle ville & importante en la Toscane , de sorte que les Espagnols qui estoient dedans , en furent chassés , & la citadelle ruinée. Comme ce peuple se vid jouissant de la liberté , ayant leué les enseignes Francoises , il ne fit faute d'implorer l'ayde & secours du Roy , lequel en donna la charge à monsieur de Strossy , qui fut depuis Marechal , lequel avec l'ayde des alliez du Roy mit des forces en campagne , assisté des Sieurs Cornelio , Bentiuoglio , Fregouse , & autres Sieurs Italiens , des Sieurs de Termes , & de Lansac. Ledit Seigneur Strossy , quoy qu'il eust les forces & de l'Empereur & du Duc de Florence sur les bras , si est-ce qu'il s'y porta fort vaillamment & prudemment , pour faire teste au Marquis de Margnan dit Medequi , lequel faisoit la guerre à toute outrance. Toutefois en despit de luy , le Sieur Strossy print plusieurs petites villes , lesquelles de-

pendent de l'estat de Sienne, dequoy ie ne veux particulièrement parler, parce que ie n'y estois pas. A ce que j'ay entendu, il s'y fit de beaux exploits. Car l'Empereur & le Duc de Florence ne desiroient rien tant que chasser le Roy d'Italie, pour la crainte qu'ils auoient, qu'y ayant vn pied, il n'y mist tout le corps. Mais nous ne sçaurions iamais garder nos conquestes, je ne sçay pas si à l'aduenir on fera mieux. Je me doute fort que non: pour le moins il me le semble ainsi. Dieu veuille que ie me puisse tromper.

*Defaut
des Fran-
çois.*

Or monsieur de Strossy manda au Roy, qu'il ne le pouuoit seruir tenant la campagne & commandant dans Sienne: & qu'il le suplioit tres humblement vouloir faire election de quelque personnage, de qui sa Maiesté se peust fier, pour y commander tant qu'il seroit en campagne. Le Roy ayant receu ceste depesche appella monsieur le Connestable, monsieur de Guyse, & monsieur le Marechal de saint André, pour en nommer chacun vn. Par les mains de ces trois tout passoit. Tous les Roys ont eu tousiours cela: ils se laissent gouverner à quel-

ques vns , peut estre trop. Certes il semble parfois qu'ils les craignent.

*Dispute
pour la
nomina-
tion du
sieur de
Montluc
en la
charge de
Sienna.*

Monsieur le Connestable estoit plus fauori , & plus aimé du Roy , qu'autre fut iamais. Monsieur le Connestable nomma le sien , monsieur de Guyse le sien , & monsieur le Marechal de saint André aussi le sien. Alors le Roy leur dit , vous n'avez point nommé Montluc. Monsieur de Guyse luy respondit , il ne m'en souuenoit point : monsieur le Marechal de saint André en dit de mesmes , & encores luy dit monsieur de Guyse , si vous nommez Montluc , ie me tais , & ne parleray plus de celuy , que i'ay nommé : ny moy aussi , dit monsieur le Marechal , lequel depuis m'a fait tout ce discours. Alors monsieur le Connestable dit , que ie n'estois pas bon pour faire ceste charge , parce que i'estois trop bisarre , fascheux & colere. Le Roy respondit , qu'il auoit tousiours veu & cognu , que la colere & bisarrerie , qui estoit en moi , n'estoit sinon pour soustenir son seruice lors que ie voyois qu'on le seruoit mal. Or iamais il n'auoit ouy dire , que i'eusse prins querelle avec personne pour mon particulier. Monsieur de Guyse & monsieur le Mare-

chal respondirent qu'aussi ne l'auoient ils iamaïs ouy dire, & que desia i'auois esté gouuerneur de Montcaillier & d'Albe, sans que iamaïs homme se soit pleint de moy. Et d'autre part que si i'estois tel, monsieur le Mareschal de Brissac ne m'eust pas tant aymé & fauorisé, ny ne s'en fut tant fié, comme il faisoit. Monsieur le Connestable repliqua encores fort : car il vouloit, que celuy qu'il auoit nommé y allast. Il se faisoit de ceder, & aussi il ne m'a iamaïs gueres aymé ny les siens aussi. Monsieur le Cardinal de Lorraine y estoit, qui a meilleure souuenance que moy, de celuy que monsieur le Connestable auoit nommé : Toutes-fois il me semble que c'estoit Boccac, lequel depuis s'est fait Huguenot. A la fin le Roy s'en fit accroire ayant monsieur de Guyse & monsieur le Mareschal de S. André de son costé, & enuoya vn courrier deuers monsieur le Mareschal de Brissac, pour me faire venir en Auignon, auquel lieu i'attendois vn Gentil-homme que sa Maïesté m'enuoyoit, lequel apportoit ma dépêche, pour m'en aller à Sienné.

Or monsieur le Mareschal quelques iours deuant m'auoit donné congé,

pour m'en venir à ma maison , à cause d'une maladie , qui m'estoit survenuë , comme i'ay dit : lequel n'auoit nulle enuie de ce faire , comme luy mesmes m'a confessé depuis , & m'a fait cest honneur de me dire , que s'il eust cognu l'importance , que celuy fust de m'auoir perdu , qu'il eust encore escrit au Roy plus de mal de moy qu'il n'auoit fait : & qu'en sa vie ne se repentit tant de chose qu'il eust faite , que m'auoir laissé partir d'aupres de luy : car il m'auoit bien trouué à dire depuis que i'estois party de Piedmont. Monsieur de Cossé , monsieur le President de Birague , & autres peuuent témoigner combien de fois ils luy ont ouy regretter mon absence , mesmement quand les choses ne luy succedoient , comme il vouloit. Et si l'on regarde bien ce que i'auois fait estant sous luy , on trouuera que ce que ie dis est veritable , & qu'il auoit raison de me regretter. I'estois tousiours à ses pieds , & à sa teste. Je crois toutefois , que pour ma presence il ne se fut rien fait de mieux : mais si suis-je contrainct dire le vray. Il y en a , qui en diront dauantage , s'ils veulent.

Or il escriuit vne lettre au Roy, & vne autre à monsieur le Connestable, par laquelle il mandoit à sa Maiesté, qu'il auoit fait vn election fort mal à propos, pour commander à Sienne, car i'estois vn des plus coleres hommes du monde, & le plus bisarre, & tel qu'il falloit que la moitié du temps il endurast de moy, cognoissant mes imperfections: Mais que i'estois bien bon pour faire tenir la police & la iustice en vn camp, pour commander à la campagne, & pour faire combattre les soldats. Mais que considéré les humeurs des Siennois c'estoit feu contre feu, qui seroit le vray moyen de perdre cest estat, qu'il falloit conseruer par douceur. Il prioit monsieur le Connestable aussi de le remonstrer au Roy, & cependant il me depesche vn courrier, lequel me trouua fort malade: & me mandoit que le Roy me vouloit enuoyer à Sienne: mais que comme amy mien il me conseilloit de n'accepter point ceste charge, me priant de ne l'abandonner pour aller ailleurs, sous vn autre, & m'assurant, que si rien vaquoit en Piedmont, que i'aymassé mieux, que ce que i'auois, que ie l'auois: tout cela estoient des arti-

*Auis du
sieur de
Brissac
au Roy
sur la no-
mination
du sieur
de Mont-
luc.*

*La vñe
pour re-
tenir le
sieur de
Montluc.*

fices pour me retenir.

O qu'un sage Lieutenant de Roy doit veiller & prendre garde, qu'il ne perde celuy auquel il a beaucoup de fiance, & qu'il cognoist de valeur. Il ne doit rien espargner pour le retenir : car bien souuent vn homme seul peut beaucoup. Il faut manger beaucoup de sel pour cognoistre vn homme, & cependant vous estes priué de celuy, auquel vous auiez fiance : car vous auez ja esprouué sa fidelité. Or auoit mandé aussi ledit Sieur Marechal au Roy, que i'estois en Gascongne malade : & comme le matin ses lettres furent leuës, monsieur le Connestable, qui en fut bien ayse, dit au Roy, qu'il luy en auoit bien dit autant, & qu'homme ne me pouuoit mieux cognoistre, que monsieur le Marechal de Brissac, qui m'auoit souuent veu en besogne. Le Roy, qui de son propre naturel m'aymoit, & m'a tousiours aimé, depuis qu'il m'eust remarqué à la camifade de Boulogne, dit, comme monsieur le Marechal de saint André m'a dit plusieurs fois, que quand bien tous ceux de son conseil luy diroient mal de moy, qu'ils ne gaigneroient rien : car son naturel estoit

*Le Roy
Henry
aimoit
le sieur
de Mont-
luc.*

de m'aimer, & qu'il ne vouloit quitter son eſlection, quoy que l'on en parlaſt. Monsieur de Guyſe print la parole, & dit voylà vne lettre, qui contrarie fort. En premier lieu monsieur le Mareſchal de Briſſac dit, que Montluc eſt colere & biſarre, & qu'il ne s'accommodera iamais avec les Siennes : mais qu'il gâtera tout voſtre ſervice, ſi vous le leur enuoyez : d'autre part il le louë des choſes, qui requierent d'eſtre en vn homme de commandement, & qui a en charge des choſes grandes : car il dit, qu'il eſt homme de grande police & grande iuſtice, & pour faire combattre les ſoldats en grandes entreprinſes & executions. Qui a iamais veu qu'un homme doië de toutes ces bonnes parties n'eût avec luy de la colere : Ceux qui ne ſe ſoucient guieres que les choſes aillent mal ou bien, ceux-là peuuent eſtre ſans colere. Au demeurant, Sire, puis que vous meſmes avez faite l'eſlection, il me ſemble que ne la deuez reuoquer. Monsieur le Mareſchal de ſainct André reſpondit apres, Ce que monsieur le Mareſchal de Briſſac dit, facilement vous le pouuez rabiller en eſcrivant à Montluc, que vous meſ-

Les coleres ſont les meilleurs.

mes l'avez esleu, & que pour l'amour de vous il laisse, tant qu'il pourra, sa colere, ayant affaire avec cerueaux bisarres, tels qu'estoient les Siennes. Le Roy dit lors, qu'il n'auoit point de crainte, qu'apres qu'il m'auroit es- crit vne lettre, ie ne fisse ce qu'il me commanderoit : & soudain me despescha vn courrier à ma maison, par lequel me manda que quand bien ie serois malade, que ie me misse en chemin droict à Marseille, auquel lieu ie trouuerois ma depesche, & m'embarquerois avec les Allemans, que le Rincroque menoit, & dix compagnies Françoises, où il m'enuoyeroit aussi de l'argent pour faire mon voyage, & que ie laissasse vn peu ma collere en Gascogne m'accommodant à l'humeur de ce peuple. Le courrier me trouua à Agen entre les mains des medecins bien malade : toutesfoy ie luy dis, que dans huit iours ie me mettrois en chemin : ce que ie fis, & cuiday mourir à Toulouse, duquel lieu, par le conseil des medecins, ie deuois retourner arriere : ce que ie ne voulus faire : ains me fis traifner iusques à Montpellier, là où ie fus encore conseillé par les Medecins de ne passer

plus outre, s'asseurans, que si ie m'hafardois, ie n'arriverois iamais à Mar-
seille en vie : mais quelque chose
qu'ils me sçeussent dire, ie me resolu
de cheminer tant que la vie me dure-
roit, à quelque prix que ce fut. Et
comme ie partoys, m'arriua vn autre
courrier, pour me faire haster. Et de
iour à autre ie recouurois ma santé en
allant : de sorte que quand ie fus à
Marseille, ie me trouuay sans compa-
raison mieux que quand i'estois party
de ma maison.

Certes le Roy mon bon maistre
auoit raison de deffendre ma cause :
car iamais ma colere ne porta nul pre-
iudice à son seruice, ouy bien à moy
& à quelque autre, qui n'a sceu esqui-
uer ny se garder de mon humeur, ia-
mais ie ne luy perdis place, bataille,
rencontre, ny ne fus cause de luy faire
perdre vn seruiteur. La colere ne m'a
iamais ietté tant hors de moy, de me
faire faire chose preiudiciable à son
seruice. Si elle est violente & prompte,
aussi elle en dure moins. I'ai tousiours
cognu, qu'il vaut mieux se seruir de
ces gens là que d'autres. Car il n'y a
point d'arriere boutique en eux : & si
ils sont plus prompts, plus vaillans

*Les capi-
taines co-
leres plus
vaillans
que les
autres.*

que ceux qui veulent avec leur froi-
deur se faire estimer plus sages. Mais
laissant ce propos ie retourneray à mon
voyage.

*Ceste en-
treprise
de Sienné
fut l'an*

1555.

*Le Baron
de la
Garde en
Arger.*

Je trouvoy que le Baron de la Garde
estoit parti avec l'armée, pour aller en
Arger, faire avec le Roy d'Arger qu'il
luy baillast son armée : pource que
ledit Sieur Baron auoit esté aduertty
que le Prince d'Orie l'attendoit avec
vne grande armée sur le chemin, pour
le combattre. Et l'armée du Roy n'es-
toit pas assez forte, qui fut cause que
nous temporisames quelques iours.
Comme donc le Baron fut arriué ayant
l'armée d'Arger avec luy, nous nous
embarquasmes à Tollon, & par le
chemin rencontraumes huit ou neuf
nauires chargez de bleds, qui venoient
de Sicile, & l'apportoient en Espagne :
lesquels ledit Baron fist brusler, sauf
deux qu'il amena pour fournir son ar-
mée. Et ainsi allasmes iusques à Porte-
Herculé, auquel lieu nous fut impos-
sible de faire descente à cause que le
Marquis de Marignan auoit son camp
pres du chemin, qu'il nous falloit tenir,
pour aller à Sienné. Qui fut cause qu'il
nous fallut rembarquer, pour reculer
en arriere, & faire la descente aupres

d'Escarlin, où monsieur de Stroffy estoit avec son camp. Là trouuasmes, *Le Prieur de Capua tué.* que le Prieur de Capue auoit esté tué en recognoissant Escarlin, il y auoit deux iours, qui fut vn grand dommage, car c'estoit vn vaillant homme, s'il y en auoit en terre, ou sur la mer, & vn bon seruiteur du Roy. Il estoit frere de monsieur de Stroffy : & me dit-on qu'il fut tué de la main d'un païsan, qui luy tira vne arquebuzade de derriere vn buisson. Voyez quel mal-heur qu'un grand capitaine meure de la main d'un vilain avec son baston à feu. Nous marchasmes ainsi jusques à Bonconuant, allant tousiours monsieur de Stroffy vn peu deuant nous, à cause des viures, & là tout le camp fut assemblé.

Auant que les Allemans & François fussent arriuez audit Bonconuant, monsieur de Stroffy se mit deuant le matin, avec les trois mil Grisons, desquels monsieur de Forcauaux estoit Colonel, & avec les Italiens : afin de faire place aux Allemans & François, qui auoient besoin de loger & reposer deux heures. Je vins trouuer le soir deuant monsieur de Stroffy : Et le matin partis avec luy pour arriuer de bonne

heure à Sienne, où nous trouuâmes
 monsieur de Lansac, qui à nostre ar-
 riuée donna à dîner à monsieur de
 Strossy, à monsieur de Forcauaux &
 à moy. Sur l'arriuée des Grisons & des
 Italiens se dressa vne grande escarmou-
 che à sainte Bonde, vn Monastere
 de Nonnains près saint Marc, qui
 est vn autre Monastere de Religieux.
 Le Marquis de Marignan auoit son
 camp au Palais du Diau, qui est sur le
 chemin de Florence, près Sienne un
 mille : & ce matin mesmes il estoit
 party pour aller à sainte Bonde assail-
 lir le capitaine Bertholomé de Pesere,
 lequel monsieur de Strossy auoit mis
 dedans avec sa compagnie. Ledit Mar-
 quis auoit laissé ses Italiens audit Pa-
 lais du Diau, & mené tous les Espa-
 gnols & Allemans avec luy : & comme
 nous disions l'escarmouche se com-
 mença forte & roide à sainte Bon-
 de. Les Grisons & les Italiens firent
 alte au Pallassot près Sienne demy mil-
 le, & nos Italiens aussi par le com-
 mandement de monsieur de Strossy :
 pource qu'il vouloit aduiser plustost
 où il mettroit tout le camp, & qu'il
 vouloit aussi, qu'auant que ceux-là
 fussent logez, les Allemans & François.

*Escar-
 mouche
 devant
 Sienne.*

fussent arriuez : pource que tout à vn coup se logeroient ensemble ; mais n'ayant point encores paracheué de disner , nous ouïysmes quelques petites pieces tirer à sainte Bonde , que le Marquis y auoit mené. Alors ie dis à monsieur de Strossy ces mots , Monsieur , ceste escarmouche est grande & roide meslée avec de l'artillerie , ils vous emporteront le capitaine Bertholomé de Pesere : ie vous prie allons voir que c'est. Ledit Sieur respondit , allons donc , aussi faut-il que nous allions regarder où nous logerons le camp. Monsieur de Lansac me presta vn cheual Turc poil gris , car ie n'auois point amené mes cheuaux par mer. Lors ie dis à monsieur de Strossy , s'il trouueroit bon que i'allasse voir que c'estoit de ceste escarmouche , pendant qu'il iroit regarder avec Messieurs de Lansac & de Forcauaux , où il logeroit le camp. Il me dit qu'il le trouuoit bon , & sortismes par la porte saint Marc. Ie tiray droit au lieu de l'escarmouche , & eux vn peu à main droite , pour regarder où ils mettroient le camp. Comme i'arriuay de là la Tresse , où se faisoit l'escarmouche , ie n'y trouuay aucun capitaine : & estoit

comme vne escarmouche faite en desordre. Et les ennemis auoient gagné aduantage sur les nostres, car ils les auoient tirez des cottaux près saincte Bonde, & ramenez iusques aux prez qui sont ioignant la riuere de la Trefse. Et à mon arriuée ie demanday les capitaines, & n'en trouuay vn seul qui se dit capitaine: dont s'ensuiuoit vn grand desordre. Sur cela i'en vis venir vn sur vn cheval gris: & courus à luy, pour luy demander s'il estoit capitaine: lequel me dit qu'ouy. Je luy demanday son nom, il me respondit, *io mi chiamo Marioul de santa Flior*, & ie luy dis, *signor capitan io mi chiamo Montluco, andamo insieme*. Or tout le camp auoit desia entendu que ie venois avec le secours: & encores que nous ne nous fussions iamais veus, si est-ce que nous nous reconnusmes au nom. Je le priay de r'allier ses gens pour donner vne cargue aux ennemis, & les ramener contre-mont, ce qu'il fit: & les ramenâmes iusques au haut. Cependant tout au long d'un cottau l'escarmouche tiroit, & au long des vignes droit au Pallassot, qui est vn petit Palais, au derriere duquel estoient les Grisons. Et au dos
de

*Marioul
de santa
Flior.*

de la montagne vn peu auant, l'artillerie que le Marquis auoit à sainte Bonde tiroit. Là tous les capitaines Italiens, & le Sieur Cornelio Bentiualio qui estoit Colonel, estoient au coing des vignes tirant à sainte Bonde & à saint Marc, derriere vn petit Oratoire, au couuert de l'artillerie.

Or depuis le Pallassot iusques au petit Oratoire, il y pouuoit auoir trois cens pas. Le Seigneur Marioul & moy fîmes tant, que nous menâmes tout au long du cottau des vignes l'escarmouche sur leurs bras. J'auois amené avec moy le capitaine Charry, qui estoit mon Lieutenant à Albe, avec trente bons soldats, tous lesquels presque estoient Gentils-hommes, n'estant voulu demeurer avec mon frere monsieur de Lioux, à qui le Roy auoit donné le Gouvernement d'Albe, à la supplication & requeste que monsieur de Valence mon frere & moy luy en auions faite. Surquoy il y eust grande dispute : car monsieur le Marechal de Brissac differoit de l'accepter iusques à ce qu'il eust responce de moy. Et comme il entendit que le Roy estoit resolu de m'enuoyer à Sienna, il m'enuoya vn courier de nouveau, me

*Le sieur
de Lioux
Gouver-
neur
d'Albe.*

priant que ie ne quittasse point le
Gouuernement d'Albe, & que ie nomi-
massé mon Lieutenant ou autre, pour
commander au Gouuernement ius-
ques à mon retour, m'assurant qu'il
accepteroit celuy que ie nommerois,
& que cependant il feroit garder mes
gages, tellement que ie ne perdrois
rien : & au surplus, que ie confide-
rassé que la charge que le Roy me
donnoit à Sienné, ne seroit point de
si longue durée que le Gouuernement
d'Albe. Mais ie le suppliay tres-hum-
blement d'auoir mon frere pour agrea-
ble, l'assurant qu'il luy seroit aussi
affectionné seruiteur que moy : & que
quand bien ie retournerois de Sienné,
que ie iurois de l'aller trouuer pour
luy faire seruice en simple soldat, en-
core que le Roy ne me baillast aucune
charge pour estre pres de luy. Or pour
monstrer la complexion de monsieur
le Marechal, ie veux dire & mainte-
nir, que c'estoit vn des bons seigneurs
& maistres que cinquante ans y a fut
en France, pour ceux qu'il cognoissoit
auoir bon zele & affection au seruice
du Roy : & si monsieur le President
de Birague met la main à la conscien-
ce, il en iurera comme moy. Il ay-

moit plus le profit d'autrui que le sien propre. On ne perdoit rien pres de luy, il faisoit part & des biens-faicts & de l'honneur. Au reste il ay-moit & honnoroit iusques aux simples soldats. Les bons hommes il les cog-noissoit par leur nom: prenoit l'aduis de tous sans croire sa teste seule, comme faisoit monsieur de Lautrec. Or pour retourner à l'escarmouche ie trou-uay à l'Oratoire le sieur Cornelio, & le Colonel Charamont, que ie n'auois encores veu. Entre ledit Oratoire & sainte Bonde il a vn grand chemin, & au long d'iceluy deux petites mai-sons, à dix ou douze pas l'vne de l'autre. Nous fîmes vne cargue aux enne-mis au long de ce chemin, & leur ostasmes les deux maisons. Le capi-taine Charry se ietta dans l'vne, nos Italiens dans l'autre. Ils demurerent là enuiron trois quarts d'heure tou-siours presque aux mains, de sorte que le Marquis y desbanda toute l'arque-buzerie Espagnolle, & les Italiens mesmes qui estoient à leur fort de saint Marc: & mit six enseignes Espagnol-les tout au long du grand chemin pour soustenir l'escarmouche. Or la grande escarmouche estoit à main droite & à

main gauche dans les vignes , de sorte que la cauallerie n'y pouuoit rien faire. Le seigneur Cornelio par l'aduis des capitaines se voulut retirer. le luy remonstray qu'il ne falloit poinct. qu'il commençast sa retirade qu'il n'eust de la cauallerie , ensemble les Grisons pour le soustenir , vers lesquels ie m'en yrois pour les prier de marcher iusques à moitié chemin du Pallassot à l'Oratoire : & que de mesmes i'yrois prier le Comte de la Mirande qui estoit Colonel de la cauallerie , & auoit fait alte du costé du Pallassot , en vn vallon derriere vn petit bois : ce qu'ils trouuerent bon : ainsi ie courus aux Grisons , & les priay de vouloir marcher seulement deux cens pas. Le Colonel qui commandoit sous monsieur de

*Grisons
epinia-
stres.*

Fourqueuaux , n'y voulut entendre. le courus au Comte , & le priay de laisser venir quatre cornettes de gens de cheual , ce qu'il fist : qui furent le Comte de Fontauala , Cornelio , Ioby , le Baron de Rabat , & Serillac mon nepueu , qui conduisoit la compagnie de monsieur de Cipierre. Or comme les cornettes marcherent au galop , ie vis le Sieur Cornelio , qui commençoit à se retirer à l'instance des capi-

taines : & courus à luy , & luy remonstray que les six enseignes marchoient : & que c'estoit des Espagnols , car les drapeaux estoient trop grands , qui estoit signe que le Marquis estoit là avec tout le camp : lequel les chargeroit dès qu'il commenceroit à prendre la descente , le priant de tourner au mesme lieu. Ce qu'il fist n'en estant pas à trente pas. le tournay aux cornettes , & les arrestay à moitié chemin du Pallassot à l'Oratoire , puis retournay autresfois aux Grisons : lesquels apres que ie leur eus remonstré nostre perte , se leuerent & commencerent à sonner les tabourins , & marcher iusques au costé de la cauallerie. Le Marquis qui vist que la cauallerie & les Grisons se monstroient , voulut retirer les six enseignes du grand chemin. Il n'y auoit chef aucun des nostres qui fut à cheual que moy & le Seigneur Marioul , qui ne m'abandonna iamais. Aussi ie pouuois voir tout ce que l'ennemy faisoit. Alors ie luy dis : voilà les enseignes Espagnolles qui tournent visage ayant veu nostre cauallerie & les Grisons , faites leur , Seigneur Cornelio , vne cargue : car il est temps maintenant. Le Seigneur Marioul des-

*Sage
aduiz d'un
sieur de
Montlus.*

cend, & mist vne rondelle au bras,
 & l'espée en la main. Je dis au capi-
 taine Charry qu'il monstraist ce qu'il
 auoit tousiours esté, & qu'il fist pa-
 roistre à ces estrangers ce qu'un Gas-
 con scauoit faire, & qu'il gaignast le
 deuant de tous. Monsieur de Four-
 queuaux auoit amené quatre cens ar-
 quebuziers Italiens de Parme, braues
 hommes, qui estoient joints à l'Ora-
 toire. Je ne me feray point plus vail-
 lant que ie ne suis, car ie ne descendis
 pas. Je faisois desia le Lieutenant de
 Roy. Et departismes les soldats à main
 gauche, & à main droite, & au long
 d'un grand chemin: & là fismes la car-
 gue qui fust braue, s'il s'en est iamais
 faite, & telle que nous les ramenaf-
 mes iusques à vne descente à main
 gauche de sainte Bonde où estoit le
 Marquis, & le demeurant de ses Es-
 pagnols & Allemans. Et pource que
 les Espagnols tenoient iusques sur le
 bord de la montée, ceux qui auoient
 prins la fuite donnerent au trauers
 d'eux: & se remenerent les vns & les
 autres iusques sur les bras des Alle-
 mans. Le Marquis qui vist ce desor-
 dre sur ses bras, commença à se reti-
 rer par vne vallée, tant qu'il pouuoit,

*Désordre
 des Impe-
 riaux.*

sans sonner trompette ny tabourin. Ceux qui estoient sortis de saint Marc se retirerent aussi en haste : & en ramenerent les quatre petites pieces, desquelles ils battoient sainte Bonde dans leur fort de saint Marc. Et me dit le Marquis, lors que ie sortis de Sienne, en m'accompagnant environ deux mille de la ville, que si nous eussions poussé outre, nous mettions son camp en desordre & fuite, & les deffaisions : mais nous ne voyions pas son desordre. Le proverbe des anciens est vray. Si l'ost scauoit de l'ost, mal iroit de l'ost. Nous nous tinsmes tous heureux d'auoir eschappé vne si grande fortune : & nos ennemis encore plus. Monsieur de Strossy qui estoit de l'autre costé de la porte saint Marc, en des vallons qu'il y a, discourant toujours avec Messieurs de Lansac & de Fourqueuaux pour l'affiette du camp, oyoit bien qu'il y auoit vne grande elcarmouche : mais il scauoit aussi que tous les capitaines y estoient : & ie m'en y estois aussi allé. Ils ne penserent iamais que la chose fust si aspre, qu'elle estoit : à la fin comme ils entendirent le rencontre si fort, ils laisserent là tout, & coururent à nous,

toutesfois ne peurent arriuer à la cargue, dequoy fut bien marry ledit Seigneur de Stroffi, mesme de ce que l'on ne l'auoit aduertit de ce combat, aussi fut bien monsieur de Fourqueuaux, d'autant que les Grisons, desquels il estoit chef, estoient venus iusques à combattre, & que ses arquebuziers auoient combattu. Le luy dis que ie n'auois nul homme à cheual avec moy, sinon le Sieur Marioul, & que cestuy-là estoit trop homme de bien, pour laisser la cargue & l'escarmouche, car il auoit trois ou quatre enseignes sous luy. Parquoy ie ne leur pouuois enuoyer personne pour les aduertir. Or monsieur de Stroffi auoit mandé le Sieur Robert son frere au sortir de table en diligence, pour faire auancer les François & Allemands, ce qu'il fit : & les trouua, qui commençoient à boire, lesquels il ne peust tirer promptement des tables : car ledit Sieur de Stroffi auoit fait mettre à manger dans le grand chemin, & si l'on ne leur eust rien appresté là, ainsi comme ainsi, ils fussent passez outre, & à point nommé fussent arriuez sur la chaude du combat, ainsi la bataille estoit gagnée : mais il faut dire comme l'Italian,

*Les Allemands
s'amusaient
à manger
pendant
le combat,*

l'Italian, *Fâ me indeuino, & io te daro danari.* Voylà ce qui se fit le premier iour, que j'arriuay à Sienne, estant si bien remarqué des Siennesois & de tous les capitaines-Italiens, qui ne me cognoissoient pas, que cela me porta vne grande faueur parmy les Siennesois, & parmy tout le camp, courant à cheual parmy les gens de pied, ores çà, ores là: disposant ceux-cy d'un costé, ceux-là de l'autre, ie leur monstray que ce n'estoit pas la centième escarmouche, où ie m'estois trouué.

Or monsieur le Marechal logea son camp entre porte Noue & porte Tuffe, dans de beaux bourgs qu'il y auoit. Et non seulement en cest endroit là estoient beaux les bourgs, mais i'oserois bien dire, que si les bourgs de Sienne eussent esté tous ensemble, ils eussent surpassé la ville de grandeur. Car dans les bourgs y auoit de plus beaux Palais, de plus belles Eglises & Monasteres, qu'il n'y auoit dans la ville. Le lendemain matin monsieur de Strossi nous mena sur la muraille de la ville tirant au camp de l'ennemy: & là disputasmes s'il seroit bon de le combattre, les vns le trou-

*Conseil
sur ce
qu'il fal-
loit com-
battre les
ennemis.*

uoient bon , les autres mauuais. Ceux qui le trouuoient mauuais disoient , que nous ne pouuions passer pour aller au Palais du Diau , sans passer à la veuë d'vn petit fort , que le Marquis auoit fait entre la petite Obseruance & le Palais du Diau : auquel lieu il y auoit trois ou quatre pieces de grosse artillerie , comme il estoit vray , & que laissant cestuy-là derriere , nous laissions pareillement leur fort de Camolie. Je proposay , que pour le dommage , que l'artillerie du petit fort nous pouuoit faire , nous passerions vn peu deuant le iour , & laisserions vn enseigne ou deux , pour brider le petit fort , & quant au fort de Camolie , nous y pouuions laisser trois ou quatre compagnies de la ville. Et de ma part qu'avec le demeurant de la ville ie passerois à porte Fontebande , & aurois monté vne montaignolle au poinct du iour , pour me rendre à la plaine , & tellement à propos , que tout ainsi que nostre camp arriueroit pres du leur , à mesmes temps ie me rendrois si pres d'eux , qu'il faudroit qu'ils entraissent en crainte de nous voir arriuer l'vn d'vn costé , l'autre d'vn autre. Les

*Aduis du
sieur de
Montluc.*

Siennes faisoient estat de tirer quatre mille bons hommes dehors. Il y en eust qui tindrent ma proposition, & des Siennes aussi, qui estoit de les combattre, d'autres le contraire. Le ieu ne pouuoit estre, qu'il ne fust bien disputé : car le Marquis auoit *Forces des Marquis* trois terces d'Espagnols, sçauoir le terce de Sicille, de Naples, & celuy de Gorsegue (c'est ce que nous appellons regimens) les deux premiers composés de soldats vieux, & celuy de Gorsegue de nouveaux : mais si est-ce qu'il y auoit de bons soldats, & deux regimens d'Allemands, en chacun desquels y auoit douze enseignes, avec quatre ou cinq mille Italiens. Quant à la caualerie, ie pense que la nostre eust battu la leur : car nous auions de bons capitaines, & de braves cheuaux legers. Au reste nostre camp estoit de dix enseignes d'Alle- *Forces des Partisans François* mans, dix de Grisons, quatorze de François, & de cinq à six mille Italiens. De tout ce iour monsieur de Strossi ne peust resoudre ce qu'il feroit pour la diuersité des opinions : toutesfois ie pense que le lendemain il se fust resolu de les aller combattre : car les Siennes en auoient grande

enuie , & croy que ces gens qui eussent combattu pour leur liberté , eussent fait rage : mais le Marquis en fut aduerty , ou son dessein n'estoit pas de demeurer plus là : car il partist vne heure deuant le iour , & si Dieu eust voulu inspirer monsieur de Stroffi à ce que ce iour il les fut aller combattre , nous les trouuions le matin deslogez & les combattions sur leur retirade & en desordre. Mais il faut tousiours retourner à ce que i'ay dit cy deuant , *Fà me indeuino & io te darò danari.*

Le Marquis print le chemin deuers Mauchaut , auquel lieu monsieur le Marechal auoit laissé quatre enseignes , où bien le Marquis la tenoit, qui s'en alla à vn autre lieu pres de là , & monsieur de Stroffi droict à Mauchaut , ie n'ay bonnement souuenance , lequel c'estoit : mais si est-ce qu'ils demurerent huit ou neuf iours ayant leurs camps à sept ou huit mille : l'un allant pour prendre quelque place , & l'autre suiuant pour secourir. Toutesfois le Marquis arriua deuant Mauchaut , & commença à la battre pour la prendre , où bien pour la reprendre. le n'y estois point : car i'estois

demeuré à Sienné suivant l'intention du Roy, & suivant ma charge. Et sans vne maladie, où ie commençois d'entrer, ie caide que monsieur de Strossi m'eust mené avec luy, & eust laissé monsieur de Lansac gouverneur, comme il faisoit auparavant : mais à la fin, comme monsieur de Strossi partist, monsieur de Lansac print son chemin à Rome, pour faire sa charge d'Ambassadeur. Comme le Marquis sentist approcher monsieur de Strossi, il luy fit place, & leua son artillerie : & se mit vn peu à main droite de la ville, à cent cinquante, ou deux cens pas, & s'ayda de trois petites montaignolles, dans lesquelles il se retrancha, & du costé où estoient les fontaines. Monsieur de Strossi se vint camper entre le Marquis & la ville, au long d'vn grand chemin creux, qu'il y auoit. Or monsieur de Strossi se mettoit si pres, pour combattre le Marquis, s'il le pouuoit tirer hors de son retranchement, là demeurer sept ou huit iours regardans à qui deslogeroit le premier. Le Marquis cognoissant bien que s'il deslogeoit le premier, monsieur de Strossi le combattroit, ce que le Marquis ne vou-

*Le sieur
de Lansac
Ambassa-
deur à
Rome.*

loit faire : car il luy estoit defendu
 expressement de rien hazarder , com-
 me il nous a esté dit depuis par Dom
 Jean de la Lune mesmes , qui estoit
 avec le Marquis , lequel estoit vn
 braue Espagnol.

*Dom Jean
 de la Lu-
 ne.*

Or entre les deux armées n'y auoit
 qu'un champ , qui ne duroit pas cin-
 quante pas , dans lequel se faisoient
 les escarmouches des gens de pied ,
 lesquelles les nostres perdoient pres-
 que tousiours , à cause de l'artillerie ,
 que le Marquis auoit mis sur ces trois
 montaignolles , de sorte que monsieur
 de Stroffi perdist plus de gens par leur
 artillerie , que par leurs arquebuzades.
 Ledit Sieur de Stroffi ne tenoit qu'une
 fontaine , vers laquelle l'artillerie d'une
 des montaignolles tiroit , & y endom-
 mageoit beaucoup de gens , tellement
 qu'il falloit , que la nuit l'on allast
 prendre l'eau. Monsieur de Stroffi ne
 pouuoit mettre sa cauallerie en ba-
 taille , que l'artillerie des montaignol-
 les ne l'endommageast : & me dit-on
 qu'en trois ou quatre iours il y auoit
 esté tué plus de six vingts hommes ou
 cheuaux , de sorte que la cavallerie
 en estoit toute espouuentée , & nos
 gens de pied en estoient de mesmes.

*L'artille-
 rie nuit
 aux Fran-
 çois.*

Monsieur de Strossi s'opiniastroit à ne vouloir desloger le premier, sur l'esperance qu'il auoit que le Marquis deslogeroit, afin de le combattre, & aussi qu'il ne luy vouloit donner cest aduantage qu'il le fit partir le premier. L'un & l'autre auoit bon cœur & la gloire en recommandation. Mais il vaut mieux faire les affaires de son Maistre sans se mettre sur le point de l'honneur. I'entens si ce n'est vne honte toute descouuerte. Il m'aduertissoit tous les iours de tout ce qui se faisoit, ensemble le Senat. Aussi tous les iours nous estions au conseil, pour disputer de ce que monsieur de Strossi nous escrivoit. Je l'aduertissois à toute heure & le priois de ne se consumer là en la perte, pour laquelle les soldats des ennemis demeureroient en cœur & les siens en peur. Autant luy escriuoient les Seigneurs du Senat : mais il auoit si grande enuie de combattre le Marquis, que ceste enuie luy ostoit la cognoissance de la perte, qu'il faisoit. Je mourois d'enuie d'y aller : mais le Senat n'en fut d'aduis. A la fin il m'escriuit, que dans deux iours il se retireroit à la veüe de son ennemy droict à Lusignano. Je luy despeschay

incontinent vn gentil - homme , qui estoit pres de moy , nommé le Sieur de Lecuffan , & le priay de ne faire point sa retraicte de iour , puis que la perte des escarmouches estoit tombée sur les siens (car par mal-heur les deux iours derniers nos gens auoient plus perdu que tous les autres.) Et quelque chose que l'on luy sceust conseiller au contraire , ie le suppliois de me croire , & de faire sa retraicte de nuict : car il n'y auoit que deux milles iusques à Lusignano : & le priois qu'il se souuint , que le Roy François se retira deuant Landrecy en ceste sorte : & tant s'en faut qu'il en fut blasmé , qu'au contraire il en fut estimé , & luy fut attribué à la plus grande sagesse , qu'il fit iamais , par tous les Princes & Potentats de la Chrestienté. Et neantmoins il n'auoit fait aucune perte aux escarmouches , l'aduertissant que iamais iusques icy , ie n'auois veu faire vne bonne retraicte en ceste sorte aux amis & ennemis , si ceux qui la faisoient estoient suyuis de pres. Et luy mis en avant la retraicte que voulurent faire Messieurs de Montegean & Boissi à Brignolles , lesquels ne se voulurent retirer sans

*Aduis du
sieur de
Montluc
sur le des-
sein de
monseigneur
de Stroffi.*

voir l'ennemy , quelque conseil que
 les capitaines , qui estoient avec eux
 leur donnassent , qui fut cause qu'ils
 furent defaits à vn quart de lieuë du
 logis : Monsieur Dannebaut , qui pour
 lors estoit Marechal de France à Te-
 roanne : Monsieur Dauffun à Cari-
 gnan , & prou d'autres que ie luy
 nommois. Et puis qu'un si grand Roy
 que le nostre , & grand guerrier ,
 comme il estoit , en auoit esté loué
 de tout le monde , qu'il en deuoit
 prendre exemple , attendu aussi que
 tant de vaillans capitaines s'estoient *Retraites*
 perdus en faisant la retraite à la teste *à la venue*
 de l'ennemy : que par telle perte , si *des enne-*
 elle aduenoit , il pouuoit penser que *mis dan-*
 deuiendroit la ville de Sienne. Bref ,
 monsieur de l'Escuffan me rapporta
 qu'une fois monsieur de Strossy s'estoit
 resolu de la faire en ceste sorte : &
 sans vn homme mal-heureux qu'il
 auoit auprès de luy , nommé Thomas *Thomas*
 d'Albene , il se retiroit en la façon que *d'Albene*
 ie luy conseilloy. Mais comme il y a *cause du*
 des gens au monde que Dieu a faits *mal-heur*
 heureux , il en a fait d'autres pour *de Mon-*
 estre mal-heureux , comme estoit ce *sieur de*
 Thomas. Car il luy remonstra tant de *Strossy.*
 choses , que finalement il fist changer

l'opinion à monsieur de Strossy, qui me manda qu'il estoit resolu de se retirer à la veuë de son ennemy. Et pour monstrier qu'il se vouloit retirer ainsi que ie luy conseillois, ledit sieur fist partir à vne heure de nuict deux canons qu'il auoit droit à Lusignano: auquel lieu ie cuide que les canons estoient desia arriuez, car il n'y auoit que deux petits milles, auant qu'il changeast l'opinion qu'il auoit prinse. Et il estoit quatre heures de nuict auant que monsieur de l'Escussan le laissast, qui m'apporta sa résolution, & arriua environ les sept heures du matin à la mode de France. Or c'estoit en Aoust, soudain ie mandé à la Seigneurie, que ie les priois de se vouloir trouuer tous au Palais; parce que i'auois à leur communiquer quelque chose d'importance, ce qu'ils firent. Or ma maladie me croissoit de plus en plus: car elle se tourna en fièvre continuë avec dissenterie: neantmoins ie me rendis au Palais enuiron les neuf heures: & alors commençay à leur dire en Italien, lequel lors ie parlois mieux, qu'à present ie ne sçauois escrire. Voilà pourquoy ie l'ay couché en François: afin aussi que les Gentils-

*Le sieur
de Mont-
luc ma-
lade.*

hommes Gascons , qui n'entendent gueres ce langage , & qui liront, comme ie m'asseure , mon liure , n'ayent la peine de se le faire interpreter , me ressouenant à peu près de ce que ie leur dis. Et croy certes , que ie n'y manque pas dix mots : car tout mon discours fait , estoit autant que la nature m'en auoit peu apprendre sans nul art.

Messieurs , ie vous ay prié de vous assembler pour vous remonstrer quatre choses , qui sont de grande importance , & ce à cause que monsieur de Stroffy m'a mandé ceste nuit par le Seigneur de l'Ecuffan , la resolution qu'il auoit prise de se retirer à ce matin de plein iour à la veuë de son ennemy , iusques à Lusignan. Vous sçavez les prieres que nous luy auons faites de vouloir prendre garde à ceste retraite , & mesmement ce que ie luy enuoyay dire par le Seigneur de l'Ecuffan. Ce qu'il a bien gousté au commencement , ayant vne fois resolu de faire comme le Roy François fist deuant Landrecy. Toutesfois par ie ne sçay quel mal-heur il se laisse gouverner à vn homme qu'il a près de luy , nommé Thomas d'Albene , le

*Harant
gue du
sieur de
Montluc
aux Siennois.*

quel luy a fait changer d'aduis : parce qu'il luy fait accroire que ceste retraite de nuict luy sera honteuse. Dieu vueille que le mauuais conseil de ce Thomas ne luy soit honteux , & dommageable , & à vous aussi. Or attendant , Messieurs , quel succez aura ce combat , i'ay à vous remonstrer quatre choses : La premiere , & qui plus vous touche , c'est qu'il vous souuienne que vous estes Souverains en vostre Republique : que vos Predecesseurs vous ont laissé cest honorable tiltre de pere en fils : que ceste guerre ne vous amene autre chose que la perte de vostre Souveraineté. Car si les ennemis demeurent victorieux , il ne vous faut esperer rien plus , sinon que comme vous estes Souverains , vous demeurez esclaves & subjets : qu'il vous vaut beaucoup mieux mourir les armes en la main pour soustenir cest honorable tiltre , que viure , & le perdre ignominieusement : La seconde , c'est que vous consideriez l'amitié que le Roy mon Prince vous porte , lequel ne pretend autre bien de vous , sinon que vostre amitié soit reciproque à la sienne : & que comme liberalement il vous a prins en sa pro-

tection , que vous ayez ceste ferme
 fiance en luy , qu'il ne vous abandon-
 nera pas. Car si pour vn petit coup de
 fortune vous vouliez changer d'opi-
 nion , regardez au peu d'estime que
 l'on auroit de vous autres. Il n'y auroit
 Prince sur la terre , qui vous voulut
 aider ni secourir , si vous vous monf-
 triers legers & muables. Et pour tou-
 tes ces considerations , ie vous prie
 vouloir estre constans , & vous monf-
 trer magnanimes & vertueux en l'ad-
 uersité , lors que les nouvelles vous
 viendront de la perte de la bataille :
 laquelle ie crains beaucoup , veu l'ad-
 uis que monsieur de Strossy a prins :
 toutesfois Dieu vueille destourner tout
 mal-heur. La tierce est , que vous con-
 sideriez l'estimation en laquelle vos
 Predecesseurs sont morts : & laquelle
 ils vous ont laissé pour heritage , pour
 s'estre dit tout à iamais les plus vaillans
 & belliqueux de toute l'Italie , laissant
 honorable memoire des batailles ,
 qu'ils ont gagnées , nation contre na-
 tion. Vous vous dites aussi estre sortis
 des anciens belliqueux Romains , &
 vous dites leurs vrais enfans legitimes ,
 portans leurs armes anciennes , qui est
 la Loue avec Remus & Romulus ,

*Le sieur
 de Mont-
 luc pre-
 sage la
 perte de
 la batail-
 le.*

*Les Sien-
 nois sortis
 des Ro-
 mains au
 dire du
 sieur de
 Montluc,
 mais ils
 sont issus
 des Gan-
 lois.*

38 *Comm. de M. B. de Montluc*,
fondateurs de leur superbe Cité, la
capitale du monde. Doncques, Mes-
sieurs, ie vous prie vous vouloir sou-
uenir, qui vous estes, & qui ont esté
les vostres. Et si vous perdez ce beau
tiltre, quelle honte & infamie ferez
vous à vos peres, & quel argument
donnerez-vous à vos enfans, de mau-
dire l'heure qu'ils seront sortis de tels
peres, qui de liberté les auront mis
en seruitude? La quatre fera pour
vous remonstrer, que comme i'ay
parfaite fiance, que vous vous mon-
trerez vertueux & magnanimes, &
que vous prendrez en bonne part tou-
tes les remonstrances que ie vous ay
faites, qu'aussi vous vous resoudrez
promptement à donner ordre à tout
ce qui sera necessaire, pour la con-
seruation de vostre ville: car de la
bataille ie vous la baille pour perduë,
non qu'il vienne de la faute de mon-
sieur de Strossy, mais pour la perte
que nous auons desia faite aux escar-
mouches. Car il est impossible que
nostre camp ne soit demeuré en crain-
te, & celuy de l'ennemy en courage.
C'est l'ordinaire à celuy qui est victo-
rieux d'auoir le cœur enflé, & au
battu de trembler de peur. Les petites

*Malheu-
reux pre-
sages.*

pertes aux escarmouches , qui sont
 avantcourriers de la bataille , ne pre-
 sagent iamais que perte & dommage.
 Et d'autre part il faut que ceux qui se
 retirent , monstrent le dos à l'ennemy.
 Et encores que l'on tourne quelque-
 fois visage , tousiours faut-il s'ache-
 miner. Il n'est possible que l'on ne
 rencontre quelque haye ou fossé , là
 où il faut que l'on passe souuent en
 desordre. Car en matiere de retraite on
 veut estre des premiers , parce qu'or-
 dinairement la peur & la crainte sont
 aux deux costez qui accompagnent
 ceux qui se veulent retirer. Et pour
 peu que l'on soit hasté, tout est perdu ,
 si l'ennemy a seulement la moitié du
 courage quedoient auoir les hommes.
 Souuenez-vous , Messieurs , de la ba-
 taille qu'Hannibal gagna contre les
 Romains à Cannes près de Rome. Les
 Romains qui estoient dans la ville ne
 penserent iamais qu'il fust possible que
 les leurs fussent vaincus , & ne pour-
 ueurent , ny donnerent aucun ordre à
 leurs affaires : tellement que quand
 les nouuelles leur vindrent de la per-
 te , ils entrèrent en vne si grande peur,
 que les portes de Rome demeurerent
 trois iours & trois nuits ouuertes ,

*La peur
 accompa-
 gne les re-
 traites.*

*Bataille
 de Can-
 nes.*

sans qu'homme osast aller les fermer. Et si Hannibal eust suivy sa victoire, sans aucune difficulté il estoit entré dedans. Tite-Liue a décrit ceste hystoire. Or doncques, Messieurs, donnez ordre tout à ceste heure à vos portes : & eslisez des hommes pour en prendre la charge. Et faites que l'eslection soit des plus gens de bien, & des plus fidelles qui sont parmy vous. Faites crier par la ville dès à ceste heure que tous ceux qui ont bleds & farines aux moullins, se hastent de les faire moudre, & d'apporter tout dans la ville. Faites que tous ceux qui ont grains ou autres viures dans les villages, les retirent incontinent dans la ville, à peine que l'on les bruslera, ou qu'on les donnera au sac, si dans demain à l'entrée de la nuict tout n'est retiré : & ce afin que nous puissions auoir viures, pour attendre le secours que le Roy nous enuoyera. Car il n'est pas si petit Prince, que comme il a eu la puissance de vous enuoyer secours, qu'il n'en aye encores pour vous en enuoyer dauantage. Faites commandement à vos trois Gonfaloniers de tenir toutes leurs compagnies prestes à l'heure qu'ils seront mandez.

Et

Et pour ce que ma fièvre me trauaille, ie suis contrainct me retirer au logis, attendant les nouuelles de ce que Dieu nous donnera. Et vous, pouruoyez tout incontinent à ce que ie vous ay remonstré, vous offrant pour le seruice du Roy nostre Maistre, & le vostre particulier, non seulement ce peu d'experience que Dieu a mis en moy, mais ma propre vie.

Ainsi me despartis d'eux, lesquels incontinent resolurent de prendre patience en la fortune que Dieu leur enuoyeroit, & de manger iusques à leurs enfans, auant que de se desister, pour quelque mal-heur qui leur sçeust aduenir, de la protection & amitié du Roy. Je cogneus dès lors à leur care & à leur langage, que ces gens estoient bien resoluus de garder leur liberté, & l'amitié qu'ils m'auoient promise & iurée. Et à la vérité leur resolution me resioüyt fort. Ils firent faire tout incontinent le cry. Tout le monde courust aux champs retirer ce qu'ils y auoient. Et sur les cinq heures du soir, comptant à la mode de France, arriva le capitaine Combas maistre de camp de l'infanterie Françoisse, qui me vint aduertir que la bataille

*Monsieur
de Stroffi
deffait le
3 Aoust
1555.*

estoit perduë , & que monsieur de Strossy estoit blessé à mort , lequel on auoit mis sur des perches pour l'emporter à Montalsin : & que la nuit mesme tout ce qui estoit eschappé du camp , seroit aux portes de Sienne. Je vous laisse penser en quel estat ie me trouuay , estant malade d'une fièvre continuë , & d'une dissenterie , voyant le chef mort , ou autant valoit. N'ayant que quatorze ou quinze iours que i'estois arriué parmy ceste Republique , n'y cognoissant personne du monde , & ne scachant qui estoit bon François ou non. Il faut tant de temps pour cognoistre les hommes. Monsieur de Strossi ne m'auoit laissé que cinq compagnies Italiennes , desquelles ie n'en cognoissois vn seul capitaine. Il les auoit laissez dans la Citadelle , & dans le fort de Camolie , qui estoient les clefs de la ville. P'envoyay le capitaine Combas pour en dire les nouuelles à la Seigneurie au Palais , lesquels ne s'en esbayrent aucunement , ains dirent au capitaine Combas , qu'il y auoit deux ou trois iours que ie leur disois que ceste retraite estoit dangereuse : Et qu'encores aux remonstrances que ie leur

auois faites , ils tenoient la bataille pour perduë : mais que pour cela ils ne changeroient point de la bonne volonté qu'ils portoient au Roy , ny de l'esperance qu'ils auoient d'estre secourus de luy.

Ne trouuez estrange , capitaines <sup>Instruc-
tion aux
capitai-
nes.</sup> mes compagnons , si presageant la perte d'une bataille ie l'asseurois ainsi aux Siennes. Ce n'estoit pas pour leur desrober le cœur , ains pour les asseurer : afin que la nouvelle venant tout à coup , ne mist vne espouuente generale par toute la ville : cela les fait resoudre : cela les fait aduiser à se pouruoir. Et me semble que prenant les choses au pis , vous ferez mieux que non pas vous asseurer par trop. Chacun sur ce que ie leur auois dit , s'estoit resolu. On traïsnoit tout dans la ville. Le matin au point du iour arriua l'infanterie. Car la cauallerie en auoit amené monsieur de Strossy : aussi n'y auoit il rien à manger pour les cheuaux. Le Colonel Reincroc , & le Seigneur Cornelio Bentiuoglio vindrent à mon logis. Nous arrestasmes que le Reincroc feroit six enseignes de dix qu'il en auoit , le Seigneur Cornelio six d'Italiens , & le capitaine

Combas six des Françoises : & tout le reste s'en iroit à Montalsin. Les troupes n'entrèrent iamais dans la ville que l'eslection ne fust faite, & avec le reste nous fîmes aussi partir les cinq enseignes d'Italiens, pour s'en aller audit Montalsin, auquel lieu i'escruius à monsieur de Stroffi sur l'assurance que m'auoit donné le Seigneur Cornelio, qui auoit encore esperance en sa vie, pour l'asseurer de l'ordre que i'y auois donné, lequel il trouua fort bon. Le Marquis ne sceust poursuivre sa victoire : car s'il l'eust fait, tout le camp estoit mis en pieces. Et tout le monde n'eust sçeu sauuer monsieur de Stroffi, que le Duc de Florence ne l'eust fait mourir cruellement. C'est la faute ordinaire des victorieux. Vous Seigneurs generaux des armées, qui viendrez apres nous, faites vous sages aux despens de tant d'autres, & ne vous laissez ainsi transporter à la ioye pour vne bataille gaignée. Suivez vostre pointe, ne donnez tant loisir à vostre ennemy de se r'auoir. Le Marquis n'arriua iusques au lendemain à Lusignano : car il craignoit que monsieur de Stroffi ne r'aliaist encores son camp, veu qu'il n'auoit point perdu

*Le Mar-
quis ne
sçait user
de sa vic-
toire.*

de la cauallerie , ne ſçachant point que ledit Seigneur de Stroſſi fuſt bleſſé. Le Marquis ne vint de trois iours deuant Sienne. le ne mets point icy comme la bataille fuſt combattuë ny perduë , pour ce que ie n'y eſtois point , & que auſſi il y auoit de la diſpute , qui auoit bien fait ou mal fait. Cecy eſt comme vn procès , il faut ouïr toutes les parries auant qu'en donner Arreſt. Car i'ay ouïy les Griſons & les Italiens , que les François & les Lanſquenets accusent d'auoir mal fait (mais ils le nient) & encores pis la cauallerie. Autres diſent & aſſeurent qu'il y euſt de la trahiſon. Or ie n'en ſçay rien , ie n'en parle que par ouïy dire. le retourneray touſiours à noſtre propos , que ces retraites de iour à la barbe de l'ennemy ſont ſi dangereuſes , qu'il les faut éviter ſi l'on peut , ou pluſtoſt hazarder le coup tout entier.

*Diſpute
de la per-
te de la
bataille.*

Monſieur de Stroſſi demeura iuſques au treizième iour que l'on le tenoit pour mort : toutesſois il n'arreſtoit pour cela d'enuoyer capitaines deuers la Romanie pour auoir des gens & garnir toutes les places de la Marine , & ce qui eſtoit aux enuironſ

*Diligence
du ſieur
de Stroſſi.*

46 *Comm. de M. B. de Montluc ;*

de Montalsin , de gens de pied , & de gens de cheual. C'estoit vn homme fort prudent & sage : mais il est impossible d'estre tousiours suiuy du bonheur. Or me voyant à l'extremité,

Le sieur de Montluc malade à la mort.

& pres de la mort , estant abandonné des Medecins , ie baillay la charge de commander au Seigneur Cornellio. Monsieur de Strossi entendant mon extremité , despesche en poste à Rome pour faire venir monsieur de Lansac pour y commander : lequel arriué qu'il fust à Montalsin , l'on luy conseilla de s'en venir de nuict à pied avecques deux guides & vn seruiteur, hors des grands chemins , & que plus

Le sieur de Lansac pris.

facilement il se sauueroit. Mais comme il fust pres de Sienne , des soldats qui alloient à la guerre le rencontrèrent , lesquels le prindrent & l'amenèrent au Marquis , & du Marquis à Florence , là où il demeura prisonnier tant que la guerre dura , & d'auantage. Ledit sieur de Lansac fust là mal conseillé : car il auoit assez de moyen de passer , s'il eust sceu bien conduire son affaire. S'il fust venu , ie croy que ie fusse mort , car ie n'eusse eu rien affaire. I'auois l'esprit tant occupé à ce qui me faisoit besoing , que ie n'a-

uois loisir de songer à mon mal. Monsieur de Fourqueuaux fust prisonnier & blessé à la bataille, & le capitaine Balleron Colonel de l'infanterie Francoise, & plusieurs autres de quatre à cinq mille. On me dit que de sa personne, ledit sieur de Stroffi fist acte d'un preux & vaillant capitaine. Voila le succès du malheur de la bataille.

Ceste histoire pourroit bien servir à ceux qui ont tant d'enuie de faire des retraites à la veüe de l'ennemy. Je conseillerois tousiours que l'on songeast pour combattre, comme j'ay dit, mais non pour se retirer. Car ie ne trouue point au fait des armes chose si difficile qu'une retraite. Celle de monsieur le Conestable à saint Quentin nous en donne encores suffisante preuue. Lequel scauoit en son temps enseigner & monstrier aux capitaines ce qu'ils deuoient faire: neantmoins le mal-heur porta, qu'il ne sceust prendre pour luy ce qu'il auoit de coustume de départir aux autres. Et veux dire, que s'il eust esté bien secouru des capitaines de gens de pied qui estoient demeurez dehors avecques luy, que pent estre il eust fait sa retraite. Car il ne falloit que hazarder

trois ou quatre cens arquebuziers auprès de Monsieur le Marechal de saint André, lesquels eussent bien gardé au Comte Dayguemont, de recognoistre le desordre qui estoit parmy le bagage, lequel estoit encores meslé parmi la cauallerie. Car il n'eust iamais chargé ledit sieur Marechal, s'il eust esté secondé des arque-

*La def-
faite de
Monsieur
le Connes-
table à
saint
Quentin.*

buziers. D'autant que ledit Comte n'auoit pas vn homme de pied: & monsieur le Connestable eust eu vne grande demie heure de temps à s'acheminer, comme il auoit desia commencé de faire: & cependant eust gagné le bois pour sauuer son infanterie, & se fust retiré avec toute sa cauallerie à la Fere. Et ainsi ne se pouuoit perdre que les arquebuziers avec partie de la cauallerie de monsieur le

*Faute en
la retrai-
cte à S.
Quentin.*

Marechal: & valoit mieux que cela se perdist, que le chef & le tout, comme il fist. I'en ay parlé à des capitaines de gens de pied, qui sont encore en vie, & leur remonstray comme on n'auoit eu l'entendement de comprendre cela: Que moy n'ayant que dix huiët ou dix-neuf ans, i'auois bien cognu à saint Iean de Lus, à la retraicte du capitaine Carbon & de
monsieur

monfieur de Grammont , qu'il falloit hazarder vne petite partie , pour fau-
ner le tout. Et en fis l'experience com-
me i'ay au commencement escrit. Ils
s'excusoient fur le maiftre de camp ,
& le blafmoient fort. Tous ces exem-
ples ay-ie mis par escrit , qui peuuent
feruir à l'aduenir. Et fuis contrainct
redire fouuent ceste mefme faute , qui
fe fait fur les retraictes pour les grands
inconueniens qui en aduiennent , pour
caufer la perte d'une bataille. Elle ne
feroit pas tant à regretter , lors que la
bataille , & le combat eft refolu , &
qu'un chacun fçait ce qu'il peut. Mais
d'efre battu en fe voulant retirer , cela
eft infupportable.

*Aduis
aux ge-
neraux ,
es ar-
dées.*

Voyez Lieutenans de Roy com-
bien ces fautes importent. Celle de
fainct Quentin mit ce Royaume en
danger & fut caufe qu'il falluft quitter
toutes nos conquêtes : celle-cy mit
les affaires du Roy en Italie en mau-
uais estat. N'ayez donc honte aucune
de vous couvrir de la nuit : tant s'en
faut que cela foit honteux , qu'il eft
honorable de fe iouer & mocquer de
l'ennemy , qui vous attend , lequel
au iour ne trouue que le gifte : il vous
fera bien plus vilain & plus honteux

50 *Comm. de M. B. de Montluc,*

d'estre battus en tournant le dos. Si vous auez tant de honte combattez de par Dieu à bon escient. Tenez vous de pied coy dans vostre fort, si vous l'aeuez tant soit peu auantageux, & là attendez ou que vostre ennemy se lasse, ou qu'il vous vienne combattre & vous attaquer; & ainsi vous iouirez à boule-ueüe, comme on dit.

*Le Mar-
quis de
Marignā
deuant
Sienne.*

Or le Marquis logea le terzo de Corsegue à la petite Obseruance, & le terzo de Secille à la Chartrouse, & les retrancha bien fort, de sorte que nous ne pouuions aller à eux. Et luy avec tout le demeurant de son camp demoura à Arbierotte, & partie de sa cauallerie à Bonconuent. Il se fioit que la garnison, qu'il auoit au fort de S. Marc battroit toutes les nuits l'estrade du costé de Fontebrande: afin qu'il n'entraist viures dedans Sienne: mais il ne sceut si bien faire, qu'il n'y entra des vaches & des boeufles par l'espace de six semaines. Je pense que ce qui retenoit là le Marquis, estoit qu'il attendoit ma mort & celle de monsieur de Strossi, se fiant que messieurs de Lansac & de Fourqueuaux prins, nos gens estant sans chef François, prendroient party

*Esperan-
ces du
Marquis.*

de se retirer : toutesfois monsieur de Strossi guerit. Et pour ce qu'il fust aduerty , que i'étois mort , à cause qu'on me tint trois iours en cest estat , n'entrant personne dans ma chambre que les Prestres , pour avoir soing de mon ame , car le corps estoit abandonné des medecins , on manda à monsieur de Strossi , que i'estois mort. Monsieur de Strossi qui vist monsieur de Lansac prins & moy mort , se hazarda de Montalsin pour se venir ietter dans Sienne : & partist l'entrée de la nuit de Montalsin avecques six enseignes de pied & deux compagnies de gens de cheual , l'vne desquelles Serillac mon nepueu conduisoit , lequel aduisa avant que partir , d'emprunter trois ou quatre trompettes de ses compagnons , se craignant qu'il aduiendroit ce qu'il aduint. Car monsieur de Strossi ne sceust faire son parterment si secret , *Le sieur de Strossi au secours de Sienne.* que le Marquis n'en fust aduerty : & le vint attendre avec tout son camp vers Fontebrande , & au long de la riuere de la Tresse. Monsieur de Strossi auoit mis tous ses gens de pied deuant , & sa cauallerie derriere , lequel estoit monté sur vn fort petit cheual ayant sa iambe en escharpe à

52 *Comm. de M. B. de Montluc ,*

l'arson de la selle , & l'Euesque de
Sienne avec luy. Et comme nos gens
de pied Italiens arriuerent aupres de
l'embuscade des ennemis , les ennemis
leur coururent sus avec telle espou-
uante , que sans faire guerre de re-
sistance se mirent en fuite , & por-

*Danger
du sieur
de Strossi.*

terent par terre monsieur de Strossi ,
lequel se ietta & l'Euesque avec luy ,
parmy des ruines de quelques mai-
sons rompues tenant son cheual par
la bride. Le bruit fust si grand , que
l'on le pouuoit oüyr à Sienne : car il
n'y auoit pas du tout vn mil. Les en-
nemis exécutoient leur victoire , à
trauers desquels Serillac donna avec
ses trompettes. Et comme ils enten-
dirent tant de trompettes : & voyant
nostre cauallerie parmy eux , tour-
nerent visage en route & en fuite
sur le Marquis , qui estoit derriere
avec ses Allemans , qui fut contrainct
voyant le desordre se retirer à Arbie-
torte. Or ceux qui auoient fait la car-
gue , & qui aussi l'auoient prinse ,
c'estoient Espagnols & Italiens en-
semble , & ainsi les nostres s'enfui-
rent d'un costé , & les ennemis d'un

*Fuite &
épouuan-
te des*

autre. Deux ou trois cents Italiens des
nostres gaignerent les murailles de

Sienna, d'autres s'enfuirent à plus de douze mil de là, & des vieux capitaines, que monsieur le Marechal estimoit beaucoup. Mais les plus vaillans hommes du monde ayans perdu le iugement, pensant tout perdu, ne sçauent où ils en sont. Voyez combien les hazards de la guerre sont grands, & combien il est vilain de prendre la fuite sans veoir le danger apparent. Sur ces entrefaites le iour commence à venir. Serillac se trouue n'ayant perdu que trois ou quatre de sa compagnie qui s'en estoient fuyz avec les gens de pied: & croy que de l'autre compagnie n'en demeura pas beaucoup: car il n'y auoit qu'un Lieutenant, qui la commandast. Monsieur de Stroffi, qui se vid sans ouyr aucun bruit, remonte à cheual assés mal aisément, & commence à reconnoistre notre cauallerie, qui auoit fait alte, & regardoit Serillac s'il se trouueroit parmy les morts. Et comme il le void venir à luy, ie vous laisse penser quelle ioye eurent l'un & l'autre: & ainsi s'acheminèrent droit à la ville. Or ie veux dire que monsieur de Stroffi fit là une des plus grandes folies, que iamais homme de son

*deux ar-
mées.*

*Serillac
rencontre
monsieur
de Stroffi.*

estat ait faite, comme ie luy ay dit cent fois depuis. Car il sçauoit bien, que s'il estoit prins tout le monde ne l'eust sçeu sauuer, que le Duc de Florence ne l'eust fait mourir honteusement, pour l'inimitié iurée, qu'il luy portoit. Et encores que Serillac fust mon nepueu, si luy donrai-ie ceste louiange & reputation avec la verité, qu'il fust cause du salut de monsieur de Stroffi. Je le puis bien escrire, puis que le sieur de Stroffi mesme le disoit. Sa compagnie estoit fort bonne, estant la plus part Gascons & François: car c'estoit la vieille compagnie de monsieur de Cipierre. Il n'arriua à la ville, des capitaines que Caraffe, qui depuis a esté Cardinal, & vn autre, comme l'on me dit, du nom duquel ne me souuient: & deux ou trois cens soldats, lesquels monsieur de Stroffi ne voulut point qu'entraissent dans la ville, ains la nuit apres les renvoya avec ce capitaine, & retint Caraffe avec luy.

Or comme monsieur de Stroffi fut dans la ville, il demanda nouuelles de moy: l'on luy dit, que depuis quatre iours on commençoit à auoir quelque peu d'esperance de ma vie.

Monſieur de Stroſſi vint deſcendre
 deuant mon logis , & l'Eueſque , & ^{*Viſite le*}
 ledit gentilhomme , & me trouua ſi ^{*ſieur de*}
 extenué , que les os m'auoient percé ^{*Montluç.*}
 la peau en pluſieurs lieux : & me re-
 conforta le plus qu'il peult : & là de-
 meura douze iours attendant ce que
 Dieu feroit de moy. Et comme il vid
 que de iour à autre ie recouurois ſan-
 té , delibera le treisième à l'entrée de
 la nuit ſortir ſans en dire mot à per-
 ſonne qu'à moy. Et vn peu deuant
 qu'il montaſt à cheual , luy & l'Eueſ-
 que me vindrent dire Adieu , ſçachant
 bien que ſa preſence feroit opiniaſtrer
 dauantage le Marquis : & auſſi qu'eſ-
 rant dehors il auroit le moyen de me
 ſecourir , qui luy promis d'attendre
 iuſques aux derniers abois. Le Mar-
 quis auoit ietté des gens par tous les
 chemins. Et par là où ledit Marquis
 ne penſa iamais qu'il paſſaſt , il print
 ſon chemin ſortant à la porte Camol-
 lia , & deſcendit à main droicte dans
 le vallon , laiſſant le fort de Camollia
 au deſſus , & s'en alla au long du ruiſ-
 ſeau tirant au palais du Diau. Mon-
 ſieur de Stroſſi s'acheua là de guerir : ^{*Le ſieur*}
 car il s'arma & monta ſur vn bon ^{*de Stroſſi*}
 cheual. Il rencontra quarante ou cin- ^{*ſort de*}
^{*Sienna.*}

56 *Comm. de M. B. de Montluc,*

quante soldats à pied ennemis, qui luy donnerent l'alarme : toutesfois il marcha tousiours, & ne se perdit que quelques valets d'aucuns, qui estoient sortis de la ville, pour s'en aller avec luy. Ce ne fust pas sans danger. En peu de iours il eschappa trois grandes fortunes. Peu apres son depart ie recouray ma santé, & me fis porter par la ville sur vne chaire. Le Marquis ne perdant point temps nous brida de toutes parts. Tous les iours il se faisoit de belles escarmouches. Ie cogneus bien que le Marquis me vouloit auoir par faute de pain. Voylà pourquoy ie fis ceste Harangue aux capitaines que i'assemblay.

*Harangue du
sieur de
Montluc
aux Ca-
pitaines
dans
Sienna.*

Messieurs, ie croy qu'il n'y a nul de nous, qui ne desire sortir à son honneur & reputation de ce siege. Le desir de l'honneur nous y a amenez. Vous voyez que nous sommes icy pour long temps, car il ne faut pas que nous pensions, que l'ennemy se leue iamais d'icy, qu'il ne nous aye d'une façon ou d'autre : car de la prise de ceste place dépend sa victoire. Or vous voyez que le Roy est bien loing de nous, & qu'il ne nous peut secourir, qu'avec un long temps. Car il faut

qu'il preigne nostre secours d'Allemagne & de France : parce que les Italiens sans autre nation ne seroient assez forts pour faire leuer le siege aux ennemis , qui ont non seulement des Italiens , mais de toutes nations. Et pour attendre le secours il nous faut auoir vne longue patience , en espargnant nos viures tant qu'il nous sera possible. Et pour ceste occasion i'ay à vous remonstrier , que ie veux faire amoindrir le pain , qui est de vingt quatre onces , à vingt. Je suis certain , que les soldats en crieront : si ce n'est que vous leur remonstriez combien nous sommes loing du Roy , & que sa Maiesté ne nous peut si tost secourir , & que vous voulez plustost mourir de faim , que si l'on vous reprochoit , Que si vous eussiez eu la patience d'amoindrir le manger , la ville ne se seroit pas perduë. Ce seroit vn vilain reproche , pour remplir le ventre perdre son honneur , vous ne vous y estes point enfermez pour la perdre , mais pour la conseruer. Representez leur qu'ils sont parmy des nations estrangeres , où ils peuvent marquer la leur d'une marque honorable. Quel honneur gaignent les hom-

58 *Comm. de M. B. de Montluc* ,
mes de se faire non seulement honno-
rer , mais encores honorer la nation
de là où ils sortent ? C'est ce qu'un
cœur genereux se doit proposer. Vous,
Allemands , vous en retournerez glo-
rieux & nos François aussi. Quant à
vous , qui estes Italiens , vous nous
rendrez tousiours ceste gloire d'auoir
d'un cœur invincible combattu pour
la liberté de vostre patrie , laquelle
chose nous ne pouuons faire , que
par vne longue patience , afin de don-
ner temps au Roy de nous secourir.
Croyez que sa Maiesté Tres-chres-
tienne n'obmettra rien de l'amitié ,
qu'elle vous a iurée. Si vous remon-
trez tout cecy à vos soldats , & qu'ils
voyent & cognoissent , que vous
mesmes estes en ceste deliberation ,
ie m'assure qu'ils prendront le mesme
chemin que vous tiendrez. Ne vous
excusez pas , Messieurs , sur eux. Ie
n'ay iamais veu mutinerie , & si en
ay veu souuent aduenir , pour les sol-
dats , si les capitaines ne leur por-
toient le manton. Si vous leur mon-
trez le chemin , il n'y a rien qu'ils ne
facent. Il n'y a incommodité , qu'ils
ne souffrent. Faites le donc , ie vous
supplie , ou resoluez vous de bonne

heure de descouvrir ce que vous auez
 au fonds du sac : afin que ceux qui
 aymeront mieux sans honneur aller
 manger leur saoul, s'en aillent, &
 ne destournent la belle resolution des
 autres. Et parce que les Allemans *Responce*
 n'entendoient point mon iargon, ie *d'Alle-*
 dis au truchement du Reincroc, qu'il *mans.*
 remonstra à son maistre, ce que
 i'auois dit, ce qu'il fist. Le Reincroc
 dit, que luy & ses soldats prendroient
 la mesme patience, que nous mes-
 mes prendrions. Et qu'encore que l'on
 die que les Allemans ne pouuoient
 pastir sans boire & manger leur saoul,
 luy & tous ses gens feroient cognoistre
 le contraire à ce coup. A la verité ces
 gens me faisoient peur, parce qu'ils
 aiment plus à faire chere, que nous.
 Quant à l'Italien il est plus accoustu-
 mé à pastir que nous. Et ainsi se reti-
 rerent chacun en son quartier assen-
 bler leurs compagnies, ausquelles
 firent semblable remonstrance, que
 ie leur auois faite à eux. Les soldats *Resolu-*
 l'ayant entendu leuerent tous la main, *tion des*
 & iurerent qu'ils pastiroient iusques *capitai-*
 au dernier soupir de leur vie, avant *nes &*
 que se rendre, ny faire rien indigne *soldats.*
 de gens d'honneur. Apres ie manday

au Senat, que ie les priois d'assembler le lendemain matin tous les plus grands de la cité au palais, pour entendre vne remonstrance que ie leur voulois faire, qui touchoit à eux & à leurs affaires, ce qu'ils firent, & leur fis ceste remonstrance en Italien.

*Haran-
gue du
sieur de
Montluc
aux Sien-
nois.*

Seigneurs, si plustost Dieu m'eust rendu vn peu de santé & de mémoire, plustost eusse-ie pensé à ce qu'il nous faut faire, pour la conseruation de vostre liberté & de ceste cité. Vous auez tous veu comme la maladie m'a conduit iusques au dernier soupir, & à la fin Dieu plustost par miracle, que par œuvre de nature, m'a ressuscité, pour faire encore seruice à ceste Republique, en vne telle & si grande extremité. Or Seigneurs, ie voy bien, que la conseruation de la cité, & de vostre liberté ne consiste sinon à prolonger les viures: car si par les armes le Marquis se veut efforcer de nous auoir, i'espere que nous le rendrons si mal content, qu'il maudira l'heure de nous estre venus assieger. Ie voy qu'il n'est pas resolu d'en manger: au contraire il veut à faute de manger nous forcer. A quoy il faut obuier, s'il est possible. Hier i'assemblay ie

Colonnel des Allemans & ses capitaines , le seigneur Cornelio , que voylà avec les siens , Combas pareillement avec les capitaines François , auxquels ie remonstray , que pour prolonger le temps , & donner loisir au Roy Tres-chrestien de nous secourir , il falloit amoindrir le pain des soldats , qui estoit de vingt quatre onces , & le faire revenir à vingt. Et que comme tout le monde entendra , mesmement le Roy , que nous sommes deliberez de tenir iusques au dernier morceau , cela incitera sa Maiesté à mettre la main à leuer nostre secours , pour ne perdre tant de gens de bien , & n'abandonner au besoing ceux qu'il a prins sous sa protection. Or selon que i'ay entendu , vous aviez fait , estant moy à l'extremité , la description des viures , & n'auiez trouué à manger , que iusques au quinziésme de Nouembre. Dequoy vous avez donné aduis à sa Maiesté. Cela luy pourroit bien auoir donné occasion de se refroidir à nous enuoyer le secours , veu le long chemin qu'il y a : & aussi que nous nous approchons de l'hyver. Les armées ne volent point , & ne vont point en poste. Son secours

sera & digne d'un grand Prince, & respondant à l'amitié, qu'il vous porte, & bastant pour forcer vos ennemis : Voylà pourquoy c'est chose, qui ne peut estre si tost presté. Or, Seigneurs, apres auoir fait la remonstration aux capitaines, ie les trouuay tous de bonne volonté à pastir iusques au dernier soupir de leurs vies : & nation pour nation s'en allerent faire la remonstration aux soldats, lesquels ils trouuerent tous de bonne volonté de prendre patience, & ainsi l'ont promis & iuré. Regardez donc ce que vous autres deuez faire, puis qu'il y va de la perte de vostre liberté, de vos Seigneuries, & par aduenture de vos vies : Car il ne vous faut esperer aucun bon traictement, veu que vous vous estes mis sous la protection du Roy. Ie vous prie doncques, puis que nous qui n'auons icy rien à perdre, qui n'auons ny femmes, ny foyers, vous monstons le chemin, aduisez de regler vostre despence, & ordonner commissaires pour faire description de tous les bleds, que vous auez dans la cité avec la description des bouches : & ce fait, commencez à amoindrir vostre pain iusques à quinze

*Ordre
proposé
par le
sieur de
Montluc.*

onces. Car il n'est possible, que vous n'ayez quelque peu plus de commodité en vos maisons que n'ont pas les soldats. Et de tout ce bon ordre i'en aduertiray les Ministres du Roy qui sont à Rome, & de là feray passer outre vn gentil-homme, afin qu'il iuge le temps qu'il pourra auoir pour nostre secours. Du surplus reposez vous en sur moy, qui ne veux auoir plus de priuilege, que le moindre citadin. Ce ieusne que nous ferons, sera non seulement pour nos pechez, mais aussi pour redimer vos vies, pour la conseruation desquelles, ie despenderay volontiers la mienne. *Credete signori, que fin à la morte, io vi gardaro quello che vioi promesso, riposate vi sopra di me.*

Alors ils me remercierent bien fort de la bonne exhortation, que ie leur faisois, qui ne tendoit qu'à leur conseruation: & me prierent, que ie me retirasse à mon logis, pource qu'ils vouloient entrer en la grand'salle, là où tous les plus grands Seigneurs de la ville estoient assemblez: ausquels ils firent entendre ce que ie leur auois remonstré, & que dans deux heures ils m'enuoyeroient deux de leur Seigneurie, pour m'en rendre responce: &

ainsi me despartis d'eux. Ce qu'ils firent. En ceste assemblée, ma proposition ayant esté représentée, enfin tous d'une voix prindrent resolution de manger iusques aux femmes & enfans, plustost qu'ils n'attendissent la volonté du Roy, sur l'esperance qu'ils avoient en luy, qu'il les secoureroit: & que tout incontinent ils alloient donner ordre au retranchement des viures, & à faire description des bleds.

*Lecusfan
deners le
Roy pour
luy repre-
senter l'e-
stat des
Siennois.* Ce qui fut fait dans cinq ou six iours. Et après ie fis partir le Seigneur de Lecusfan à grande difficulté. Car le Marquis faisoit faire garde, pour empescher qu'on ne nous portast aucuns viures.

Et tant de payfans qui estoient prins, estoient pendus sans remission. Lecusfan alla à Montalsin aduertir du tout monsieur de Stroffi, pour donner à Rome aduis de tout à messieurs les Ministres du Roy: & delà il s'en alla vers sa Maiesté luy représenter le miserable estat des Siennois, selon que ie l'auois chargé. Cecy pouuoit estre enuiron la my Octobre.

Depuis ce temps ie ne peus faire aucune chose digne de memoire iusques à la veille de Noël, sauf qu'un peu apres le partement dudit Lecusfan,

san , nous rabaissâmes le pain des soldats à dix-huict onces , & de la ville à quatorze. Il se fist pendant ce temps de fort belles escarmouches. Or la veille de Noël enuiron quatre heures apres midy , le Marquis de Marignan m'enuoya par vn sien trompette la moitié d'vn cerf , six chappons , six perdrix , six flascons de vin excellent , & six pains blancs , pour faire le lendemain la feste. Je ne trouuay pas estrange ceste courtoisie , d'autant qu'à l'extremité de ma grande maladie , il permist que mes Medecins enuoyassent des Siennes au camp , pour recouurer de Florence certaines drogues. Et luy mesmes m'enuoya trois ou quatre fois des oyseaux tres-bons , qui sont vn peu plus grands que les beguesignes qui se prennent en Prouence. Me laissa aussi entrer vn mulet chargé de petits flascons de vin grec , que monsieur le Cardinal d'Armagnac m'enuoya , pource que mes gens luy auoient escrit , que ie ne parlois d'autre chose en ma grande maladie que de boire vn peu de vin grec. Et ledit Seigneur Cardinal fist tant , que le Cardinal de Medicis en escriuit audit Marquis son frere. Et faisoit entendre

ledit Seigneur Cardinal que c'estoit pour me faire vn baing. Le vin arriva sur le point que i'aboyois à la mort, & ne m'en fust pas baillé : mais en despartirent la moitié à des femmes enceintes de la cité. Et quand monsieur de Stroffi entra ie luy en donnay trois ou quatre flacons, le reste ie le beuvois comme l'on boit de l'hypocras le matin. Toutes ces courtoisies auois ie receu du Marquis, ce qui ne me fist point trouuer estrange le present, qu'il m'enuoyoit. I'en enuoiaiy partie à la Seigneurie, partie au Rein-croc, & le reste ie le garday pour le Seigneur Cornelio, le Comte de Gayas, & pour moy : parce qu'ils mangeoient ordinairement avec moy. Toutes ces courtoisies sont tres-honnestes & loüables, mesmes aux plus grands ennemis, s'il n'y a rien de particulier, comme il n'y avoit entre nous. Il seruoit son maistre, & moy le mien. Il m'attaquoit pour son honneur, & ie soustenois le mien. Il vouloit acquerir de la reputation, & moy aussi. C'est à faire aux Turcs & Sarrazins de refuser à son ennemy quelque courtoisie. Il ne faut pas pourtant qu'elle soit telle & si grande qu'elle rompe ou recule vostre dessein.

Mais cependant que le Marquis me caressoit avec ses presens, lesquels ie payois en grands mercis, il pensoit bien à me faire vn autre festin. Car la nuict mesmes enuiron vne heure apres minuiet il donna l'escalade avecques toute son armée à la citadelle, & au fort de Camolia. C'est vne chose estrange, que plus d'vn mois auparauant mon esprit me disoit, & sembloit me prognostiquer que le Marquis me donneroit vne escalade, & que le capitaine Sainct Auban seroit cause de la perte du fort. Cela m'estoit tousjours deuant les yeux, & qu'aussi les Allemans seroient cause de la perte de la citadelle, où il entroit toutes les nuits vne enseigne en garde. Qui fust cause que ie mis vne enseigne de Siennesois en garde dans vne maison vis à vis de la porte de la citadelle. Le seigneur Cornelio fist tant avecques le Reinroc, qu'il promist, que s'il venoit vne alarme, & que le camp s'efforçast de donner escalade à la citadelle, que le capitaine Allemand, qu'il y mettoit tous les soirs de garde, auroit commandement de lui de laisser entrer la compagnie Siennesoise, pour ayder à deffendre la citadelle. Ce qu'il ou-

*Escalade
du Mar-
quis à
Sienne.*

blia, comme ie pense, ce soir là. Tous les soirs i'allois veoir entrer en garde vne compagnie Françoisë dans le fort de Camolia, & vne autre Siennoisë entre le fort & la porte de la ville sous une grande hasle, qui estoit enuironnée aux deux costez d'une petite tranchée. Mais à la teste, qui alloit droit au fort, n'y auoit rien, ains tout estoit planit : & y pouuoit auoir du corps de garde au fort soixante ou quatre-vingts pas, & autant iusques à la porte de la ville. Ceste enseigne demeueroit là pour deux occasions : L'une pour secourir le fort, s'il en auoit besoin : comme l'autre compagnie Siennoisë la citadelle ; & l'autre pour garder que l'ennemy ne vint donner vne escalade à la muraille de la ville : pour ce que du costé de main gauche sortant de la ville, la muraille estoit fort basse, & encores vne partie tombée. Or plusieurs fois aupara-
uant i'auois dit au seigneur Cornelio, & au Comte de Gayas ces mots, voyant entrer la compagnie du capitaine S. Auban dans le fort ; Croyez-vous, qu'il me va tousiours devant les yeux que nous deuons perdre ce fort par la faute du capitaine S. Au-

*S. Auban
met Sien-
ne en dan-
ger.*

ban, & sa compagnie. Je ne la voyois i-
mais entrer que la fièvre ne me prenne
du mauvais presage que i'en avois. Je
ne le pouvois estimer dans mon cœur,
pource qu'il n'auoit iamaïs vingt hom-
mes d'apparence en sa compagnie :
car il aymoît mieux vn teston, qu'un
homme de bien. Et de luy-mesme ne
vouloit bouger de son logis, quelque
chose que ie luy remonstraße, & ses
compagnons luy remonstroient aussi.
Je l'eusse voulu loing de là, tant
ie l'auois à contre-cœur, la necessité
me forçoit. Cela estoit cause que mon
esprit me dictoit tousiours, que cest
homme me causeroit quelque mal-
heur. Or nostre fort de Camolia estoit
enuironné d'un fossé large d'une pic-
que, & profond autant, & non gue-
res plus par trois costez : & à la teste
qui venoit droit au corps de garde des
Siennes, n'y auoit rien, qu'un petit
rampart de hauteur de six ou sept
pieds, & non dauantage : Et y auoit
vn petit relais à moitié du rampart,
là où les soldats se pouuoient tenir à
genoux. Les ennemis auoient vn autre
fort trois fois plus grand que le nostre,
& vis à vis du nostre, à cent cinquante
pas l'un de l'autre. De sorte qu'eux

ny nous, n'osions leuer la teste sans estre bleffez de ces quartiers là. Et au nostre y auoit vne petite tour vis à vis du leur, là où nous tenions pour asseurer mieux nostre fait tousiours trois ou quatre soldats qui nous seruoient de sentinelles : & y montoient avecques vne petite eschelle à main, tour ainsi que l'on monte à vn pigeonnier. Ladite tour auoit esté percée du costé du fort des ennemis : & nous y auions mis quelques barriques pleines de terre : car ce trou auoit esté fait par l'artillerie de leur fort. Lequel fort monsieur de Termes auoit fait faire, mais quand il s'en alla, n'estoit pas du tout acheué : neantmoins quand le Duc de Florence se rompist avecques le Roy, le Marquis fist vne nuict une grande traite, menant forces pionniers avecques luy, & s'en faislit : car on n'y faisoit point de garde, & incontinent le mit en deffence.

Or comme i'ay desia dit cy-dessus, à vne heure apres minuiet le Marquis me donna l'escalade tout à vn coup à la Citadelle & au fort de Camolia, où la compagnie de S. Auban estoit par mal-heur ceste nuict là de garde. Le Marquis donna à la Citadelle avec-

ques les Espagnols & Allemans : & ne se trouua par bonne fortune que trois eschelles qui fussent assez longues, & de prime arriuée ils chargerent si fort ces trois là, que l'une se rompiſt. Les Allemans se deffendoient, & les Siennesois se presentoient à la porte, comme il leur estoit ordonné. Le capitaine des Allemans, qui auoit la charge de la porte, ne les vouloit laisser entrer. Ceste dispute dura plus de demie heure : cependant cinq ou six des ennemis entrèrent & forcerent les Allemans, lesquels commencerent à prendre la fuitte. Alors l'on ouurist les Siennesois, qui coururent à la teste de la Citadelle, où les ennemis commençoient à entrer, & rencontrèrent ces cinq ou six qui estoient entrez, lesquels ils mirent en pieces : & y en auoit deux qui estoient parens du Marquis, dont l'un ne mourut pas soudainement. Cela refroidit les autres qui estoient sur le point d'entrer. En mesme temps on donne l'escalade au fort de Camolia. Sainct Auban estoit dans la ville dans son liēt bien à son aise, & son Lieutenant nommé Comborcie estoit au fort, qui estoit un ieune homme non experimenté : ie

La Citadelle saisiſſe.

Le fort
fais.
croy que s'il eust eu de bonnes gens
en sa compagnie, qu'il eust fait son
devoir, tous deux se sont faits Hu-
guenots depuis. Dès que les ennemis
presenterent les eschelles par trois
courtines, toute sa compagnie se met
en fuitte & route : & voila les enne-
mis dedans : & des quatre qui estoient
en la tour, les trois se jetterent à corps
perdu bas, & l'autre abbattit les bar-
raques du trou, & tiroit les ennemis
dedans. Ce meschant auoit esté prins
quelques iours auparauant, & auoit
demeuré plus de dix iours prisonnier.
Et pense que sur son entreprinse le
Marquis se resolut de donner l'escala-
de : car il s'en alla avecques eux, &
depuis ne le vismes. Or le sieur Cor-
nelio & Comte de Gayas estoient lo-
gez pres de la porte de Camolia, les-
quels coururent incontinent à la por-
te, où trouuerent que la pluspart
de la compagnie Siennoise estoit con-
tre icelle, & l'autre partie tiroit en-
cores aux ennemis, qui sortoient du
fort pour venir à eux. Le sieur Cor-
nelio laissa le Comte de Gayas à la
porte de la ville, & courut à moy
m'aduertir : & me trouua que ie sor-
tois du logis avecques deux pages, qui
portotent

portaient chacun deux torches : & luy
dis qu'il courut sortir dehors luy & le
Comte de Gayas , pour garder sur
tout que les Siennes n'abandonnassent
leur corps de garde , & qu'ils leur
donnassent courage. Car ie m'en allois
sortir apres luy. Ce qu'il fit : & arriva
si bien à point qu'il trouua tout aban-
donné : & leur fist vne cargue avec-
ques les Siennes : & les repoussa ius-
ques dans le fort gagné. L'alarme
estoit desia par toute la ville , qui cou-
roit à la citadelle , & qui couroit à
la porte de Camolia. Comme j'arri-
uois à la porte , vint à moy la Mo-
liere & l'Espine tous deux à cheual ,
l'un Controllleur des guerres , & l'aut-
re Tresorier , comme de present est
encores la Moliere Controllleur , aus-
quels ie commanday l'un courir à la
porte sainct Marc , & l'autre à la
porte Nouë : & qu'en allant criaissent
toufiours victoire , les ennemis sont
repoussez. Je faisois cela craignant que
quelques-vns de la ville eussent intel-
ligence avec les ennemis , & que
quand ils entendoient ces cris , ils ne
s'oseroient descourir. Cependant j'es-
cis à la porte de la ville , & faisois
artiller les capitaines & soldats Fran-

*Ruse pour
rompre
les intel-
ligences.*

74 *Comm. de M. B. de Montluc*,
çois, pour secourir le sieur Cornelio.
Comme ie vis qu'il y auoit assez de
gens dehors, ie commanday au Lieu-
tenant du capitaine Luffan de se tenir
à la porte, & fermer le guichet quand
ie serois dehors: & que si i'estois re-
poussé qu'il n'ouurit point, ains qu'il
nous lascia tous tuer dehors, & moy-
mesmes le premier. Et sortis avec mes
quatre torches: & trouuay le sieur
Cornelio, Comte de Gayas, & les
capitaines que i'auois mis dehors, qui
auoient gaigné le rempart, & les sol-
dats sur ce petit relais le genoux à
terre, qui leur tiroient dans le fort,
& eux aux nostres, qui ne pouuoient
leuer la teste sans estre descouverts. Et
par les autres deux costez les ennemis
donnoient l'assaut, & les nostres def-
fendoient. Or comme ie iettois les gens
dehors par le guichet, Sainct Auban
passe outre, sans que ie l'apperceusse.
La porte pour entrer dans le fort que
nous auions perdu, estoit faite comme
vn trou, ayant vn pas en auant, &
vne autre à costé, faite en onde ou en
serpent. Et n'y pouuoit passer qu'un
homme de front. Là ie trouuay da-
ceste entrée le capitaine Bourg, c
est encores en vie, lequel portoit l'en-

seigne du capitaine Charry, le sieur Cornelio, & le Comte de Gayas contre luy. Monsieur de Bassompierre Commissaire de l'artillerie estoit toujours aupres de moy, & quelque canonnier des siens. Je voyois bien que le combat dureroit : & craignant que la poudre nous faillit, ie dis à monsieur de Bassompierre, qu'il dépeschast deux de ses canonniers pour en aller querir, ce qu'il fist. l'oserois bien dire, qu'il fut autant cause de nostre salut, que tout le combat, comme vous entendrez. Ceux que nous combattions estoient les Italiens : car les Espagnols & Allemans donnoient à la Citadelle. Je courois tousiours aux vns & aux autres, leur criant, courage mes amis, courage mes amis, & tout à vn coup au costé de main droite de la porte, où estoient les trois susnommez, i'aperçeu S. Auban, auquel ie mis l'espée à la gorge : & luy dis, paillard, meschant, tu és cause de nous faire perdre la ville, ce que ne verra iamais, car ie te tueray tout à ceste heure, ou tu sauteras dedans. Alors tout espouventé me dit, ouïy monsieur i'y sauteray, & appella Lufsan, Blaçon, Combis, qui estoient de

Le sieur de Mont-luc au secours.

ses compagnons , leur disant : he mes amis secondez-moy , ie vous prie , sautez apres moy. Les autres luy respondirent , saute seulement , nous te

*Le fort
regaigné
par les
François,*

suiurons. Alors ie luy dis , ne te soucie de rien , car ie te suiuray moy-mesme , & mismes tous les pieds sur le relais comme luy. Et tout à coup , comme il fust sur ledit relais , sans marchander , car s'il l'eust fait il estoit mort , il se jetta à coup perdu dedans , ayant vne rondelle à la main , & ses compagnons aussi. Il ne fut iamais en l'air que les autres n'y fussent , & ainsi tous quatre sauterent dedans : c'estoit à deux pas de la porte que combattoit le Bourg, le sieur Cornelio & le Comte Gayas. Et tout à vn coup ie fis sauter quinze ou vingt soldats apres les quatre capitaines : & comme tout cela se ietta à coup perdu dedans le Bourg , le sieur Cornelio & le Comte de Gayas passerent & entrerent dedans. Ie fis mettre les deux torches sur ce relais : afin que nous nous vissions , pour ne nous entre-tuer les vns & les autres : & entray par là où le sieur Cornelio estoit. Or les picques , halberdardes , de arquebuses ne nous seruoient de rien : car nous estions tous à x espées & aux dagues ; & les fil-

mes sauter par dessus les courtines ,
 par où ils estoient entrez , sauf ce qui
 mourut dedans. Il y en auoit qui
 estoient encores demeurez à la tour.
 Le capitaine Charry arriua à nous ,
 encore qu'il n'y eust que huit iours ,
 qu'il auoit eu vne arquebuzade par la
 teste , lequel nous tenions pour mort :
 toutesfois ie le vis l'espée & la ron-
 delle en la main , vn morion sur son
 couurechef , qui luy couuroit sa playe.
 Le bon cœur se monstre tousiours là
 où il est. Encore extremement blessé
 vouloit-il auoir part au combat. l'es-
 tois au pied de l'eschelle , & auions
 dit au sieur Cornelio , & au Comte
 de Gayas de sortir hors le fort , don-
 ner courage à ceux qui deffendoient
 les flancs , & que l'un print vn costé ,
 & l'autre vn autre. Ce qu'ils firent ,
 & y trouuerent encore prou d'affai-
 res. Je prins par la main le capitaine
 Charry , & luy dis , capitaine Char-
 ry , ie vous ay nourry pour mou-
 rir faisant grand seruice au Roy. Il
 faut que vous montiez le premier. Luy
 plein de bonne volonté & sans mar-
 chander , commence à monter par
 l'eschelle , laquelle ne pouuoit estre
 de plus de dix ou douze degrez : &

*Hardieffz
 du capi-
 taine
 Charry.*

falloit entrer par vne fausse trappe ,
comme i'ay desia dit. I'auois de bons
arquebuziers , & tousjours les faisois
tirer à ce trou de la fausse trappe : &
fis mettre sur l'eschelle deux desdits
arquebuziers , qui montoient apres
luy. I'auois les deux torches avec moy ,
car les autres deux le sieur Cornelio
& le Comte les auoient emportées :
& voyoient si clair que nos arquebu-
ziers n'offensoient point le capitaine
Charry , qui montoit degré par degré
donnant tousiours loisir à nos arque-
buziers de tirer. Et comme il fut à se
monstrer sur le haut , ils tirerent deux
arquebuzades , qui luy percerent la
rondelle & le morion sans luy faire
mal à la teste. L'arquebuzier qui estoit
apres luy , tira par deffous la rondelle ,
qui fut cause , que le capitaine Charry
s'auança de monter , & les voila tous
trois dedans l'un apres l'autre. Ils y
tuerent trois des ennemis , & le reste
fauta par le trou. Ceux des flancs fu-
rent aussi repoussez : & ainsi notre
fort regaigné de tous costez.

Or le Marquis auoit donné le mot
à celuy qui estoit chef à l'escalade du
fort , qui estoit le gouuerneur de luy
fort de Camolia , que s'il entroit le

premier par la citadelle , qu'il vint à luy avec tous les Italiens : & que si aussi il gaignoit le fort , qu'il le viendroit secourir avec les Allemans & Espagnols. Et comme ledit Gouverneur du fort eust gaigné le nostre il en aduertit le Marquis : mais pour ce qu'il y a des vallons entre la citadelle & le fort de Camolia , ledit Marquis ne peust venir si tost , qu'il eust voulu. Et nous qui pensions auoir tout acheué vismes venir tout leur camp , ayant plus de cent cinquantes torches , & par bonne fortune les deux canonniers de Bassompierre arriuerent avec la poudre : & tout à vn coup & à grand' haste , nous la departismes aux arquebuziers , car ils n'en auoient plus , & ie tournay mander audit Bassompierre de renuoyer à la poudre. A mesme instant m'arriua la Moliere & l'Espine : & tout à vn coup ie renuoyay la Moliere au Gonfallonnier de saint Martin , qu'il m'enuoyast deux cents arquebuziers les meilleurs qu'il eust , conduits par le fils de Misser Bernardin , bonne enseigne , vn ieune homme qui portoit vne enseigne de son regiment plein de bonne volonté car ie l'auois cognu & bien remarqué

*Le Marquis
quis a
secours de
ceux du
fort.*

aux escarmouches. Il vint hastiuement & nous trouua aux mains avec tout le camp. Je laiffay le Sieur Cornelio & le Comte de Gayas avec les autres capitaines deffendre le fort , & moy , Bassompierre , & le Commissaire ordinaire des guerres allions au long des flancs , ne faisant autre chose , que courir d'un costé & d'autre pour donner courage à nos gens. Il pouuoit estre trois heures apres minuiet, quand nous recommençames à combattre , qui dura iusques à ce que le iour les en tira. Et firent la plus grande folie ,

Faute du Marquis. que gens pouuoient faire : car à la lumiere des torches , nous les voyons plus clair que s'il eust esté iour , s'ils fussent venus à la faueur de la nuit avec peu de lumiere , ils nous eussent donné plus d'affaires. Les deux cents arquebuziers Siennesois , que nous mena le fils de Miffier Bernardin nous firent vn grand bien , comme fit aussi la poudre que Bassompierre auoit renuoyé querir : car le tout nous fit besoin , auant que nous nous separissions , pour la longueur du combat : où il fut bien assailly & encores mieux deffendu.

Voyla le succes du combat , qui fut

le plus grand & le plus long, où ie me sois iamais trouué, sans bataille, & la où ie tiens que Dieu m'a autant ou plus aydé & gardé l'entendement : car si i'eusse failly d'un pas seulement à commander, nous estions perdus, comme estoit aussi la ville, car par cest endroit là nous n'y auions rien fortifié. Et toute notre fiance estoit en ce fort, ie promets à Dieu que trois mois apres pour le moins, les cheueux me dresseient en la teste, quand ie m'en souuenois. Les ennemis perdirent donc là six cents hommes morts ou blesez, comme nous disoient les prisonniers, que nous prenions. Nous ne perdîmes en tout cinquante hommes morts ou blesez. Et ce qui leur en fit tant perdre à eux, fut la lumiere des torches qui faisoit que les nostres ne pouuoient faillir, & mesmement estant pres les vns des autres d'une picque ou deux au plus, qui fut vne grande incongruité au Marquis, comme i'ay dit. Car nous qui auions peu de lumiere les descourions à eux, & donnoit grand aduantage, comme i'ay dit. Et comme il fut iour nous voulûmes recognoistre nos morts dans le fort parmy les leurs, i'y trouuay mon

valet de chambre & mon palefrenier, qui estoient fautez apres les capitaines, de ma vie ie n'eus deux meilleurs seruiteurs. Le sieur Cornelio & le Comte de Gayas allerent voir la citadelle, car ie ne me pouuois plus soustenir, estant encores si foible de ma grand'maladie que qui m'eust soufflé, m'eust ietté par terre : & m'estonne comme il fut possible, que ie prinsse ceste peine. Dieu au besoin me redoubla les forces : car à la verité pendant ce grand & long combat, ie ne cessay de courir & sauter, ores ça, ores là, sans me trouuer iamais las, si ce n'est lors, que ie ne vis plus les ennemis. Ils me rapporterent comme tout s'estoit passé, & y trouuerent vn parent du Marquis, qui n'estoit encores mort, lequel ils firent apporter à leur logis & panser.

Or ie ne veux oublier à mettre icy, pour monstrier exemple aux autres, que si iamais homme fut secouru en tel besoin, que ie le fus : & ne voudrois pour rien desrober l'honneur aux chefs, qui estoient là, ny aux soldats, car depuis que le sieur Cornelio & le Comte sortirent auant moy, & firent la cargue : & depuis que i'y fus arri-

ué, le Lieutenant de Luffan, que i'auois laissé à la porte, me iura n'auoir iamais veu homme, qui y fust venu pour r'entrer, que les deux canonniers de Bassompierre en allant querir les poudres. Toute la ville demeura toujours en armes tant que le combat dura : & veux donner ceste louange aux Siennesois, avec la verité, comme Dieu est veritable, qu'il ne se trouua iamais vn seul homme qui demeurast dans les maisons, & qui ne print les armes, vieux, & ieunes, ny ne se trouua vn seul homme, qui monstraist porter aucune affection à l'Empereur, qui me donna vne grande assurance de deux choses, l'vne de la loyauté, & l'autre de la hardiesse. Trois iours apres le Marquis m'enuoya vn trompette, celuy-mesmes, qui m'auoit apporté le present, voir s'il y auroit aucun en vie de ceux qui estoient entrez dans la citadelle, & qu'il ne me vouloit point nier, qu'il n'y eust deux de ses parens. Le Sieur Cornelio luy mena recognoistre celuy-là qui estoit en vie, & trouue que c'en estoit vn. Le trompette retourna incontinent le dire au Marquis, lequel il me renuoya en mesme instant me priant de le luy

*Loyauté
des Siennesois.*

vouloir rendre , me respondant de la rançon , ce que ie fis dans vne litiere , qu'il m'enuoya : mais il mourut trois iours apres qu'il fut en leur camp.

*Instruc-
tion pour
les Gou-
verneurs.*

Vous gouuerneurs des places , il me semble , que vous deuez prendre icy vn beau exemple à vous presenter vous mesmes au combat. Car il y en a , qui disent qu'un gouuerneur ou Lieutenant de Roy ne doit iamais hazarder sa personne : & mettent en auant , que s'il est mort , tout est perdu. Ie leur accorde , qu'il ne doit pas s'hazarder à toutes choses , & à toutes heures , comme vn simple capitaine : mais puis qu'il y va de la perte du tout , que fera-ce , que vous deuendrez Gouuerneurs & Lieutenans de Roy ? & combien y aura-il de dispute sur vostre honneur & renommée ? Serez vous quittes en disant , ie ne uoulois m'hazarder au combat , pour la crainte avec ma perte de perdre tout , mesmement de prendre ce hazard la nuit , de secourir , ou vn fort , ou vne citadelle , veu que ie pouuois deffendre la ville : cela ne vous sauuera pas. Iugez que la prinse d'un fort est de telle consequence , que vostre ennemy à vn pied sur la gorge. Il faut

creuer plustost ou reconquerir ce que vous auez perdu , comme ie fis , ayant au sortir fait fermer la porte pour nous oster toute esperance de retraite , estant resolu de mourir ou repousser les ennemis : car les laissant là aussi bien estois-ie perdu.

Et vous Capitaines mes compagnons , mirez vous & prenez exemple sur Sainct Auban : afin que vous aymiez plus les vaillans hommes que l'argent : car l'argent vous mènera à la perte de vostre vie & de vostre reputation : & les vaillans hommes que vous aurez pres de vous , vous sauueront l'un & l'autre : & ne vous feront porter la honte sur le front. Admirez & suyuez quant & quant le grand cœur de Charry , lequel demy mort vint encore au combat , & se presenta pour entrer le premier & passer avec vne eschelle par vn trou. Je croy qu'il n'y peut auoir passage plus dange-reux : car vostre ennemy a grand' prise sur vous. Toutesfois nul danger n'arresta ce braue soldat de prendre ce hazard. Pour conclusion de cecy , Je vous diray , Gouverneurs des places , que lors que quelque mauuaise opinion vous entrera dans la teste ,

*Remon-
trance
pour les
capitai-
nes.*

que vous y pouruoyez , comme ie fis , ayant mis les compagnies pres des forts. Mais i'eusse mieux fait , puis que Sainct Auban m'estoit à contre-cœur , de l'employer en quelque autre lieu , ne m'en pouuant du tout defaire. Cela m'a depuis fait sage , & m'en suis bien trouué , n'ayant depuis donné charge à homme qui me vint à regret. Il y a assez de moyen de s'en depestrer , sans pourtant offencer personne , ne luy oster le courage.

*L'Empe-
reur se
plaint du
Marquis.*

Peu apres arriua vn gentil-homme de la chambre de l'Empereur , comme depuis nous entendismes , portant lettres au Duc de Florence & audit Marquis , par lesquelles leur mandoit qu'il trouuoit fort estrange , qu'on fir tant durer ceste guerre , & qu'il scauoit bien que Siennne n'estoit pas pour resister contre l'artillerie , mais que c'estoit la coustume du Marquis de faire durer la guerre. Le Marquis remonstroit , qu'il auoit fait tout ce qui estoit possible en luy : & qu'il cognoissoit bien , qu'avec l'artillerie on ne la prendroit pas , car i'auois de vaillans hommes là dedans , & la ville resoluë de combattre avec moy : me rendant plus d'honneur , que ie ne meritois , me

loüant de grande vigilance , & de pouruoyance , de sorte qu'il cognoiffoit bien , à l'ordre que ie tenois dans la ville , qu'il perdrait le temps de faire batterie. Toutesfois estant venu cedit gentil-homme pour cest effect , de la part de l'Empereur , & ayant desia parlé au Duc de Florence Come de Medicis , ils firent resoudre le Marquis à faire batterie. Il n'auoit rien obmis de ce qu'un homme de guerre deuoit , nous tenant bridez sans esperance de secours : & toutesfois on l'accusoit de vouloir faire durer la guerre. C'est l'ordinaire , lors que les choses ne sont pas conduites à l'appetit de ceux qui en parlent à leur aise. Le desir de ceux , que nous seruons , va plus viste , que nous ne pouuons.

Vers le vingtiesme de lanuier nous fusmes aduertis , que l'artillerie parloit de Florence en nombre de vingt-six ou vingt-huict canons , ou grandes coulevrines. Les Siennes furent curieux d'enuoyer espier , pour en scauoir la verité : trouuerent qu'elle arriuoit à Lufignano , qui mit la cité vn peu en trouble : & à la fin le lendemain de l'aduertissement ils resolurent d'assembler toute la Noblesse & Ci-

*Les Sien-
nois ont
peur du
canon.*

toyens au Palais, pour resoudre en-
tr'eux s'ils devoient endurer l'assaut,
ou composer avec le Marquis. Or là
il ne me falloit pas faire le mauuais :
car ils estoient plus forts que moy :
falloit tousiours gagner ces gens là
avec remonstrances & persuasions dou-
ces & honnestes, sans parler de se
courroucer. Croyez que ie forçay bien
mon naturel, contre l'aduis de mon-
sieur le Connestable, qui m'auoit re-
présenté & depeint au Roy comme
il m'auoit veu en mon aage bouillant.
Il faut qu'un capitaine & Gouverneur
sage, & aduisé, quand il est parmy
les nations estrangeres rasche tant qu'il
peut, se conformer à leur humeur.

*Vn Gou-
verneur se
doit con-
former à
ceux qu'il
comman-
de.*

Parmy les Allemans & Suisses il faut
faire carroux : avec les Espagnols te-
nir leur morgue superbe, & faire plus
le Religieux & deuotieux qu'on n'est :
parmy l'Italien, estre discret & sage,
ne l'offencer, ny caresser leurs fem-
mes. Quant au François il est à tout
faire : tant y a que Dieu me fit la
grace, qui suis Gascon, prompt, co-
lere, fascheux, & mauuais patient de
me comporter si bien parmy cette na-
tion soupçonneuse & deffiante qu'il
n'y eust citadin, qui se peust plaindre
de

de moy. Or comme toute la noblesse & Seigneurie de la ville alloit au Palais, Miffier Hieronyme Espano, qui estoit gentil-homme Siennois, & des plus grands de la ville, & des huiet de la guerre, auant qu'aller au Palais, vint hastiuement parler avec le Sieur Cornelio, & luy dit comme tous les Seigneurs qui estoient de la cité, estoient appelez à se rendre au Palais incontinent, & que c'estoit pour refoudre s'ils deuoient attendre la batterie, ou entrer en composition avec le Duc de Florence & le Marquis de Marignan, & qu'il auoit desia entendu que la pluspart balotteroient qu'on deuoit entrer en composition, & non endurer la batterie & l'assaut, pour la crainte qu'ils auoient d'auoir pis, & qu'il s'y en alloit, & le pria de m'aduerdir. Tout incontinent le Sieur Cornelio vint à moy, & me trouua, que ie voulois monter à cheual, pour aller voir les gardes : & comme il m'eust dit cela, montasmes tous deux à ma chambre, & discourusmes longuement quels moyens il y auroit de rompre ce coup. Et en mesme instant arriua le Seigneur Bertholomé Cauallcan, qui m'en dit autant, & qu'il

pensoit bien que desia la résolution estoit prinse par toute la ville, & qu'ils n'alloient au Palais, sinon pour balotter. Et que s'ils l'auoient vne fois balotté, il n'en falloit plus parler.

Or tous trois estions bien empechez, eux de me donner conseil, & moy de ne le sçauoir prendre. A la fin ie m'aduisay d'aller au Palais, & emmener avec moy le Rincroc & ses capitaines, le Seigneur Cornelio avec les siens Italiens, & Combas avec les capitaines François. Nos Allemans commençoient fort à pastir de vin, & le pain bien petit, car de chair il ne s'en parloit plus, sinon de quelque cheual, ou quelque asne, qu'on mettoit en vente à la boucherie, & d'argent il ne s'en parloit plus du tout : car monsieur de Strossi n'auoit nul moyen d'en y faire entrer : qui nous mettoit en crainte, que les Allemans se ioindroient avec la ville, pour entrer en composition. Qui fut cause, que ie priay le sieur Cornelio d'aller parler avec le Rincroc, & le priay de me faire compagnie au Palais, & amener ses capitaines avec luy, & qu'il laissast les Lieutenans & Enseignes en leur quartier chascun : afin

*Necessité
de toutes
choses à
Sienne.*

qu'estant au Palais il n'aduint quelque surprinse autour des murailles , & luy qu'il en fit de mesmes : & manday au capitaine Combas que pareillement il vint : & enuoya le Sieur Bartholomé diligemment au Palais , pour regarder s'il pourroit gagner quelque vn secrettement , pour ayder à rompre ceste boutée. Car il me sembloit bien aduis ,
que si ie pouuois rompre ce coup , ie *Pratique du sieur de Mont- Inc.* praticquerois tant de gens , que la balote blanche seroit la plus forte : & ainsi s'en allerent tous hors de ma chambre , & ne leur dis rien de ce que ie voulois faire.

Or i'estois encore si tres-extenué de ma maladie , & le froid estant grand & aspre , i'estois contrainct d'aller si enueloppé le corps & la teste de fourreures , que quand l'on me voyoit aller par la ville , nul ne pouuoit auoir esperance de ma santé , ayant opinion que i'estois gasté dans le corps , & que ie me mourois à veuë d'œil. Que ferons nous , disoient les Dames & les pourreux , (car en vne ville il y en a d'vns & d'autres) que ferons nous , si nostre Gouverneur meurt ? Nous sommes perdus : toute nostre fiance apres Dieu est en luy. Il n'est possible qu'il

en eschappe. Je croy fermement que les bonnes prieres de ces honnestes femmes me tirerent de l'extremité & langueur où i'estois, i'entends du corps : car quant à l'esprit & entendement ie ne le sentis iamais affoiblir.

*Plaisante
saillie du
sieur de
Montluc.*

Ayant donc accoustumé auparavant d'estre ainsi embeguiné, & voyant le regret que le peuple auoit de me voir ainsi malade, ie me fis bailler des chausses de ueloux cramoisi, que i'auois apportées d'Albe, couuertes de passement d'or, & fort decoupées & bien faites : car au temps que ie les auois faites faire, i'estois amoureux. Nous estions lors de loisir en nostre garnison, & n'ayant rien à faire il le faut donner aux Dames. Je prins le pourpoint tout de mesmes, vne chemise ouurée de soye cramoisie & de filet d'or, bien riche, (en ce temps là on porroit les collets des chemises vn peu auallez) puis prins vn collet de busle, & me fis mettre le haussacol de mes armes, qui estoient bien dorées. En ce temps là ie portois gris & blanc, pour l'amour d'une Dame, de qui i'estois seruiteur, lors que i'auois le loisir : & auois encore vn chapeau de soye grise, fait à l'Allemande,

avec vn grand cordon d'argent, & des plumes d'aigrette, bien argentées. Les chapeaux en ce temps là ne couvroient pas grands comme font à ceste heure : puis me vestis vn cazaquin de veloux gris garny de petites tresses d'argent à deux petits doigts l'un de l'autre, & doublé de toille d'argent, tout decoupé entre les tresses, lequel ie portois en Piedmont sur les armes. Or auois ie encore deux petits flascons de vin grec de ceux que monsieur le Cardinal Darmagnac m'auoit enuoyez. Le m'en frottay vn peu les mains, puis m'en lauay fort le visage, iusques à ce qu'il eust prins vn peu de couleur rouge, & en beus, prenant vn petit morceau de pain, trois doigts, puis me regarday au miroir. Le vous iure, que ie ne me cognoissois pas moy mesme, & me sembloit que i'estois encore en Piedmont amoureux, comme i'auois esté. Le ne me peus contenir de rire, me semblant, que tout à coup Dieu m'auoit donné tout vn autre visage.

Le premier qui arriua à moy avec ses capitaines fut le Sieur Cornelio, & le Comte de Gayas, monsieur de Bassompierre Commissaire, & le

Comte de Bisque , que i'auois enuoyé querir. Et comme ils me trouuerent de ceste sorte , se prindrent tous à rire. Je brauois par la salle , plus que quatorze : & n'eusse pas eu la puissance de tuer vn poullet : car i'estois si foible que rien plus. Combas & les capitaines François arriverent aussi. Toute ceste farce ne tendoit qu'à faire rire les vns & les autres : & le dernier ce fut le Colonel Rincroc & ses capitaines , qui comme il me vist de ceste sorte , il se mit à sanglotter de force de rire : & ie le prins par les bras & luy dis , & quoy Seigneur Colonel , pensez vous , que ie sois ce Montluc , qui va tous les iours mourant par les uës ? Nany , nany : car celuy-là est mort : & ie suis vn autre Montluc. Son truchement le luy dit , qui le faisoit encores plus rire , & desia le Sieur Cornelio luy auoit dit la resolution , pourquoy ie l'enuoyois querir , & qu'il falloit , que nous ostissions par une sorte ou par autre ce doute , qui estoit parmy les Siennesois. Et ainsi nous allasmes tous à cheual au Palais , & comme nous eusmes monté le degré , nous trouuasmes la grande salle toute pleine de Noblesse & de Bourgeois de

la ville , qui estoient du conseil. Or à main gauche il y a vne petite salle, ^{Conseil des Siennois.} en laquelle n'entre que les capitaines du peuple , les douze Conseillers , & les huit de la guerre : tout cela se nomme le Magistrat. L'entray ainsi en la grand' salle , & leur ostay mon chapeau. Je ne fus cogneu de personne de primme abordée, ains penserent tous que ie fusse quelque gentil-homme , que monsieur de Stroffi eust enuoyé dans la ville pour commander l'assaut , à cause de ma foiblesse. L'entray dans la petite salle , & tous les capitaines & Colonnels apres moy , lesquels demeurerent debout aupres de la porte : & ie m'allay asseoir aupres du capitaine du peuple , où ceux qui tenoient le lieu du Roy auoient accoustumé se seoir , comme i'auois fait souuent. Et en entrant mon chapeau à la main , ie me soufriois vers l'un & vers l'autre : tous s'esmerueilloient de me voir. Deux desia auoient commancé d'opiner. Et alors ie commençay à leur parler en Italien en ceste substance.

Seigneurs , i'ay esté aduerty , que depuis que vous avez entendu à la ^{Havane} ^{que du} ^{sieur de} verité , que les ennemis amenoient ^{Montluc}

*aux Sien-
nois.*

l'artillerie, vous estiez entrez en quelques disputes, qui engendrent parmy vous plustost la peur & la crainte, que quelque belle resolution de combattre, & deffendre vostre ville & liberté, avec les armes. Ce que i'ay trouué fort estrange, & m'en suis esmerueillé, ne me le pouuant persuader. Toutesfois à la fin ie me suis resolu venir vers vous avec les Colonnels & capitaines de toutes les trois nations, que le Roy a en ceste ville, pour vous visiter en ce lieu, & entendre de vous la verité de tout ce qui se passe. Or Messieurs, ie vous prie considerez & pesez bien ce conseil, où vous estes tous appelez. Car de ce conseil, & de la resolution que vous prendrez dépend tout l'honneur, grandeur, authorité, & assurance de vostre estat, de vos vies, de vos honneurs, & conservation de vostre liberté ancienne : & au contraire toute la honte, deshonneur, reproche, avec vne infamie perpetuelle à vos enfans, deshonneur à vos peres, qui vous ont laissé pour heritage vne telle grandeur que vous tenez, l'ayant deffenduë tousiours par batailles les armes en la main, contre tous ceux, qui leur ont voulu oster.


Et

Et à present que vous devez achepter l'occasion qui se presente de la moitié de vos biens , pour monstrier à toute la Chrestienté , que vous estes les vrayz enfans legitimes de ces anciens Romains belliqueux , les enfans legitimes de vos peres , qui ont tant combattu pour s'oustenir vostre liberté , est-il possible que cœurs Siennes , cœurs si genereux , soyent entrez en frayeur , pour ouïr parler de l'artillerie ? Voulez-vous entrer en crainte pour cela ? Le ne puis penser , que cecy procedé de vous , qui avez fait preuve de vostre generosité. Ce n'est pas aussi faute d'amitié , que vous portiez au Roy Tres-chrestien , ny de la bonne esperance , que vous avez en luy. Ce n'est pas aussi pour vous deffier les vns des autres , pour les partialitez qui sont dans vostre cité. Car ie n'ay jamais cognu , que vous fussiez diuisez : mais au contraire bien vnis pour la conseruation de vostre liberté & Seigneurie. Ie vous ay veu tousiours resolu de mourir les armes au poing , plustost que de la vous laisser ravir. I'ay tousiours veu grands & pe-
tits marcher d'un mesme pied , & avoir vne mesme resolution. Ce n'est

pas aussi pour faute d'hardiesse : car ie n'ay iamais veu faire sortie aux escarmouches , que tousiours quelqu'un de vostre ieunesse ne se soit remarqué par dessus les nostres , encores mesmes qu'ils soyent plus vieux soldats qu'eux , pour auoir fait des actes dignes d'estre loüiez & estimez d'un chascun. Ie ne puis croire , que gens qui font si bien , puissent pour le bruit du canon , qui fait plus de peur que de mal , entrer en crainte , & prendre resolution de se rendre esclaves de ceste nation insupportable des Espagnols , ou de vos voisins vos anciens ennemis. Or puis que cela ne procede de vous , il faut donc , qu'il procede de moy , qui ay cest honneur d'estre Lieutenant du Roy de France vostre bon amy , & protecteur. Que si vous le faites pour crainte que ie n'aye la santé pour prendre la peine , qu'il conuient supporter à l'heure que les ennemis nous assailliront , pour la foiblesse où ie suis encore , à cause de ma grand' maladie , cela ne vous doit faire entrer en defiance. Les bras & les iambes ne font pas tout. Ce grand capitaine Antoine de Leue gouteux & impotent a gagné de victoires dans sa chair.

qu'autre de nostre aage n'a fait à che-
ual. Dieu m'a reserué tousiours le iu-
gement pour vous conseruer. M'avez-
vous iamais veu manquer ? Estois-ie
croupy dans vn liët lors de la grande
camifade & escallade que vostre en-
nemi vous donna ? Mais voyez, ie vous
prie, Messieurs, la grande grace que
Dieu m'a fait tout à vn coup, m'ayant
rendu la force, autant que si ie ne fusse
esté malade. Et par là vous pouuez
cognoistre, que Dieu nous ayme, &
qu'il ne veut pas que vous ny nous,
nous perdions. Ie me sens assez fort
pour prendre le harnois, vous ne me
verrez plus fourré ny emmailloté. Que
si vous le faites pour crainte de mon
insuffisance & peu d'experience, en
cela vous faites vn grand tort au Roy.
Car c'est autant, comme de donner
entendre à tout le monde que sa Ma-
iesté vous a enuoyé icy vn homme
desgarny de toute suffisance, & mal
experimenté pour sçauoir ordonner ce
qu'il faut faire, pour la deffence de
vostre ville. Quoy, pensez vous que
le Roy vous ayme si peu, que de m'a-
voir enuoyé icy, s'il n'auoit grande
assurance de moy, & qu'il n'eust es-
sayé en autre lieu qu'est-ce que ie

*Beau
traict du
sieur de
Montluc.*



100 *Comm. de M. B. de Montluc*,
porte, & ce que ie puis ? Le ne vous
diray rien de moy, cela seroit honteux à moy-mesmes, vous en auez
veu vne partie, l'autre vous la pourrez entendre. Vous pourrez donc iuger, que le Roy ne m'a pas choisi
parmi tant de gentils hommes, qu'il a en son Royaume, & ne m'a pas enuoyé aupres de vous, sans auoir bien
poisé ce que ie sçay faire, par la longue experience, qu'il en a tousiours eüe, non seulement pour estre politique, comme vous m'auuez veu iusques
icy, mais pour pourueoir lors que de force on veut emporter vne place.
Craignez-vous, Seigneurs, que la hardiesse me faille au besoin ? Et de quoy me seruiroit tant de preuues, que i'en ay fait depuis que ie suis icy avec vous estant malade ? Vous m'auuez veu sortir des que i'ay peu monter à cheual, allant voir les escarmouches de si pres, que moy-mesmes les commandois. Et ne vous souuient-il pas du iour, que i'entray en ceste ville, & de la grande escarmouche que ie rendis : vos gens l'ont veüe, ils y ont eu part : & la nuit de Noël encores plus où le combat dura six grosses heures. Ne vint-ie pas moy-mesmes au

maines ? ne cogneustes vous pas alors que ie ne perdis point l'entendement à ordonner , ny la hardiesse à combattre. l'ay honte de le dire , mais puis que vous le sçavez , ie n'en dois pas rougir. Je ne vous veux dire que ce que vous avez veu , ie ne suis pas Espagnol ventart. Je suis François & encore Gascon , qui est de nostre nation le plus franc & libre. Or , messieurs , il me semble que vous avez assez d'experience de vous mesmes , qui vous rendra digne d'un perpetuel reproche , si vous prenez autre resolution , outre le dommage que vous en receurez. Il me semble , que vous me devez auoir cogneu , depuis que ie suis avec vous autres , & que ie n'ay rien oublié de ce que le Roy s'est promis que ie sçauois bien faire , quand la necessité se presentera. Toutes ces remonstrances , que ie vous ay faites , tant de ce qui vous touche en particulier , comme de ce qui touche le mien , vous doit faire oublier toute crainte , & prendre tout le cœur & la magnanimité qu'ont tousiours eu vos predecesseurs & vous mesmes , qui estes en vie. Parquoy ie vous prie , que vous preniez tous ensemble vne resolution

telle , que les vaillans hommes , comme vous estes , doiuent prendre : c'est de mourir les armes en la main , plustost que de laisser perdre vostre souveraineté & liberté. Et de moy , & de tous les Colonels & capitaines que voylà , nous iurons Dieu , que tous mourons avec vous , comme nous vous en donnerons à ceste heure l'assurance. Ce n'est pas pour nostre bien , & pour acquerir des richesses : ce n'est pas pour nos aises , car vous voyez que nous patissons & la faim & la soif. Ce n'est donc que pour nostre deuoir & pour nous acquiter du serment : afin qu'on puisse dire & vous quelque iour , que c'est nous qui auons deffendu la liberté de ceste cité , & qu'on nous puisse appeler les conserveurs des Siennesois.

Alors ie me leuay , & dis au truchement Alleman , qu'il retint bien ce que ie voulois dire , pour le redire au Colonel Rincroc & à ces capitaines. Et alors commençay à parler aux

*Serment
des gens
de guerre
estran-
gers.*

Colonels & leurs dis , *Signori miei & fratelli, iuriamo tutti & prometiamo inansì Iddio che noi moriremo tutti l'arme in mano con essi loro per adiutar li a deffendere lor sicuressa & liberta : & ogni vno di noi*

s'oblighi per li soi soldati : & alsate tuti le vostre mani : Alors chacun haussa la main , le truchement le dit au Colonel , lequel incontinent leua la main , & tous ses capitaines criant *io , io , huerlic* , & les autres , ouy , ouy , nous le promettons , chacun en son langage. Surquoy le capitaine du peuple se leua , & tout le conseil , me remerciant infiniment : & apres tourna le visage deuers les capitaines , lesquels il remercia bien fort & d'une grande volonté. Lors il me prierent me vouloir retirer à mon logis , iusques à ce qu'ils eussent parlé à tout le conseil , qui estoit dans la grand' salle , & donné à entendre toute la remonst'ance , que ie leur auois faite. Ce que ie fis : & à la sortie de la petite salle , ie trouuay Misser Bartholomé Caualkan , qui ne sçauoit pas la proposition que i'auois faite , car il n'entra pas dans la salle du conseil , lequel me dit à l'oreille , qu'il pensoit que tous auoient prins resolution de n'endurer point la batterie. Alors ie le r'amenay à mon logis. Et trois heures apres arriuerent quatre des Magistrats , dont Misser Hieronyme Espano , en estoit l'un , ayant charge de toute la Seigneurie

*Resolu-
tion des
Siennois.*

generalement de me remercier infiniment : & me dit que Miffier Ambrosi Mitti auoit parlé en la chaire accoustumée, qui est au milieu de la grand' salle contre la muraille, leur faisant entendre la remonstrence que ie leurs auois faite, lequel n'en oublia rien, car c'estoit vn homme sage & bien auisé, & le serment qu'auoient fait tous les Colonnels & capitaines, les exhortant de se resoudre tous au combat. Il ne me souuient s'ils se mirent à la deliberation de la balotte, ou si tous leuerent la main comme nous auions fait : mais les quatre nous rapporterent que iamais ils n'auoient veu vne plus grande ioye, qui s'estoit mise entr'eux apres la proposition dudit Ambrosi Mitti. Et me dirent aussi qu'apres que ie fus en ladite salle, & fait lescdites remonstrences, les deux Gentils-hommes qui auoient opiné, qu'il falloit capituler & entrer en composition avec l'ennemy, auoient prié le Senat leur vouloir faire ce bien que de rayer leurs opinions, & n'y auoir esgard, & les laisser encore opiner, ce qui fut fait, & encore opinerent qu'il falloit combattre, & n'entrer en aucune composition, ains

plustost mourir les armes à la main. Je dis à Misser Hieronyme Espano , que ie m'en allois retirer pour tout ce iour , & pour toute la nuict , pour escrire l'ordre qu'il falloit tenir pour le combat , & pour toute la ville , & qu'incontinent ie l'enuoyerois , comme ie ferois aussi aux Allemans en leur langage : aux François en la leur.

Gouverneurs & capitaines , vous devez prendre quelque exemple icy , *Instruction pour les Gouverneurs des places.* pource qu'il y en a , qui disent quand ils ont rendu vne place que les soldats n'ont point voulu combattre , outre que les gens de la ville les vouloient trahir , & les ont forcez d'entrer en capitulation & composition. Ce ne sont qu'excuses , ce ne sont qu'excuses , croyez moy. Ce qui vous force c'est vostre peu d'experience , Messieurs mes compagnons , quand vous vous trouuerez en telles nopces prenez vos beaux accoustremens , parez vous : lauez uous la face de vin Grec : & la faites deuenir rouge : & marchez ainsi brauement parmy la ville & parmy les soldats , la care leuée , ne tenant jamais autre propos , sinon que bien tost avec l'ayde de Dieu & la force

106 *Comm. de M. B. de Montluc* ;
de vos bras & de vos armes, vous aurez en despit d'eux la vie de vos ennemis, & non eux la vostre : qu'ils ne sont pour vous venir attaquer dans vostre fort : que c'est ce que vous desirez le plus : car de là dépend leur ruyne & vostre deliurance. Et de ceste forte iusques aux femmes prendront courage, & les soldats pareillement : mais si vous allez avec vn visage passe ne parlant à personne, triste, melancolique & pensif, quand toute la ville & tous les soldats auroient cœur de lyons, vous leur ferez venir de moutons. Parlez souuent avec ceux de la ville en quatre ou cinq parolles, & pareillement aux soldats, leur disant, & bien mes amis, n'avez vous pas courage ? le tiens la victoire nostre, & la mort de nos ennemis desia pour asseurée : car i'ay ie ne sçay quel presage en moy, que quand il me vient, ie suis tout asseuré de vaincre, lequel ie tiens de Dieu & non des hommes. Parquoy reposez vous sur moy, & resolvez vous tous de combattre & sortir d'icy avec honneur & reputation. Vous ne pouuez mourir qu'une fois : c'est chose qui est destinée. Si Dieu l'a ordonné, vous avez beau

fuir. Mourons donc avec honneur : mais il n'y a nulle apparence de danger, ains plutoſt pour nos ennemis, ſur leſquels nous auons tout auantage. Et qui voulez vous, Gouverneurs & capitaines, qui oſe dire, qu'il a peur, vous voyans reſolus en ceſte ſorte ? ie vous diſ, que quand ils en trembleroient, ils la perdroient : & deuiendra le plus poureux auſſi hardy, que le plus courageux de la troupe. Iamais les ſoldats ne ſ'eſtonneront tant qu'ils verront la hardieſſe de leur chef durer. Et tout ainſi que le chef remporte la louange, & que le reſte n'a rien, ſinon celle que leur chef leur donne, deuant le Prince : ainſi doit le chef ſe reſoudre de ne monſtrer iamais auoir peur. Car en faiſant cela les ſoldats meſmes en porteront bon teſmoignage : & ainſi la reputation qu'il aura acquiſe, luy demeurera, ſans que iamais aucun y contredife. Ie ne vous conſeille donc rien, que ie ne l'aye eſprouué moy-mefme, non ſeulement là, mais en pluſieurs endroits, comme vous trouuerez dans ce Liure, ſi vous auez la patience de le lire. Or voicy l'ordre que ie fis pour le combat & pour toute la ville. Ie vous repre-

*Tout preſent
que de
pend du
chef.*

*Deſſein
de l'Atta-
que.*

sente toutes ces particularitez, sans me contenter de dire que Sienne fust assiegée, où ie soustins le siege neuf ou dix mois : & puis ie capitulé forcé de famine : Car de là le capitaine, le Lieutenant de Roy, le soldat n'en peust pas faire profit. C'est l'Historien. De ces gens il n'en y a que trop. Je m'escriis à moy-mesme : & veux instruire ceux qui viendront apres moy. Car n'estre né que pour soy : c'est-à dire en bon François, estre né vne beste.

*Ordre à
Sienna
pour la
fortifica-
tion.*

J'ordonnay donc en premier lieu, que la cité seroit diuisée en huit parties, & que les huit de la guerre en auroient chacun la sienne : que chacun des huit commettroient vn personnage, de qui ils respondroient. Lequel personnage feroit la description de tout le quartier qui luy seroit baillé en charge, combien d'hommes, de femmes, & d'enfans, il y auroit en leur quartier de l'aage de douze ans, les masles iusques à soixante, & les femmes iusques à cinquante, & qui fussent pour porter la hoste, la barelle, les picqs, les palles, & les sappes, & que chacun de son quartier feroit des capitaines de chaque art, sans

qu'ils soient meslez : qu'il seroit fait commandement à peine de la vie, que dès que leur capitaine les manderoit venir là où ils seroient commandez, d'y venir tout incontinent, & les femmes & enfans : que chacun fera prouision promptement de ce que leur office portera, & que les maistres des seruiteurs & chambrieres ou maistresses, seront tenus de promptement donner ordre, que leurs seruiteurs & chambrieres soient garnis des outils seruans à trauailler, chacun en son estat, à peine de deux cens escus : & la cité d'en fournir aux pauvres qui n'auront dequoy en auoir, aux despens du tresor public, & que lesdits deputez feront leur rolles, & iront de maison en maison pour enroller leurs gens, & que dès que les capitaines crieront chacun en son quartier, force, force, que tous & toutes courront à leurs outils : & se rendront où leur capitaine les menera : & les deputez bailleront les rolles de tous ceux & celles, qu'ils auront trouuez en leurs quartiers, à chacun des huit de la guerre, quartier pour quartier : que les vieux ou vieilles qui excederont l'age susdit demeureront aux maisons

de leurs maistres, pour leur acoustre à manger, & garder la maison; que lesdits deputez feront rolle de tous les maisons & charpentiers qui seront en leur quartier: lequel rolle bailleront à celuy des huit de la guerre qui les aura commis. Voila l'ordre pour les pionniers & manoeuvres.

*Ordre
pour le
combat.*

L'ordre de ceux qui portoient les armes estoit, que les trois Gonfalonniers, qui est de saint Martin, de Ciotat, & de Camolia, feroient incontinent la reueuë de toutes les compagnies, qui estoient vingt & quatre: & regarderoient les armes d'un chacun, si elles estoient bien en ordre pour combattre: & sinon incontinent les contraindroient de les faire acoustrer. Qu'ils feroient reaffiner toutes les poudres, & qu'on feroit grandes quantité de boulets, & de cordes. Que lesdits Gonfalonniers se tiendroient chacun en son quartier sans en bouger, iusques à ce qu'un des huit de la guerre leur viendrait commander ce qui leur faudroit faire: que les Gentils hommes vieux qui ne pourroient porter armes, ny travailler, se rendroient à solliciter les pionniers du quartier là où feroient leurs maisons,

& ayder aux capitaines desdits pionniers. Or auois-ie tousiours deliberé, que si l'ennemy nous venoit assaillir avecques l'artillerie, de me retrancher loing de la muraille où se feroit la batterie pour les laisser entrer à leur aise : & faisois estat tousiours de fermer les deux bouts, & y mettre à chacun quatre ou cinq grosses pieces d'artillerie, chargées de grosses chaînes & de gros cloux, & pieces de fer. Derriere la retirade, ie deliberay mettre tous les mousquets de la ville, ensemble l'arquebuzerie : & comme ils seroient dedans faire tirer l'artillerie, & l'arquebuzerie tout à vn coup. Et nous qui serions aux deux bouts, venir courant à eux avec les picques & hallebardes, espées à deux mains, & espées & rondelles : Cecy faisois-ie, pour ce que ie voyois bien qu'il n'estoit possible au Roy de nous enuoyer secourir, à cause qu'il estoit engagé en tant de lieux, qu'il n'estoit possible de pouuoir leuer gens suffisans pour leuer le siege par mer ny par terre. Monsieur de Strossi n'auoit le moyen de nous secourir. Et par ainsi ie les voulois laisser entrer, & faire peu de deffence à la bresche : afin de leur don-

ner la bataille dans la ville, apres estre passez par la furie de nostre artillerie & arquebuzerie. Car de deffendre la bresche, il eust esté à mon aduis bien aisé : mais nous n'eussions apporté tant de dommage à nos ennemis, comme en leur laissant l'entrée, laquelle nous eussions feint d'abandonner, pour les tirer au combat.

*Sentinel-
les perduës.*

Cinq ou six iours avant que l'artillerie vint; ie faisois sortir de la ville deux païsans, & vn capitaine ou sergent, dès que la nuict venoit, comme pour sentinelles perduës. C'est vne chose fort bonne & asseurée : mais regardez bien qui vous enuoyerez : car elle vous peut faire mauuais party. Et comme la nuict estoit venuë, le capitaine mettoit le païsan en sentinelle à cinquante ou soixante pas de la muraille, & dans vn fossé ou derriere vne haye : ayant aduis que dès qu'il entendroit aucune chose, il viendrait trouuer le capitaine au pied de la muraille. Lequel capitaine auoit charge de moy, que tout incontinent que le païsan auroit parlé à luy, de se mettre tous deux l'vn apres l'autre à quatre pieds, & s'en aller en auant iusques au lieu où le païsan auoit ouï le

*Moyen
pour des-
couvrir
ceux qui
venient
reconnois-
tre la pla-
ce.*

le bruit : & qu'il falloit que plustost ils se couchassent le ventre à terre , pour descouvrir s'ils aduiferoient point trois ou quatre qui recognoissent ce lieu là : & veoir si apres ils s'assembleroient pour parler : car cela est le vray signe qu'ils recognoissent cest endroit , pour y amener l'artillerie. A quoy faire ils ne deuoient estre que le maistre ou commissaire de l'artillerie , le Colonel ou maistre de camp de l'infanterie , ou l'ingenieur , le maistre charretier , & vn capitaine des pionniers : afin que selon la resolution qu'auroit prise le Commissaire , le Colonel & l'ingenieur , le maistre charretier recognoisse aussi le lieu par là où il pourra mener l'artillerie. Et l'ingenieur doit monstrier au capitaine des pionniers ce qu'il faudra faire , pour faire l'esplanade , selon que les tous auront resolu. Et voila la recognoissance qui se doit faire la nuit , apres que vous auez recognu de iour vn peu de loing. Car si ceux de dedans vallent rien , ils doiuent par escarmouches , ou par l'artillerie vous garder de recognoistre de pres. Le capitaine me deuoit incontinent venir aduertir , de ce que nos paisans & luy

auroient veu : & laisser encores les païsans en sentinelle , & vn soldat en son lieu , iusques à son retour. Or par trois fois ils furent descouuerts en ceste maniere : & tout incontinent que i'estois aduertiy , ayant aussi le rolle des huit quartiers , & des huit de la guerre qui commandoient leurs quartiers , soudain i'aduertissois le Seigneur Cornelio , lequel promptement me sçauoit dire le quartier où c'estoit , & le Seigneur des huit de la guerre , qui le commandoit. le n'auois iamais dit à homme quelle estoit mon intention , sinon au Seigneur Cornelio. C'estoit vn homme sage & aduisé , & vaillant , auquel me reposois bien fort. Et comme il sçeuſt que ie leur voulois liurer la bataille dans la ville , de tout vn iour nous ne fismes que donner le tour dedans & dehors , & recogneusmes fort bien tous les endroits , où l'ennemy nous pouuoit faire batterie :

*Bel ordre
pour la
conserua-
tion d'une
place.*

& pareillement recogneusmes l'endroit où nous falloit faire la retirade. Et tout incontinent que l'aduertissement me venoit du capitaine qui demouroit en sentinelle hors la ville , soudain i'aduertissois le Seigneur quartier , & il aduertissoit son com

mis , & son commis le capitaine des pionniers : de sorte que dans vne heure vous eussiez veu pour le moins mil ou douze cens personnes à commencer la retirade. Or auois-ie ordonné aussi que la cité feroit grand' prouision de torches : de sorte que ceux qui auoient recognu , n'estoient gueres de retour au Marquis , qu'ils voyoient tout cest endroit par le dedans de la ville couuert de torches & de gens : tellement qu'au poinct du iour nous auions fort aduancé nostre retirade : & renuoyons le matin reposer ceux-là , en faisant venir d'vn autre quartier iusques au midy. Et d'vn autre depuis midy iusques à la nuict , & par consequent d'autres iusques à la minuit , & au poinct du iour : de façon que nous faisions en peu d'heure vn si grand labeur , que ne pouuions estre en aucune maniere surprins. Je fis en ceste sorte tourner la ville au Marquis lequel estoit logé chez Guillot le sonneur. Et me dit le Seigneur Hernandon de Selue , frere du Seigneur Rigomes , qui commandoit le costé de la petite Obseruance , auquel ie parlay le Vendredy auant que nous partissions de la ville , à fiance , entre

*Les des-
seins du
Marquis
rompus.*

leur logis & le fort de Camolia, que le Marquis estoit entré vne fois en tel soupçon, qu'il pensoit qu'il y eust quelqu'un en leur conseil, qui m'advertist de leurs deliberations: voyant que dès lors qu'il auoit desseigné de nous battre, dès lors on traualloit en cest endroit. Car la nuit on entend aisément le bruit. Vn si grand remuement ne se peut cacher. Et pource qu'il me dit qu'il auoit fait vn Liure du siege de Sienné, il me pria que ie luy voulusse dire comment ie pouuois descouurir leur intention. Je luy en dis la verité.

*Nouvelle
entreprise
du Mar-
quis.*

Mais pour retourner à nostre propos, à la fin le Marquis vint mettre son artillerie sur vne petite montagne, entre porte Ouille, & la grande Obseruance. Ce lieu là me cuida mettre à deuiner à moy-mesme, qui pensois estre si fin: parce qu'à porte Ouille il y a vne grande antiporte fort large, & que les maisons de la ville se touchent presque, n'y ayant que la ruë entre deux, n'estant possible de long temps y faire la retirade necessaire: car il falloit abattre plus de cent maisons, cela me faschoit extrêmement: car c'est autant acquerir

d'ennemis dans nos entrailles , parce que le pauvre citadin qui void enlever sa maison , pert patience. Le bailly au Comte de Bisque la charge de faire terrasser ceste porte : nous prenions la terre dans des iardins & lieux vacans qu'il y a vn peu à main gauche. O le bel exemple que voicy , & que ie veux coucher par escrit : afin de seruir de miroir à ceux qui voudront conseruer leur liberté.

Tous ces pauvres habitans sans *Belle résolution des Siennois.* monstrier nul desplaisir ny regret de la ruine de leurs maisons , mirent les premiers la main à l'œuvre , chacun accourt à la besogne. Il ne fust iamais qu'il n'y eust plus de quatre mil ames au travail : & me fust monstrier par des Gentils-hommes Siennois , vn grand nombre de gentil - femmes portans des paniers sur leur teste pleins de terre. Il ne sera iamais , Dames Siennaises , que ie n'immortalise vostre nom , tant que le Liure de Montluc viura : car à la verité vous estes dignes d'immortelle louange , si iamais femmes le furent. Au commencement de la belle resolution que ce peuple fist de deffendre sa liberté , toutes les *Louange des Dames Siennaises.* Dames de la ville de Sienne se des-

partirent en trois bandes : La première estoit conduite par la Seignora Forteguerra , qui estoit veltuë de violet , & toutes celles qui la suiuoient aussi , ayant son accoustrement en façon d'une nymphe , court & montrant le brodequin : La seconde estoit la Signora Picolhuomini , veltuë de satin incarnadin , & sa troupe de mesme liurée : La troisieme estoit la Signora Liuia Fausta veltuë toute de blanc , comme aussi estoit sa suite avec son enseigne blanche. Dans leurs enseignes elles auoient de belles deuises : je voudrois auoir donné beaucoup & m'en resouuenir. Ces trois escadrons estoient composez de trois mil Dames , gentil-femmes ou bourgeois. Leurs armes estoient des pics , des palles , des hots & des facines. Et en cest equipage firent leur monstre , & allerent commencer les fortifications. Monsieur de Termes , qui m'en a souuent fait le conte (car ie n'y estois encor arriué) m'a asseuré n'auoir iamais veu de sa vie chose si belle , que celle là. Ie vis leurs enseignes depuis. Elles auoient fait vn chant à l'honneur de la France , lors qu'elles alloient à leur fortification. Ie vo

drois auoir donné le meilleur cheual
que i'ay , & l'auoir pour le mettre
icy.

Et puis que ie suis sur l'honneur de
ces femmes , ie veux , que ceux qui ^{D'une}
viendront apres nous , admirent & le ^{jeune fille}
courage & la vertu d'une ieune Sien- ^{Siennoise}
noise , laquelle encores qu'elle soit
fille de pauvre lieu merite toutesfois
estre mise au rang plus honorable.
I'auois fait vne ordonnance au temps ,
que ie fus créé Dictateur , que nul à
peine d'estre bien puny , ne faillist
d'aller à la garde à son tour. Ceste
ieune fille voyant vn sien frere , à qui
il touchoit de faire la garde , ne pou-
uoir y aller , prend son morion , qu'elle
met en teste , ses chausses , & vn coler
de beufle : & avec son hallebarde sur
le col , s'en va au corps de garde en
cest equipage , passant lors qu'on leust
le rolle sous le nom de son frere : fit
la sentinelle à son tour , sans estre
cognue iusques au matin que le iour
eust poinct. Elle fust ramenée à sa mai-
son avec honneur. L'apres-diné le Sei-
gneur Cornelio me la monstra.

Or pour retourner à nos moutons ,
il ne fust possible de ce iour-là , ny de
la nuit suyuant , que le Comte peust

faire son terre plain , ny nous aussi la retirade , à laquelle nous trauaillions , laissant enuiron quatre vingt pas au Marquis , s'il y vouloit entrer. Nous auions fait vne trauerse aupres de porte Ouille : & là nous auions mis trois grandes coulevrines , chargées de ce que i'ay dit. Auquel lieu estoit le Seigneur Cornelio , & le Comte de Gayas , & trois canoniers qu'auoit laissé monsieur de Bassompierre. A main droite sur vn haut estoit la grand' Obseruance , entre icelle & les murailles nous auions mis cinq canons farcis de mesme : lesquels ledit Bassompierre commandoit. Or l'vn & l'autre estoient si cachez , que l'ennemy n'y pouuoit rien veoir de dessus les colines. Bien s'apperceuoient ils , que haut à l'Obseruance il y auoit des gens : car toujours ils tiroient là quelque coup : mais nous estions tous derriere vne tranchée qu'auions faite entre l'Obseruance & la muraille de la ville tapis & couchés : de sorte que ne pouuions estre veus. Les soldats estoient tous contre les maisons , ayant fait force trous en icelles , pour aller & venir au couuert. Derriere la retirade , qui n'estoit gueres plus haute , que la hau-

teur

teur d'un homme, ils estoient aussi au couuert, sans pouuoir estre veus. Le Seigneur Cornelio estoit aussi couuert, à cause qu'il estoit en bas lieu, & à la couuerte d'une fort espoisse muraille, qui touchoit à la porte Quille. L'ordre du combat estoit tel.

Le Seigneur Cornelio auoit avecques luy vne enseigne d'Allemands, *L'ordre & dessein du combat.* deux de François, quatre d'Italiens, & quatre de Siennesois, ayant le Comte de Gayas avec luy, pour le soulager: & avec moy à l'Observance, le Rein-croc avec trois compagnies d'Allemands, deux de François, deux d'Italiens, & quatre enseignes Siennesoises. En toutes les deux troupes du Seigneur Cornelio & de moy, il n'y auoit vne seule arquebuse, sinon picques, hal-lebardes, espées à deux mains, encores n'en y auoit il pas beaucoup, espées & rondelles, toutes armes pour nous ioin-dre incontinent collet à collet. Ce sont les plus furieuses armes: car s'amuser à ces escopeteries, c'est temps perdu, il faut se ioin-dre. Ce que le soldat ne veut faire tant qu'il a des armes à feu: car il veut toujours porter de loing. Toute la nuit mirent les gabions pour vingt &

fix, ou vingt & sept pieces : & au point du iour ils en eurent placé douze, comme ils eussent fait tout le reste, n'eust esté qu'il leur falloit monter sur ceste montagne leur artillerie à bras. La muraille est assez bonne, laquelle il n'y a pas long temps vn des deux Papes Pies, qui estoient de la maison de Picolhuomini, & de l'ordre du peuple, auoit fait faire. Au point du iour ils commencerent leur batterie à vn pied ou deux pieds de terre tousiours de loing, & bien pres de cent pas. Ce qu'ils faisoient, pour couper la muraille par le bas. Et le lendemain matin pensoient auecques le reste de l'artillerie abattre en peu d'heure toute la muraille : mais pour cela le Comte de Bisque ne cessoit de remplir tousiours ceste antiporte, & nous laissoit des flancs : de sorte que nous pouuions veoir au long de la bresche. Enuiron midy ils laisserent ceste batterie de bas, & commencerent à battre au milieu de la muraille. Et comme ie vis qu'ils commençoient à faire iour, ie laissay le Seigneur Cornelio, qui alloit d'un lieu à autre, & prins monsieur de Bassompierre, nous en allasmes au fort de Camoli.

Batterie
des Empereurs.
vieux.

& de là nous voyons tout le recul de leur artillerie. Je laisseray ce propos pour acheuer l'ordre.

Je laissay vne compagnie Françoisse au fort de Camolia, vne autre à la citadelle, ayant deux compagnies de Siennesois à chascune : plus les deux compagnies d'Allemands à la grand' place, chascune à part : à la porte saint Marc vne d'Italiens. Et tout au long de la muraille vers Fonde-brande, des Siennesois, & de mesme vers porte Noue : ayant donné le mot aux deux compagnies Françoises, que si i'auois besoing d'eux, ie les enuoyerois querir, laissant les Siennesois dans la citadelle & dans le fort. Et autant en auois-je dit aux Allemands : & auois mis en l'ordre que nous changerions de mot de six heures en six heures, tant le iour que la nuit : afin que quand nous serions au couuert, s'il y auoit aucun traistre, qui allast en nul endroit où il pourroit auoir intelligence avecques les ennemis, tirer les gens de là, pour affoiblir cest endroit, & s'en aller ailleurs, que homme ne sçait creu, s'il ne portoit le mot, changeant lequel seroit porté aux Siennesois par deux des Seigneurs des

huit de la guerre, l'un par vne moitié de la ville, & l'autre par l'autre. Et si ceux là mesmes n'apportoient le mot, ils ne bougeroient point. L'auois tousiours peur que le Marquis eust quelque intelligence à la ville. Voila pourquoy i'y mis cest ordre. Les Allemands, qui estoient à la place auoient le mesme commandement. Et encores falloit qu'un chef ou sergent des autres le vint querir. Il fust esleu six sergens de nos compagnies Italiennes & Françoises, lesquels auoient charge, cependant que la batterie & l'assaut se donneroient, d'aller tousiours au long de la courtine de la muraille aux quartiers que ie leur auois ordonné, lesquels n'abandonneroient iamais leur quartier. Fust aussi ordonné que à peine de la vie il n'y auroit homme, de quelque nation que ce fust, ny les Siennes pareillement, qui se hazardast abandonner la retirade, estant du nombre de ceux qui y estoient ordonnez, pour le combat. Et autant en fust fait tout au long des murailles de la ville. Fust ordonné aussi que des huit Seigneurs de la guerre, les quatre demeureroient tousiours avecquemoi, ou bien avecques le Seigneur

Cornelio : afin que les deux qui demeureroient avecques luy , allassent tous à cheual chercher le secours , que le Seigneur Cornelio leur diroit , avecques le mot , pour le secourir s'il en auoit besoin : & les deux miens en feroient le semblable : c'est à sçauoir des compagnies Siennes : & les autres quatre iroyent aux lieux , où les quatre sergens estoient ordonnez , afin que tous ensemble donnassent courage aux gens , si la necessité le requeroit. Et là où ne se presenteroit aucun besoing , & qu'aucun viendroit à eux avecques le mot demander des gens pour secourir , il leur en bailleroit partie , & l'autre se garderoit tousiours pour deffendre cest endroict. Que les officiers du Roy , comme controleurs , commissaires des viures , thresoriers ou commis seroient ordinairement partie du iour & partie de nuict tous à cheual , allant tousiours par la ville : & que d'heure en autre vn d'eux m'apporteroit nouuelles , comme tout se portoit dans le corps de la ville , & au tour des murailles , nous portans tousiours assurance d'auoir parlé aux quatre de la guerre , & aux sergens qui estoient deputez avecques eux.

C'est l'ordre que ie donnay , à tout le moins , dont i'ay souuenance , n'oubliant tous les iours à visiter les compagnons & accourager les habitans de bien faire.

A present ie retourne à ce que nous fismes au fort de Camolia. Monsieur de Bassompierre courust chercher vn canon , qu'il y auoit à la citadelle : mais comme il le pensa remuer , le roüage se deffit , & amena vn demy canon , qu'un Siennois , que ledit Bassompierre auoit mis à l'artillerie , tiroit : & en tiroit comme d'une arquebuz. Il fust aidé d'une troupe de soldats François & de Siennois , qui estoient à la citadelle pour l'amener. Et quant à moy ie faisois faire vne plate-forme aux soldats du fort , ayant vne compagnie de pionniers , que ie manday soudain querir. Nous l'eufmes fait en moins d'une heure & demie , où ie montay le demy canon. Je donnay dix escus à nostre Siennois , afin qu'il fist de si bons coups de ceste piece-là, comme il faisoit à la citadelle. Ils auoient mis des gabions au flanc venant deuers nous. Bassompierre & moy nous mîmes à main droite. Nous regardions la bale en l'air , comme v

chapeau en feu , donnant fort à main droite , le second à main gauche. Je fremissois de despit. Monsieur de Bassompierre m'asseuroit tousiours , que bien tost il prendroit sa mire , & alloit & venoit à luy. Le troisieme donna au pied des gabions , & le quatriesme dans leur artillerie , & y tua force gens : car tous ceux-là qui aydoient , s'enfuyrent derriere vne petite maisonnette , qu'il y auoit au cul de l'artillerie. Et alors ie l'allay embrasser : & le voyant bien affuté , luy dis , *Fradel mio da li da seno , per dio facio ti presente d'altri diece scoudi , & d'un bichier de vino greco.* Je luy laissay le capitaine François , qui gardoit le fort , pour tousiours le fauoriser de ce qu'il auoit besoin : & nous retirasmes monsieur de Bassompierre & moy à nostre lieu. Il y vint vne enseigne d'Allemands , qui venoit au long de l'autre gabionnade , enseigne desployée. Cela pouuoit estre sur les quatre heures. Nous la pouuions veoir marcher du derriere de l'Obseruance : & ne fust iamais arriué à l'artillerie , que nostre piece tira , & tua l'enseigne : & soudain les Allemands en fuite , se retirans là où ils estoient auparauant. Et fist ce Sien-

nois de si grands coups , qu'il leur demonta six pieces de canon : & demoura leur artillerie toute abandonnée iusques à l'entrée de la nuit , sans iamaïs tirer que deux canons , qui estoient couverts de gabions , qui tenoient le flanc vers Camolia : lesquels nostre artillerie ne pouuoit atteindre , parce qu'elle donnoit par dessus , à cause de la hauteur des gabions. Et entre chien & loup tirerent sept ou huit coups à l'Observance , où nous estions , & aux maisons prochaines : & de toute la nuit ne se tira rien plus. Nous fîmes grand' diligence toute la nuit d'acheuer nostre retraite , & le Comte de Bisque l'antipor-te : de sorte que deux heures deuant iour tout fust paracheué , & chacun en son lieu , où il deuoit combattre. Ce qui nous faisoit tant haster , c'estoit , que nous oyons mener vn grand bruit à leur artillerie , & pensions qu'ils y menassent l'autre , qui fut cause que ie iettay vn homme dehors , pour recognoistre leur batterie : lequel nous rapporta , qu'ils auoient coupé plus de quatre vingts pas de muraille à vn pan ou deux de terre , & qu'il pensoit qu'en peu d'heures ils l'au-

roient toute abbatue. Dequoy nous ne nous souciasmes pas beaucoup : car nous esperions leur vendre bien cher l'entrée. Et environ vn'heure deuant iour ils cessèrent de faire bruit, qui nous fist penser, qu'ils n'attendoient que l'aube du iour pour donner feu. Je montay sur la muraille, ayant le capitaine Charry avecques moy, lequel à toute force m'en vouloit faire descendre, quand l'aube du iour commença à paroistre. Et bien tost apres i'apperçeus qu'aux fenestres des gabions n'y auoit point d'artillerie, & qu'en lieu d'auoir mise l'autre, ils auoient osté celle qui y estoit. Et alors ie criay au Seigneur Cornelio que nous estions hors d'assaut, & que les ennemis auoient retiré l'artillerie. Tout le monde commença à monter sur la muraille : & les Siennes à belles iniures contre eux, disant en leur Italien. *Coioni marrani, venete qua vi metteremo per terra vinti brassi di muri.* Ils furent contraincts de demeurer trois iours au deffous de la montagne pour r'abiller leurs roüages, que le demy canon, que nous auions mené à Camolia leur auoit gasté.

Le Marquis qui retire son canon.

Or comme i'ay escrit, ce Gentil-

homme de la Chambre de l'Empereur auoit tousiours fait le mauuais , mais comme il eust bien recogneu le tout , luy estant remonstré par le Marquis , que la retirade & tout ce que ie faisois , estoit pour les laisser entrer , & leur donner la bataille dans la ville.

(Car si ie sçauois ce qu'il faisoit , il sçauoit aussi ce que ie faisois , tousiours il y a quelque traistre parmy)

*Resolu-
tion du
Marquis.*

il fust aussi bien d'opinion avec le Marquis & les autres capitaines , que la ville ne se prendroit iamais par force , mais qu'il la falloit auoir par famine : & fust d'aduis que l'on renuoyast l'artillerie à Florence. Lequel s'en retourna deuers son maistre , pour luy compter ce qu'il auoit veu , & que le Marquis ne pouuoit faire autre chose , sinon ce qu'il auoit fait. Le ne sçay s'il luy compta la peur qu'il y auoit eüe : laquelle le Marquis mesme me recita lors que ie sortis de Sienne , qui m'accompagna plus de deux mil , & me dit que lors que leur artillerie fust abandonnée , pour le fracas , que nostre demy canon faisoit , il estoit tout au costé de la maisonnette dans sa lictiere , ayant la goutte , & la lictiere estoit à terre : & ce gentil-hom-

me de l'Empereur parloit à luy ayant les mains sur la courtine d'icelle, & la teste dedans, parlant en secret audit Marquis. Nostre canonnier voyant que l'artillerie estoit abandonnée, & que tout le monde estoit retiré au costé de la maisonnette, tira vne volée contre icelle, de laquelle vne partie de la muraille, qui estoit de brique, tomba sur la liètiere, dans laquelle ledit gentil-homme se trouua sur les iambes du Marquis, si estonné que rien plus, & me iura, qu'en sa vie il ne pensa mourir qu'alors: & le luy tirèrent hors de dessus ses iambes, & luy-mesmes à bien grand' peine: car toute la liètiere estoit pleine de la couverture de la dicte maison. Et me dit outre ledict Seigneur Marquis, qu'il y eust si grand' peur que la goutte le laissa. Car tout ce fracassément tomba sur luy tout à coup, ensemble sur ce gentil homme, qui pensoit estre mort. J'ay ouy dire que l'apprehension de la mort a guery des maladies. Je ne sçay si depuis ses gouttes l'ont prins: mais ledit Seigneur Marquis m'assura, qu'il ne l'auoit eüe depuis. S'il est vray ou non, ie m'en raporte.

*Danger
du Mar-
quis, &
sa peur.*

Cecy pouuoit estre vers la my lan-

*Les Alle-
mans ne
peuvent
pastir.*

uier, & ne tarda pas huit iours, que nous commençâmes à cognoistre, que les Allemans se faschoient fort du peu de pain, qu'ils mangeoient, n'ayant vne goutte de vin, qui estoit le pis. Le Reincroc mesmes, qui estoit maladiſ, ne pouuoit pastir. Il ne se trouuoit rien, sinon quelque peu de cheual ou d'asne. Et commençâmes à regarder le Seigneur Cornelio & moy, quel moyen nous pourrions trouuer pour faire sortir ces Allemans: & regardions que s'ils estoient dehors, nous pourrions tenir encores la ville plus de deux mois, là où s'ils ne sortoient nous serions contraincts de la rendre. Et aduifâmes tous deux d'enuoyer vn homme secrettement à monsieur de Stroſſi, pour luy remonſtrer le tout, & le prier de les enuoyer querir avecques les meilleurs moyens dequoy il se pourroit aduifer, dont ie luy fis l'ouuerture: & luy enuoyay le capitaine Coffeil, qui auourd'huy porte mon enseigne, bien embouché. Il le falloit faire passer à grand' difficulté: car il falloit combattre deux corps de garde, à cause que le Marquis auoit desia fait grande quantités de tranchées qui venoient iulques au

pres de la ville de tous costez. Le capitaine Charry en combatist vn, & le Comte de Gayas avecques vne troupe d'Italiens l'autre : de sorte qu'ainsi qu'ils combattoient, il força la tranchée, & gagna le derriere du camp avec ses guides, & deux iours apres retourna en compagnie d'un gentilhomme Italien, nommé le capitaine Flaminio, lequel portoit des lettres au Reincroc, & aussi à moy, m'escriuant que ie le luy enuoyasse avec ses compagnies : & qu'il dresserait vn camp, là où il auoit force cauallerie & gens de pied Italiens. Et que s'il n'auoit vn nerf de tramontane, il ne me pouuoit secourir : & qu'il protestoit contre moy, si la cité se perdoit, & au Reincroc de fort belles lettres, ayant fort bien fait le bec au capitaine Flaminio. Cest homme là se mist à lamenter, disant que monsieur de Strossi le reduisoit à toute extremité, & qu'il luy estoit impossible de passer, sans estre deffait : mais qu'il en parleroit à ses capitaines : & y eust grand dispute parmi eux. A la fin vn de ceux, en qui il auoit plus de fiance, & qui luy seruoit de maistre de camp, luy dit qu'il valoit mieux se hazarder les

*Inuention
du sieur
de Mont-
luc pour
se defai-
re des Al-
lemans.*

armes en la main pour se sauuer, que non de demeurer pour mourir de faim, ou se rendre à leur discretion sous vne capitulation, laquelle ainsi comme ainsi falloit qu'elle se fist dans peu de iours. Car il n'y auoit rien plus à manger, & leurs soldats commençoient à murmurer, & n'attendoient que l'heure, qu'une grande troupe s'en yroient rendre aux ennemis, qui fust cause qu'ils se resolurent de partir. Le Reincroc n'auoit pas grand tort, estant vn perilleux voyage : car au sortir de la porte il falloit combattre force corps de garde d'Espagnols. Et à demy mil de là vn autre à vne tranchée que l'ennemy auoit faite aupres d'un moulin. Je fis deffendre qu'homme du monde ne parlast de ceste sortie & fis fermer les portes de la ville. Et à l'entrée de la nuit tous arriuerent avec leurs bagages à la grand' place de porte-Noue.

*Sortie
des Alle-
mans.*

Les Siennois, qui n'auoient rien entendu de cecy, commencerent de s'en aller au palais tous desesperez. Je fis sortir trois troupes, deux de François, & vne d'Italiens. La premiere menoit le capitaine Charry : la seconde le capitaine Blacon, qui est mort à present

en Xainctonge Huguenot : & la troisieme le Comte de Gayas. Le capitaine Charry auoit charge de combattre le premier corps de garde , qui estoit au long d'une grande rue du fauxbourg : le second estoit aux Augustins sur la rue mesmes : & le troisieme aupres de Saint Lazare. Ils auoient commandement de moy , de ne cesser iamais , iusques à ce qu'ils eussent combattu tous les trois corps de garde. Et le Comte de Gayas prenoit par dehors le fauxbourg à main droite , tout au long des maisons , allant tousiours le petit pas pour les recueillir. La terzo de Cecille , estoit à la Chartreuse ayant de fort bons soldats : & le Reincroc au sortir de la porte , prenoit à main droite , entrant dans vn vallon , & le Comte de Gayas demouroit sur le haut , allant tousiours le pas , qui faisoit deux effects pour secourir les nostres , comme dist est , & le Reincroc , s'il en auoit besoin : & ainsi commençames à ouurir la porte , pouuant estre vn'heure de nuit. Le capitaine Charry se mist deuant : C'estoit luy , qui menoit tousiours la feste , Blacon apres , le Comte de Gayas apres , & puis les Allemans , qui furent inconti-

nent descendus au vallon. Et tout à vn coup nous entendîmes le combat de nos François contre les Espagnols.

*Combat
des Fran-
çois &
Impe-
riaux.*

Le capitaine Charry mist en route les deux corps de garde l'un apres l'autre, iusques à celui de Sainct Lazare. Surquoy sortirent ceux de la Chartreuse secourir leurs gens : & vindrent aux Augustins, où Blacon auoit fait alte, attendant le capitaine Charry : & là se mirent entre-deux. Le capitaine Charry cuida retourner, entendant bien que l'on combattoit Blacon : & rencontra les ennemis, qui redoubla le combat. Le Comte de Gayas ne le pouuoit secourir, à cause, que ie luy auois deffendu expressement qu'il ne s'engageast point au combat, iusques à ce qu'il auroit cognu que les Allemans estoient sauuez : mais à la fin il fallut que tout se melast : car nos deux troupes Françoises luy tomberent sur les bras. Le combat dura plus d'une grand' heure. Le Seigneur Cornelio & moy estions hors la porte au rasteau, & n'y auoit rien d'ouuert que le guichet. Et comme les soldats, venoient l'un apres l'autre, nous les mettions dedans : & tout à vn coup ouîmes venir le combat à nous, qui crioit
France,

France , qui crioit Espagne. Voila tout arriué aupres du rasteau meslé. Nous auions les torches dans les portes , & par le guichet voyons vn peu de clarté , & tirions les soldats dedans. Il falloit bien dire qu'en l'vne partie & en l'autre y auoit bien des vaillans hommes. Car iamais François ny Italiens ne se ietta de furie sur nous , ains tournoient rousiours le visage deuant ce rasteau : & iamais ne se retirerent , sinon à mesure , que nous les tirions dedans. Tous les trois chefs y furent blesez : & y perdismes de mort ou blesez plus de quarante des meilleurs soldats , que nous auions , François & Italiens. Et à la fin nous eufmes le reste de nos gens dedans. Et pource qu'auant la sortie , les Siennes estoient estonnez de ce que les Allemans s'en alloient : ie fis aller le Seigneur Cornelio tout autour des gardes , & par les forts , pour reconforter nos gardes : car personne ne sçauoit que les Allemans s'en deussent aller : & moy m'en allay au palais , & trouuay tous les Seigneurs bien estonnez. Et alors ie commençay à leur remonstrer ce qui ensuit.

¶ Le voy bien , Seigneurs , que vous

*Haran-
gue du
sieur de
Montluc
au Senat
de Sien-
ne.*

vous estes assemblez icy pour la sortie des Allemans , & que vous estes entrez en crainte & en soupçon , que pour leur depart la cité se perde , ie vous dis que c'est la conseruation d'icelle , & non la perte. Car leurs six enseignes despensoient plus , que les douze Italiennes & Françoises. D'autre-part vous auez entendu que lesdits Allemans commençoient desia à murmurer , ne pouuant plus pastir. Je preuoys assez que leurs capitaines mesmes n'en fussent pas esté maistres , ayans crainte qu'ils se rendissent aux ennemis. Vous auez entendu depuis cinq ou six iours , que les ennemis crioient aupres de nos murailles que nous estions perdus , & que nos Allemans feroient bien tost avec eux. Cela ne venoit pas des capitaines : mais du commun qui ne pouuoit plus pastir. Or , Seigneurs , si vous vous esbaysez à present pour leur allée , on diroit que vostre hardiesse ny la nostre ne dependoit que de la leur : & pour les honorer à eux nous nous deshonnorerions nous mesmes. A quoy ie ne consentiray iamais : car vous sçauiez que tous les grands combats , qui se font faits en ce siege , vous & nous l

auons faits , & ne font iamaïs sortis
dehors , qu'un seul coup , que mau-
gré moy le Colonel Reincroc voulust
faire sortir ses gens sous la conduicte
de son nepueu , & de son Maistre de
camp , qui ne vouloit auoir personne
d'autre nation que de la sienne : &
vous vistes comme bien tost ils furent
renuersez iusques au dedans du fossé
du ruelin de porte-Noue. Et si par
fortune ie ne m'y fusse trouué , qui fis
sortir le corps de garde Italien , il n'en
fust eschappé vn seul. Je ne les veux
pas blasmer , mais ils sont meilleurs
pour vne bataille , que pour vn siege.
Or doncques , Seigneurs , pourquoy
entrez vous en crainte pour leur sortie.
Je uous veux dire encore vn'autre cho-
se , que quand i'en aurois enuoyé les
douze compagnies , qui me restent en
ceste ville , encores entreprendray-ie
de garder vostre cité , auecques vous
autres seulement , pourueu que les
chefs me demeurassent , pour me sou-
lager. Il faut faire par tour vos ensei-
gnes , n'ayans que deux nuiets de fran-
ches , & les nostres n'en auront qu'une :
& que nous commançons à retran-
cher nostre pain à quatorze onces , &
vous autres à dix. Et faut mettre les

*L'Alle-
mand
mal pro-
pre pour
vn siege.*

bouches inutiles hors la ville , & com-
mettre six personnages pour faire la
description d'icelles demain mesmes ,
sans espargner personne quelconque ,
& promptement les mettre dehors :
& ainsi nous prolongerons nostre pain
trois mois , qui sera le temps que le
Roy nous pourra secourir , mesme-
ment à present que le printemps vient.
Cessez donc d'auoir peur , ains au
contraire , prenez ce que i'ay fait pour
vostre salut. Si ie l'ay fait sans le com-
muniquer au Senat , ce n'est pas par
mauuaise volonté , mais pour tenir se-
cret ce depart , qui estoit fort dange-
reux , comme vous auez peu voir ,
ayant esté forcé de faire iouïr ce per-
sonnage à monsieur de Stroffi , pour
me deliurer de ces gens qui aiment
trop leur ventre.

Ayant entendu ma remonstrance ,
ils me prièrent d'aller reposer , &
qu'ils mettroient le tout en delibera-
tion , me remerciant bien fort du bon
confort & conseil que ie leur donnois.

*Le sieur de Mont-
luc créé
Dicta-
teur à
Sienna
pour un
mois.* Le matin toute la harangue que ie leur
auois faite fust sçeuë par la cité , &
ne se parla plus de crainte aucune. Or
ils ne se peurent bonnement accorder
aux bouches inutiles , pource que l'un

vouloit fauoriser l'autre , & me créèrent par balotte leur Dictateur general pour l'espace d'un mois : de sorte que le Capitaine du peuple ny le Magistrat pendant ce temps ne commanderent iamais rien , ains moy absolument tenois le rang & l'estat , que faisoient anciennement les Dictateurs Romains. Je créé six Commissaires pour faire la description des bouches inutiles , & apres baillay ce rolle à vn cheualier de saint Iean de Malte , accompagné de vingt - cinq ou trente soldats , pour les mettre dehors , ce qui fust fait dans trois iours apres que i'eus baillé le rolle. Et si n'estoit que i'ay bon tesmoignage des Siennes & des officiers du Roy , & capitaines qui estoient dans Siene , ie ne mettrois cecy par escrit , craignant qu'on dit que ie fusse vn menteur : c'est chose qui est veritable. Je vous dis , que le rolle des bouches inutiles se monta quatre mil & quatre cens ou plus : que de toutes les pitiez & desolations que i'ay veu , ie n'en vis iamais vne pareille , ny n'en verray à l'aduenir à mon aduis. Car le maistre falloit qu'il abandonna son seruiteur qui l'auoit seruy long temps : la maistresse la

chambriere, & vn monde de pauvres gens, qui ne viuoient que du trauail de leurs bras. Et par trois iours ceste desolation & pleurs dura. Ces pauvres gens s'en alloient à trauers des ennemis, lesquels les rechassoient vers la cité. Et tout le camp demouroit nuit & iour en armes pour cest effect: car ils nous les reiettoient iusques au pied des murailles: afin que nous les remissions dedans, pour plustost manger ce peu de pain qui nous restoit, & voir si la cité se vouldroit reuolter, pour la pitié de leurs seruiteurs & chambrieres: mais cela n'y fist rien, & si dura huit iours. Ils ne mangeoient que des herbes, & en mourut plus de la moitié: car les ennemis les tuoient, & peu s'en sauua. Il y auoit vn grand nombre de filles & belles femmes, celles-là auoient passage: car la nuit les Espagnols en retiroient quelques-vnes de celles-là pour leur prouision: mais non que le Marquis le sceust, car il leur alloit de la vie, & quelques hommes forts & vigoureux, qui passaient & eschappoient la nuit, mais tout cela ne venoit pas à la quarte part; car le demeurant mourust. Ce sont des loix de la guerre. Il

faut estre cruel bien souvent , pour venir à bout de son ennemy. Dieu doit bien estre misericordieux en nostre endroit , qui faisons tant de maux.

Vous, Gouverneurs & Capitaines des places, si vous ne le sçavez, apprenez ces ruses. Ce n'est pas tout d'estre vaillant & sage, il faut estre fin & aduifé. Si i'eusse prié le Rein-croc de sortir, il en eust esté mal content, & m'eust reproché que ie l'en-uoïois à la boucherie. I'y proceday plus sagement, m'aydant de l'autorité de monsieur de Stroffi. Je ne taschois qu'à gagner temps pour ennuyer mon ennemy, & donner loisir au Roy de nous ayder : mais comme i'ay dit, il courroit au plus pressé. Plus touche la peau, que la chemise. Ne craignez de vous descharger des bouches inutiles, estoupez les oreilles aux cris. Si i'eusse creu mon courage, ie l'eusse fait trois mois-plustost : peut estre que i'eusse sauué la ville : ou pour le moins i'eusse amusé mon ennemy plus longuement. Cent fois ie m'en suis repenty.

*Remon-
trance
aux Gou-
verneurs
des pla-
ces.*

Le Marquis ayant veu que i'auois mis les Allemans dehors, lesquels fu-

*Les Alle-
mans des-
faits.*

rent la plus part deffaits par les chemins , & à leur grande faute , laquelle ie ne veux efcire icy , car ils ne furent pas deffaits aux enuirs de Sienne , mais ailleurs par les chemins , où la peur leur print fans grande raison : Voyant auffi que i'auois ietté les bouches inutiles dehors , & que toutes ces deux choses prolongeioient le siege long temps avecques le retranchement de nostre pain , qu'il sceust par ceux qui estoient sortis , cela le fist penser à quelque autre remede pour nous auoir , craignant que sur le printemps il suruint quelques neiges , comme souuent il aduient en ce temps en ce quartier là : & que si cela aduenoit , il falloit qu'il leuast le siege , s'en allant par les villes pour manger : car presque il estoit en aussi grande necessité que nous. Et mangeoient les

*Dessein
du Mar-
quis.*

soldats de son camp des mauues & autres herbes aussi bien que nous : parce que bien souuent la munition ne pouuoit arriuer à temps : car elle venoit deuers Florence , là où il y a trente milles , & sur des petits asnes , sauf cent mulers : & falloit qu'ils portassent à manger pour aller & venir qui estoit cinq ou six iours. Et à cha-
que

que voyage en mouroit tousiours vne
 partie par le chemin. Car de trouuer
 vne seule herbe, ny foin, ny paille, ^{*Incom-*}
 ny grain, il ne s'en trouuoit plus, & ^{*moditez*}
 moins personne qui y habitast, ny à ^{*du Mar-*}
 dix mille pres du chemin. Et toute ^{*quis.*}
 sa cauallerie estoit encores dix mille
 par delà Florence, sauf la compagnie
 du Seigneur Cabri nepueu du Mar-
 quis, qui estoit de cinquante che-
 uaux: & falloit que de quinze en
 quinze iours se rafraischist des autres
 cinquante, qui se tenoient à Boncon-
 uent. Et si Dieu nous eust voulu don-
 ner vn peu de neige, seulement pour
 huiët iours, leur camp estoit contraint
 de se rompre. Toutes ces choses mi-
 rent le Marquis pour abbreger la
 guerre en vne opinion, c'est de trou-
 uer le moyen de mettre diuision entre
 les parts dans la ville, nous voyant
 foibles, scachant bien qu'encores que
 nous eussions douze enseignes, il n'y
 auoit pas dix huiët cens hommes, &
 par l'aduis des Siennes bannis de la
 cité, qui estoient pres du Marquis fust
 trouué inuention de gaigier vn cita-
 lin de la ville, nommé Messer Pie-
 ro, qui estoit borgne, & de l'ordre
 du peuple, qui estoit l'ordre de qui

*Pratiques
du Mar-
quis dans
Sienne.*

nous nous fions le plus, ioint avec l'ordre des reformateurs, & ce par le moyen des petits garçons, qui alloient chercher des herbes au long des prez de la riuere de la Tresse, avecques de petits sacs : & fist tant le Marquis qu'il le conuertist à estre traistre. Et la forme de ce faire fust, que Messer Piedro receuroit plusieurs blancs signez de ces Siennes qui estoient avecques le Marquis, là où luy-mesme coucheroit les lettres.

Le fond de ce fait est tel, qu'il falloit que ledit Messer Piedro couchast dans les lettres ces mots, Comme il trouuoit estrange, qu'ils se laissent tromper si ouuertement au Seigneur de Montluc : & que les enfans pouuoient bien cognoistre que toutes les assurances qu'il leur donnoit que le Roy les secourroit, n'estoient que bayes & tromperies : & qu'encores qu'il fust esté banny de la cité, neantmoins il regrettoit infiniment de le veoir perdre, les larmes aux yeux : & que s'ils vouloient faire sortir vn homme pour aller iusques à Rome entendre si le Roy faisoit armée pour les secourir, ils cognoistroient la tromperie & cautelle, dont i'usois en leur

endroit : & qu'il les prioit de ne se
laisser conduire au dernier morceau :
& que s'ils le faisoient , ils n'en eschap-
peroient que par leurs testes , & la
ruine de leurs biens , femmes & en-
fans : & qu'il y auoit moyen encores
de faire leur appointment avecques
l'Empereur , par le moyen du Mar-
quis , s'ils le vouloient mettre dans
leur ville , qui estoit chose bien aisée ,
s'ils se vouloient tenir & accorder
avecques aucuns de la cité , qui desia
leur auoient promis : & que pour
sçauoir qui estoient ceux de l'intelli-
gence , il falloit qu'ils allassent veoir
à vne telle ruë : & là où on verroit
vne petite croix blanche au bas de la
porte de la maison , celui-là estoit de
leur intelligence. Ce meschant borgne
faisoit bien son office , & adressoit
les lettres à vn de ceux de qui nous
auions fiance , estant bien certain que
celuy là porteroit la lettre au Magis-
trat , & qu'incontinent le Magistrat
enuiroieroit le matin en la ruë qu'il
nommoit en la lettre , & qu'il pren-
droit le gentil homme de la maison ,
où la petite croix se trouueroit. Tou-
siours il s'adressoit de faire la croix à
quelque maison de l'ordre des Noues ,

*Trahi-
son d'un
Siennois.*

& des Gentils-hommes , pource que les autres deux ordres les tenoient pour suspects. Et pensoit le Marquis que tout incontinent que celuy-là seroit prins , cognoissant l'humeur des Siennes , & la grande haine qu'ils se portoient les vns aux autres , ils l'ameneroient sans autre forme de iustice sur l'eschaffaut : & que par ce moyen là , ces deux ordres de Noues & Gentils hommes entreroient en vne grande contention & desespoir , & que pour sauuer leurs vies seroient contraincts de prendre les armes & se rendre maistres d'un canton de la ville pres les murailles , pour tenir la main aux ennemis , afin qu'ils peussent entrer dans la ville.

Or commença ledit meschant borgne à forger la premiere lettre : & de nuit la va mettre sous la porte de la maison d'un des Gentils-hommes qui n'estoit point soupçonné : & fist la croisette en vne autre rue à la Maison d'un des plus riches Gentils-hommes de l'ordre des Noues : & le matin le Gentil-homme à qui la lettre s'adressoit , trouua icelle dans l'entrée de sa maison , & soudain la leust , & la porta au Magistrat , & incontinent qu'ils

l'eurent veüe me l'enuoyerent par Miser Hieronyme Espano, & me manderent qu'ils auoient mis en deliberation d'aller prendre ledit Gentil-homme, & l'amener tout droit à l'eschafaut. l'enuoyay les sieurs Cornelio & Bartholomé Caualkan deuers eux, les prier de ne mettre point la main si tost au sang, & que cecy pourroit bien estre des inuentions du Marquis, pour nous mettre en diuision, & qu'ils le pouuoient bien mettre en prison, ce qu'ils firent. Deux iours apres, voicy vne autre lettre trouuée en mesme sorte à la maison d'un Gentil-homme de l'ordre des Noues, qui n'estoit point suspect, & la croissette à un de l'ordre des Gentils-hommes. Alors la furie commença si grande, qu'il me fallust aller au Palais moy-mesme, & à peine peus-je obtenir ceste grace, que pour cinq iours on dilayast, pour voir si pendant ce temps Dieu nous enuoyeroit la cognoissance de ce fait. Toute la ville estoit esmeuë, & ne se parloit d'autre chose que de faire couper testes. Comme ie veux que Dieu m'ayde, il m'alloit tousiours au deuant que c'estoit vne cautelle du Marquis, car ie scauois à qui

*Conseil
du sieur
de Mont-
luc sur
cette en-
treprise.*

*Prudence
du sieur
de Mont-
luc.*

i'auois affaire. le priay Miffier Bartholomé Caualecan , qu'il ne cessast iour & nuiét d'aller voir lesdits Gentils-hommes & Bourgeois de l'ordre des Gentils-hommes , & des Noues , à qui le malheur touchoit , les prier qu'ils ne se desesperassent point , & que ie garderois bien qu'on ne mettroit point la main au sang , & que ie n'adiousterois point de foy à toutes ces lettres , ny croix. Le sieur Cornelio m'y secouroit fort aussi : car il auoit bien bonne part en la cité , à cause de monsieur le Cardinal de Ferrare , pres lequel il auoit tousiours demeuré , tant qu'il demeura en la cité.

Or à trois ou quatre iours de là , pensant que la furie seroit passée , voila vne autre lettre , & vne croix trouuée en mesme forme des autres : & alors tout le monde perdist patience ; & les vouloit-on mener tous trois sur l'eschaffaut. Je courus au Palais menant le sieur Cornelio & le sieur Bartholomé avec moy. Allant au Palais il me vint en l'esprit qu'il falloit rompre ce coup par le moyen de la deuotion : & comme ie fus au Palais trouuay desia presque toute la grande

salle pleine de gens de l'ordre du peuple & des reformateurs. Et dès que j'entray en la salle du Magistrat, tous commencerent à me crier qu'il n'estoit plus temps de dissimuler, & qu'il falloit faire iustice. Et alors ayant prins place, ie parlay à eux en telle maniere en langage Italien, comme les autres fois.

Seigneurs, depuis le temps que ^{Havard} i'ay eu cest honneur de commander ^{que du} en vostre cité, par le commandement ^{seigneur de} du Roy mon maistre, vous n'avez ^{Montluc} rien entrepris, soit pour le fait de ^{au Senat} la guerre, soit pour la conduicte de ^{de Sienn} vostre ville, sans me le communiquer, & prendre aduis & conseil de moy. En quoy j'ay esté si heureux, par la volonté de Dieu, que ie ne vous ay conseillé chose aucune, qu'elle n'ait reüssi à vostre bien, honneur, & profit, comme ie ne voudrois faire, n'ayant pas plus à cœur mon salut & ma vie, que la vostre propre. Or Messieurs, puis que j'ay esté si heureux & si fortuné, que de vous avoir tousiours donné des conseils salutaires & profitables: ie vous supplie en avoir la mesme opinion, & me croire en vne affaire si importante qui se pre-

152 *Comm. de M. B. de Montluc*,
fente, laquelle à mon aduis trouble
grandement vos entendemens. Je vous
demande vn don les mains ioinctes,
& au nom de Dieu, que vous vous
gardiez sur toutes choses de mettre la
main au sang de vos citoyens, iusques
à ce que la verité soit du tout descou-
uerte. Laquelle ne peut estre longue-
ment cachée : on a beau couvrir le
feu, la fumée en sortira. Aussi on a
beau masquer & desguiser ce fait la
verité paroistra. Tout le monde (&
Ruse du croyez moy) ne me sçauroit faire croi-
Marquis. re, que cecy soit autre chose qu'une
ruse, & cautelle du Marquis. Il confi-
dère, que la peau de lyon ne luy sert
de rien : il a vestu celle du renard,
afin de pouuoir venir à bout de son
dessein. Or il ne sçauroit mieux faire,
ne plus finement en vser qu'en iettant
la diuision parmy votre cité. Et com-
ment la peut-il mieux semer, si ce
n'est en vous persuadant qu'il y a des
traistres parmy vous, & dans vos
murailles, sçachant bien que cela vous
occasionnera, non seulement de les
emprisonner, mais encore de les faire
mourir, & par leur mort mettre la
cité en trouble : car le sang ne peut
mentir. Les parens porteront la mort

de leur parent , quand bien elle seroit iuste , avec douleur & desplaisir , & tascheront à se venger. Bref , vous voilà des ennemis domestiques , plus dommageables que ceux de dehors : vous voilà en peine de songer à la mort des vostres , au lieu de penser à celle de vos ennemis. Voyez donc Messieurs , quel ayse , quel plaisir , & quel contentement vous donnerez à vos ennemis , quand ils sçauront que vous songez à faire couper testes , & encore de ceux que i'oserois dire & iurer sur mon ame estre innocens. Quoy qu'il en soit , l'attente ne vous peut estre dommageable : car ils sont en vos prisons. Vous estes assurez d'eux , vous faites bonne garde. Je veilleray de mon costé , pourquoy vous hasterez vous de les faire mourir ? A l'honneur de Dieu , croyez moy , vous ne vous en repentirez pas. Il n'y ay point d'intrest que le vostre , ayons recours à Dieu en vne telle necessité. Commandez que tout le Clergé de vostre ville dès demain ordonne vne procession generale par toute la ville , & qu'il soit enioinct à tout le monde de s'y trouuer , & qu'on se mette en prieres : afin qu'il plaise à

Dieu nous faire tant de grace de découvrir la verité de ce fait, & la trahison s'il y en a, ou l'innocence de ces prisonniers. Je m'assure que Dieu nous exaucera, & que bien tost vous en ferez esclairs : lors vous pourrez faire iustice si la cause y escheoit, & proceder contre les coupables. Mais avant cela, sur la collere mettre la main au sang de vos citoyens sans auoir bien pesé toutes choses, il me semble que vous ferez tres-mal : & ferez cause d'un grand mal-heur en vostre cité. Messieurs, la seule affection que j'ay au bien de vostre seruice, & à vostre salut & conseruation, me fait tenir ce langage : & vous supplie me faire ce plaisir, de superceder pour quelques iours. Lesquels cependant nous employerons en prieres & oraisons.

Vn murmure courut lors par la salle, les vns disans ouy, les autres non : car tousiours y a-il des contredisans. Mais enfin mon aduis fut suivi : & soudain les Eglises aduerties, & tout le peuple, afin de s'apprester pour aller le lendemain en procession generale faire prieres à Dieu : car de ieusnes nous en faisons assez. Je me

trouuay à la procession & tous les capitaines, ensemble tous les Seigneurs & Dames de la ville, les parens des prisonniers suyuant ploroient, bref toute la ville ce iour là & le lendemain fut en deuotion & oraisons, faisant chacun prieres à Dieu, qu'il nous fit la grace de descourrir la verité de ceste trahison. Cependant ie ne dormois pas : car la nuict le Sieur Cornelio & moy discourusmes comment ceste pratique du Marquis se pouuoit faire. L'arraisonnois à part moy, puis qu'il en estoit venu si auant, que celuy qui menoit la marchandise, ne s'aresteroit pas là, & que le conseil de la ville ne seroit pas si secret, qu'il n'eust aduis de ce qui auoit esté conclu, car à ces grandes assemblées il y a tousiours quelque parleur : & cognus bien, que i'auois fait vne erreur d'auoir tout haut dit que i'estois asseuré, que c'estoit vne ruse du Marquis : car il estoit à craindre, que cela ne fit tenir en ceruelle son conducteur. Or puis qu'il y auoit apparence qu'il nous donneroit avec ses lettres & bultins, quelque nouvelle alarme, ie m'aduisay de faire aller de nuict par la ville quelques

*Proces-
sions ge-
neralles
ordon-
nées.*

hommes , le plus coyement qu'on pouuoit , pour voir si rien se descouuroit. Et ainsi fismes faire la sentinelle deux nuicts. Le iour ie faisois amuser le peuple aux processions par les paroisses. Et lors que quelqu'un de la

*Prudences du
seigneur de
Montluc.* Seigneurie me venoit dire , que c'estoit perdre temps ; qu'il falloit faire iustice , ie le priois d'auoir patience , l'asseurant que ie commençois à descourir quelque chose : car il en falloit ainsi vser , pour retenir la fureur du peuple.

Or la troisieme nuict apres , environ vne heure auant minuiet voyci passer ce Messer Piedro , qui s'arresta deuant vne maison , & mit la main à la fenestre , laquelle estoit basse , & la trouua fermée. Or l'une des trois lettres se trouua auoir esté mise par vne fenestre basse , comme estoit celle-là. Lors il mit le genou à terre , & par deffous la porte , mit la lettre tant auant qu'il peust allonger le bras , puis s'en va au long de la rue. Vn gentilhomme qui estoit au guet , incontinent va apres luy , & le prenant par le bras , luy dit , *chefe te voi* : l'autre luy respond , *io son Messer Piedro*. Il ne meschant.

Le traistre surprins.

Il le reconnut , & luy dit *doue andate* , lequel luy respondit , *me ne vo a la guardia* , le Gentil-homme luy respondit , *adio , adio* : Puis ayant heurté fit ouvrir la porte , & trouua la lettre qui parloit comme les autres. Incontinent il la porta au Magistrat , lequel m'en-uoya deux de leur conseil , me faire entendre le tout. Ils allerent faire lever le Sieur Cornelio , qui vint avec eux : & fut arresté que les portes ne s'ouvroient point le matin , ny les gardes & sentinelles ne bougeroient , qu'il ne fut prins. Et sur le matin le Sieur Cornelio s'en yroit enuironner la maison avec cent hommes par deuant & par derriere. Le Sieur Cornelio le cognoissoit : & comme il eust départi ces gens il heurta à la porte , & le trouua encores au liét : & tout incontinent ils m'aduertirent de la prinse. Et pource que le terme de ma dictature estoit passé , i'vsois de prieres comme auparavant , & leur requis que tout incontinent il fut mis sur la gehenne , car il nyoit la lettre , & n'auoit veu aussi le Gentil homme de toute ceste nuit. Et comme il fut sur la gehenne , il pria de ne le tourmenter plus , car il vouloit confesser

*Misser
Piedro
confesse.*

la verité, ce qu'il fit tout au long, & les pratiques du Marquis pour mettre la division dans la ville. Sur la chaude l'on le vouloit faire pendre aux fenestres du Palais : mais ie les priay de ne le faire encores, & fut mis en vne basse fosse. Et priay le capitaine du peuple de me vouloir bailler les trois Gentils-hommes prisonniers, car ie voulois parler à eux à mon logis : ce qu'il fist.

Le sieur Cornelio & Bartholomé Caualcán les amenerent. Et comme ils furent au logis, ie leur remonstray qu'ils ne deuoient aucunement sçauoir mauuais gré au Senat de ce qu'il les auoient fait prendre, estans les affaires reduites à tels termes, que le pere ne se deuoit fier au fils, ny le fils au pere, puis qu'il y alloit de leurs vies & de leurs biens, & qu'ils allassent au Magistrat le remercier affectueusement de ce qu'ils n'auoient pas fait iustice d'eux, ains qu'ils auoient eu la patience iusques à ce que Dieu auoit fait cognoistre la verité. Ils me respondirent qu'ils ne feroient pas cela : car ce n'estoient pas eux, qui leur auoient sauvé la vie, mais que c'estoit moy, & qu'ils vouloient re-

mercier Dieu & moy , & non eux. Il nous cousta à tous trois plus d'une heure à les convertir. Je leur remonstray que s'ils ne le faisoient , ce seroit accomplir ce que le Marquis desiroit , qu'ils demeurassent en haine mortelle , & en division. Et tout ce que ie pouvois imaginer ; qui pouvoit servir à les y faire aller , ie le leur disois pour les humilier. A la fin se recognoissans grandement obligez à moy de ce que ie leur auois sauué leurs vies , ils me promirent de le faire , & les y accompagnerent le Sieur Cornelio & Messer Bartholomé à ma requeste , car ie craignois qu'ils s'en dedissent par les chemins. Et comme ils furent deuant le Magistrat , vn d'eux parla pour trois , remonstrant leur innocence & le tort qu'on leur auoit fait , duquel ils ne se vouloient ressouuenir , veu la necessité du temps & l'estat de la cité , les suppliant affectueusement les vouloir tenir pour leurs bons citadins , & amis , & pour loyaux à leur republique. Et afin qu'à l'aduenir eux & leur posterité n'en fussent remarquez , qu'ils leur pleust leur en bailler patentes scellées de leur grand scel. Et alors le capitaine du peuple leur fit vne grande

Les prisonniers vont au Senat.

remonstrance, par laquelle il les prioit les excuser : qu'estant question du salut public, ils auoient esté contraincts fermer les yeux à l'intérêt particulier : & veu l'importance de l'affaire, en faire la recherche : mais qu'on les tenoit pour gens de bien, & bons citoyens. Sur quoy ils descendirent tous de leur siege, & les embrasserent. Messer Bartholomé Caualecan me dit que la pluspart s'estoient mis à pleurer : ainsi se retirerent en leurs maisons.

*Le sieur
de Mont-
luc de-
mande la
vie du
seigneur.*

Et pource que ce meschant borgne estoit de l'ordre du peuple, qui estoit la plus grande part, & là où il y auoit plus de gens de guerre, j'eus crainte que si l'on le faisoit mourir, que ceux de son ordre nous leuassent quelque bruit par la ville, disant qu'on connoissoit bien à ceste heure de quel ordre estoient les traitres, & que cela pourroit estre cause de leur faire mettre la main aux armes. Qui fut cause que ie fis requeste à tout le Senat me donner sa vie : & le bannir à perpetuité, afin d'assoupir toutes choses : & que le Marquis ne peust dire, que rien de son dessein eust succédé, non plus que ses entreprinse par les armes.

mes. Et voilà comme le tout fut descouvert & assoupi : car le Senat m'accorda ma priere. Je me suis souuent estonné comment ie fus si sage & si moderé en vne affaire si importante, veu qu'il estoit raisonnable d'en faire vn exemple. Mais cela eust apporté, peut estre, plus de mal que de bien. Il ne faut pas tousiours estre si aspre, voyant les autres si eschauffez apres le sang de ces prisonniers, cela me refroidissoit. Ne vous laissez pas mes Gentils-hommes, qui aurez charge des places, emporter à la premiere apparence des choses qu'on vous dira. *Instruction pour les Gouverneurs.* Songez & pesez les circonstances, rompez les desseins du peuple, que vous commanderez sous quelque pretexte, comme ie fis, l'amusant à nos processions : non que cela fut mal fait, mais ie voulois voir si le temps descouriroit quelque chose. Si i'eusse permis la mort de ceux-ci, leurs parens eussent, peut estre, esté poussez de quelque esprit de vengeance. Tachez par tout à entretenir l'vnion de ceux que vous commandez, comme ie fis en ceste ville-là où tout fut rapaisé & accommodé. Et aussi songez à quel ennemy vous avez affaire :

*Belles
considérations d'un
Gouver-
neur.*

car vous pouuez penser qu'il ne laisse pierre à remuer ny artifice, pour mettre de la division dans la ville. Ainsi ai-ie ouy lire autrefois dans Tite live, qu'Annibal, ce grand capitaine, faisoit pour mettre de la division parmy les Romains. Il faut que vostre prudence & sagesse, Gouverneurs des places, sçachent discerner si cela a de l'apparence, si celuy qui est accusé est homme de pratique, de moyen, & s'il a rien fait, qui puisse approcher de cela. Si en le prenant on pourra cognoistre à sa contenance quelque peur, ou en ses responcez quelque variation. Vous deuez en cela estre sages & discrets: & penser qu'il n'y a rien plus aisé que de calomnier vn homme. Dieu mercy tout se passa avec douceur: & les prisonniers & leurs parens me vindrent remercier.

Or apres que le Marquis eust perdu toute son escrime & toutes ses ruses, il nous laissa en paix, ne s'attendant nous auoir, qu'au dernier morceau de pain: & commençasmes à entrer au mois de Mars nous ayant tout failly: car de vin il n'y en auoit vne seule goutte en toute la ville, dès le demy Feurier. Nous auions mangé

tous les cheuaux , asnes , mulets ,
 chats , & rats , qui estoient dans la
 ville. Les chats se vendoient trois ou
 quatre escus , & le rat vn escu. Et
 en toute la cité n'estoit demeuré que
 quatre vieilles iumens , si maigres
 que rien plus , qui faisoient tourner
 les moulins , deux que i'auois , le
 Controllleur la Moliere le sien , &
 l'Espine Thresorier le sien , le Sieur
 Cornelio vne petite haquenée baye ,
 qui auoit perdu la veuë de vieillesse ,
 Messer Hieronyme Espano vn cheual
 turc , qui auoit plus de vingt ans.
 Voilà tous les cheuaux & iumens ,
 qui estoient demeurez dans la ville ,
 en ces extremitez plus grandes que
 ie ne sçauois vous représenter. Car
 ie croy qu'il n'y a rien si horrible ,
 que la famine. De Rome en hors l'on
 nous donna quelque esperance de se-
 cours , & que le Roy enuoyoit mon-
 sieur le Marechal de Brissac nous se-
 courir. Qui fut cause que nous ac-
 courcismes nostre pain à douze on-
 ces les soldats , & les gens de la ville
 à neuf , cependant peu à peu nous
 perdions plusieurs habitans & soldats,
 qui tomboient morts sur la place en
 cheminant , de sorte qu'on mouroit

*Retran-
 chement
 au pain.*

164. *Comm. de M. B. de Montluc*,
sans maladie. A la fin les Medecins
cogneurent que c'estoit les mauues
qu'on mangeoit : pource que c'est
vne herbe qui lasche l'estomac , &
garde de faire digestion. Or n'auions
nous autres herbes au long des mu-
railles de la ville , car tout estoit
mangé , encores n'en pouuoit-on
auoir , sans sortir à l'escarmouche :
& alors tous les enfans & femmes
de la ville sortoient au long des mur-
railles. Mais ie vis que i'y perdois
force gens , & ne voulus plus laisser
sortir personne. Or d'ouyr plus nou-
uelles de monsieur le Mareschal n'y
auoit plus remede : car les tranchées
venoient iusques aupres des portes.

*Ceste me-
morable
sortie des
Siennois
fust l'an
1526.*

Lesquelles tranchées le Marquis auoit
fait redoubler, pour crainte que nous
fortissions à la desesperade sur luy , &
luy donnissions la bataille , comme
autresfois auoient fait les Siennois ès
guerres qu'ils auoient eues , comme
eux-mesmes racontioient.

En cest estat nous traismes ius-
ques au huitiesme d'Auril , que nous
eismes perdu toute esperance. Alors
la Seigneurie me pria ne trouuer mau-
uais , s'ils commençoient à penser à
leur salut. Et voyant qu'il n'y auoit

plus remede , si ce n'est de nous man- *Les Siennois marchands.*
 ger nous - mesmes , ie ne leur peus
 dénier , chargeant de maledictions
 ceux qui engagent les gens de bien ,
 & puis les laissent là. Je n'entendois
 pas parler du Roy mon bon maistre ,
 il m'aimoit trop , mais bien de ceux
 qui le conseilloyent mal à son aduan-
 tage. J'ay toujours veu plus de mau-
 uais conseils que de bons pres les Rois.
 Ils enuoyerent vn des leurs deuers le
 Marquis , pour le prier de leur don-
 ner vn sauf-conduit , pour deux de
 leurs gens , qu'ils luy vouloient en-
 voyer , ce qu'il fist , & commence-
 rent à capituler. Le Marquis leur y
 aida fort , & commencerent à entrer
 en grande fiance de luy : car il voyoit
 que de faire saccager ceste ville , &
 la faire ruiner , cela n'apportoit profit
 à l'Empereur ni au Duc de Florence ,
 & que cela ne seroit que le gain des
 foldats. D'autre part il craignoit que
 si les Siennois ne pouuoient auoir au-
 cune composition , que nous fortif-
 fions sur luy à la desesperade , ayant
 desia perdu plus de la tierce partie de
 ses gens , lesquels estoient morts pour
 le long siege , & autres qui s'estoient
 desrobez , de sorte qu'il n'auoit pres- *Extrémité du Marquis.*

que point d'Italiens, lesquels logeoient dans le fort de Saint Marc. Et demeura le Marquis vn mois durant, n'ayant aupres de luy que six enseignes : & tout le reste estoit aux tranchées, & ne pouuoit iamais rafraichir ses gens que de six enseignes, lesquelles n'auoient plus d'une nuit franche, & telle garde y auoit, qu'elle ne se remuoit de six iours. Voilà où il fust aussi bien reduit dehors, que nous dedans, & ne se pouuoit ayder de sa cauallerie, ni monsieur de Strossi non plus de celle qu'il auoit, à cause qu'il n'y auoit chose du monde sur la terre pour donner à manger aux cheuaux depuis Montalsin iusques à Sienne, & de Sienne iusques à Florence.

Or parleray-ie à present de moy, comme ie vivois. Je n'auois non plus d'avantage que le moindre soldat : & mon pain ne pesoit que douze onces, & ne s'en faisoit de blanc que sept ou huit, dequoy les trois venoient à mon logis, & le reste se gardoit pour quelque capitaine qui estoit malade. Ny la ville ny nous ne mangeasmes iamais depuis la fin de Feurier iusques au vingt-deuxiesme d'Auril, qu'une fois le iour. Je ne trouuay iamais

dat qui en fist plainte. Et assurez vous que les remonstrances que ie leur faisois souuent nous seruoient de beaucoup. Car s'ils s'en fussent voulu aller au camp de l'ennemy, le Marquis les eust fort bien traittez. Car les ennemis estimoient fort nos soldats Italiens & François : & aux escarmouches ils cognoissoient leur valeur. I'auois achepté trente poulles & vn cocq pour me faire des œufs : & en mangions le Sieur Cornelio, le Comte de Gayas & moy : parce que tous trois mangions tousiours ensemble en vn quartier le matin, & en vn autre le soir : mais vers la fin du mois de Mars cela fust tout mangé, & le cocq & tout. C'est dommage qu'il n'y en eust dauantage. Ainsi ie demeuray sans chair & sans œufs : & ne mangions plus que nostre petit pain, & vn peu de pois avec du lard & des mauues bouïllies, vne fois le iour seulement. Le desir que i'auois d'acquérir de l'honneur, & de faire souffrir ceste honte à l'Empereur d'auoir arresté si longuement son armée, me faisoit trouuer cela si doux, qu'il ne m'estoit nulle peine de ieusner. Ce chetif soupper avec vn morceau de pain, m'estoit

*Promi-
sions du
sieur de
Montluc.*

vn banquet , lors qu'au retour de quel-
que escarmouche ie sçauois les enne-
mis estre frottez , ou que ie sçauois
qu'ils estoient en mesme peine que
nous.

Mais pour retourner à la capitula-
tion , le Marquis enuoya deuers le
Duc de Florence & Dom-Iohan Man-
ricou , qui estoit Ambassadeur pour
l'Empereur vers le Pape , lequel se
tenoit à Florence à cause du siège.
Ledit Duc enuoya vn sauf-conduit ,
les Siennesois aussi enuoyerent deuers
le Pape , qui estoit le Pape Iulle , qui
mourut deux ou trois iours apres ,
duquel ils eurent mauuaise responce ,
leur reprochant leur obstination , &
qu'ils se retirassent au Duc de Flo-
rence , & luy baillassent la carte blan-
che. C'estoit vn terrible Pape. Le Duc
vsa de plus grande honnesteté , & se
monstra plus courtois , comme doit
faire vn Prince qui desire attirer &
gagner le cœur d'un peuple. C'estoit
aussi vn des plus sages mondains qui
ait esté de nostre temps. Il luy a bien
seruy , ayant à establir sa principauté
au temps des deux plus grands & am-
bitieux Princes , qui furent iamais ,
lesquels auoient grande enuie de met-

tre

*Pape
Iulle.*

*Sageste
du Duc
de Flo-
rence.*

tre le pied en Italie. Mais l'Espagnol a esté plus fin que le nostre : & ce Duc s'est tres-bien gouverné. Il s'appelloit Cosme, & croy qu'il est encores en vie. Pendant tous ces pourparlers allerent & reuindrent huit iours durant de Florence au camp. Or le lundy sur le soir la capitulation fut apportée, & le matin le Marquis m'auoit enuoyé vn trompette, me priant que ie luy enuoyasse deux Gentils-hommes en qui i'eusse fiance, pour leur dire quelque chose qu'il vouloit que i'entendisse : & estoit venu à S. Lazare pour cest effet. Je luy enuoyay le sieur Cornelio, & le capitaine Charry, auxquels il dit ce que portoit la capitulation, laquelle deuoit arriuer ce soir mesme à la cité : & qu'entre autre chose il y auoit vn article, qui disoit que le Sieur de Montluc avec les compagnies Ita- *Propo-*
liennes & Françoises, & tous Offi- *tion des*
ciers du Roy fortiroient bagues sau- *Marquis*
ues, enseignes desployées, les armes *au sieur*
sur le col, & tabourin sonnans, & *de Mont-*
que cest article là ne me seruoit de *luc.*
rien, car nous n'estions pas aux Sien-
nois, ains au Roy. Et puis que nous
n'estions à eux, ils n'auoient aussi

puissance de capituler pour nous : & qu'il falloit qu'on capitulast de la part du Roy pour nous : & que ie capitulasse seulement de la part du Roy , qu'il m'asseuroit que i'aurois tout ce que ie leur demanderois : & que hors le seruice de l'Empereur , il feroit autant pour moy , que pour le Cardinal son frere : & que luy & moy estions deux pauures Gentils-hommes , qui avec les armes estions paruenus aux degrez d'honneur : que des plus grands de France & d'Italie seroient bien aises d'auoir nos places : & leur dit qu'il attendroit là ma responce. Ils me trouuerent à porte Noue , où ie me promenois avec Messer Hieronyme Espano : & apres auoir entendu ce qu'il me mandoit , ie leur dis , qu'ils luy allassent dire que ie sçauois bien qu'il auoit leu les Histoires Romaines , là où il pouuoit auoir trouué , que du temps des anciens Romains belliqueux , ils enuoyerent vne de leurs colonies habiter en Gascongne pres des Monts-Pirenées d'où i'estois natif, & que s'il ne se vouloit contenter de ce que les Siennes m'auoient comprins en leur capitulation , à la sortie ie luy montrerois que i'estois sorty

*Responce
du sieur
de Mont-
luc.*

& extraict des Bellicieux Romains ,
 qui aimoient mieux perdre cent vies ,
 si tant en pouuoient recouurer , qu'un
 doigt de leur honneur & reputation :
 & que j'aimois mieux que les Sien-
 nois capitulassent pour moy , que si
 ie capitulois pour eux : & que pour
 moy , le nom de Montluc ne se trou-
 ueroit iamais en capitulation. Et ainsi
 s'en retournerent vers luy : & comme
 ils luy eurent fait la responce , il leur
 dit en Italien , *che vol dir questo ? mi pare
 che vol iocar à la disperata. Altre volte io
 rese due forteresse con ragione , ne per questo
 ne fui mai represo de l'Imperatore , & no
 resta su Maiesta à servir si di me.* Alors
 le sieur Cornelio luy dit que j'estois
 resolu en cela , & que j'aimois mieux
 mettre le tout au hazard de l'espée ,
 qu'au hazard d'une capitulation. Et
 alors il leur dit , or bien recomman-
 dez-moy à luy , & dites luy que ie
 luy monstreyay que ie suis son amy
 hors le seruice de l'Empereur , & du
 Duc de Florence , & qu'il sortira en
 toute assurance selon la capitulation
 des Siennois , ou comme il luy plaira :
 & ainsi s'en retournerent vers moy.

O capitaines , que vous pouuez <sup>Remon-
strances</sup>
 prendre icy vn beau exemple : c'est ^{aux capi-}

*taines sur
les capi-
tulations.*

que comme vous vous trouuerez en telles affaires , ne monstrez iamais avoir peur. Car il n'y a chose au monde , qui mette tant l'ennemy en crainte , que quand il cognoist que le chef, contre qui il a affaire , ne s'estonne de rien : & qu'il luy monstre tousiours en ses parolles , qu'il se rangera plustost au combat , qu'à la capitulation : car il n'y a rien qui mette plustost l'ennemy à deviner ce qu'il doit faire , & vsfer de ceste forte , afin de donner aux siens grand courage. L'avois autant de peur qu'un autre , me voyant bien engagé , & nulles nouvelles de secours , ny de vivres , ny d'hommes : mais que l'on demande à ceux qui sont encores en vie , si iamais ils cogneurent que ie m'estonnasse , non plus que le premier iour que i'y entray. Et au dernier que nous estions reduits en extreme necessité de toutes choses , ce fust alors que ie fis plus le resolu de combattre , qu'auparavant. Et croy que cela seruit de beaucoup aux Siennes & à nous d'auoir toute telle composition , comme si nous l'eussions faite dès le premier iour que les ennemis nous assiegerent. Le soir arriua la capitulation bien tard , &

le Mardy matin quatre de la Seigneu-
 rie porterent la nostre , où ie trouuay
 vn article qu'vn chacun , de quelque
 bas estat & condition qu'il fut , sor-
 tiroit avec leurs bagues sauues , fem-
 mes & enfans qui voudroient sortir ,
 sauf & reservé les bannis & rebelles
 de l'Estat de l'Empereur , du Roy
 d'Angleterre , qui estoit le Roy Phi-
 lippe * , & du Duc de Florence. Alors
 ie cognus bien que cest article tom-
 boit sur les pauvres Florentins qui
 estoient dans la cité avec nous , &
 qui auoient esté bannis pour la part
 de monsieur de Stroffi. Il y auoit aussi
 des Neapolitains & Milanois , de fa-
 çon que ie voyois là perdre plus de
 cent hommes , & mettre leurs testes
 sur l'eschaffaut. Alors ie dis aux Sei-
 gneurs qu'ils s'en retournassent , &
 que dans vne heure ie m'en irois à
 eux , & leur monstrerois la trompe-
 rie qui estoit dans leur capitulation ,
 & que promptement ils assemblassent
 les plus grands de la cité , ce qu'ils
 firent : & prins le sieur Cornelio
 & Bartholomé Caualecan , qui pensa
 mourir de peur , quand il entendit
 ma proposition , car il estoit Flo-
 rentin.

* C'estoit
 le fils de
 l'Em-
 pereur
 Charles
 V. qui avoit
 épousé la Reine
 d'Angle-
 terre Ma-
 rie I, &
 qui fut
 depuis
 Roi d'Es-
 pagne
 sous le
 nom de
 Philippe
 II.

Les bannis.

*Remon-
france
aux Sien-
nois sur la
capitula-
tion.*

Seigneurs, j'ay veu vostre capitulation, qui tend plustost à vous faire couper la teste, que non à la conservation de vos vies & biens. Vous voyez vn article, que tous generallement iouyront de la capitulation, leurs bagues saunes, sauf & reserué les rebelles de l'Estat de l'Empereur, du Roy d'Angleterre, & du Duc de Florence. Or vous scauez que l'Empereur vous a faits declarer rebelles à la Chambre Imperiale, comme sujets de l'Empire, pour vous estre rebellez contre luy. Par là donc vous voyez que vous estes declarez sujets : & vous autres dites que non, & que vous estes seulement recommandez à l'Empire. Le procez n'est point encores iugé, pour voir si vous estes suiets ou recommandez : & quand les ennemis seront icy dedans, & que vous serez en leur puissance, quels iuges voulez vous, qui iugent ce procez, sinon les bourreaux avec vos testes. Ce seront les pieces qu'ils visiteront. Or, Messieurs, ie vous vois tous morts, vos biens confisquez, vos femmes & vos enfans en perdition. Quant à moy & aux soldats, ils nous laisseront sortir seurement : car les gens de guerre pas-

sent par tout : & tousiours avec meilleur marché que les autres. Ils scauent que nous n'auons rien à perdre que nos armes : & que nous sommes tenus d'obeyr à nostre Prince. Que s'ils nous font quelque outrage , à nostre tour nous en aurons la raison , car les hommes se rencontrent plustost que les montagnes. Mais tout le malheur tombera sur vous , veu l'ini-mitié que l'Empereur & le Duc vous porte. Vn Prince ne pardonne guere à son subiet qui s'est rebellé : & s'il a moyen d'y trouuer à redire , il ne faudra d'en prendre l'occasion. Et pource que nous auons vescu si longuement ensemble , sans iamais auoir eu vne seule parolle de colere entre nous : & moy qui ay receu tant d'honneur de vous autres , si vous me voulez croire , nous ferons penser au Marquis chose à laquelle peut estre n'a-il encores pensé , c'est que nous sortions les armes à la main au combat , & luy donnions la bataille. Et faut croire que Dieu nous aydera & sera pour nous , veu la cruauté , qu'ils veulent excecuter en vostre endroit. Et de moy , ie vous offre ma vie & de tous mes capitaines & soldats pour

Les guerriers passent par tout.

176 *Comm. de M. B. de Montluc* ,
mourir avec vous : afin que tous mour-
rions & viuions ensemble , plustost
que de vous voir ainsi trahis & ven-
dus. *Credete à me , à me dico che son
uechio , & à cui sono passate molte cose
inanti li occhi.*

*Arrest
pour le
combat.*

Or m'asseurois-ie bien , que cest
article n'y auoit pas esté mis pour
eux , mais seulement pour ceux que
i'ay nommé , & trouuay ceste inuen-
tion , afin d'amener les Siennes au
combat avec nous : car i'aymois
mieux mettre le tout au hazard , que
de perdre vn seul homme de ceux ,
qui estoient dedans la ville , & qui
sous ma parolle s'y estoient opiniaf-
trez. Ils prindrent cela pour argent
comptant , & se resolurent tous , apres
que i'en fus party , à combattre. Et
tout incontinent leur manday ce qu'il
falloit faire , qu'estoit que les Gonfa-
loniers commanderoient de faire affi-
ner les poudres de leurs gens , & es-
moudre leurs espées , hallebardes , &
fers de picques , & qu'à peine de la
vie , il n'y eust homme de ceux qui
pourroient porter les armes , qui ne
fut prest dans deux iours , & que tous
les Prestres & Religieux , qui auoient
pris les armes pour deffendre la cité

à la batterie , les eussent à prendre sous les mesmes capitaines qu'ils estoient , & croy que pour deux ou trois iours il ne se vid vn plus grand remuement de gens en ville. Les deux deputez qui auoient sauſconduit du Duc de Florence , & du Marquis , tournerent vers les trois heures apres midy au Marquis , & luy monſtrerent ceſt article , qui auoit mis en deſeſpoir toute la cité , & les ſoldats meſmes : & luy dirent la deliberation : & par quelques aduertiffemens il entendit le remuement , & appareil qui ſe faiſoit dans la cité pour le combattre , ce qui fut cauſe qu'il depeſcha toute la nuit vers le Duc de Florence , & Dom-Iean Manricou , lequel ie vis depuis pres la Royne d'Eſpagne à Bayonne , les aduertir du tout , & qu'il les prioit qu'à preſent , qu'il eſtoit ſur le point d'auoir la ville , pour ceſt article là , ne le miſſent au hazard de perdre le tout : & qu'ils conſideraſſent , qu'il auoit affaire avec vn bon chef & vieux ſoldat , me loſiant deux fois plus que ie ne vallois : & que comme ils ſçauoient eux meſmes , il auoit perdu pres de la moitié de ſon armée , & encores en auoit-il beau-

coup de malades , & qu'il n'auoit pas vingt hommes de cheual , car il n'auoit rien pour les nourrir , n'y moyen de les y faire venir : & qu'ils considérassent & pesassent bien cest affaire : que quand à luy il se deschargeroit sur eux. Et comme le Duc de Florence & Dom-Iean virent la deliberation , ils luy enuoyerent le Cousignou , Secretaire & principal du Duc avec la carte blanche , & qu'il y mit tout ce que nous voudrions : car il lui tardoit qu'il ne fust maistre de la ville. Ce fut le mercredy matin , que le Cousignou arriua : & enuoya chercher ledit Marquis les deux deputez , qui estoient r'entrez le Mardy au soir dans la ville : & coucherent dedans les articles , que tous ceux qui seroient bannis & rebelles de l'Estat de l'Empereur & l'Empire & du Duc de Florence , sortiroient en toute seureté comme les autres : & ainsi allasmes iusques au dimanche matin , qui estoit le vingt-deuxiesme d'Auril , que nous sortismes , ainsi que s'ensuit.

*La forme
de la red-
dition de
Sieme.*

Auant que personne de nous sortit , ie remis la citadelle & le fort de Camolia entre les mains des Siennesois , là où ils mirent vne enseigne en chas-

cun : & leur fis mettre vne enseigne en chasque porte de la cité, que nous tenions ouuerte, puis reuins à porte Noue. Le Marquis auoit fait mettre toute son infanterie Espagnolle tout au long de la ruë, qui va à S. Lazare deçà & delà, ses Allemans en bataille vn peu à main droite dans vn camp.

Et à S. Lazare estoit le sieur Cabry son nepueu avec cinquante ou soixante cheuaux, qui est tout ce qu'ils auoient, comme desia i'ay escript,

Ceste reddition de Sienne faite le 21. d'Avril.

& trois cents arquebuziers Italiens, 1555. qu'il auoit prins dans les forts de Saint Marc, & Camolia, qui estoit la garde que le Marquis auoit ordonné pour nous faire compagne. Le Sieur Cornelio & le Comte de Gayas armez, la picque sur le col, coste & coste vne troupe d'arquebuziers apres eux, & apres deux capitaines, qui amenoient la teste des picquiers : là où il y auoit force corselets, & au milieu des picquiers les enseignes desployées & haussées, & à la queuë des picquiers, le demeurant des arquebuziers, & deux capitaines à leur queuë. Le Samedy i'auois enuoyé prier le Marquis, qu'il voulut vser d'honnesteté enuers les femmes anciennes & les

*Courte oi-
sie du
Marquis.*

enfans, qui sortoient avec nous, de nous prester quarante ou cinquante mulets de ceux de sa munition, ce qu'il fit : & avant sortir les fis distribuer aux Siennes, lesquels chargerent les anciennes femmes & quelques enfans sur les genoux. Tout le reste estoit à pied : là où il y auoit plus de cent filles suivant leurs peres & meres, & des femmes qui portoient des berseaux où estoient leurs enfans sur leurs testes, & eussiez veu beaucoup d'hommes qui tenoient en vne main leur fille, & en l'autre leur femme : & furent nombrez à plus de huit cents hommes, femmes, & enfans. J'auois veu vne grand' pitié aux bouches inutiles : mais i'en vis bien autant à la despartie de ceux qui s'en venoient avec nous, & ceux qui demouroient. Oncques en ma vie ie n'ay veu despartie si desolée, & encore que nos soldats eussent pasty iusques à toute extremité, si regrettoient ils infiniment ceste departie, & qu'ils n'eussent la commodité de sauuer la liberté de ce peuple : moy encore plus qui ne peus sans larmes voir toute cette misere, regrettant infiniment ce peuple, qui s'estoit monstré

si deuotieux à sauuer sa liberté. Et apres que le Sieur Cornelio fut dehors, tous les Italiens sortirent, & les citadins à la quenë des Italiens. Puis sortirent à la teste de nos François Sainct Auban & Luffan armez de picques sur le col, & apres eux vne trouppes d'arquebuziers : & à la teste des picques deux capitaines. Plus vne trouppes d'arquebuziers, que les capitaines Charry & Blacon commandoient, ayans chacun vne halebarde à la main & les enseignes au milieu des picquiers, tout ainsi que les Italiens, apres ie sortis armé, & Messer Hieronyme Espano coste à coste de moy : car ie craignois que l'on le print, pource qu'il estoit vn des Principaux autheurs de la reuolte de la cité. Il estoit sur vn cheual Turc vieux, & moy sur vn autre bien maigre & harassé, encore faisois ie bonne mine. Ie laissay deux enseignes Siennoises à la porte, & les priay de la fermer incontinent apres moy, & ne l'ouurir iusques à ce que le Marquis luy-mesme arriuaist à icelle. Ledit Marquis alloit & venoit, & le Seigneur Chiapin Vitello avec luy tout au long des files, pour garder que personne ne touchast

*Sortie de
François*

aux Siennes. Car quant à nostre bagage, il estoit si petit, qu'il ne faisoit point de nombre. Les trois Maistres de camp des Espagnols me vindrent saluer, & tous leurs capitaines. Les Maistres de camp ne descendirent point, mais tous les capitaines descendirent & me vindrent embrasser la iambe, puis remonterent à cheual, & m'accompagnerent iusques à ce que nous trouuassmes le Marquis & le Sieur Chiapin qui pouuoient estre à trois cents pas de la porte de la ville: & là nous nous embrassasmes, & me mirent au milieu d'eux. Et allasmes tous iours parlant du siege & des particularitez, qui estoient suruenues, nous attribuant beaucoup d'honneur, mesmes me dit qu'il m'auoit beaucoup d'obligation, car outre qu'il auoit appris beaucoup de ruses de guerre, i'estois cause qu'il estoit guery des gouttes: & me conta la peur qu'il auoit eue, & le Gentil-homme de l'Empereur. Cela ne se passa pas sans rire. Je luy dis qu'il m'auoit bien fait plus de peur la nuit de l'escalade: & si pour cela ie n'estois pas guery de ma fievre. Surquoy ie luy dis, qu'il auoit fait vne grande faute d'estre

*Propos
du Mar-
quis &
du sieur
de Mont-
luc.*

venu à moy , comme firent les Iuifs pour prendre nostre Seigneur , car ils auoient apporté lanternes & flambeaux qui me donnoit grand' aduantage. Il me respondit baissant la teste , car il estoit fort courtois , *signor , vn'altra volta sero piu sauió*. Alors , ie luy raconté que s'il eust continué sa batterie , il n'en eust pas eu si bon marché : que les Gascons estoient d'une nation opiniastre , mais qu'ils estoient de chair & d'os , comme les autres , qu'il falloit manger. Sur ce propos & autres nous nous entretenimes iusques à ce que nous fusmes vn mil au delà de S. Lazare , & là il dit au Sieur Chiapin Vitello , qu'il allast à la teste de nos gens , & qu'il parlast au Sieur Chabry , qu'il gardast bien qu'aucun desordre ne se fist , & que si personne faisoit semblant de rien prendre du nostre , qu'il tuast tous ceux qui y mettroient la main : & qu'il commandast le mesme au capitaine des trois cents arquebuziers. Et comme le Sieur Chiapin se fut departy de nous , le Marquis m'embrassa me disant ces parolles , en aussi bon François que i'eusse sçeu dire , Adieu monsieur de Montluc , ie vous prie recommandez

184 *Comm. de M. B. de Montluc* ,
moy tres-humblement à la bonne gra-
ce du Roy. Assurez le que ie luy
suis tres-humble & affectionné serui-
teur , autant que Gentil homme , qui
soit en Italie , mon honneur sauue.
Alors ie le remerciay de la bonne vo-
lonté qu'il portoit au Roy , & cour-
toisies que i'auois receuës de luy : des-
quelles ie porterois tesmoignage par
tout , & m'en reuancherois là où i'au-
rois moyen de luy faire seruice. Il
m'en offrit de mesmes , & ainsi nous
tournasmes rembrasser. Il n'auoit pas
avec luy alors que quatre ou cinq
cheuaux : car tout estoit derriere en
mesme ordre , qu'il auoit laissé , &
s'en retourna : & bien tost apres re-
pris le Sieur Chiapin Vitello : &
nous embrassames , & dismes adieu.

*Courtoi-
sie entre
les sol-
dats.*

Nous allasmes à Arbieroute , qui
est vn petit village sur le Tresse , ou
bien la riuiera mesmes s'appelle Ar-
bie , & là trouuasmes dix-huict asnes
chargez de pain , que le Marquis y
auoit enuoyé pour le nous distribuer
en passant. Et en baillay vne partie
aux Siennesois , vn autre aux Italiens ,
& l'autre aux François : & passant
parmy les Espagnols , les soldats
auoient porté des pains tout expres ,

&c

& en donnoient aux nostres. Je veux dire , au tesmoignage de ceux qui estoient avec moy , que ce pain là sauua la vie à plus de deux cents personnes , & s'en trouuera prou , qui diront à plus de quatre cents. Et encores ne se peust il faire qu'il n'en mourut plus de cinquante ce iour là mesme : car nous auions demeuré depuis le Mercredy iusques au Dimanche sans manger que six onces de biscuit le iour , pour homme. Et le Ieu- dy de deux cheuaux que i'auois , i'en fis tuer vn qui vaudroit à present plus de neuf cents escus , il est vray qu'il estoit pour lors bien maigre , & le despartis par toutes les compagnies Françoises & Italiennes , & fis prendre tout l'huile des lampes des Egli- ses , & la distribuay pareillement aux soldats , & avec des mauues & orties faisoient cuire ceste chair & huile , & ainsi se sustenterent iusques au Dimanche matin , qu'il n'y auoit homme , quand nous sortismes , qu'eust mangé vn morceau. Le Marquis me fit apporter quatre flacons de vin , avec cinq ou six pains blancs : & comme nous fusmes à Arbierroutte , fismes alte , au long de la riuere sous

*Grande
disette à
Sienna.*

des faules qu'il y auoit , mangeans ce pain. Je donnay deux des flascons de vin aux Siennes , les autres deux nous les beusmes , chacun vn peu : & apres nous mismes en chemin droict à Mont-

*Le sieur
Cabry.*

talsin. Et comme nous fusmes pres de Bonconuent qu'estoit la garnison , le Sieur Cabry en fit retourner l'escorte à pied : & iusques à ce qu'il vid monsieur de Stroffi qui venoit au deuant de nous avec trouppes de gens à cheual , il ne nous abandonna : & alors il me dit adieu , & nous embrassa comme il fit les sieurs Cornelio, Comte de Gayas , & tous nos capitaines , car il estoit vn fort honneste Gentil-homme , & braue soldat , s'ils en auoient en leur camp. Et ainsi arriuasmes à monsieur de Stroffi , & nous embrassames sans nous pouoir dire mot. Et ne sçay lequel de nous deux auoit plus le cœur ferré , pour le souuenir de nos fortunes. Et ainsi arriuasmes tous descharnez & presque ressemblans des morts à Montalsin , qui estoit le Dimanche : & le Lundy & le Mardy demeurasmes enfermez avec les Thresoriers & Controllers , pour regarder à la despence , & à ce que j'auois emprunté pour prester aux soldats ,

& trouuafmes que le Roy nous deuoit quatre mois. Et me donna ledit Sieur de Stroiffi du sien propre, pour m'en retourner en France cinq cens escus. Je iurerois qu'il ne luy en demeura pas la moitié autant. Car le Sieur Cornelio & moy fusmes contraincts d'emprunter quatre cens escus pour desengager son grand ordre, qu'il auoit engagé chez vn Iuif au commencement qu'il arriua à Sienne. Je le luy voulus rendre depuis, & mesmes à Thiomuille, mais iamais il ne les voulut reprendre & se mocquoit de moy. Voila la fin du siege.

O mes compagnons, qui me ferez cest honneur, que de lire mon liure, ne m'accorderez-vous pas ce que i'ay dit cy dessus, que Dieu auoit accompagné autant ma fortune qu'il fit iamais à capitaine de mon aage. Vous auez noté les grandes aduersitez que i'eus en ce siege, & le peu de moyen que j'auois, sans qu'on m'en peust donner de dehors, pour estre le Roy fort engagé de tous costez. Vous auez entendu, que aucun n'espargnoit rien. Vous auez aussi veu la grand' famine,

*Heur du
sieur de
Montluc.*

où ie fus reduict. Et si bien le considerez, trouuerez, que i'ay esté autant secouru de Dieu, qu'homme qui ait porté les armes il y a cent ans. Ie ne peu mentir en mon liure : car il y a trop de tesmoins, qui sont en vie. Cognoissez vous, si ie vous ay dit la verité, quand i'ay escrit, qu'il faut employer tout ce que Dieu a mis aux hommes, auant que se tenir pour vaincu : Cognoissez vous, s'il me falust rien oublier, & que si i'eusse rien oublié, en quel estat ie me trouuois, & mettois ceste pauvre cité : & mettois encores l'honneur du Roy, & sa reputation en dispute par tout le monde ? Il ne m'en souuient iamais, que ie n'en demeure en tristesse, pour la folle, que i'auois faite, d'auoir mis la cité, & tous nous autres, iusques au dernier morceau, & à la discretion des ennemis, & perte de l'honneur & reputation du Roy. Car il ne vouloit pas, que ie me laissasse reduire à cela : & que l'on le demande à monsieur de la Chapelle aux Ursins, que sa Maiesté despescha expressément pour m'aduertir, que ie ne me laissasse mettre à telle extremité, de sortir avec vne reputation honteuse pour luy. Les

Princes sont glorieux, & combattent plus pour la gloire & l'honneur, que pour acquest. Et veux dire, que ce ne fust pas œuvre d'hommes : mais œuvre de Dieu, d'en eschaper en ceste sorte. Deux iours avant que nous fortissions de Sienne, le Senat me baillast mon acquit en patante, signée de leur grand seal, confessant la dedans, que ie n'auois point voulu capituler pour la ville, ny pour nous : mais aussi que veu l'extremité, en quoy ils estoient reduicts, ie ne les auois pas voulu empescher, m'appellant en tesmoignage, de la loyauté, & fidelité, qu'ils auoient monstree au service du Roy : n'ayant aucunement failly au serment, qu'ils luy auoient donné, & que ie sortois sur leur capitulation, & non eux sur la mienne. Or où trouuerez vous liure, qui parle, que iamais homme soit sorty d'une place sans capitulation, sinon qu'il en sortist de nuit à la desrobée : mais non de la sorte, que i'en sorties. Car chascun confessera, que ie n'estois pas aux Siennes : & par consequent ils ne pouuoient pas capituler pour moy, comme dit le Marquis au Seigneur Cornelio, & au capitaine Charry. Si

*Declara-
tion des
Siennes.*

190 *Comm. de M. B. de Montluc,*
est-ce que par la volonté de Dieu ,
i'en sortis en ceste sorte : & se trou-
uera la patente dans le tresor du Roy ,
comme ie diray cy apres.

*Discours
du sieur
de Mont-
luc aux
Gouver-
neurs des
places.*

Le sçay bien , messieurs les Gou-
verneurs , que plusieurs d'entre vous
prendrez plaisir à ce que i'ay à vous
dire sur le gouvernement & conser-
vation des places , & que d'autres
l'estimeront fort peu : par ce qu'il y
en a de si bon naturel , qui pensent
sçauoir toutes choses d'eux mesmes ,
& n'estiment rien le sçauoir ny l'ex-
perience d'autrui , comme si Dieu les
auoit faits naistre sçauans dès le ven-
tre de leur mere , comme saint Iean
Baptiste. Voyla pourquoy il ne se faut
pas estonner , si on void tomber tant
de gens en mal-heur. Car l'outre-
cuidance les y mene par la main : &
apres les fait tomber du haut en bas
vn si grand fault , qu'ils ne se peuuent
releuer. Ce ne seroit rien , si la cheut-
te ne faisoit mal qu'a eux : mais le
Roy & le peuple s'en sentent. Ne
desdaignez donc d'apprendre. Et en-
core que vous soyiez bien experimen-
tez , cela ne vous peut nuire d'escou-
ter & lire les discours des vieux capi-
taines. Estant en l'aage de vingt cinq

ans, ie prenois plus de plaisir à ouyr discourir les vieux guerriers que ie ne fis iamais à entretenir la plus belle dame, que i'aye iamais aimée. Escoutez donc ce que i'ay à vous dire.

Quand vostre maistre vous baille vne place en garde, vous deuez considerer trois choses : la premiere, l'honneur qu'il vous fait de se fier tant en vostre sagesse, valleur, & bon entendement, de faire choix de vous pour vous bailler vne charge de telle importance. L'honneur qu'il vous fait, n'est pas petit : car il honnore non seulement vostre personne, mais toute vostre race, vous baillant en charge vne clef de son Royaume, ou quelque ville, qui luy importe grandement : comme estoit celle, dont ie vous ay representé le siege. Cest honneur (dis-ie) qu'il vous fait, traine vne queue si longue, que non seulement vostre renommée s'estend par tout le Royaume d'où vous estes sorty, & aux environs de la place, que vous deffendrez : mais aussi par tout le monde. Nous sommes curieux d'entendre ce qui se fait bien & mal, qui est bon & mauuais. Et encor que nous n'y ayons interest, si voulons

192 *Comm. de M. B. de Montluc*,
nous ſçauoir toutes choſes , c'eſt le
naturel de l'homme. Et ainſi par tous
les païs eſtrangers voſtre nom ſera
cogneu pour iamais , en bien ou mal.
Car tout ce qui ſe fait , eſt mis par
eſcrit : & ſans les eſcritures qui ſe font
parmy le monde , la pluſpart des gens
d'honneur ne ſe ſouciéroient d'acque-
rir de la reputation : car elle couſte
trop cher. Iamais homme n'en euſt à
pire marché que moy. Mais l'honneſte
deſir que nous auons de perpetuer
noſtre nom , comme on fait par les
eſcrits , eſt cauſe , que la peine ſem-
ble bien douce à celuy qui a vn cœur
genereux. Il me ſembloit lors , que ie
me faiſois lire Tite Liue , que ie
voyois en vie ces braues Scipions ,
Catons , & Cefars. Et quand i'eſtois
à Rome voyant le Capitolle , me reſ-
ſouuenant de ce que i'auois ouy dire
(car de moy , i'eſtois vn mauuais lec-
teur) il me ſembloit , que ie deuois
trouuer là ces anciens Romains. Donc-
ques les hiftoriens qui ne laiſſent rien
à mettre en leurs liures , marqueront
voſtre nom en blanc , & en noir ,
avec gloire ou avec honte , comme
vous voyez qu'ils ont fait de tant de
capitaines , qui nous ont deuancez.

*Deſir d'é-
terniſer
ſon nom.*

La

La seconde chose, que vous devez <sup>Considé-
rations
d'unGou-
verneur.</sup> mettre devant vos yeux, c'est, que vous devez penser si vous perdez vostre place, quel dommage vous apportez premierement au Roy. Car c'est son bien & sa maison, n'y ayant aucune place de garde, que ce ne soit proprement la maison du Roy : outre que les reuenus sont siens, & dont vous le priuez en perdant la place, & enrichissez son ennemy, augmentez son honneur, & faites honte à vostre maistre : qui void dans les histoires escrit pour iamais, que sous son regne vne telle place s'est perdue. Puis vous devez penser au dommage, que vous portez à les pauvres subiets. Combien de maledictions vous donneront ceux qui seront voisins de la <sup>Maledic-
tions du
peuple.</sup> place que vous auez perduë, car ils seront destruits. Par vostre non chalance ou faute de cœur ils sont ruynez & perdus. Ils maudiront l'heure, que vous fustes iamais né, & sur tout les pauvres habitans, qui ont par vostre faute changé de Roy & de maistre, ou bien chargeant leurs enfans sur leurs espauls, ont esté contraincts d'aller chercher domicile ailleurs. O que ces pauvres Anglois, qui

s'estoient accasez depuis trois cens ans dans la ville de Callais, doiuent maudire la lascheté & poltronnerie de celuy, qui si laschement laissa perdre vne si bonne place ! Comment pourrez vous leuer les yeux si vous tombez en tel mal-heur ? Auparauant vous estiez honoré & estimé. Tout le monde se resiouissoit de vostre venuë, priant Dieu pour vous, qu'il vous conseruast. Que si ce malheur vous aduient, au lieu de louanges, vous aurez des iniures, pour prieres, mallections : & vous donneront à tous les diables. Et au lieu de vous carresser, on vous tournera le dos : chacun vous monstrera au doigt : de sorte que cent fois le iour vous maudirez l'heure, que vous n'estes mort dans vostre place, plustost que de la rendre honteusement.

Non seulement vostre maistre, les Princes & Seigneurs vous verront de mauuais œil, mais les femmes & les enfans. Et veux encore passer plus outre, que vostre propre femme, encores qu'elle face semblant de vous aymer, elle vous hayra, & estimera moins dans son cœur. Car le naturel
Les femmes hay- de toutes les femmes est tel, qu'elles

hayssent mortellement les couïards & ^{sont les} les poltrons, encore qu'ils soient bien ^{couïards.} peignez. Et ayment les hardis & courageux, pour laids, & difformes qu'ils soient. Elles participent à vostre honte. Et quoy qu'elles soient entre vos bras dedans le lict, faisant semblant d'estre bien aises de vostre retour, elles voudroient que vous eussiez esté estouffé, ou qu'une canonnade vous eust emporté. Car tout ainsi que nous pensons que la plus grande honte d'un homme est d'avoir une femme putain: les femmes aussi pensent que la plus grande honte qu'elles ayent, est d'avoir un mary couïard. Ainsi vous voila bien accommodé, monsieur le Gouverneur qui aurez perdu vostre place, veu que dans vostre propre lict on vous maudira.

Mais que dirons nous de vos enfans? on leur reprochera qu'ils sont ^{Les enfans dif-} fils d'un pere lasche, & verront son ^{fameux} nom par escrit, & les malheurs dont il ^{par le} aura esté cause. Car il n'y eust iamais perte de place, si petite soit elle, qui n'apporte une infinité de maux. Il court un si grand malheur pour vos enfans, qu'il faut que pour esteindre vostre vilaine renommée, & mettre

la leur en credit, ils hazardent leur vie à tout propos sans discretion. Et bien peu eschappent sans mourir de ceux qui par ce moyen se veulent faire remarquer. Combien en ay-ie veu en mon temps, lesquels ayant fait quelque signalée faute la voulant reparer se sont perdus, voire exposez à la mort au premier hazard, ayant regret de viure ? Que si vos enfans eschappent de ce malheur, encores craindra le Roy, quelque grande reputation qu'ils ayent acquise, de leur bailler vne place en garde, craignant que les enfans ne ressemblient au pere, comme il aduient ordinairement. Ainsi vous ne vous ruinez pas seulement, mais toute vostre posterité.

*Aduis du
sieur de
Montluc.*

Pour euter & rompre le col à vostre mauuaise fortune, & à tous ces malheurs, il y a bon remede, lequel ie me suis appris moy-mesme : & suis content de le vous enseigner, si vous ne le sçaez. Premièrement vous deuez considerer tout ce que ie vous ay dit : & mettre d'un costé la honte, de l'autre l'honneur, que vous aurez, si vous deffendez courageusement vostre place, demeurant victorieux, ou pour le moins ayant fait tout ce qu'un

homme de bien peut faire , de sortir triomphant , & comme vainqueur , encore que vous soyez vaincus. Comme vous voyez , que ie fis en ce siege. Songez toujours , que vous voyez vostre Prince & vostre maistre deuant vous : & quel visage vous deuez esperer , si par vostre lascheté vous perdez sa place. Et pource , qu'il n'y a eu iamais commencement en vne chose , qu'il n'y aye aussi vne fin , songez dès l'entrée , quelle doit estre la fin , & pensez que vostre maistre ne vous a pas baillé ceste place , pour la rendre , mais pour la sauuer : qu'il ne vous l'a pas donnée pour y viure seulement , mais aussi pour y mourir , s'il est besoing , en combattant. Si vous luy demandiez à vostre depart , voulez vous que ie meure auant la rendre ? il vous dira que vous deuez combattre iusques au dernier iour de vostre vie : car puis que vous estes son subiet , elle est à luy. Le Seigneur de Iarnac disoit quelque iour au Roy nostre maistre , que c'estoit la plus grande ruze & finesse , dont les Roys se soient iamais aduisez , d'auoir fait accroire à leurs suiets , que leur vie estoit à eux , & que leur plus grand

Considération d'un qui entreprend de garder une place.

Saillie du sieur de Iarnac.

honneur estoit de mourir pour leur service. Mais aussi ç'auoit esté vne grande sottise à nous de le croire, ny faire tant d'estat de ce beau liët d'honneur. Si est-il vray pourtant, car nos vies & nos biens sont à nos Roy, l'ame est à Dieu, & l'honneur à nous. Car sur mon honneur mon Roy ne peut rien.

*Vn chef
ne doit
iamais
penser à
la mort.* Pour retourner à ce que ie vous ay dit, si vous n'avez ceste resolution en vous mesmes, acceptant la charge qu'on vous donne, vous ferez mieùx de vous excuser. Il y a assez moyen de se descharger : & en y a prou, qui prendront volontiers ce que vous refuserez. Que si vous l'acceptez en ceste deliberation, pour en venir bien à bout, faites vne chose, ne pensez iamais à vostre mort. C'est affaire à vn sot d'auoir peur de mourir, s'il ne la void à trois doigts de luy : Encores faut il qu'il pense lors qu'elle est à cent lieues. Songez au contraire, comment vous la pourrez donner à vos ennemis : car si vous entrez en l'aprehension & crainte de la mort, tenez hardiment vostre place pour perduë. Car ceste peur vous desrobe le sens & l'entendement, qui est la meilleure

piece de vostre harnois. Vous auez
 beau estre vaillant , si cela vous man-
 que au besoin. Doncques si vous la
 voulez conseruer , il ne faut pas que
 vous entriez en ceste crainte de mou-
 rir. Car la peur ne vous vient que
 trop d'elle mesmes , & de nostre na-
 turel , sans que nous l'aidions à venir
 par nos imaginations. Il la faut reiet-
 ter , si elle s'offre deuant vous. Ayez
 soudain recours à l'intention du Roy ,
 & pourquoy il vous a mis là. Songez
 au deshonneur & honte où vous allez
 entrer. Lisez ou faites vous lire souuent
 les liures , qui parlent de l'honneur
 des grands capitaines , mesmes ceux
 qui ont escrit de nostre temps , com-
 me Langey , & vn autre , qui a escrit
 en Italien : le ne scay comme il s'ap-
 pelle , qui a si bien escrit depuis le
 Roy Charles. huiëtiesme. Souuent ie
 me le suis fait lire , c'est vn bon au-
 theur. Pleust à Dieu , que nous , qui
 portons les armes, prinsions ceste cou-
 tume d'escire ce que nous voyons ,
 & faisons. Car il me semble , que cela
 seroit mieux accommodé de nostre
 main (i'entens du fait de la guerre)
 que non pas des gens de lettre : car ils
 desguisent trop les choses : Et cela

*Je croy
 qu'il en-
 tend Gui-
 chardin.*

*Capitai-
nes qui
ont bien
deffendu
les places.*

sent son clerc. Lisez donc ces livres, & songez en vous mesmes, Si ie fay comme Antoine de Leue à Pauie, le Sieur de Lude à Fontarabie, le Seigneur de Bouillon à Peronne, le Seigneur de Sanffac à la Mirande, & Montluc à Sienne, que dira-on de moy ? quel honneur rapportera-y ie à ma maison ? & au contraire, si ie me rends, quelle honte & infamie pour moy & pour les miens ? Ayez apres vostre recours à Dieu, & le priez, qu'il vous garde de tomber en ces malheurs, luy remettant le tout entre les mains. Apres cela aidez vous de tout ce qu'il a mis en la puissance des hommes, comme vous voyez que i'ay fait en ce siege. Et sur tout soyez diligens & vigilans, songeant tousiours à vostre charge. Si vous faites cela avec l'oubly de la mort & du danger, vous auez le moyen de conseruer vostre place, quand ce seroit vn pigeonier. Et quand bien elle se perdra, y ayant fait vostre deuoir, croyez qu'alors Dieu y a mis la main. Il faut tousiours tanter ; car i'ay veu souuent perdre ce qu'on n'eust iamais pensé, & sauuer tel qu'on tenoit pour perdu. Si vous y mourez, vous ne vous

deshonnorerez ny vostre posterité : & si vous enterrerez avec vous vne immortelle reputation : qu'est tout ce que les hommes , qui portent les armes doiuent desirer. Car l'homme qui a peur de mourir , ne doit iamais aller à la guerre ; puis qu'au monde il y a tant d'autres exercices , où l'homme peut applicquer son esprit & son entendement , mesmement en ce Royaume de France , où il y a tant d'ordres , soit de Iustice , soit des finances , & trop pour le bien du Roy & de son estat. Car tant de belle ieunesse vit inutile , laquelle seroit propre à porter les armes. Entrant quelquefois aux Parlemens de Thoulouse & de Bourdeaux , depuis que ie fus Lieutenant de Roy en Guyenne , ie me suis cent fois estonné , comme il estoit possible , que tant de ieunes hommes s'amussassent ainsi dans vn palais , veu que ordinairement le sang boult à la ieunesse. Je croy que ce n'est que quelque accoustumance. Et le Roy ne sçauroit mieux faire , que de chasser ces gens de là , & les accoustumer aux armes. Et pour retourner à vous , qui commandez dans les places , & vous , qui vous y voulez.

Homme qui a peur de mourir ne doit aller à la guerre.

Aduis du sieur de Montluc.

enfermer, si vous craignez tant la mort, n'y allez pas, combien que ce soit vne folie de la craindre. Ceux qui soufflent les charbons en leurs maisons n'en sont pas plus exempts que les autres. Et ne sçay pas quel choisis il y a de mourir d'une pierre dans les reins, ou d'une bille par la teste. Si Dieu me donnoit le choisis, ie n'aurois pas grand' peine de le prendre.

Sur tous, mes compagnons, il faut auoir l'esprit rendu à espier ce que vostre ennemy peut faire : & iouier deux rolles, disant à par vous, Si i'estois l'assaillant, que ferois-je ? par quel costé pourrois-je entreprendre ? car croyez que le plus souuent vostre iugement & celuy de vostre ennemy se rencontrent. Communiquez-en à ceux que vous auez cognu personnes d'entendement, tantost en commun, afin de ne mettre personne en ialousie, & le plus souuent en priué. Que si vous vous trouuez sous vne nation, où il faille manger du chou, & que vous ne soyiez le plus fort, composez vous selon leurs humeurs. Mordez vous la langue plustost que trop parler. Ramenez les par douceur & courtoisie : & sur tout monstrez leur le

chemin lors qu'il faudra partir. Car si vous, monsieur le Gouverneur, voulez viure à chere ouuerte, & cependant retrancher le manger des autres, vous tirerez sur vous la hayne de vos capitaines & soldats. Il est raisonnable que vous, qui avez plus d'honneur, ayez plus de part à la peine.

Le vous veux aduertir d'une autre chose, c'est que lors que l'extremité vous pressera, vous ne demeuriez gueres enfermé en vostre cabinet : mais monstrez vous aux capitaines & soldats, voire au peuple, avec vn visage assuré. Vostre seule presence leur redoublera le cœur. J'ay cognu en mon temps prou de Lieutenans de Roy, qui esloignoient d'eux les gentils-hommes, pour les faire attendre quelquefois trop en leurs salles, & ne parler à eux. Le Gentil-homme veut estre carressé, mesmement le Gascon. Et cependant ceux-là font les empressez. J'en ay cognu vn, vne fois en ma vie, parce qu'il auoit de tres-belles parties ie ne le veux nommer, car nul n'est parfait au monde. Celuy-là deux heures du iour s'enfermoit dans son cabinet, feignant faire quelque despesche d'importance : mais c'estoit pour lire

Le Gouverneur se doit faire voir.

Rolland le Furieux en Italien, son secretaire mesme nous le disoit. Ce qui nous faisoit despiter. Car cependant nous estions à arpenter sa salle ou sa cour. N'en faites pas ainsi. Vos heures de plaisir doiuent estre à vous promener sur les ramparts, visiter vos magasins, & regarder si rien vous deffaut.

*Faute du
Sieur de
Montluc.*

Si vous vous trouuez en lieu, où vous soyez pressé, n'oubliez à vous seruir du moyen que ie tins pour me deffaire des Allemans, & prenez exemple à ma faute : car ie tarday trop : mais ie pensois tousiours, que le Marquis me voulust forcer par l'espée, & non par la faim. Mais il fust aussi fin que moy. Que si vous vous doubtez de quelque trahison, & que vous n'en puissiez sçauoir le fons, faiçtes vous donner des aduis supposez, & sans nommer personne, dictez que vous estes aduerty, qu'il y a entreprise sur vous, & que vous estes sur le point de la descouurir, feignez aussi auoir quelque intelligence en l'armée de vostre ennemy, encores que vous n'en ayez pas : car ce sera vne contremine. Je ne vous diray que ce mot, que vous vous representiez,

*Ruses
d'un gou-
verneur.*

& la bonne grace de vostre Prince ,
 & son inimitié : car vous avez le choix.
 Elle ne s'efface pas comme la nostre.
 Les Roys ont autre cœur , que nous.
 Ils ne pardonnent gueres à ceux qui
 leur font perdre quelque chose : car
 ils veulent tousiours gagner. Quel
 mauuais visage eust ce braue Seigneur
 de Lautrec à son retour de Milan ?
 & Dieu sçait s'il en estoit cause. Il
 souloit dire , que ce fust le plus grand
 ennuy , qu'il eust de sa vie. Souffrez
 donques toutes les extremitez. N'ou-
 bliez rien de ce que doit faire vn hom-
 me de bien. Je sçay bien , qu'il faut
 perdre , qu'il faut gagner , & n'y a
 rien d'imprenable. Mais desirez cent
 mille fois plustost la mort , si tous
 moyens ne vous deffaillent , que dire
 ce meschant & vilain mot , *Je la*
rends.

Monsieur de Strossi me presta vne
 gallere pour me ramener en France ,
 & enuoya vn sien parent , ieune hom-
 me de vingts ans , cheualier de saint
 Iean , à Ciuitauechia , pour l'appres-
 ter : & voulust , que le cheualier mes-
 me m'amenast à Marseille : le Mer-
 credy matin ie prins la poste & vins
 à Rome , où i'arriuy enuiron les qua-

*Le sieur
 de Mont-
 luc à Ro-
 me.*

tre heures apres midy , & fit aller les capitaines Luffan , Blacon , & S. Auban , m'attendre à Ciuitauechia : car monsieur de Stroffi leur donna congé pour quatre mois. Les autres demurerent avec ledit sieur : monsieur le Cardinal d'Armaignac me logea : & fus aussi bien reçu de tous les ministres du Roy , que gentil-homme scauroit estre. Ils auoient desia entendu ma sortie : car le Marquis l'auoit mandé par vn courier , à son frere , monsieur le Cardinal. I'y trouuay monsieur le Cardinal de Guise , & monsieur le Duc de Ferrare , pere de cestuy-cy , estant là encores depuis la creation du Pape Marcel. Sa Sainteté demanda à monsieur le Cardinal de Guise , si i'estois arriué , comme l'on luy auoit dit : il luy dit que ouy. Et alors il le pria de me faire venir deuant luy , car il auoit grande enuie de me veoir. Et monsieur le Cardinal me trouua pres le logis de monsieur d'Auanson Ambassadeur , lequel me dit que i'allasse faire la reuerence à sa Sainteté , qui auoit enuie de me veoir. Monsieur d'Auanson me presta son coche. Je trouuay le Pape leué sur vne chaire pres son lit , si mal , qu'à peine

pouuoit-il gueres parler. Mais nonobstant il me fit fort bon accueil. Le luy dis que ie ne le voulois importuner de parolles, mais que i'esperois que Dieu luy enuoyeroit la santé dans deux ou trois iours, & qu'apres ie luy viendrois rendre compte, comme les choses estoient passées à Sienne. Il me dit, qu'il en estoit bien estonné : mais qu'il feroit encores bien aise de l'entendre de moy ; & me dit ces mots, Que ie pouuois dire, que iamais homme de quelque nation qu'il fust, n'auoit eu tant de credit, ny n'auoit encores auecques les Siennes, que moy. Là ie prins congé de luy, pour ne le fascher : & trouuay monsieur le Cardinal de Guise au logis de monsieur d'Auanson auquel ie dis, qu'ils pouuoient bien rentrer au conclave pour faire vn autre Pape : car celuy là ne seroit pas en vie le lendemain au soir, comme il fust vray. Car le lendemain enuiron vespres il trespassa : & le iour apres ie prins congé de tous, & m'en allay à Ciuitauechia, qui fut vn Vendredy : & le Samedy à la pointe du iour ie m'embarquay. Les pompes, les plaisirs, les delices, la curiosité de ceste ville,

*Mort du
Pape
Marcel.*

ne me peust arrester vn iour, pensant que peut estre ailleurs ie pourrois faire seruice à nostre maistre. Vne chose veux- ie dire, encore qu'elle soit à ma louange, qu'allant par les rues, & allant au chasteau saint Ange, tout le monde couroit aux fenestres, & sur les portes, pour veoir celuy, qui auoit si longuement deffendu Siene. Cela ne me faisoit, que d'autant plus esleuer le cœur, pour acquerir de l'honneur. Et encore que ie n'eusse pas presque d'argent pour m'en retourner, si me sembloit-il, que i'estois plus riche, que Seigneur de France.

Or nous fismes voile enuiron la pointe du iour, & eusmes aussi bon vent, que nous l'eussions sceu desirer. Et vinsmes à Capocorée sur l'entrée de la nuit. Là donnasmes sonde, & deux heures deuant iour nous passasmes le destroit, qui est entre la Corce & la Sardaigne : & fusmes à Boniface, où estoit monsieur de la Molle, vers les neuf heures du matin. I'auois sceu à Ciuitauechia, que le Prince d'Orie estoit party deuers Piombin avec trois ou quatre mil soldats, qu'il auoit embarquez dans cinquante deux gal-
leres :

lères : & qu'il alloit pour combattre *Le fleur*
 monsieur de Termes , qui battoit Cal- *de Ter-*
 uy. Ce qui fust cause que ie passay à *mes de-*
 Boniface , pour en aduertir ledit Sieur *uant Ca-*
 de la Molle. Lequel incontinent des- *luy.*
 pescha vers ledit Sieur si à propos ,
 qu'à peine peut il estre leué assez à
 temps , qu'il n'y fust surprins : & fust
 contrainct , comme il me dit depuis ,
 de mettre trois canons dans la mer ,
 lesquels depuis il retourna pescher.
 Le luy fis là vn bon tour , & vn bon *Bon ad-*
 seruice à mon maistre. Vous qui por- *uis à*
 tez les armes , & qui voulez bien ser- *ceux qui*
 uir vos Princes , ayez tousiours l'œil *desirent*
 à ce qui les conserue , pour donner *bien ser-*
 aduis de ce que vous iugez propre *uir leur*
 pour leur seruice. I'en ay veu de si *Roy.*
 bons amis , qui s'eslouissoient de la
 perte de leurs compagnons , pour
 penser augmenter leur gloire de leur
 honte. Ie n'ay iamais fait cela , ny ne
 le voudrois faire au plus grand enne-
 my , que i'ay au monde. I'en pour-
 rois bien dire de grands & notables
 exemples , mais ie les laisse pour re-
 uenir à mon propos. Le Baron de la
 Garde estoit aussi en vn port de mer ,
 pres du lieu , où estoit monsieur de
 Termes : il fut aduerty promptement ,

que l'armée du Prince d'Orie estoit en mer : mais il ne sçauoit de quel costé. Si est-ce, que par opinion il se leua promptement tenant la route de Marseille, qui fust cause de la salvation de monsieur de Termes : car comme le Prince d'Orie pensoit surprendre le Baron de la Garde à ce port de mer, où il estoit, il fust aduertty qu'il estoit party, il n'y auoit pas cinq ou six heures, ce qui l'occasionna de le suyure, tenant mesme route. Cela estoit le Samedy mesmes que i'auois eu ce bon vent : & le suyuit iusques aux isles Dieres. Le Baron sans s'arrester vogua vers Marseille : car s'il se fust arresté aux isles, il estoit trouffé, d'autant qu'il n'auoit que quatorze ou quinze galleres. Je me despartis de monsieur de la Molle le Dimanche enuiron dix heures : & tout le iour ie ne peüs faire chemin, pource que le vent m'estoit contraire. Et enuiron deux heures auant iour le mesme vent qui auoit couru le Samedy, retourna : & nous mismes en chemin, qui estoit le Lundy.

Or sur la pointe du iour, ie dis au cheuallier, s'il auoit plus grand voiles, que celle-là. Il me dit, que c'estoit

la plus grande, s'enquerant alors pour-
quoy ie le demandois, si ie voudrois
faire plus grand' diligence, ie luy dis,
que ouy. Et tout incontinent il mist
vne voile sur la courcies pres la pou-
pe: & sur la pointe du iour il suruint
vn brouillard, qui dura iusques à ce
que le soleil fut haut, & commença
le brouillard à passer. Et alors la garde
de la gabie commença à crier velle,
velle: bien tost apres commence à
crier, gallere, gallere. Alors le che-
uallier me dist, que ce ne pouuoit
estre autre, que le Prince d'Orie, ou
le Baron de la Garde. Et tout à vn
coup le brouillard s'abbatist: & nous
trouuâmes au milieu de cinquante
deux galleres, quatorze qui s'estoient
departis de la troupe, prenoient le
chemin vers la Sardaigne, & nous fus-
mes au milieu. Tout le monde com-
mença à se desesperer dans la gallere.
Ees pilottes vouloient gaigner la coste
de barbarie, pour nous sauuer, le
Comite n'estoit pas de cest aduis: ains-
que nous deuions tirer outre à force
de rames & de voiles. Sainct Auban
& les autres capitaines auoient les
plus belles affres, que gens eurent
iamais: disant qu'apres estre sortis

*Cinquan-
te deux
galleres
du sieur
d'Orie.*

d'une si grande extremité , que du siege de Sienne , ils estoient sur le point d'estre reduicts à ce malheur , de se veoir attachez à la cadene : que plustost, que se veoir reduits à ce malheur, il valoit mieux mourir les armes à la main. Quelque mine que ie fisse , ie n'estois gueres plus asséuré : & eusse bien voulu estre à planter des choux. Tout à vn coup quatre des quatorze commencerent à tourner les voiles à nous , pour nous donner dessus : & les autres amenerent iusques à la moitié de l'arbre , pour attendre ceux-cy. Et comme les quatre eurent haussé la voile pour venir sur nous à rame rancade , la pointe de leurs galleres fust à l'endroit de nostre fougon. Et pour ce que le cheuallier ne disoit mot , & que tout le monde crioit dans la gal- lere , avec vne miserable confusion , ie luy dis , O cheuallier , il semble que vous vous perdez. Vous avez esté nour- ry avecques vn des vaillans hommes , qui iamais monta sur la mer , qu'estoit le Prieur de Capue. Alors il me res- pondit , *no me perdo , no me perdo per Dio : mas io guardo la mie.* Les galleres ennemies cependant vindrent à vne portée d'arquebuzade de nous , pour

nous inuestir. Et lors le cheuallier allant de poupe en prouë accourage tout le monde, faisant tirer à voile rancade, tirant tant que nous pouuions : de sorte, que quand ils nous cuiderent inuestir, nous fusmes plus de cinquante pas deuant eux, & leur commençasmes à tirer arquebuzades. Ils nous suyurent enuiron mil pas : & à cause de ces trois voiles que nous auions, avec la peur qui nous donnoit des ailles, il nous sembloit, que nostre gallere volloit deuant les leurs : de façon que tout à vn coup ils haufferent les armes. Et nos mariniers lors à belles iniures firent à qui mieux mieux. Ainsi nous nous sauuasmes en despit d'eux, par la grand' diligence de nos gens. Et pource que nous n'eufmes pas de vent vers le soir, qui nous commença vn peu à changer, ne peusmes estre à Marseille iusques au Mardy à souper. Et trouuay monsieur le Comte de Tande, madame la Comtesse, & le Baron de la Garde qui soupoient au iardin de monsieur de Sainct Blancart. Lesquels furent tous esbahis de me voir, ayant fait estat que i'estois mort, & Sienne saccagée & bruslée. Car ils sçauoient nouuel-

les, estant en Corsegue de iour à autre, de la Romaine, & que i'estois à l'extremité, sans esperance d'auoir iamais composition : & tenoit tousiours le Baron de la Garde ceste opinion, quand il estoit avecques Monsieur de Termes en Corsegue, & à Marseille, lors qu'il fust arriué, & que ie iouërois à la desesperade sur la sortie, si le Marquis ne nous faisoit telle composition, que ie voudrois. Autres disoient, que i'auois perdu l'entendement, & que Dieu me vouloit punir de ma trop grande temerité & folie. Ils parloient de moy, ainsi que i'entray dans le iardin. Ils ne voulurent que ie leur disse rien, iusques à ce que i'eusse soupé : car ils auoient presque acheué. I'eus bien tost fait : car il m'estoit deffendu de manger

Ceux qui sortent d'un siege ne doiuent guerres manger.

guerres apres auoir tant ieusné : & croy que cela fust cause de la mort de plusieurs, apres estre sortis : car il faut peu à peu remettre nature. Apres ie leur contay tout de point en point comme i'auois fait. Ils tindrent cela pour vne chose estrange. Le Baron se trouua fort esbahy, quand ie luy dis que le Prince d'Orie, l'auoit fuiuy iusques aux isles Dieres : & re-

mercioit Dieu de ce qu'il n'auoit creu
aucuns de sa troupe , qui vouloient
qu'il donnast sonde aux isles , & tint
mon sieur de Termes pour perdu , à
tout le moins son artillerie : mais ie
luy dis , que sur ma relation mon sieur
de la Molle auoit enuoyé à toute dili-
gence vers luy pour l'aduertir. Ie des-
peschay le lendemain matin le Sieur
de Lecussan en poste deuers le Roy ,
pour luy donner aduis de mon arriuée :
car mon sieur le Comte me dit , que *Le Roy*
sa Maiesté estoit fort mal contente de *mal con-*
moy , de ce que ie m'estois laissé re- *tant de*
duire au dernier morceau , & qu'il *sieur de*
n'en pouuoit esperer , que la perte *Montluc.*
mienne , & la ruine de la cité , d'où
dependoit toute sa reputation en Ita-
lie. Voyez les dangers qu'on court de
seruir les Princes. Il n'y a ordre ; ils
font nez pour commander , & nous
pour seruir & obeir : & Dieu sçait si
i'auois occasion de me plaindre d'auoir
esté ainsi abandonné & mis en proye.
Mais c'est tout un. Il leur semble ,
qu'encores ce nous est trop d'honneur
de mourir pour leurs querelles. Le Ba-
ron me pressa fort d'y despescher , &
fit promettre au Sieur de Lecussan , qu'il
courroit nuict & iour. Ce qu'il fist. Je

demeuray avec eux iusques au Venedredy matin , que ie prins la poste : & arriuay à Saint Mathurin le neuuiesme ou dixiesme iour de May , où ie trouuay ledit Sieur de Lecuffan , qui m'attendoit pour me dire la grande ioye , que le Roy auoit eüe quand il luy eust le tout raconté , s'esmerueillant sa Majesté de ma fortune ; & disoit à tout le monde , qu'il croyoit , que i'estois le plus heureux homme du monde , apres vn tel & si long siege , sans esperance de secours , estre fortly si honnorablement , ayant affaire non seulement à l'Empereur , mais aussi au Duc de Florence , qui desiroit se venger des Siennesois. Il tenoit pour vn grand heur l'escapade que i'auois faite sur la mer , des pattes du Prince d'Orie. Le lendemain matin ie fus au leuer de monsieur de Guise , qui ne se pouuoit saouler de m'embrasser : & m'amena en la chambre du Roy : lequel estoit encores au lit , toutesfois esveillé. Et à l'entrée de la chambre il commença à crier tout haut , me tenant par la main , Sire , voicy vostre homme perdu. Et alors ie m'approchay pour luy baiser les mains. Il m'embrassa de tous ses deux bras : &

*Le sieur
de Mont-
luc arri-
ué à la
Cour.*

me

me tint la teste contre sa poictrine presque autant comme on demeure-
roit à dire vn Patynostre, me disant
par deux fois, en me tenant de ceste
sorte : Hé monsieur de Montluc vous
soyez le bien venu. Je ne vous pen-
sois iamais veoir. Alors ie luy dis,
que Dieu m'auoit conserué pour luy
faire encores en ma vie vn bon ser-
uice. Il me dit, qu'il le croyoit : &
estoit bien asseuré, que pour ce faire,
ie n'y espargnérois ma vie : & me
retourna encores r'embrasser, puis se
leua. Je me retiray au logis, que le
Mareschal des logis auoit baillé audit
Sieur de Lecussan par le commande-
ment du Roy mesmes, aussi contant
du bon visage de mon maistre, com-
me s'il m'eust donné quelque riche
present : car i'ay esté tousiours glo-
rieux : aussi suis-ie Gascon. Cela seul
estoit bastant pour me faire passer tou-
tes impossibilitez. Monsieur le Car-
dinal de Lorraine, monsieur le Con-
nestable estoient pour lors à Ardres,
traictant quelque paix entre l'Empe-
reur & le Roy.

*Le Gascon
Glorieux.*

Après que sa Maiesté eust disné,
vers vne heure apres midy, il se re-
tira dans la gallerie, monsieur de Guise

seulement avec luy. Il me fit appeler. Monsieur de Guise ferma la porte apres que ie fus entré. Lors il voulut, que ie luy rendisse compte par le menu de ce qui s'estoit passé durant le siege, depuis le premier iour, que i'entray dans Sienné, iusques au dernier, tellement que le propos en dura si longuement, que les capitaines, qui estoient venus avecques moy, qui estoient demeurez sur la terrasse, me dirent, qu'ils auoient ouy sonner l'orloge cinq fois. Il print vn grandissime plaisir au retranchement du pain, & de la sorte que i'en auois vsé, & des remonstrances qu'auois faites aux capitaines & au Senat. Print aussi grand plaisir à la deliberation, que i'auois prins de leur donner la bataille dans la ville, & sur tout à l'ordre que i'auois fait, duquel il me souuenoit beaucoup mieux lors qu'à present, car il fut imprimé en Italie. Et la derniere fois, que ie suis retourné de la Toscane, le Duc d'Vrbain me dit à Pesero, qu'il l'auoit : & que iamais n'auoit trouué chose, qui plus luy pleust, que celle-là. Sa Maiesté voulut aussi, que ie le misse par escrit. Il en fit donner la coppie à plusieurs

*Le sieur
de Mont-
luc conte
au Roy de
sa char-
ge.*

Gouverneurs , & me souuient bien qu'il commanda qu'on l'enuoyast à Mariambourg , où monsieur le Marechal de Cossé estoit , ou bien monsieur de Fumel. Il eust grand pitié , quand il entendist le fait des bouches inutiles. Et sur la fin il me demanda deux choses : la première comme i'auois peu faire d'accorder les quatre parts & nations, ennemis mortels les vns des autres. Car tous generallement , comme l'on luy auoit dit , s'estoient comportez si bien les vns avec les autres sans desordre , qu'il n'estoit possible de mieux : ayant passé Espagnols & Flamans avec sauf-conduit. Ce qu'on tenoit à chose miraculeuse , comme faisoit bien l'Empereur mesmes , s'estonnant que i'eusse peu accommoder ces gens-là de ceste sorte. Et des Italiens mesmes , qui venoient d'Italie , luy en faisoient le recit , comme d'une chose non ouye. Alors ie luy respondis , que c'estoit vne chose , que i'auois trouuée facile. Et comme ie le vis affectionné à la vouloir entendre cognoissant qu'il prenoit plaisir d'en ouyr conter , ie luy

*Demande
du Roy.*

*Plaisante
Responce
du sieur
de Mont-
luc.*

le monde i'auois achepté vn sac & vne petite corde pour lier la bouche d'iceluy, ensemble vn fagot, ayant prins & chargé tout sur le col, à la veuë d'un chacun; & comme ie fus à ma chambre, ie demanday du feu pour allumer le fagot: & apres ie prins le sac, & là ie mis dedans toute mon ambition, toute mon auarice, mes haines particulieres, ma paillardise, ma gourmandise, ma paresse, ma partialité, mon enuie, & mes particularitez, & toutes mes humeurs de Gasconne, bref, tout ce que ie peus penser, qui me pourroit nuire à considerer tout ce qu'il me falloit faire pour son seruice: Puis apres ie liay fort la bouche du sac avec la corde, afin que rien n'en sortist, & mis tout cela dans le feu: Et alors ie me trouuay net de toutes choses, qui me pouuoient empescher en tout ce qu'il falloit que ie fisse, pour le seruice de sa Maiesté. Et si dis que tous ses ministres, à qui il bailloit les charges, vouloient faire de ceste sorte qu'il n'atteindroit pas à ce que Dieu a reserué pour soy, qui est le Ciel: mais si feroit bien à tout ce que Dieu a fait sur la terre, & mis en la puissance des

hommes. Car mon esprit estoit toujours demeuré libre, sans qu'aucune chose m'empeschast à considerer ce qu'il me falloit faire, pour venir à bout de mon dessein, qui estoit de ne sortir iamais de là, qu'avecques le dernier morceau en la bouche. Et veux dire que tous ceux qui se despouilleront & brusleront ce que i'ay dit cy-dessus, que Dieu assistera toujours avec eux: & l'ayant ainsi favorable, l'homme ne peut faillir de faire ce qu'il voudra. Car Dieu demeure toujours avec ceux-là: & au contraire fuit ceux qui ne seruent leur maistre de ceste sorte. Car ils faussent tous le serment qu'ils ont fait, ayant iuré de le servir loyallyement & fidellement. Ce que l'on ne peut faire estant garny & plein de tous ces vices & fautes. Sa Maïesté se print à rire: me commanda de dire la verité, & ne luy mentir point. Je luy dis, que ie ne luy mentirois non plus qu'à Dieu. Il me demanda, si monsieur de Strossi me pouuoit secourir: Car ses ministres de Rome luy auoient mandé plusieurs fois, qu'il le pouuoit faire, & qu'il n'auoit tenu qu'à luy, que ie ne fusse secouru. Alors ie luy respon-

*Autre demande
du Roy.*

dis, qu'il me demandoit vne chose, qu'il sçauoit mieux que moy. Surquoy il me dit, que ce ne pouuoit estre : car il n'estoit pas là où luy & moy estions. Lors ie luy dis, Vous autres Roys & Princes, auez les oreilles si longues, que vous entendez tout ce qui se fait, encores que vous en soyiez à cent lieues : toutesfois ie luy dis que sa Maiesté estant engagée en Escosse, à Calais, à Mariembourg, & autres chasteaux voisins, à Mets, en Piedmont, en Corseque, elle deuoit mieux sçauoir que moy, si apres auoir fourni à tout ce qui estoit besoin en ces lieux là où il estoit engagé, il pouuoit enuoyer argent audit Seigneur de Stroffi, pour faire vne leuée de gens de pied & de cheual, pour combattre vne si grande force que le Marquis auoit deuant Sienne : & s'il ne l'auoit, en quelle sorte vouloit-il, que monsieur de Stroffi me peut secourir : lequel n'auoit pas vn homme pour respondre aux Espagnols, & Allemans. D'Italiens il n'en eust trouué que prou : mais cela n'estoit pas ieu parti : que monsieur de Stroffi estoit plein de bonne volonté, mais qu'on ne peut voler sans ailles : que

*Le sieur
de Mont-
luc souf-
fient mon-
sieur de
Stroffi.*

par trois fois il auoit courū beaucoup d'hazard , pour son seruice : dequoy ie luy fis le conte. Alors sa Maieité me dist que ma responce l'auoit contenté & satisfait , & qu'il croyoit ledit Seigneur de Strossi estre son seruiteur , & trop homme de bien , pour tenir à luy : & s'excusa grandement à moy de ce qu'estant engagé en tant de lieux , il ne luy auoit esté possible d'enuoyer gens en Italie , audit Sieur de Strossi , qui fussent esté assez forts pour leuer le siege , & combattre le Marquis. Alors ie luy dis , Or doncques , Sire , ne vous en faut prendre à monsieur de Strossi , ny à vous auec. Car l'un & l'autre auez fait tout ce qui estoit en vostre puissance : mais cela vous aduifera vn'autre fois à pouruoir mieux à vos affaires. C'estoit vne charité qu'on prestoit audit Sieur de Strossi , qui estoit autant picqué & plus que le Roy , pour le fait de Sienne , pour la hayne qu'il portoit au Duc de Florence. Apres cela il sortist , & s'en alla trouuer la Royne , & Madame de Sauoye , qui est de present : & leur compta ce que ie luy auois dit , principalement de monsieur de Strossi. Dequoy la Royne fust tres-

aïse : & le lendemain me fist cest honneur de me remercier du bon office d'amy, que j'auois fait audit sieur de Strossi, qui luy appartenoit. Je n'auois garde de faire autrement : car outre que j'eusse menty, j'honorerois trop ledit Seigneur de Strossi. Il m'aimoit & estimoit plus qu'homme, qui sortist iamais de Gascongne.

*Madame
de Valen-
tinois.*

Cecy fust fait le Lundy, & le Mardy Madame de Valentinoïis me dist, qu'elle n'auoit iamais veu reuenir homme d'une charge, dont le Roy fust plus content & satisfait que de moy & qu'il me louoit grandement. Je ne sçay si elle le disoit pour me flatter : mais elle le sçauoit mieux que tout autre : car elle auoit fort gagné le cœur du Roy nostre maistre : elle dit, que j'estois bienheureux. Comme ie parlois avec elle, le Roy arriua, & me remit encores sur quelques propos de mon voyage. Or auois-ie la patente & declaration, que les Siennes m'auoient donnée, scellée de leur grand seau, declarant que ie n'auois iamais voulu consentir à la reddition de Sienne, ny capituler au nom du Roy : mais aussi qu'ils m'appeloient en tesmoing, s'ils auoient iamais voulu en-

rendre à aucune capitulation , iufques à ce qu'ils s'estoient veus reduicts à toute extremité , & au dernier morceau de pain. Sa Maiefté print la patante , & la leut : & apres me demanda , pourquoy ie n'auois voulu capituler pour moy & pour les foldats : & qu'il trouuoit eſtrange , que le Marquis ne m'eust deffait à la sortie. Alors ie luy reſpondis , que c'estoit pour deux raisons : l'vne que i'auois prins vne reſolution de ne rendre i'amaïs place , ains mourir pluſtoſt : & que le nom de Montluc , pour moy , ne ſe trouueroit iamais par eſcrit à rendre ny capituler , ne m'eſtant iamais mis dans place pour la rendre , ains pour la deffendre , ou y mourir , comme i'auois mandé au Marquis par le Seigneur Cornelio , & le capitaine Charry : & auſſi pource que ſi ſa Maieſté , ou vn qui viendroit apres luy , venoit à reconquerir Sienne , & que les Siennois ſe vouluſſent aider de la protection , en quoy ils s'estoient mis , qu'il demeurast en cela à ſa diſcretion & liberté. Car il n'auroit plus puissance de dire , que ſon Lieutenant , qui eſtoit Montluc , auoit conſenty à leur reddition , eſtant ſigné en leur capitula-

Reſolution du ſieur de Montluc.

tion , & qu'il ne deuoit point quitter sa fortune , ny celle de ceux qui viendroient apres luy à la Couronne de France. Les fortunes de la guerre sont diuerfes & variables. Milan & Naples ont esté deux & trois fois à nous. Sienne , Sire , le fera peut estre encores. Je n'ay rien fait , qui vous puisse preiudicier. Il trouua ma raison si bonne , qu'il en demeura fort content , & me commanda de faire mettre la patente dans mes papiers : & garder qu'elle ne se perdist iamais. Madame de Valentinois luy respondit , que les archives d'un pauvre Gentil-homme n'estoient pas si asseurez , que le Thresor d'un Roy , & que cela luy estoit de si grande consequence , qu'il deuoit commander estre mis dans le sien. Il me la print de ma main , & la bailla à un sien valet de chambre ou bien de Madame de Valentinois , pour la donner à monsieur le Garde des Seaux , qui depuis a esté monsieur le Cardinal de Sens : & luy commanda qu'il la mist en son thresor , où sont tous les titres du Roy. Or de cecy ne peut auoir que seize ou dix-sept ans , s'il plaisoit au Roy son fils qui regne à present , de commander à monsieur de

Fizes , qui estoit pour lors Secretaire dudit Sieur Cardinal , qu'il fit chercher la patante , ie m'asseure qu'elle se trouuera , & en voudrois auoir donné cinq cens escus d'un double , pour laisser memoire de moy , & l'insérer dans ce liure. Car cela resmoignera , que ie suis sorti hors de Siennne sans capitulation aucune , enseignes déployées , les armes sur le col , & tabourin sonnant. Ce qui ne se trouuera en liure quelconque , & que iamais homme aye fait un pareil traict. De sorte qu'il ne faut trouuer estrange , si ie desire tant d'en auoir un double. Il ne faut pas que le Roy mesprise tant cela , qu'il soit hors d'esperance , qu'il ne s'en puisse seruir quelque fois. Sa Maiesté doit estre curieuse de la faire chercher plustost que moy. Il y a plus d'interest.

Le iour apres , qui fut le Mercredy au soir , monsieur de Guise me dit , que le Roy s'estoit resolu de me bailler le lendemain l'Ordre , qui estoit en ce temps-là , chose si digne & recherchée , que le plus grand Prince de France ne se fut tenu pour content , s'il ne l'eust eu : & eust mieux aimé , que le Roy ne luy fit iamais aucun

*Le sieur
de Mont-
luc fait
Chevalier
de l'Or-
dre.*

bien. Parce que c'estoit vne marque d'honneur qui n'estoit pas profanée, comme il est à present. Le lendemain qui estoit le leudy matin, le Roy m'en honnora, & apres disner ie luy demanday congé pour m'aller mettre en ordre, & seiourner vn peu à Paris : car i'estois tout deschiré & rompu pour vn nouveau Cheualier de l'Ordre. Ce qu'il m'accorda, & me donna auant que je partisse, trois mil francs de pension prins à l'espargne, trois mil liures de rente sur son domaine, où la Comté de Guare, où i'ay partie de mon bien, estoit comprise. Bregeyrac faisoit le reste. Je iouys deux ans de la Comté, mais non de Bregeyrac, pource qu'il estoit hypothequé ailleurs : & ie desirois fort trouuer les moyens de le desangager, à cause que monsieur de Vallence mon frere y auoit vn Prieuré : & faisoit estat de demeurer là, plus qu'ailleurs. I'eusse bien empesché ce que depuis s'est monopolé en ce lieu là. Sa Maiesté me donna aussi deux mil escus argent comptant : & encores me dit, que ie luy demandasse quelque autre chose, qui me feroit besoin. Je luy demanday deux places de Conseillers au

*Recom-
penses du
Roy fai-
tes au
sieur de
Montluc.*

Parlement de Toulouse, pour ayder à payer le mariage de ma fille, que monsieur de Fontenilles a espousée, m'ayant mandé monsieur de Valence de Paris que ie luy demandasse cela, dont ie retirerois plustost argent, que d'autre chose. Lesquels sadite Maïesté me donna : & de cest argent ie mariay madite fille avec quelque peu d'autre, que ma femme auoit. Sadite Maïesté me promist la premiere compagnie de gendarmes, qui vacqueroit. Je n'eus pas la premiere, ny la seconde, mais i'eus la troisieme. Car les Roys promettent tant qu'il n'est pas possible qu'ils trouuent tout. Cecy aduint apres mon retour de Montalzin, à la seconde fois qu'il m'enuoya par de là : c'estoit la compagnie de monsieur de la Guishe. Voylà les biens faits, que ieus du Roy pour lors, qui ne furent pas petits. En somme, ieus ce que ie demanday. Et depuis la mort de ce bon Prince mon maistre, j'ay souhaitté la mienne cent fois, veu les grandes trauerfes, que l'on m'a donné. Il n'eust esté en la puissance des hommes de me les donner, s'il fust en vie : car il n'oublioit iamais les seruices que l'on lui faisoit, tant petits

Bon naturel du Roy Henry.

232 *Comm. de M. B. de Montluc*,
fussent-ils: & n'estoit en la puissance
des hommes de luy oster la bonne opi-
nion, qu'il auoit des personnes, quand
ils luy faisoient seruice. Et au con-
traire, quand un homme auoit fait
quelque chose mal à propos en son ser-
uice, quelque bon visage qu'il fit, pour
complaire à ceux, qui luy vouloient
oster la mauuaise opinion qu'il en auoit
pris, cela ne luy partoist iamais du
cœur, comme monsieur le Marechal
de S. André m'a plusieurs fois dit, &
déclaré sa complexion. Il estoit fort
son priué, & le cognoissoit tres-bien.

*Le Ma-
reschal de
S. André
fort priué
du Roy
Henry.*

Or sa Maiesté vint à Paris cinq ou six
iours apres, auquel ie demanday con-
gé pour aller iusques chez moy pour
veoir ma famille, ce qu'il m'accorda
volontiers. Je ne cacheray iamais les
biens & honneurs, que mes maistres
m'ont fait, car cela est à faire à un
cœur vilain & ingrat.





COMMENTAIRES
DE MESSIRE
BLAISE DE MONTLUC,
Mareschal de France.

LIVRE QUATRIEME.



PEINE auois - ie demeuré
trois sepmaines à ma mai-
son , que sa Majesté me de-
pescha vn courier , me man-
dant que ie l'allasse trouver là où il se-
roit , sans marchander ni attendre au-
tre commandement. Ce que ie fis in-
continent , n'ayant presque veu ma
maison , & mes amis : mais la gloire
de l'honneur est un poignant esguillon.
A mon arriuée sa Maieisté me dit ,
qu'il falloit , que ie m'en allasse en
Piedmont trouuer monsieur le Maref-
chal de Brissac , lequel m'auoit enuoyé
demander , pour commander les gens

*Comman-
dement
du Roy
au sieur
de Mont-
luc.*

234 *Comm. de M. B. de Montluc,*
de pied , faifant estat , que pour fecou-
rir Saint Iago , où monsieur de Boni-
uet s'estoit enfermé , il luy faudroit
donner une bataille. On me depescha
deux iours apres que ie fus arriué , me
monstrant le Roy beaucoup de signes
d'amitié , & d'auoir agreable mon
seruice. Ie trouuay monsieur le Ma-
reschal de Brissac à Turin malade de la
goute : & le lendemain j'allay trouuer

*Monsieur Daumal-
le com-
mande à
l'armée.* monsieur Daumalle , qui comman-
doit l'armée à Saint Valant pres Vul-
pian. Laquelle estoit composée de
cinq mil hommes de pied , mil hom-
mes d'armes , & douze cents cheuaux
legers. Le Roy me donna à mon de-
part vn coursier des siens , qui estoit
tres-bon. Ie faisois venir mon train
apres moy , car ie m'en allay en poste.

*Le Sieur
de Mont-
luc recog-
noit Vul-
pian.* Le mesme jour , que i'arriuay vers
monsieur Daumalle , ie voulus aller
reconnoistre Vulpian , pour y mettre
le siege : car le Duc d'Albe ayant mal
fait ses besognes , auoit quitté S. Iago.
Ledit Sieur Daumalle me presta un
petit cheual gris. En plein iour i'allay
reconnoistre la ville à moins de cin-
quante pas : car ie leur voulois mon-
trer que pour auoir veu ma femme , ie
n'auois rien oublié de ce que ie soulois
faire.

faire. Ceste recognoissance se fist à sa veüe, & de plusieurs autres. Le luy en rendis si bon compte, qu'il trouua que du tout ie luy auois dit la vérité. Lendemain il mist partie de l'armée vers le chasteau, où les ennemis auoient fait un grand terre-plein environné d'un grand fossé, avec vne tenaille qui couuroit le chasteau: & entre la tenaille & le chasteau y auoit quatre vingt pas ou plus, & vne tranchée, qu'ils auoient faite encores au milieu: afin que s'ils perdoient la teste de ce grand bastion & tenaille auant qu'ils fussent au chasteau, se peussent retirer à ceste tranchée. Monsieur Daumalle auoit pour lors pour Commissaires de l'artillerie Duno & Balasergues: qui firent commencer les tranchées à plus de cinq cent pas de la ville, & trouuerent que la terre estoit pleine de petits cailloux, de sorte que cent hommes n'eussent pas fait en un iour vingt pas de tranchée: & amuserent deux iours ledit Sieur en ceste besogne. L'estois fort malconcant que nous ne faisions ce que ie voulois. A la fin monsieur Daumalle se resolut de veoir luy même ce que ie lui conseillois de faire:

Ce siege fut en Septembre.

1555.

Monsieur Daumalle va luy mesmes

*reco-
nois-
tre.*

& allasmes à vne heure de nuict par le costé du coing de la ville à main gauche & par derriere vne petite chapelle, qui estoit à quinze ou vingt pas de la contre-escarpe. Il ne mena homme du monde avec luy que moy, & Fequieres, qui depuis, à ce que i'ay entendu, a tourné visage à la maison de Guise, combien que ledit Seigneur lui faisoit autant d'honneur ou plus, qu'à gentil-homme qui fut pres de luy. Ledit Seigneur & moy marchasmes par dessus la contre-escarpe & Fequieres par dessous. Nous mesurions combien de contre-escarpe nous falloit couper pour mettre l'artillerie sur le bord du fossé, & voir aussi si le recul du canon seroit veu de l'arquebuzerie des ennemis, & nous aussi, si nous logions contre la contre-escarpe. Nous nous en allasmes par dessus icelle, & tout le long des fossés plus de six vingts pas, passasmes deux sentinelles des leurs, sans qu'elles nous dissent mot parlans à l'oreille: que si nous eussions porté deux eschelles, il eust fait tenter la fortune pour veoir ce qu'il en fust aduenu. Car elle se presente souuent sans y penser, & lors que moins on y songe. Et quand se

vint à la troisiéme, elle cria & esueilla toutes les autres, lesquelles à ce que ie pense dormoient: & ainsi ledit Seigneur & moy avec luy nous retirasmes vers la petite chapelle, beaucoup mieux accompagnez au retour qu'à l'aller, mais c'estoit de bonnes arquebuzades: & fusmes contraints nous ietter dans la chappelle, le derriere de laquelle Fequieres gagna. Or icelle chappelle estoit ouuerte deuers la ville: & là où la porte se tenoit, quand il y en auoit, c'estoit vn pillier de pierre carré de la grosseur d'un homme, qui n'eust pas esté gueres gros: & nous hastoient tant les arquebuzades, que monsieur Daumalle fut contraint se ietter tout en un coup derriere le pillier tout droit, & moy derriere luy, car toute la chappelle estoit ouuerte. Le n'ouys à ma vie de plus grandes arquebuzades, ie ne scay si c'estoit la peur. Il y auoit dequoy en auoir: car les balles presque tousiours touchoient le pillier duquel monsieur Daumalle se couuroit. Il me seruoit à moy de pauois, car ie lui tenois la teste & mon corps contre le sien. Ils nous tindrent là assiegez plus d'une grand' demy heure: & faut bien

*Danger
où mon-
sieur Dau-
malle &
le sieur de
Montluc
se trou-
uent.*

238 *Comm. de M. B. de Montluc,*
dire qu'ils nous auoient ouys , quand
nous nous estions iettez dans la chap-
pelle : nous les oyons crier *iuro à Dios*
ellos son en la capilia : io los è entendidos.
Monsieur Daumalle m'a depuis sou-
uent fait le conte des belles affres que
nous eufmes. Car ie croy que plus de
cent arquebuziers se vindrent affuster
pour nous tirer. Ils iettoient des bran-
dons de pailles allumez dans le fossé.
Nous voicy bien , dit-il , s'ils font une
sortie , raisons nous monsieur , luy
dis-ie , ceux de Lorraine ne sont pas si
mal-heureux que d'estre pris en tapi-
nois. Le droit de la guerre ne veut pas
qu'ils sortent sans sçavoir que c'est.
Nous auons icy vn bon bouclier Bar-
fellonois. Les balles donnoient tou-
siours contre la pierre. Il nous seruoit
bien de serrer les fesses. Fequieres fit
vn tour mal habille : car ne sçachant
où nous estions , il siffoit comme pour
nous appeller. Je crois que cela les fist
opiniastrer à tirer tant. Cependant
l'alarme se donna par tout. A la fin
ils se fascherent autant de tirer , com-
me nous d'auoir patience : puis fortif-
mes , & trouuâmes Fequieres derriere
la chappelle qui auoit esté plus habille
que nous , & là monsieur Daumalle

conclud , qu'il meneroit la nuit enfuyuant l'artillerie sur le bord du fossé , & toutes nos enseignes. Et par là ie gagnay la bataille contre les Commis-faires de l'artillerie , qui disoient , que tout le monde y mourroit , & qu'il faudroit abandonner l'artillerie : & par bonne fortune arriua monsieur de Caillac. Le matin monsieur Daumalle luy conta tout ce que nous auions veu la nuict , moy present : & luy bailla Fequieres pour aller recognoistre par derriere la chappelle : car la nuict mesmes ledit Sieur ordonna deux enseignes , qui estoient loin de la chappelle , pour s'aller camper au derriere d'icelle : les assiégez firent là une incongruité : car ils ne se deuoient contenter de l'ouurir , mais deuoient la raser. Et apres le retour de monsieur de Caillac , il fut de notre opinon. Monsieur Daumalle permist à monsieur de Caillac & à moy d'aller mener les pionniers couper la contre-escarpe : & ordonna que Duno & Balasergues meneroient l'artillerie apres nous : & fit faire vne gabionnade dans le pré à quarante ou cinquante pas de la contre-escarpe , pour mettre les poudres , & au point du iour nous eufmes couppé la contre-

escarpe, les canons placez, pour tirer :
 de sorte que la bouche du canon en-
 troit dans le fossé. Commencant à
 faire la batterie, monsieur de Bonniuet
 alloit & venoit à la teste du bastion,
 & là où monsieur Daumalle se te-
 noit, aussi faisoit bien monsieur le
 Marechal de Cossé. Deux nuits,
 deuant qu'on fist les tranchées à la
 teste du bastion qui couuroit le chas-
 teau, pour s'approcher du fossé, le
 Baron de Chipy Maître de camp fit
 mettre en camisade ses soldats, & à
 coup perdu se ietta dans le fossé pelle
 mesle avec eux : & gagna deux caze-
 mattes, qui flanquoient le fossé, &
 tua ceux qui estoient dedans, car ils
 ne se peurent retirer : & en mesme
 instant monsieur Daumalle commanda
 les ingenieurs, qu'ils fissent des mines à
 la teste du bastion. Ce qu'ils firent,
 & en firent trois. Monsieur de Cossé
 couroit au bastion veoir si les mines
 estoient prestes : & puis reuenoit à
 monsieur Daumalle à la batterie que
 nous faisons. Iusques icy ie n'ay peu
 nommer monsieur d'Anguyen, mon-
 sieur le Prince de Condé son frere, ny
 monsieur de Nemours, pource qu'ils
 y estoient pour leur plaisir, & n'y

Chipi
 Maître de
 camp.

Trois
 Princes
 en ce sie-
 ge.

auoient point de charge , estant accourus de la Court au bruit d'une bataille , qu'on disoit se deuoir donner bientoſt : parce qu'on n'eust iamais pensé que le Duc d'Albe s'en fust retourné sans coup ferir. Ils ne s'abandonnerent iamais ; & a l'assaut allerent ensemble , & monsieur de Bonniuet avec eux. Il vint plusieurs autres Seigneurs , entr'autres monsieur de Vantadour , de Lude , de Lausun , de Malicorne , de la Chasteneraye. Or les deux mines firent vn grand exploit : car elles renverserent presque toute la vouſte du bastion dans le fossé , & sur la grand' pouſſierre qui se fit , le Baron de Chipy , qui estoit Maistre de camp , & tout les capitaines qu'il auoit avec luy sur la ruine , vindrent aux mains avec quatre vingts ou cent Espagnols , qui estoient entrez quatre ou cinq iours deuant , non sans perte de beaucoup des leurs à l'entrée , & bien deux ou trois cens dauantage : tous lesquels estoient hommes esleus & choisis parmy toutes les compagnies Espagnoles. Et là y en mourut plus de quatre vingts : & leur gagnerent encores nos gens ceste tranchée , qu'ils auoient faite par le milieu , car ils se voulurent reti-

242 *Comm. de M. B. de Montluc,*
rer à ceste tranchée & les nostres les
suivirent de si pres qu'ils y entrèrent
aussi tost qu'eux. Ils se voulurent iet-
ter fuyant droit au chasteau , celui
qui le gardoit ne voulut pas abbatre
le pont , & là furent acheuez de tuër.
Et voilà le succès du bastion , qui fut
bravement emporté. Là fut tué vn
neveu du Duc d'Albe Cesar de Na-
ples : entre les prisonniers le Sieur Si-
gismond de Gonsague , & le capitaine
Lazare Lieutenant de la garde du Duc
d'Albe , & plusieurs autres desquels ie
n'ay pas retenu le nom. Il faut retour-
ner à la bresche , qui n'estoit pas à la
verité dire trop irraisonnable. Elle fut
assaillie en mesme heure , que le bas-
tion , ainsi le falloir-il faire. Et quoy
que tous ces Princes & Seigneurs y
fissent tres-bien leur deuoir , y estans
montez pour donner courage aux sol-
dats , si est-ce que les ennemis la def-
fendirent fort brauement : & nous
renuerferent bien battus. Là fut tué le
Comte de Creance , & plusieurs au-
tres luy tindrent compagnie. Sçachant
l'effect que d'autre costé auoit esté
fait , cela nous consola , & donna es-
perance à tout le monde que nous
viendrions à bout de nostre dessein.
Estant

Estant monté sur le terre-plein du boulevart , qui estoit demeuré entier , ie dis à Duno qu'il allast dire à monsieur Daumalle qu'il falloit loger trois ou quatre canons sur ce terre-plein , pour foudroyer les ennemis dans la ville. Ce qui fut tout aussi tost fait , de sorte que le matin tout ioua.

Cela estonna ceux de dedans , de sorte qu'ils commencerent à penser à leur conscience , & parlementer. Enfin la capitulation fut faite , & aussi pour le chasteau , contre lequel , pour sauuer l'honneur de celuy qui estoit dedans , on fit tirer cinquante coups de canon. Cependant les nouvelles vindrent comme monsieur de Termes s'en venoit avec charge du Roy. Cela fut cause , que plusieurs parloient diuersement de cela : & en disoit on diuerses raisons. Vn Secretaire de monsieur le Marechal de Brissac , nommé Verbin , arriua le lendemain à midy avec des lettres à tous les Princes , s'excusant que ceste charge de monsieur de Termes n'estoit iamais venuë de luy. Et me dit ledit Verbin de la part de monsieur le Marechal , qu'il me prioit bien fort que ie parlasse à tous les Princes , afin qu'ils n'eussent

Il défaut icy beaucoup de particularitez de ce siege escrites par le Seigneur de Montluc comme il appert par le 6. liure.

ceste opinion de lui : ce que ie fis , encore que ie n'eusse pas , peut estre autant de credit que beaucoup d'autres : mais ie ne scay que c'est , i'en ay toujours eu plus que ie n'auois esperé.

*Avis du
sieur de
Montluc.*

Or pour vn mot seulement que ie dis à ce Verbin , qui estoit qu'il sembloit aduis à Mr de Gounort , Viconte de Gourdon , & à moy , que monsieur le Marechal deuoit mander au Roy qu'il pleust à sa Maiesté retarder la venue de monsieur de Termes , pour quelques iours , car peut-estre ces Princes feroient difficulté d'obeir à vn Gentilhomme , parce que ledit Sieur de Termes n'auoit lors autre titre , & que cela peut estre les occasionneroit de quitter l'armée. Ce qu'ils ne pouvoient faire sans que beaucoup de gens les suivissent , qui pouuoit apporter beaucoup de preiudice à son seruice. Ledits sieurs de Gounort , de Gourdon , & moy , n'auions tenu le soir auparauant autre langage , mais cest homme de bien alla dire à monsieur le Marechal : que ie lui auois déclaré , que ie n'obeyrois point à monsieur de Termes , à quoy ie ne pensay iamais : car autrefois ie luy auois obey : & n'estois pas si haut

monté sur mes mulets de coffres , que
 ie voulusse faire le Prince. Il a tou-
 siours esté mon amy & de tous mes
 freres , autant ou plus que de gentil-
 homme de la Guyenne : & tout ja-
 mais avons vescu ainsi. Cela se passa
 en ceste sorte , & marchasmes droit à
 Moncaluo , attendant la venue de
 monsieur de Termes , qui arriua au
 siege , & en usa fort sagement , aussi
 estoit il fort aduisé : car il ne se vou-
 lut iamais entremettre de commander.
 Nous mismes le siege au chasteau , car
 la ville fut emportée, aussi n'estoit elle
 pas forte , & le batismes par le cul
 d'un bastion à main droite de la porte.
 Il ne fut possible y faire bresche : car il
 eust fallu monter avec des eschelles ,
 de sorte que nos gens l'ayant voulu
 tanter furent repoussez. I'allay la nuit
 recognoistre le fossé iusques sous le
 pont leuis tout contre la muraille ,
 pour voir s'il n'y auoit point de flanc
 qui deffendit la porte : & trouuay
 qu'il y en auoit vn bas , qui battoit
 au long du fossé : ils me ietterent des
 cercles à feu , & m'y blessèrent vn
 fergent de la compagnie de monsieur
 de Lieux mon frere : & si n'estions que
 trois , qui entraimes dans le fossé.

*Moncal-
 vo recog-
 neu.*

Je fis une consultation avec monsieur de Caillac , que nous missions deux canons sur la contre-escarpe , vis à vis de la porte , afin de tirer droit aux pieces de bois où les chaisnes estoient attachées : afin que le pont tombast d'un autre costé , & ainsi nous mettrions bientost en pieces la porte , qui estoit par le dedans. Nous dismes tout à monsieur Daumalle , qui nous en laissa faire. La nuit suiuvante nous logeasmes les gabions , & trois canons , ce qui fut fait à une heure apres minuit. Tous les Princes vindrent veoir nostre besongne : & monsieur d'Anguien me prenant par le faux du corps me dit , Vous avez esté mon soldat autrefois , à present ie veux estre le vostre. Monsieur, dis-ie , vous soyez le bien venu : vn Prince ne se doit pas desdaigner au besoin de servir de pionnier , voicy besongne pour tous. Monsieur de Cossé y arriua peu apres, lequel ie prins par la main & l'amenay veoir tout nostre fait. Apres que ces Princes & Seigneurs eurent veu tout , ils s'en allerent reposer attendant le iour. Je demeuray là. Le matin comme le capitaine du chasteau se vid bridé de cette sorte , il commença à faire battre la

chamade , & se rendit vies & bagues fauves , avec permission de traifner vne petite piece d'artillerie , pour luy fauuer son honneur , & s'en alla droit au pont d'Asteure , où estoit Dom Arbre leur Maistre de camp , qui ne lui donna pas loisir d'entrer en aucune maison pour compter sa fortune : car soudain il le fist pendre & estrangler , comme il *Capitaine pendu.* meritoit : car pour le moins deuoit-il attendre un assaut , il nous eust donné prou d'affaires.

Vous qui vous enfermez dans les places , aduisez à ne prendre pas si tost l'effroy , & encores que vostre ennemy ait bien accommodé tout son fait , & que vous ayez occasion d'entrer en quelque soupçon que le vostre aille mal , si est ce que s'il y a tant soit peu d'apparence de vous pouuoir deffendre , esuertuez vous , retranchez vous. Et pensez que vostre ennemy a plus de peur à vous attaquer , que vous n'avez à vous deffendre : car la place est bien chetive , si vous n'avez quelque moyen de soutenir : puisque vous auez osé attendre le canon. Ne pensez pas sauuer vostre honneur , pour emporter ou vostre enseigne ou quelque piece d'artillerie , comme fist cestuy-cy : car

*Remon-
strances
aux Gou-
verneurs
des places.*

tout cela enfin n'est pas grand cas. Et celuy qui vous assiege le vous accorde aisément, pourueu qu'il en ait le profit, & vous la honte & le dommage. Songez les regrets que ce pauvre capitaine qui se rendit si legerement faisoit estant sur la potence, & s'il n'eust pas mieux aymé mourir sur la bresche. Lors que vous aurez fait tout ce qu'un homme de bien peut faire, il n'y a point d'ordre, il se faut rendre.

Importance de Moncaluo

Ceste prise importa fort : car Moncaluo bridoit & tenoit suiet non seulement le pont d'Asteure, mais toutes les places le long du Pau, & de la plaine du Marquisat de Montferrat, & avec cela assieuroit fort Casal. L'armée séjourna là sept ou huit iours, pendant lesquels arriuerent les nouvelles aux Princes & à monsieur Daumalle, que le Roy auoit quelque mescontentement pour la desobeyffance, dont i'ay fait mention cy-dessus. Le fus meslé parmi ceste belle histoire, m'ayant presté quelque bon personnage ceste bonne charité, de dire que ie mettois le feu aux estoupes. Et vint la chose si auant que monsieur le Connestable m'enuoya vne lettre par laquelle il me mandoit que le Roy luy auoit com-

Le sieur de Montluc calomnié.

mandé m'escire , que ie me retirasse chez moy , & que pour ceste guerre il ne vouloit plus que ie m'en entremisse. Cela ne m'estonna pas fort , car ie sçauois bien que le Roy me feroit cest honneur de m'ouyr. Monsieur le Marechal de Brissac enuoya son frere monsieur de Cossé à la Cour , lequel assura le Roy du contraire de ce qu'on luy auoit fait entendre de moy , dont le Roy m'en tint quitte à mon arriuée. Car cela fust cause que ie m'en allay à la Cour : & me fit aussi bonne chere que de costume , s'informant bien particulierement des affaires du Piedmont , mesmes des Princes qu'il y auoit en nostre armée , desquels le Roy n'estoit gueres content : mais ie n'auois garde de trop parler. Car apres , ou monsieur le Connestable , ou madame de Valentinois l'ussent sçeu , & de main en main il eust esté dit que c'estoit Montluc qui en auoit conté.

O qu'un homme qui vit parmy les grands , doit estre sage ! Les rapporteurs n'ont rien de bien au ventre , autant en voulut-on faire de monsieur de Strossi au retour d'Italie : bien me seruit d'en parler sagement. Car la

Aduertissement pour ceux qui abouchent les grands.

Royne & luy m'en sentirent bon gré. Il faut bien si vous sçavez quelque chose fort importante en aduertir vostre maistre, mais pour l'aller entretenir en disant, Sire, vn tel fait mal, vn autre va laschement en besongne, vn autre fait cecy & cela, vous meritez qu'on vous donne des poignardades. Car il faut parler autrement des grands, celuy qui auoit dit au Roy que i'estois cause du trouble c'estoit vn meschant homme : car il n'en estoit rien. Il ne faut pas trouuer estrange si l'on presse des charitez à moy, qui suis pauvre Gentil-homme : l'on en presse bien aux Princes & aux autres, pour bien grands Seigneurs qu'ils soient. Ce sont choses ordinaires à la Cour des Princes. C'est là où on fait profit : car le recullement d'vn sert d'auancement à l'autre, ils iouent aux boutehors. Il n'y a ordre, il faut passer par là : car vn bon cœur ne peut demeurer chez soy : & qui se veut chauffer, il faut qu'il s'approche du feu ou du soleil. Nostre Soleil c'est le Roy qui nous esclaire & eschauffe de ses rayons, quelque part que nous soyons. Si quelqu'vn se met au deuant il faut prendre patience, avec la

*Charitez qu'on
presse en
la Cour
des Prin-
ces.*

deuise de monsieur de Guise, *Chascun* ^{Deuise}
son tour. Apres auoir quelque peu se- ^{de mon-}
 journé à la Cour ie prins congé de sa ^{sieur de}
 Maiesté, & m'en vins à ma maison,
 où ie demeuray cinq ou six mois en
 repos. Lors que i'estois occuppé pour
 accommoder les affaires de ma mai-
 son, laquelle ie n'auois eu le loisir
 iamais de recognoistre, sa Maiesté me
 despescha vn courrier, pour me faire
 venir là où il seroit, en poste, m'es-
 criuant que i'enuoyasse mon train droit
 à Marseille, sans me mander, là où
 il me vouloit enuoyer. Ce que ie fis :
 car ie n'ay iamais esté retif : & estant ^{Les Sienn-}
 arriué à la Cour ie trouuay deux Gen- ^{nois ren-}
 tils-hommes Siennes qui estoient ve- ^{noient}
 nus supplier sa Maiesté de la part de ^{deman-}
 tout leur pays, me vouloir enuoyer ^{der le Sr}
 par delà, pour les commander, fai- ^{de Mont-}
 sant de grandes plaintes contre mon- ^{luc.}
 sieur de Soubise, non qu'il les tyran-
 nifast, ny fist aucun desplaisir, mais
 pour quelques places qu'estoient per-
 duës de leur estat : & croy que mon- ^{Le fieur}
 sieur de Soubise y auoit fait ce qu'il ^{de Sou-}
 auoit peu : mais nul ne prend en gré ^{bise.}
 aucune perte. Tout le monde iuge les
 choses par l'euenement. A mon arri-
 uée le Roy dit, qu'il falloit que ie

retournasse à Montalsin, pour y estre son Lieutenant general. Je contestay vne grande piece pour n'y aller point, non que la charge ne fust honorable : mais i'auois crainte de m'y embarquer sans biscuit. Et à la verité qui veut bien faire ses affaires, il ne faut aller si loing : car on ne s'en souuient pas : & si quelque chose se presente pour vostre aduancement vous n'en auez nulle nouuelle. Mais pour l'honneur & la reputation il vaut mieux estre souuent loing que pres. Vostre renommée croist plustost : & les estrangers vous reuerent plus que les vostres. D'ailleurs ie desirois estre employé aux guerres en la France, pres de sadite Maiesté : mais il ne fust possible m'en pouuoir excuser : aussi ie n'eusse sceu refuser mon bon maistre. Les Siennes dès que ie fus arriué, presserent sa Maiesté encore pour me faire partir, preschant plus de loüanges de moy que ie n'en meritois. Or sans plus seiourner ie partis & prins mon chemin à Marseille, où ie trouuay sept enseignes de gens de pied, que le Roy enuoyoit à Rome, lesquelles monsieur de la Mole commandoit : & mon fils aîné Marc-Antoine

*Le sieur
de Mont-
luc Lieu-
tenant de
Roy à
Montal-
sin.*

estoit vn des capitaines avec le capitaine Charry. Le Baron de la Garde nous embarqua, & nous descendit à Ciuitauechia : & incontinent prins la poste & m'en allay à Rome.

Or le Cardinal Carraffe qui estoit venu en France, supplier le Roy de commander, que s'ils auoient affaire à Rome pour le seruice du Pape que ie m'y arrestasse pour quelque temps. Ce que sa Maiesté me commanda : & trouuay ledit Cardinal desia arriué à Rome : & fus fort bien venu de monsieur le Marechal de Strossi, dudit Sieur Cardinal, & du Duc de Palliane son frere : & le lendemain me menerent baiser les pieds du Pape, lequel me fit fort grand' chere, s'enquerant de moy des particularitez de la France. Le Duc d'Albe auoit desia son camp à vingt mil pres de Rome. Ledit Cardinal auoit fait vne leuée de trois mil Suisses, qui desia estoient arriuez à Rome. I'estois tousiours d'opinion, que nous sortissions à la campagne à dix mil de Rome, & que là nous nous campissions en attendant que le Duc d'Albe s'approchast des murailles de la ville, craignant tousiours qu'il aduiendroit, ce qu'il ad-

*Le Duc
d'Albe
contre le
Pape.*

uint : mais le sieur Camille Vrsin ,
 qui gouvernoit les affaires de la guerre
 pour le Pape , n'y voulut iamais en-
 tendre , & commença à designer des
 fortifications par dedans la ville pres
 des murailles , & me fut baillé vn
 quartier. Plus de trois sepmaines s'es-
 coullerent sans que le Duc d'Albe s'ap-
 procha de plus de cinq à six mille. Et
 se donnoient toute la nuit les Ro-
 mains l'alarme entr'eux mesmes , de
 sorte qu'on ne voyoit que fuyr gens
 vers Saint Pierre , autres aux maisons
 des Cardinaux , qui tenoient le party
 du Roy d'Espagne : & ne vis iamais
 tel desordre. Ce peuple n'est gueres
 aguerry : aussi est-il composé de di-
 uerses nations. Je croy que ce n'est
 pas la race des Cefars , Catons , Sci-
 pions & autres. Il y a là trop de deli-
 ces & voluptez pour produire grand
 nombre d'hommes de guerre. Et parce
 qu'il sembla aduis à Messieurs les Car-
 dinaux d'Armagnac , & du Bellay , de
 Lansac , & d'Auanson , que si ie fai-
 sois vne remonstrance aux capitaines
 commandans en la cité , pour leur ap-
 prendre l'ordre , que i'auois tenu à
 Sienne. qu'ils le prendroient en meil-
 leure part de moy , que de tout autre ,

*Le peu-
 ple de
 Rome
 mal a-
 guerri.*

leur souuenant & à toute la cité, de la reputation que i'auois acquise audit siege. Monsieur le Marechal de Strossi & monsieur le Cardinal Carraffe le trouuerent bon : & firent venir tous les principaux, & tous leurs capitaines, enseignes & Lieutenans dans la bassecour du logis de monsieur d'Ananfon, qui pour lors estoit Ambassadeur : & là ie leur fis la harangue, qui s'ensuit, en la presence desdits Sieurs en langage Italien. Monsieur de Lansac est en vie, qui me dit qu'il n'eust iamais pensé, qu'un Gascon fut deuenue bon Italien.

Messieurs, depuis que le Duc d'Albe s'est approché vn peu de vostre cité, il nous semble à nous qui sommes François, que vous auez conçu quelque nouuelle peur, & sans grande occasion : de sorte que pour la moindre chose, vous entrez en vn merueilleux effroy. Que si les ennemis s'approchoient de vos murailles, lors que ceste confusion est parmy vous, ils entreroient dedans, tout à leur aise, sans grande contradiction : pource qu'au lieu que vous deuiez tenir vn silence dans vostre cité, mesmement la nuict, & que vous deuiez plustost

Harangue du sieur de Montluc aux Romains.

courir aux murailles , que de vous mettre au grand desordre , que vous faictes : car on void vne partie courir à sainct Pierre , autres aux Eglises , autres aux maisons des Cardinaux Espagnols avec toute la confusion du monde. Cela ne peut proceder , que d'une de deux choses , ou bien faute de cœur , ou faute que vous ne commandez pas bien l'ordre qu'il faut que vos gens tiennent , quand les affaires se presentent , tant la nuit que le iour. Si vous le faites pour faute de cœur , c'est donc signe , que vous n'auiez pas bien consideré quelles gens sont vos ennemis : & que peuuent-ils estre autres qu'hommes comme vous ? ne portons nous pas les armes pareilles aux leurs , & aussi bonnes que les leurs ? ne sont-ils pas suiets à recevoir la mort de nos coups , comme nous des leurs ? la querelle du Pape n'est-elle pas iuste & sainte , & meilleure que la leur ? Ce qui nous doit faire esperer que Dieu est avec nous. Et quelle part ny portion a le Roy d'Espagne à Rome ny aux terres du Pape ny en vos maisons , pour faire que Dieu le vueille ayder plus qu'à nous ? Qu'est deuenue la hardiesse de

vos anciens Romains , qui vous ont
laissé ceste grande renommée , qu'ils
ont acquise en leurs vies ? Quelle au-
tre nation habite aujourd'huy à Rome
pour vous auoir osté le cœur que vous
a laissé ceux , de qui vous descendez
de toute ancienneté , comme vous
dites ? Ô Messieurs ? que vous faites
vn grand tort à la renommée de vos
predecesseurs , de monstrier , que vous
ayés crainte de gens , qui ne sont que
hommes comme vous ? Vous faictes
beaucoup pour les ennemis , de ce
qu'ils se pourront vanter auoir fait
peur à ceux , qui anciennement fai-
soient trembler toutes les nations du
monde. Si ceste peur procede du mau-
uais ordre , que vous y auez donné à
vostre commencement iusques icy , il
n'y a rien encores tant gasté qu'en vn
seul iour vous n'y puissiez remedier.
Vous en allant tout à ceste heure ad-
uisez d'où procede ce deffaut , &
promptement y remediez. Et ainsi
vous ferez cognoistre à tout le mon-
de , que ce n'est pas faute de cœur :
mais que c'est faute de l'ordre , & ainsi
tout vostre peuple reprendra courage
se voyant dans le bon ordre , que
vous y aurez donné. Ne trouuez pas

estrange, si ie m'esbahis de ce que ie
 vois dans vostre cité, m'estant trouué
 dans Sienne commandant au peuple
 ayant le Marquis de Marignan plus
 de force deux fois, que n'a le Duc
 d'Albe. Je puis dire avec beaucoup
 d'honneur pour les Siennes, que ie
 ne cogneus à ma vie vn seul citoyen
 auoir peur. Bienheureux sont les Siennes,
 qui ont monstré estre extraicts
 & vrais enfans legitimes de vos an-
 ciens peres, qui ont fondé ces mu-
 railles, & les leurs aussi, à ce qu'ils
 m'ont asseuré: aussi portent ils mes-
 mes armes que vous. Et encore que
 la cité soit perduë, leur renommée &
 valeur n'est pas pour cela enterrée,
 qui donnera tousiours esperance à vn
 chacun, qu'elle se pourra quelque
 iour recouurer par leur vertu & har-
 dieffe. Que si vous ne faites autre-
 ment, que comme i'ay veu iusques
 icy, ie veux dire, que ie seray tou-
 siours plus asseuré de deffendre Sienne
 n'ayant que les femmes Siennes
 avec moy pour combattre, que non
 pas deffendre Rome avec les Ro-
 mains, qui y sont. Excusez moy, ie
 vous prie, si ie vous dis la verité: car
 ie ne le fais pour aucune commodité,
 que

*Louange
 des Siennes.*

que ie pense en pouuoir reuenir au Roy mon maistre , ny à moy : mais pour vostre bien & pour esuiter la ruyne totale de vostre ville : laquelle si elle est enuahie par vos ennemis vous ferez miserablement saccagez , & la ville pirement traictée qu'elle ne fut du temps de monsieur de Bourbon. Croyez , Messieurs , que si i'estois aise de vostre perte ie ne vous ferois pas la remonstrance en la presence de ces Seigneurs , que ie vous fais. Mais en estant marry comme vostre serviteur , puis que vous estes bons amis & confederez du Roy de France mon maistre , & desirant mourir avec vous pour vostre conseruation , cela m'a contrainct vous faire entendre ce que ie vous ay dit. Et aussi que Messieurs les ministres du Roy , qui sont icy , m'ont asseuré que vous la prendrez en meilleure part de moy , que de tout autre , pour l'estime que vous auez de moy depuis le siege de Sienne. Ce que ie vous prie de ma part vouloir faire : & si en aucune chose ie vous y puis ayder , me le faisant sçauoir , ie me transporteray incontinent à vostre conseil. le croy que le souuenir du sac de

*Les Rois
mains
surpris*

*par le
sieur de
Bourbon,*

Bourbon vous met en doubte. Vous fustes lors surprins, à present vous auez les armes aux mains. N'ayez peur, ne craignez vos ennemis, ains departez vostre ville, donnez à chacun son lieu, pour se rendre au besoing : afin que vostre confusion ne nous oste le moyen de vous secourir, si l'ennemy se presente. Et chassez la peur de vos citoyens, s'il y en a : qu'on ne voye nulle confusion : & ne vous faschez du reste. Vous verrez bienstost vos ennemis forcez de se retirer, sçachant le bon ordre que vous y aurez mis. Ils me remercierent bien fort. Et ainsi se departirent de nous, nous assurant qu'ils y alloient donner tel ordre, que les accidens qu'estoient suruenus, n'y aduiendroient plus, me priant bien fort me vouloir trouuer en leur conseil le lendemain matin, & que là ils me monstreroient l'ordre qu'ils y alloient donner, pour prendre là dessus mon aduis & conseil. Ce qui fut fait : & regardasmes tous ensemble si bien à leurs affaires, qu'il ne se parla plus de crainte, ny desordre. Je m'acostay des principaux du peuple, & leur monstray ce qu'il falloit faire. Je les cognus de bonne volonté, tou-

resfois ceste grande multitude, est formée de diuerses humeurs. Il y a moyen de les ramener toutes à vne, quand c'est pour leur bien & salut. Bref toutes choses se porteroient mieux, dequoy le Pape me sentit bon gré.

Or le Duc d'Albe quelques iours *Le Duc d'Albe se retire.* apres remua son camp, & print son chemin vers Tiboly à douze mil de Rome. Ie ne sçay si ce fut qu'il entendist, que la ville se gardoit mieux qu'elle ne faisoit, & que les choses estoient changées : ou bien que son opinion n'estoit de s'approcher plus pres de la ville. Et pour ce que dans Tiboly estoit le Sieur Francisco Vrsin avec cinq enseignes Italiens, & que la ville n'estoit point forte, Messieurs le Marechal, Cardinal de Garraffe, & le Duc de Paliane eurent crainte, que le Duc d'Albe s'en allast prendre Tiboly, & mettre en pieces ce qui estoit dedans, ce qui fut cause qu'ils me prierent de partir toute la nuit pour aller retirer le Sieur Francisco, me baillant les deux compagnies de cheuaux legers de la garde du Pape, & les deux compagnies à cheual du Duc de Paliane, que les capitaines Ambros & Bartholomé comman-

*Marc-An-
toine fils
aîné du
sieur de
Montluc.*

doient, & quatre cents arquebuziers
qui estoient sous la charge de mon fils
Marc-Anthoine & du capitaine Char-
ry. Le Cardinal Caraffe, m'auoit as-
seuré sur son honneur, que les enne-
mis ne pouuoient passer le Tybre,
& que ie pouuois faire la retraicte,
ayant tousiours le Tybre, entre les
ennemis & moy. Je fus au Soleil le-
uant avec les gens à cheual à Ti-
boly, & les gens de pied arriue-
rent deux heures apres moy, & trou-
uay que le Sieur Francisco ne sçauoit

*Le sieur
de Mont-
luc retire
le sieur
Francisco
Prin.*

aucune nouuelle des ennemis, & apres
l'auoir entendu ie me doutay de ce qu'il
m'aduint : car ie sçauois bien auant que
partir de Rome, que le Duc d'Albe
auoit prins le chemin de Tyboly : &
qu'il venoit à la desrobée surprendre
le Sieur Francisco, puis qu'il n'en sçau-
oit aucunes nouuelles. Je ne fis que
manger bien peu, & faire repaistre
mes cheuaux, & manger vn peu nos
gens de pied. I'ordonnay au Sieur
Francisco de faire sonner le tabourin
pour desloger & mettre aux champs :
& le priay de me prestier vn caualier
ou deux de ses gens, qui cognoissoient
le pays : car moy-mêmes ie voulois
aller faire la sentinelle, cependant que

tout le monde s'apprestoît pour partir ,
dont bien m'en print : car le Sieur
Francisco auoit enuoyé deux de ses
gens pour descouurir : & auoient rap-
porté cependant que nous disnions ,
qu'il n'y auoit aucunes nouuelles d'en-
nemis en tout le païs : mais ie ne me
voulus pas arrester là , & m'en allay
avec ces deux mesmes : & comme ie
fus hors Tiboly au long d'un costau , ie
me mis sous vn arbre , car il com-
mençoit à faire grand chaud , & tout
en un coup i'apperçeus au long d'un
petit bois taillis force gens à cheual ,
qui alloient droit au Tibre contre-bas ,
& d'autre que ie voyois au long d'un
vallon , qui venoient droit à moy : &
au milieu d'une plaine au deça de
ce bois taillis , ie voyois quelque cho-
se , ne pouuant discerner que c'étoit.
Ie manday promptement au Sieur
Francisco , que i'auois descouuert le
camp , & qu'en toute diligence il fit
fortir ses gens , & s'acheminast par
l'autre costé du Tibre. Iamais le sol-
dat , qui l'alla aduertir ne fust dans la
ville , que voila dix-huict ou vingt en-
seignes d'Espagnols , qui estoient cou-
chez dans la plaine , leuez & marcher.
Ie m'enuois au galop , & trouuay qu'il

n'y auoit encores vn seul homme dehors : & fis diligence de faire cheminer les enseignes Italiennes , faisant fermer la porte de la ville : & fis là le tour d'un fin homme : car i'emportay les clefs avec moy : pensant que les ennemis ne peussent de long tems rompre les portes. Car le Tybre passe par le milieu de la ville, où il y a vn pont , & de beaux & bons moulins dans la ville mesmes , lesquels i'auois commandé à faire rompre dès mon arrivée : mais cela ne peust estre acheué. I'auois laissé le capitaine Charry à la porte , & mon fils Marc-Antoine au pont , pour le soustenir , & i'allois & venois faire haster les Italiens de cheminer. Et comme ils furent tous dehors la porte, i'allis retirer le capitaine Charry, & commençâmes à rompre le pont qui estoit de bois : & tout incontinent les ennemis furent dans la ville. Je mis des arquebuziers dans des maisons , qui regardoient au long de la ruë. Les soldats firent extresme diligence d'acheuer de rompre le pont : puis m'acheminay droit à la porte. I'auois mis la cauallerie deuant les Italiens : & falloit que nous passions par le détroit des rochers ne pouuant aller

qu'un à un. Jusques à ce que nous fumes à la sortie de la porte , nous eufmes les ennemis sur les bras , & n'y a pas cinquante pas jusques au destroit du chemin. Et voyant qu'eux-mesmes ne pouvoient venir qu'un à un , ils nous laisserent , & retournerent saccager la ville. Leurs Italiens venoient apres les Espagnols , & pensoient entrer dans la ville , pour auoir leur part du sac , mais les Espagnols ne leur voulurent jamais ouurir : & s'amuserent à la porte , & les Espagnols à saccager. Et comme nous fumes à la plaine , ie fis prendre à mon fils , & au capitaine Charry avecques les quatre cens arquebuziers , à main droite au long d'un cousteau , à plus de mil pas de nous , & les deux compagnies du Duc de Paliane : & leur dis le secret , que si les ennemis passoient le Tybre , qu'ils gaignassent tousiours au long du cousteau , tirant à Rome , & qu'ils ne se souciaissent point de moy. Autant eust valu perdre toutes les enseignes qu'auoit monsieur de la Mole , comme ces quatre cens arquebuziers. Car c'estoit la fleur de toutes les compagnies. Ie ne fus iamais à demy mille dans la plaine , que voyla toute la

*Diligence
du
sieur de
Montlus.*

*Retrai-
se.*

cauallerie sur le Tybre , & leurs Allemans qui commencerent à passer , mesmement quelques gens à cheual aupres du moulin , qui ne pouuoient passer qu'un à un. Je tenois tout pour perdu : car il me falloit retirer douze mille deuant tout le camp : & pensois bien que la cauallerie passeroit force arquebusiers en croupe : mais si ie perdois les uns , ie ne voulois pas perdre les autres. Or le sieur Francisco marchoit tousiours le grand pas à une arquebuzade du Tybre , & les autres au long du cousteau vis à vis de nous. Voicy arriuer cinquante ou soixante cheuaux des leurs. Je prins l'un des capitaines de la garde avecques sa cornette , & l'autre suyuoit tousiours les gens de pied , & les faisoit haster : & tournis visage droit aux ennemis , lesquels firent alte : & moy faisant semblant de les charger , ils me tournerent le dos , pour se retirer , ne sçay pourquoy : Et ie retournay à mon chemin. Depuis ne firent semblant de venir à moy : combien que tousiours arriuoient de leurs gens , mais c'estoient trois ou quatre. Et comme ils me virent bien auant , ils tournerent en arriere , & s'allerent amuser à prendre
du

du bestail dans des prez. Il faut sçauoir ^{Dessein} quelle estoit ma deliberation , & ^{du sieur} veoir si ie me voulois perdre avec ^{de Mont-} ceux-là , ou si ie me voulois sauuer vers les nostres. Le Duc de Paliane m'auoit donné vn turc gris , qui volloit sur terre. I'estois deliberé de mesler les cartes là : & n'y voyant aucun ordre de se sauuer , ie me voulois retirer iusques aux nostres , qui alloient droit à vn chasteau qui tenoit pour le Pape , & y auoit garnison : & faisois estat de sauuer la pluspart de la caualerie. Car il n'y auoit que cinq mille iusques au chasteau. Vn trompette nous dit deux iours apres , que iamais le Duc d'Albe ne voulust laisser passer le Seigneur Ascanio de la Corne , pour ^{Ascanio} ce qu'il n'auoit là vn seul arquebu- ^{de la Cor-} zier , que des Allemans , car tous les Espagnols & Italiens estoient à Tiboly. Et ainsi me retiray droit à Rome : & manday à nos gens venir à nous : & nous r'alliasmes au pont , qu'est le plus pres de Rome , où passames , estant trois heures de nuict , quand nous arriuasmes à Rome. Voilà la fortune que i'eus à ceste retirade.

Ne vous fiez iamais , capitaines mes ^{Remon-} compagnons , quand vous arriueriez ^{strance} aux capi- ^{taines.}

en quelque lieu, si vous estes tant soit peu en doubte, à ce qu'on vous dira : car c'est tousiours la coustume, quand vous arriuez, on vous caresse, on vous prie de reposer. Ne faites pas cela. Voyez le lieu où vous estes. Reconnoissez le tout. Vn des plus grands capitaines que l'Empereur eust iamais, qui fust le Seigneur Pescaire, pour s'estre fié à son arriuée en vne ville d'Italie, fust prins, & si auoit trois ou quatre mille hommes, qui fust vne grande honte à vn si grand capitaine. Il en iettoit la faute sur vn autre, comme luy mesme m'a dit. Si i'en eusse fait ainsi, le Seigneur Francisco m'eust fait souffrir vne escorne, & peut estre perdre la vie.

Deux nuicts apres lesdits Seigneurs me baillerent deux compagnies Italiennes pour les mener à Belistre au Duc de Somme, qui est au de là de Marin au long de la mer six ou sept mille. Je cheminay toute la nuict, ayant avec moy les deux compagnies du Duc de Paliane : & commanday que nos cheuaux eussent repeu dans vn' heure & demie. Le Duc de Somme me voulut arrester à toute force cette nuict-là : mais ie n'y voulus ia-

mais entendre , car ie pensois bien que le Duc d'Albe n'estoit pas sans espions à Rome , veu qu'il y auoit tant d'Espagnols & gens qui tenoient le party du Roy d'Espagne : & me mis , apres auoir repeu , en chemin , qui fust quarante cinq , ou quarante six mille à aller ou venir : & arriua à trois heures de nuict à Rome , dont bien m'en print. Car deux heures auant iour arriuerent six cens cheuaux , & cinq cens arquebuziers à cheual à Marin , & trouuerent les nouuelles , que i'estois repassé. Et voila vn'autre fortune qui m'aduint , où il ne me fust pas besoing auoir laissé l'entendement au logis. Or il faut que i'en mette par escrit vn autre , qui m'arriua six iours apres : & ne fust-ce que pour faire rire ceux qui liront ce liure , & le discours de ma vie.

Cinq ou six iours apres ce rencontre , estant tousiours le camp du Duc d'Albe à Tiboly , le Baron de la Garde manda à monsieur le Mareschal de Strossi de Ciuitauechia , que s'il luy vouloit enuoyer quatre cens arquebuziers , qu'il les embarqueroit dans les galeres & qu'il les iroit descendre

à Neptune, qui est vne place plus forte sur le bord de la mer, laquelle entre dedans les fossez, & qu'on pourroit brusler les basteaux que le Duc d'Albe y auoit fait amener, pour faire vn pont à Ostie, afin de passer le Tybre du costé de deçà comme il fit apres. Or monsieur le Marechal m'en

Marc-Antoine & le capitaine Charry à Ciuitauechia. laissa la charge. I'y enuoia y mon fils Marc-Antoine, & le capitaine Charry avec les quatre cens arquebuziers, lesquels y allerent par enuie. Et comme ils furent à Ciuitauechia, il les embarqua, & les alla descendre audit Neptune. Mais il ne fust possible de les brusler : car il les auoit mis dans le fossé, & les deffendoient de la forteresse. Et comme les affaires de la guerre sont incertaines, il m'aduint que le iour mesmes qu'ils arriuerent à Neptune, où ils demurerent deux iours, ie m'allay promener le soir hors de la porte de Rome, qui va à Marin, & trouuay vn homme, qui venoit de Marin. Je luy demanday qui il estoit, il me dit, qu'il estoit l'hospitalier de Marin : & cogneus à sa langue, qu'il n'estoit pas Italien. Ce qu'il me confessa : car il me dit, qu'il estoit François, & qu'il estoit

pauvre homme , reduict à cest hospital de Marin. Le luy demanday , qui estoit à Marin , il me dit que le matin le Sieur Marc-Antoine Collonne y estoit arriué avec sa compagnie de cinquante hommes d'armes , n'ayant rien avec luy dauantage homme de pied ny de cheual. Les compagnies d'hommes d'armes en Italie n'ont point d'archers comme les nostres. Marin est audit Marc-Antoine : & parce que i'auois entendu à Rome qu'il estoit , l'on le m'auoit dépeinct vn ieune Seigneur de vingt à vingt deux ans , plein de bonne volonté , & riche de quatre vingt mil escus de rente. Paliane estoit à luy , que le Pape luy auoit osté , & donné à son nepueu , que l'on appelloit depuis le Duc de Paliane. Le tiltre ne luy dura gueres : car il la recouura apres. Ayant laissé cest hospitallier , il me va en l'entendement , que facilement ie prendrois prisonnier ce Seigneur Romain , & que si ie le pouuois attrapper , i'estois riche à iamais : car pour le moins i'en aurois quatre-vingt mil escus de rançon , qui estoit son reuenu d'vn an. Ce n'estoit pas trop. Je vais discourir en moy mesmes , que monsieur de la

Marc Antoine Collonne.

Plaisante esperance du sieur de Mont-luc.

Molle viendroit avec moy, menant trois cens arquebuziers seulement, & les laisserois à moitié chemin auprès d'une tour, où il y auoit des cabanes pour retirer le bestail : car i'auois reconnu le chemin allant & retournant à Belistre, & que ie prendrois le capitaine Ambrosi, Lieutenant d'une compagnie du Duc de Paliene avec vingt-cinq cheuaux des meilleurs & les plus courans de sa compagnie, que i'emprunterois du Seigneur Aurelio Fregonse, son Lieutenant, & sa Cornette avec trente-cinq salades seulement des meilleurs qu'il eust, & les meilleurs cheuaux : & que ie laisserois à une portée d'arquebuzade de M. de la Molle tirant vers Marin, le capitaine Ambrosi avec les trente-cinq salades, & moy ie m'en irois avec celle du sieur Aurelio me mettre en embuscade auprès de Marin sous les vignes, & un peu à main gauche du grand chemin, & que i'enuoyerois six salades donner l'alarme un peu deuant le iour à Marin, & qu'estant le Sieur Marc-Antoine ieune & plein de bonne volonté, il ne feroit point de faute de sortir. Je faisois estat, que à point nommé il sortiroit au point du iour,

*Aurelio
Fregonse.*

& que les six salades l'ameneroient à nostre embuscade, & que ie prendrois la fuitte avec les six salades à sa veüe, & qu'il me suiuroit à toute bride voyant vne cornette, laquelle luy feroit ioye de la pouuoir prendre, pour auoir plus de reputation de sa victoire. Or comme i'eus tout cela discouru en mon entendement, ie le tenois aussi asséuré, mon prisonnier, comme si ie l'eusse eu entre mes mains, & m'en retournay dans la ville, & parlay au Sieur Aurelio, lequel me presta son Lieutenant & son Enseigne avec les trente-cinq salades. Pareillement i'en parlay à monsieur de la Molle & au capitaine Ambrosi. Le Lieutenant du Seigneur Aurelio, qui estoit Grec, s'appelloit le capitaine Alexis. Nous nous assignasmes à l'entrée de la nuit à la porte, & ne voulus rien dire de mon entreprise à monsieur le Marechal, ny à personne de ceux que i'amenois, iusques à ce que nous fusmes hors la ville. Et alors ie tiray à part monsieur de la Molle & les capitaines Ambrosi, & Alexis, & leur dis mon entreprise : laquelle ils trouuerent tous trois fort bonne, & en cela nous eusmes aussi bon entendement

Le capitaine Alexis Grec.

les vns que les autres. Il nous tarδοit que nous n'y fussions. Et eux me faisoient l'entreprise bien aisée, affermant les deux, qui le cognoissoient, qu'il sortiroit. Et le capitaine Ambrosi ayant couru sept mille apres moy, nous assurant que nous l'emportions & tous ses gens. Et ainsi nous nous en allâmes chaque troupe à part, la mienne toujours la premiere. Et comme nous fûmes pres de la tour, i'y laissay monsieur de la Molle, & plus auant derriere la petite chapelle, le capitaine Ambrosi. Or comme nous fûmes le capitaine Alexis, & moy au fons des vignes pres Marin, il voulut que l'Enseigne menast les six, & bailla le drapeau à vn autre. Le luy baillay vn gentil-homme des miens : & nous nous mîmes dans vn marests, où l'hyuer l'eauë croissoit, & l'esté n'en y auoit point, car en autre lieu nous ne nous pouuions cacher, & ainsi s'en allerent les six droit à la porte de la ville. Et comme le iour commança à venir, nous n'auions point nouuelles que nos gens eussent donné l'alarme. Je pensois, ou bien que le Seigneur Marc-Antoine ne vouloit point sortir, ou bien qu'il

s'en estoit retourné. Or à main gauche de nous, il y auoit vn grand vallon. le m'estois mis sur vn petit haut, où il y auoit des pierres d'une ruyne de maison, ou bien de chapelle, & commençay à veoir par de là le vallon sur la montée trois ou quatre cheuaux, lesquels vne fois passoient, d'autres fois non. le les monstray au capitaine Alexis, qui estoit plus bas que moy, il fist partir deux salades tout au long des vignes, où le vallon commençoit. le n'auois iamais encore ietté les yeux dans le vallon, pour ce que le iour ne faisoit que commencer à sortir: & ie regardois tousiours vers la montagne, où se monstroient ces trois ou quatre cheuaux à cinquante pas de nous. Quand ie tournay ma veüe dans le vallon, ie vis trois troupes de gens de cheual: à la premiere y pouuoit auoir plus de cent cheuaux, à l'autre plus de deux ou trois cens, & en la grande sept ou huiët cens. Or il faut dire la raison pourquoy ils y estoient: Comme le Baron de la Garde faisoit la descente de nos gens à Neptune, ceux de Neptune firent partir deux cheuaux en poste vers le Duc d'Albe à Tiboly: lequel incontinent

*Le Sien
de Mont-
luc des-
couure les
ennemis.*

despescha le Sieur de la Corne avec-
 que douze cens cheuaux & douze en-
 feignes de gens de pied, qui chemi-
 nerent toute la nuit. Et vne heure
 deuant le iour il arriua à ce vallon,
 & les gens de pied à la croupe de la
 montée, ils auoient fait alte là iusques
 à ce que le sieur Marc-Antoine seroit
 prest, luy ayant enuoyé vingt cinq
 salades, pour le faire monter à che-
 ual. Et comme ils furent à la porte de
 la ville, ils trouuerent nos six soldats
 (l'aube du iour ne faisoit que com-
 mencer à poindre) & se demanderent
 les vns aux autres, qui viue : & au cry
 ils chargerent les nostres de telle sorte,
 qu'il ne fust possible, qu'ils reprin-
 sent leur chemin à nous : & prindrent
 la fuitte vers le chemin, qui vient
 de Belistre à Rome, & au long de la
 plaine Romaine les chasserent iusques
 aupres de Rome : & donnerent l'alar-
 me à monsieur le Mareschal, & à
 toute la ville : & dirent qu'il n'estoit
 possible que ie ne fusse prins, & tous
 les gens que i'auois avec moy perdus.
 Or comme le capitaine Alexis eust
 rappellé ses deux cheuaux, nous pris-
 mes la retraicte par le chemin, que
 nous estions venus. Et voila les cent

*Les con-
 reurs du
 Sieur de
 Montluc
 en fuitte.*

cheuaux apres nous , les deux ou trois cents apres qui venoient le trot , & les enseignes des gens de pied venoient apres le pas , & ainsi nous menerent sept mille iusques au capitaine Ambrosi , les lances tousiours sur la croupe de nos cheuaux. I'estois sur ce cheual ture gris , que le Duc de Paliane m'auoit donné , vn des vistes cheuaux que ie montay iamais , & qui bondissoit le mieux vn fossé. Aucunefois ie sautois en chemin dans le champ à main droiçte , autrefois à main gauche. Quand nous fuyons par le grand chemin , le capitaine Alexis estoit tousiours à la queue comme moy , & celuy qui portoit la cornette deuant. I'allois tousiours parlant aux soldats , qu'ils ne s'esbahyssent point , ores du costé de main gauche , ores du costé de main droite. Le plus que nous pouuions auoir deuant eux estoit de la longueur de trois ou quatre lances. Or le capitaine Ambrosi comme nous approchâmes de luy sortit de derriere la chappelle : & ie commençay à crier , volte , volte , à nos gens , qui tournerent incontinent : & tout en vn coup , ie leur fis vne cargue , & les rembarray iusques dans l'autre

*Retraictes
du sieur
de Mons-
luc.*

troupe : laquelle ayant veu nostre embuscade , auoir fait alte pour veoir que c'estoit , & toutes les deux troupes se ferrerent , faisant semblant de nous vouloir faire la cargue. Le cognus bien , que i'auois fait vn pas de clerc , d'auoir fait ceste cargue , & pensay vne fois estre perdu : Mais par bonne fortune monsieur de la Molle se monstra sur le chemin avec l'arquebuzerie , qui fut cause que les ennemis ne me firent la cargue , ains s'arrestèrent.

*Faute du
sieur de
Montluc.*

*Alexis
amuse les
Grecs.*

Alors le capitaine Alexis me dit , *Quelli primi che ci sequitano , sono Greci , per che lo ò intesi à loro gridi. Me ne vo à vedere , se potero fermar li , per tratener mi con essi loro* , ce qu'il fist leur demandant parler à fiance. Et cependant ie faisois cheminer monsieur de la Molle , & gaignay vne petite descente : de sorte que les ennemis ne pouuoient plus veoir ce que nous faisions : & leur fis aller gagner les pilliers des acqueducs , qui estoient par là où anciennement les Romains faisoient venir l'eauë à Rome : & de mesme commanday aux gens à cheual de les suiure au grand pas. Ainsi s'acheminèrent , allant le plus grand pas qu'ils pouuoient. Puis ie retournay au Sieur

Alexis , ayant rafraichy la bouche de mon cheual dans vn fossé aupres de la tour , lequel ie trouuay apres aussi frais , que s'il n'eust point couru. Or comme les deux troupes furent ensemble , & eurent fait alte , la grande fist de mesmes alte , & les gens de pied pareillement. Le capitaine Alexis parloit tousiours à eux. Je pouuois descourir tousiours les nostres : & comme ie les vis pres des acqueducs , ie m'approchay du capitaine Alexis , & luy dis , *retiriamo si , capitano , ritiriamo si*. Ils luy demanderent , qui les menoit , il me nomma : & commencerent à faire des exclamations , disans qu'en huit ou neuf iours ils m'auoient failli trois fois. C'est à la retraicte de Tiboly , & au retour de Belistre , & à ceste heure , dont le capitaine Alexis se rioit d'eux , tousiours se retirant. Or à la departie du capitaine Alexis plusieurs d'eux me crierent , à *Dio signor di Montluco* , à *Dio* : & moy aussi ie leur criay , à *Dio* , à *Dio*. Et de là tournerent tout court droit à Marin , où trouuerent nouuelles , que le Baron de la Garde auoit rembarqué nos gens , & retourné à Ciuitauechia. Le Seigneur Ascanio me renuoya trois sala-

des, que i'auois perdu : mais non les cheuaux. Car comme leurs cheuaux bronchoient, ils tomboient par terre : & moy ie sautois en chemin avec mon Turc, & leur donnois sur la croupe du plat de l'espée : de sorte qu'ils s'enfermoient dans la troupe. Il les renuoya par vn sien trompette, lequel nous faisoit rire, parlant de son maistre, qui disoit, Que s'il eust sçeu, que ie fusse esté en ceste troupe, il m'eust accompagné iusques aux portes de Rome pour me prendre : mais en courant ne demanderent iamais à ces prisonniers, qui les conduisoit, iusques à la fin, que nous fusmes sauuez. Et me disoit le trompette, que si i'eusse esté prins, il ne me falloit pas auoir crainte qu'on m'eust fait desplaisir : car l'on m'eust autant ou plus caressé, & honoré que dans nostre camp. Aussi peut-on dire, que iamais prisonnier n'est fort de mes mains, ou de lieu où i'eusse puissance, qui fust mal contant de moy. Cela est indigne de les escorcher iusques aux os, quand ce sont personnes d'honneur, qui portent les armes : mesmement quand c'est vne guerre de Prince à Prince, c'est plustost vn esbat, qu'une inimitié.

AINSI ie m'en retournay à Rome :
 & apres m'estre desarmé , i'allay trou-
 uer monsieur le Marechal , monsieur
 le Cardinal Caraffe & le Duc de Pa-
 liane , lesquels ie trouuay ensemble ,
 en vn logis à la ville , où ils étoient re-
 venus du Palais saint Pierre : & me
 commencerent à dire tous trois , qu'il
 sembloit , que ie me voulusse perdre
 pour mon plaisir ; & que s'ils eussent
 sceu ma sortie , ils m'eussent empes-
 ché. Ils voulurent entendre l'occasion
 de mon entreprise : laquelle ie leur ra-
 contay de point en point , & leur dis ,
 que la nuit en allant , ie tenois aussi as-
 seuré prisonnier le Sieur Marc-An-
 toine , comme i'estois assure de mou-
 rir , & que desia i'auois fait estat , de
 tirer de sa rançon quatre-vingts mil
 escus. Ce n'estoit pas trop , de pren-
 dre son reuenu d'un an , & que i'en
 voulois donner les quarante mil à M.
 de la Molle , aux capitaines , & aux
 soldats : & que ie voulois garder les
 autres quarante mil , pour m'achepter
 du bien en France , pour estre pres du
 Roy , car la Gascogne en est trop es-
 loignée , & qu'il me sembloit desia
 que i'auois du bien pres de Paris :
 de sorte que de toute la nuit , ie ne

*Le sieur
 de Mont-
 luc apres-
 te à rire
 à mon-
 sieur le
 Maref-
 chal de
 Strossi.*

me peus oster cette opinion de la teste.

*Estat de
la rançon
du sieur
Marc-
Antoine.*

Et comme ils entendirent mes raisons , ils se mirent à rire si fort , que ie croy qu'ils ne rirent iamais tant pour vn coup , de ce que i'auois desia fait estat de la prinse , de la rançon , & d'achepter terres & chasteaux. Et monsieur le Marechal quand il vouloit gaber , parloit tousiours en Italien. Il me dit de bonne grace , *Signor , quando che vi andaremo visitar , farete voi à noi altri tre bona chiera nei castelli , que volete comprare à presso Parigi ?* Ils en rirent à mes despens.

Or estoient - ils sur vne despesche qu'ils faisoient au Roy , & enuoyoient deuers sa Maiesté monsieur de Porrieres de Prouence , lequel auoit prins sa part du rire , & tous ceux qui estoient avec eux. Et comme il y a des gens , qui sont subiets à faire plus de mal que bien , il y eust quelqu'un qui escriuit par la voye de la banque à Lyon , comme i'auois perdu toute la cauallerie du Pape en la plaine Romaine , & que ie m'en estois fuy , & ne scauoit-on que i'estois deuenue. Ie croy que ce sont gens appostez , pour faire courir quelque mauuaise nouvelle : afin de degouter nos partisans.

Cela

Cela fust escrit de Lyon par la poste à monsieur le Connestable, lequel le dit au Roy, qui ouit ces nouvelles avec beaucoup de desplaisir. Monsieur de Porrieres, qui venoit par le pays des Grisons, ne peust estre si tost à la Cour que les nouvelles n'y eussent couru quatre iours auparavant. Et comme monsieur le Marechal, & les autres auoient ry de ma folie, le Roy restoit autant mal-content contre moy, disant que c'estoit la plus grande folie que iamais homme entreprint, ayant tousiours esté heureux, mais qu'à present i'auois perdu mon heur & ma reputation, estant bien mary que cela me fust aduenü, mesmes aux portes de Rome. Ces nouvelles ne furent si cachées, qu'on ne les escriuit tout incontinent en Gascogne. Le vous laisse à penser comme ie fus accoustré de ceux, qui ne m'aimoient gueres: car il faut estre Dieu, pour n'auoir point d'ennemis & enuieux, ou bien ne se mesler que de faire son iardin, ou son vergier. Et comme monsieur de Porrieres fust arriué, le Roy le fit venir en son cabinet, & apres auoir leu les lettres & sa creance, dans lesquelles ne se parloit rien de cela, ny monsieur:

*Fausse
nouuelle
à la Cour
de la des-
faite du
Sieur de
Montluc.*


de Porrieres n'en parloit aussi. Le Roy luy dit, Et bien monsieur de Porrieres, Montluc s'y est-il trouué ? il a fait vne belle besogne. Lequel luy respondit, qu'il m'auoit laissé à Rome : & le Roy luy dit, qu'il sçauoit bien que i'auois perdu toute la cauallerie du Pape, & que ie m'estois sauué. Surquoy monsieur de Porrieres fust fort esbahy de ces nouuelles, & luy dit, que si cela estoit aduenü depuis son partement, qu'il pourroit bien estre : mais qu'il n'auoit demeuré que neuf iours à venir. Sa Maiesté fit regarder combien il y auoit que ces nouuelles estoient venuës : & trouuerent qu'il y auoit quatre iours. Alors le Roy dit qu'il pensoit que c'estoit vne baye & nouuelles de banquiers : & sur ce il va souuenir à monsieur de Porrieres de ma folie : luy dit, comme depuis il me conta, Sire, ie vous vais dire que c'est : dequoy vous rirez autant comme nous auons fait : & luy conta toute mon entreprinse, & ce que i'auois respondü à mon arriüée à messieurs le Marechal de Strossi, Cardinal Carraffe, & Duc de Paliane, & qu'en leur contant mon entreprinse, il sembloit que ie tenois prisonnier le

*De Sieur
de Porrie-
res conte
au Roy
l'entrepri-
se du sieur
de Mont-
luc.*

seigneur Marc-Antoine, l'argent & tout. Et assurez vous, qu'à ce qu'on me dit depuis, on n'auoit veu rire le Roy si fort, il y auoit long-temps, Monsieur le Connestable & tous tant qu'ils estoient: & me dit-on, que le Roy plus de huit iours apres voyant Porrieres, lui disoit, Hé bien, Porrieres, Montluc a-t-il acheté encores ces places autour de Paris? & ne luy en souuenoit iamais, qu'il n'en rit. Et pour ce que i'escriis en mon liure, que cent ans a, homme n'a esté plus heureux, ny mieux fortuné à la guerre, que i'ay esté: regardés donc, si vous le cognoistrez à ces trois occasions, qui me vindrent en huit ou neuf iours l'une apres l'autre, outre autres que vous y trouuerez, d'auoir eschapé sans perte ces dangers qui n'estoient pas petits.

Quelques iours apres le Duc d'Albe entendit que monsieur de Guise alloit en Italie pour secourir le Pape, qui fut cause, qu'il se retira vn peu vers la mer avecques son camp: & puis vint assieger Ostie. Monsieur le Mareschal sortit de Rome avecques quelques enseignes Italiennes, & deux d'Allemands, & cinq ou six de François: & voulust

le Pape qu'il luy laissa pour sa garde, Marc-Antoine mon fils, & le capitaine Charry avecques leurs compagnies. Monsieur le Mareschal s'alla camper deçà le Tybre vis-à-vis d'Ostie, & là se retrancha. Le Duc d'Albe avant qu'il y arriuaft, auoit fait faire son pont, & fait vn fort au dessus d'Ostie, du costé mesmes où monsieur le Mareschal s'estoit campé. Le manday à monsieur le Mareschal s'il vouloit que ie m'en vinssé deuers luy, avecques cinq ou six enseignes Italiennes ou Françoises, lequel ne le voulut, pour crainte que l'entreprinse de Montalsin ne fut pas encores du tout decouuerte. Et pour ce que monsieur le Mareschal avecques les compagnies Italiennes & Françoises qu'il auoit, n'auoit sceu faire recognoistre le fort des ennemis, veoir s'il y auoit eauë dans le fossé ou non, & en estoit demy desesperé, car le Duc d'Albe s'estroit reculé d'Ostie, tirant vers le Royaume de Naples, & n'auoit laissé que quatre enseignes Italiennes dans le fort, & quatre dans Ostie, ledit Seigneur Mareschal auoit fait sortir de l'artillerie de Rome pour battre le fort, & auoit enuoyé prier le Pape



lui laisser venir mon fils , & le capitaine Charry. Ce qu'il fist à mon grand malheur , & de mon pauvre fils. Comme il fust arriué & le capitaine Charry deuant monsieur le Marechal, ledit Sieur se plaignoit à eux , de n'auoir peu faire recognoistre le fort à son aise. Le lendemain au soir , toucha la garde à mondit fils , lequel delibera de venir à bout de ce que les autres auoient failly , & communiqua son dessein au capitaine Charry , & au Baron de Beynac, qui estoit aussi ce iour-là en garde. Il ne faillit pas : car le lendemain voyant les ennemis sortir selon leur coustume pour chercher des fascines, il les suiuit & mena battant sans crainte des arquebuzades iustques au bord du fossé , qu'il recognuist aussi sagement & curieusement , comme si c'eust esté quelque vieux capitaine : mais s'en retournant , vne meschante arquebuzade luy donna dans le corps. Toutesfois de son pied , il se porta iusques au logis dudit Seigneur Marechal : parce qu'il disoit qu'auant mourir , il luy vouloit rendre compte de son fait. Ledit Sieur Marechal le fist mettre sur son lit , sur lequel ce pauvre garson rendant presque l'ame ,

Monsieur de Stroff à Ostie.

Marc Antoine recognoist le fort.

Sa blessure à Ostie.

luy dit ce qu'il auoit veu, l'asſeurant
 que le foſſé eſtoit à ſec, quoy qu'on
 luy euſt dit le contraire. Bien toſt apres
 il rendit l'ame. Ledit Sieur Mareſchal
 enuoya le corps le lendemain à mon-
 ſieur le Cardinal d'Armagnac, & à
 monſieur de Lanſac à Rome, leſquels
 le firent auſſi honorablement enſeve-
 lir, comme s'il euſt eſté fils d'un grand
 Prince. Le Pape, les Cardinaux, &
 tout le peuple Romain témoignèrent
 le regret, qu'ils auoient de ſa mort.
 Si Dieu me l'eufſe ſauué i'en eufſe fait
 un grand homme de guerre: car outre
 qu'il eſtoit fort vaillant & courageux,
 ie cogneus touſiours en lui de la ſa-
 geſſe, qui excedoit la portée de ſon
 aage. Nature luy auoit fait vn peu de
 tort, car il eſtoit demeuré petit, mais
 fort & apilé, les eſpaules groſſes, au
 reſte eloquent & deſireux d'appren-
 dre. Monſieur le Mareſchal de Coſſé
 eſt en vie, Marc-Antoine eſtoit avec
 lui à Mariembourg, il pourra porter
 teſmoignage, s'il lui plaift, ſi quel-
 qu'un controle ce que i'en eſcris, ſi
 ie ments. Et encores qu'il ne ſied pas
 bien aux peres de loïier leurs enfans,
 ſi eſt ce que puis qu'il eſt mort, &
 qu'il y a tant de gens qui en peuuent

*Sa mort**Ses hon-
neurs à
Rome.**Éouange
de Marc-
Antoine.*

tesmoigner , ie serai excusable , & digne de pardon.

Or pour executer la charge , que le Roy m'auoit donnée en la Tos cane , ie demanday congé au Pape , pour m'en aller à Montalsin , lequel ne me le voulust donner que pour quinze iours seulement , apres luy auoir fait grand'instance : & me fit laisser mes grands cheuaux , & tout mon bagage , lesquels monsieur le Marechal de Strossi fut contraint faire sortir , disant qu'ils estoient à luy , & par ses seruiteurs mesmes. Monsieur le Cardinal d'Armagnac me fit sortir mes mulets de coffres avecques ses couuertes , disant qu'il les enuoyoit à la maison d'un autre Cardinal , où il alloit quelquefois demeurer douze ou quinze iours. Et ainsi ie retiray de Rome tout ce que i'y auois. Pendant le sejour que ie fis par de là , sa Saincteté me fit bien cest honneur de monstrier euidemment à tout le monde , qu'il auoit grand' fiance en moy.

Deslors que ie fus à Montalsin , monsieur de Soubise partit & s'en alla à Rome. le trouuay que Montalsin estoit comme assiegé : car à S. Cricou , il y auoit des Allemans : à la grand-

Montal-
sin dit an-
cienne-
ment
Mons Al
cinoi Vo
late, lib.
25.

Les Sien-
nois mal
contans
du fleur
de Sou-
bise.

Hostellerie, au dessus de Montalsin
deux arquebuzades, il y auoit aussi
des ennemis, & à vn Palais à trois
arquebuzades à main gauche pareille-
ment y auoit ennemis : & à vn autre
tirant à Grossette, vn mille pres de
Montalsin, il y en auoit encores. Et
tout cela se trouua faisi des ennemis,
quand la trefue vint. Et ne tenoit le
Roy rien iusques aux portes de Sienne
par ce costé là : & croy que cela fut la
principale cause que les Siennes eurent
en peu d'estime monsieur de Sou-
bise. Il y a grand' peine à contenter
tout le monde : & encores que l'on
face ce qu'on peut, si tout ne va pas
comme on souhaite, on n'a rien fait.
Je ne le veux ny accuser ny excuser
aussy du tout. La trefue duroit encores
entre le Roy & l'Empereur, laquelle
estoit pour dix ans. Les affaires de ces
Princes estoient si embrouillées, &
confuses, qu'il ne fust possible pouoir
faire paix. Voyla pourquoy on fit
ceste trefue : mais i'auois entendu que
monsieur de Guise auoit prins congé
du Roy, & s'en venoit en Italie. Qui
me fit penser, que encores que le se-
cours, qu'il menoit, fut pour le Pape,
la trefue seroit rompuë aussi du costé
du

du Roy , & fis une entreprinse , pour aller donner vne escalade aux Allemans à saint Cricou , qui est une petite vilote , quatre mille pres Montalsin : & de là voulois aller atraper tous les autres lieux , que i'ay nommez. Je ne sçay si les Allemans furent aduertis , ou bien s'ils furent commandez de se retirer de là : car quand ie fus hors de la ville , deux heures de nuit , vn gentil-homme Siennois , qui auoit sa maison dans Cricou , lequel i'auois envoyé là , me vint dire qu'ils estoient partis à l'entrée de la nuit. l'envoyai de mesmes sçauoir nouuelles de ceux qui estoient à l'Hostellerie & au Palais , & trouuay qu'à la mesme heure tout auoit vuidé. Et ainsi nous eusmes liberté de sortir vn peu au large iusques à l'Altesse , vn chasteau assez fort , à trois mille de Montalsin , & pres du chemin de Sienne. Puis m'en allay à Grossette , où le Colonel Cheremon estoit gouuerneur , lequel faisoit de ce pays là , tout ainsi que s'il fust esté à luy , ne recognoissant les Siennois. Dequoy ils estoient desesperer : & là nous accordasmes , que les habitans recognoistroient la Seigneurie , & non lui , & qu'il n'auoit pas

en ce pays là plus d'avantage , que le Roy n'auoit voulu pour lui mesmes. Et ainsi en peu de iours tout fut changé au contentement des Siennesois.

*Le Cardinal
Burguos
Lieutenant
du Roy d'Es-
pagne à
Sienne.*

Le Cardinal Burguos commandoit à Sienne pour le Roy d'Espagne : & auoit entreprinse sur Montalfin , laquelle il pensoit emporter facilement : & se deuoit executer la mesme sepmaine , que i'arriuay. Et comme il entendit ma venuë , il surçoya quelques iours , pour voir si rien se descouvroiroit. Et voyant que rien ne s'estoit descouvert, il enuoya querir le capitaine Mantillou Espagnol , & gouverneur du Port-hercule , pour executer l'entreprinse. En mesme tems ayant enuoyé quelques gens à cheual pour faire venir des viures , ils le rencontrèrent , & le prindrent lui & vn secretaire du Cardinal Burguos , & quatre seruiteurs , & me les menerent. Ils se vouloient deffendre , disans , qu'ils auoient esté prins contre la trefue , car encor il n'y auoit rien de rompu à descouvert. Je fis donner secretement la gesne à vn sien seruiteur , lequel dit , qu'il pensoit , que le Cardinal Burguos auoit mandé son maistre pour executer vne entreprinse , qu'il auoit sur Mon-

tassin. Nous ne pouuions descouuoir ce *Le sieur*
 qui en pouuoit estre. Et comme on *de Mont-*
 entendit à Sienne la prinse du capitaine *luc des-*
 Mantillou, cela se commença à diuul- *coudre*
 guer : de sorte qu'un gentil-homme *l'entre-*
 Siennes m'enuoya son seruiteur m'ad- *prinse du*
 uertir du lieu par là où l'on vouloit *Cardinal*
 donner l'escalade, & vint à la porte *sur Mon-*
 de la ville, ne voulant entrer dedans, *tassin.*
 mais seulement qu'il vouloit parler à
 moy. Je menay Messer Hyeronime
 Espanos, & nous dit le tout : & qu'il
 y auoit des soldats François des com-
 pagnies qui estoient en garnison,
 qui estoient de l'intelligence, & que
 si nous cherchions bien les maisons
 prochaines de cest endroit là, nous
 trouuerions par aduanture les eschel-
 les. Nous donnasmes dix escus au ser-
 viteur, qui s'en retourna. Messer
 Hyeronime, & moy allasmes secre-
 tement voir le lieu : & croy que i'y
 amenay monsieur de Bassompierre
 avecques nous, & regardasmes que
 la muraille estoit bien basse : mais
 qu'il y auoit une tourelle, là où l'on
 mettoit tousiours deux sentinelles,
 lesquelles estans de l'intelligence, l'en-
 treprinse estoit facile, & plus que fa-
 cile. Or Messer Hyeronime, qui estoit

*Eschelles
à cordes
trouvées.*

pour lors du Magistrat, deputa promptement deux hommes , pour chercher les maisons voisines du lieu : & ne tarda trois heures , qu'ils nous apportèrent plus d'une charge de cheual d'eschelles de corde , les mieux faites , que j'eusses encores iamaïs veuës. Dans ceste maison n'y habitoit personne , il y auoit long-temps : mais nous cognoissions bien , qu'il y entroit des gens , & autre chose ne peusmes descourir. Et lors j'arrestay avec le Sergent Maior , qu'il mettroit tous les soirs quatre sentinelles dans la tourelle , lesquelles seroient prinſes au fort. Je croy que s'il l'eust voulu exécuter le iour il l'eust peu faire : car aussi bien , ou mieux que la nuit , du grand palais , où il n'y auoit que trois arquebuzades , il pouoit venir par un vallon couuert de petits bois iusques aupres de la muraille. Enuiron

*Phebus
Turc.*

un mois apres , un Siennesois nommé Phebus Turc se vint adresser à moi , me voulant dire quelque chose en secret. Je le fis venir dans ma garde-robe. Je n'auois rien qu'une dague au costé , & comme il entra ie le vis armé de iac & manches de mailles : oncques en ma vie ie n'ay veu visage d'homme

plus farouche que le sien. Vne fois
 i'auois enuie d'appeler quelqu'un: mais
 il me disoit tousiours qu'il ne vouloit
 que personne entendist son affaire que
 moy. A la fin ie m'asseuray, me sen-
 tant assez fort pour le colleter, s'il
 auoit entrepris de faire quelque mau-
 uais coup: il me raconta que plusieurs
 fois le Cardinal Burguos l'auoit fait re-
 chercher de tenir la main à vne entre-
 prinse qu'il auoit sur Montalsin, &
 que par importunité il lui auoit ac-
 cordé, & qu'il estoit allé parler à
 luy deux fois desguisé, & auoit trois
 soldats, qui estoient de l'intelligence,
 lesquels il lui deuoit nommer, vn
 iour deuant ladicte execution, &
 qu'il la venoit executer, auant que
 Dom Arbre de Sandé fust arriué, le-
 quel venoit à Sienne, pour comman-
 der les armes: & que si ie voulois il
 meneroit l'entreprinse si acortement,
 qu'il me les ameneroit tous entre mes
 mains. Nous arrestasmes que ce seroit
 dans quatre iours, & qu'il s'en retour-
 neroit la nuit mesme à Sienne arrester
 le tout: & le fis mettre hors la ville,
 car la porte estoit desia fermée: & du
 matin despeschay vers le Colonel Cha-
 remon à Grossette, qu'il se rendist le

*Pratique
 du Car-
 dinal
 Burguos.*

iour apres à Pagamegura , moitié chemin de Grossette à Montalsin. Et ce iour mesmes que i'auois despesché au Colonel , ie fis venir les capitaines , qui estoient à Chuse , à Montizel , & à l'Hospitalet près Piance : & là les fis iurer sur le Crucifix de ne dire rien de l'entreprinse. Et s'en retournerent aprester leur cas pour estre prests , quand ie leur manderois : & fis aller ma compagnie de cheuaux legers à la Roque de Baldoc feignant d'y tenir garnison , & lendemain allay parler au Colonel à Paramégura , & arrestasmes qu'il tiendroît quatre cens arquebuziers prests. Mon entreprinse estoit , que comme les ennemis donneroient l'escalade , le Colonel Cheremond viendroît par derriere eux , & la garnison de Chuse & Montizel se mettroit entr'eux & le Palais , & ma compagnie aussi. Ie deuois sortir avec quatre cens hommes de la ville sur eux quand ils seroient repoussez : & au retour de Pagamegura , ie trouuay que ledit Phebus estoit de retour , & ne parla à moy de tout le soir , qui me donna mauuais soupçon. Le matin il me vint dire , que le Cardinal ne vouloit point , que l'affaire s'executast de

*Apprest
& con-
remine
du sieur
de Mont-
luc.*

quelques iours. Il me menoit de iour à autre. A la fin ie fus conseillé de le prendre prisonnier, & luy faire dire la verité, d'autant que c'estoit vne fourbe pour me trahir, ce que ie fis. Et le fis mettre dans vne basse fosse au chasteau, où par mal-heur il trouua vne piece de bois ou fer. Or pour ce qu'il estoit Siennois ie voulois voir si les Siennois mesmes le pourroient conuertir à dire la verité. Voila pourquoy ie tins l'affaire en quelque longueur. Mais cependant avecques ceste piece de fer il perça la muraille, & se sauua à Sienne. Et ainsi ie ne peus rien faire, qui valust, sur ceste entreprinse. Il fust plus fin que moy: toutefois ie luy dois cela, qu'il m'a aprins en fait de telle importance, de n'espargner vn prisonnier, ains en sçauoir soudain la verité. Car sans doute c'estoit un traître.

*Phébus
Turc pri-
sonnier.*

Dès que i'arriuay à Montalsin, ie pourchassay de faire reuenir au ser- uice du Roy le Sieur Marioul de Santa- Fior, & son Frere le Prieur, lesquels par quelque mal- contentement s'en estoient ostez. Nous estions fort grands amis depuis l'escarmouche de Sienne: enfin ie les gagnay. Ils vindrent à la

*Marioul
de Santa
fior re-
tourne au
service
du Roy.*

298 *Comm. de M. B. de Montluc*,
Cour, où le Roy leur fist fort bonne
chere. Sa Maïesté luy donna vne com-
pagnie de chevaux legers, & au
Prieur quelque pension, & se tindrent
rousiours depuis aupres de moy. Or
Dom Arbre de Sandé fist vne entre-
prinse, pour venir prendre Piance,
vne petite ville aupres Montizel, que
i'auois fait reparer le mieux que i'auois
peu, & y auois vne compagnie d'Ita-
liens. Je baillay au Sieur Marioul ma
compagnie, & ce qu'il auoit assemblée
de la sienne, & partie de celle du
Comte de Petilane: & l'enuoyay à
Piance pour retirer la compagnie Ita-
lienne, & l'amener à Montizel où es-
toit le capitaine Bartholomé de Peze-
ro. Quelque iour auant que Dom
Arbre sortist de Sienné, le capitaine
Serres, qui estoit lieutenant de ma
compagnie de cheuaux legers, & mon
parent, auoit combattu à la veuë de
Montalfin le capitaine Carillou, gou-
verneur de bon Conuent, qui auoit
avec luy dix hommes d'armes de la
compagnie du Marquis de Pesquiere,
& l'enseigne de la compagnie menoit
huit salades d'une compagnie de che-
uaux legers, & huit arquebuziers à
cheual, qui estoient venus brauer de-

uant Montalsin bas au long de la plaine devers l'Hostellerie, lequel ne pensoit pas qu'il y eust caualerie dans Montalsin : Car i'en auois enmené ma compagnie avecques moy à Grossette : & auois enuoyé le capitaine Serres courir avec dix-huict salades par le costé de main gauche vers Sienne : & s'estoient battus aupres de Chuse : de sorte que les miens en eurent le meilleur. Et au retour le capitaine Serres se vint reposer vn iour ou deux à Montalsin, pour puis apres me venir trouver à Grossette, & m'en ramener à Montalsin. Le capitaine Serres sortit avec les dix-huict salades, deux gentils hommes Siennois armez de iac & manches, & deux soldats à pied qui les suivirent : & comme le capitaine Carrigue vid les salades il se voulut retirer, & le capitaine Serres lui estoit tousiours en queue. Et comme ce capitaine Carrigue voulut passer vn ruisseau estroit, le capitaine Serres le chargea à toute bride, & les print tous, sauf vn capitaine qui auoit sa compagnie dans Bonconuent. Ces arquebuziers à cheual estoient à luy. Il eust vne arquebusade à trauers du corps d'un des

Capitaine Serres.

deux arquebuziers , qui estoient sortis avec le capitaine Serres , lequel ils auoient fait passer le ruisseau , & vn autre avec lui , qui l'amenoit deuers

Entre-prise de Dom Arbre sur Piance. Bonconuent : & mourut à l'entrée de la porte de Bonconuent. Je tenois tous ces gens prisonniers à Montallin.

Dom Arbre s'achemina droit à Piance avecques trois canons & deux coule-urines. Je me doutay bien qu'il n'ameneroit pas tant d'artillerie pour Piance : car il n'estoit pas fort pour l'artillerie. Et comme le sieur Marioul entendit , qu'il estoit trois mille pres de Piance , il s'en va au deuant avec toute la ca-uallerie : & commanda au capitaine , qui estoit deuant , qu'il commençast à faire sortir ses gens , pour gagner Montizel , là où il n'y a que deux petits milles. Il attaqua l'escarmouche si forte , & se mesla si bien , qu'il ne se peust apres démesler : & fust chargé à toute bride de trois troupes de leur cauallerie. Là il fust prins douze ou quatorze cheuaux legers de ma compagnie , dont le capitaine Gour-gues , qui estoit à la suite de M. de Srossi , estoit du nombre : & du Comte Petilane , ou du sieur Marioul autant ou plus. Or comme il fist alte deuant

Capitai-ne Gour-gues.

Piance , il trouua que le capitaine n'auoit pas un homme dehors. Les ennemis fuyuoient tousiours : & là se rompirent encores quelques lances , cependant que ce capitaine faisoit sortir ses gens : & à la fin il fut de nouveau chargé de toute leur cauallerie : & fut contrainct se retirer à Montizel. Le capitaine Serres , & le Baron de Clermon mon nepueu , qui portoit ma cornette , se sauuerent vers l'Hospitalet. Le capitaine des gens de pied perdit la tierce partie de sa compagnie de ceux qui auoient fait les paresseux à sortir , & luy se sauua avecques son enseigne & sa troupe , qui luy demeura : & fist teste au passage d'un ruisseau , donnant loisir au capitaine Bartholomé de le venir secourir : car c'estoit à la veuë de Montizel , & le Sieur Marioul , qu'il retira encore de la cauallerie. Voila ce que l'on gaigne à aller attaquer vne escarmouche à la teste d'une armée , comme j'ay dit cy - deuant , & se vouloir retirer de iour , estant le plus foible.

Comme Dom Arbre eust demeuré trois iours à Piance , il part à l'entrée de la nuict avec les torches : & print

son chemin au long d'une vallée, tirant à la Roque de Baldoc. Le Seigneur Marioul estoit allé en poste à Rome faire venir quelques salades, qu'on lui auoit promis pour refaire sa compagnie. Le Prieur demeura avecques moy le soir que Dom Arbre partist. Nous estions sortis le Prieur & moy hors de Montalsin à cheual : & comme la nuit commença à venir, nous nous retirâmes, discourant en chemin de ce que Dom Arbre vouloit faire de cette grosse artillerie. Il me tomba en l'entendement, que c'estoit pour aller attaquer la Roque de Baldoc, là où il y auoit vn capitaine Florentin, que monsieur de Soubise y auoit mis, lequel ie soupçonnois vn peu, pour ce que les gentils-hommes Siennes m'auoient dit, qu'ils auoient esté aduertis qu'il auoit enuoyé deux fois à Florence. En nous retirant aupres de la porte de Montalsin ie dis à deux cheuaux legers de ma compagnie, qu'ils allassent decouurer tout au long des colines d'entre Piance & la Roque, & qu'ils n'en bougeassent, qu'il ne fust la poincte du iour. Or quelques iours auant, monsieur de Guise, qui estoit vena

à Rome , & desia s'estoit acheminé vers le Royaume de Naples , auoit enuoyé querir Cheremon avec sa compagnie à la requeste des Siennesois , qui ne se pouuoient accorder avecques lui : & m'auoit enuoyé monsieur de la Molle , le capitaine Charry , & trois ou quatre autres compagnies. Aussi en auoit-il enuoyé querir de celles que i'auois. Il auoit donné le gouuernement de Grossette à monsieur de la Molle. Comme ie fus au liët , voici reuenir les deux cheuaux legers , lesquels me dirent , que Dom Arbre marchoit avec les torches au long de la vallée , que i'ai dit , tirant à la Roque. I'aduertis incontinent le Prieur , & montasmes à cheual avec tous ceux que nous peusmes recouurer. Ie commanday au capitaine André Casteaux , nepueu de monsieur le Cardinal de Tournon , qu'il marchast avec sa compagnie sans bagage à extresme diligence apres moy , & qu'il marchast par des bois : & luy baillay deux gentils-hommes Siennesois pour le conduire. Cependant i'arriuay vne heure deuant iour à la Roque de Baldoc. & comme le iour vint arriua André Casteaux avecques sa compa-

gnie. A peine fut-il dedans , que les passages furent prins , & prindrent les guides , qui m'auoient mené , s'en retournant , & le fourrier de ma compagnie , par lesquels ils sçeuvent , que ie m'estois mis dedans. L'enuoyay à Grosfette deux payfans par les bois , escriuant à M. de la Molle , qu'il s'en alast ietter en toute diligence dans Montalzin , & qu'il commandast en lieutenant de Roy : car ie m'estois enfermé : & voulois deffendre la place. Dom Arbre logea son camp à Auignon , vis à vis de la Roque : & là demeura trois iours , plaidant s'il me viendrait attaquer ou non. A la fin il print party de se retirer , sçachant à qui il auoit affaire , disant , *iuro à Dios , aquel capitán tiene alguns diabolos en su poder , o ai algun trahidor tras nos otros & si lo puedo saber , yo tengo de cortar lilos brassos , y los piernos.* Mais toutes mes intelligences estoient à songer , & jour & nuict qu'est ce que ie ferois si i'estois à la place de mon ennemi. Il a de l'entendement comme vous , des pratiques comme vous , songeant à ce qu'il songe souuent , vous vous rencontrerez & pouruoyrez à ce qu'il vous brasse. Que si vous attendez les

effets, vous ferez souvent surprins. Il faut & iour & nuit estre en ceruelle, & souvent considerer que veut faire votre ennemi, s'il attaquera cecy ou cela. Si i'estois en son lieu ie ferois cecy & cela : & souuent discourez - en avec vos capitaines : car tel que vous estimez peu, a souvent le meilleur aduis. Or Dom Arbre s'en retourna, & se vint mettre avec son armée à l'Alteffe, qui n'est qu'à trois mil de Montalfin, où voyant son desseing, ie m'en retournay, renuoyant monsieur de la Molle à Grossette. Dom Arbre mist trois compagnies dans Piance, deux Italiennes, & une demy Espagnolle & demy Italienne, car le gouuerneur qu'il y auoit laissé, estoit Espagnol, & le Sieur Bartholomé de Lestephe, nepueu du Sieur Cyapin Vitellou, qui auoit vne des meilleures & des plus fortes compagnies qui fust en Italie, tenoit tous les prisonniers dans le Palais, lesquels pouuoient estre de cinquante à soixante. Au bout de quelques iours il se retira à Sienne avec son camp, s'estant toutes ses entreprises éuanouïes en fumée. L'enseigne du Marquis de Pesquere alloit & venoit pour leur

*Bon ad-
vis pour
un chef.*

*Braverie
de Dom
Arbre.*

deliurance en eschange des nostres. Il se moquoit de moy, disant, *No sera dicho, que yo rendra vn Frances, que yo no tenga tres Espagnoles, y per estas barbus yo haure los mios: & ellos non hauran los suos.* Le Cardinal Burguos estoit marri de tout cecy, & eust voulu que nous eussions laissé aller tous les prisonniers d'un costé & d'autre: car ie tenois les capitaines Mantillou & Carrillou gouverneurs de Porthercule & de Bonconuent, & plus de vingt autres, là où il y auoit douze Espagnols naturels, sans les gouverneurs. Je portois impatiemment les responses qu'il me faisoit: & auois presque tousiours nouuelles des nostres qu'il les faisoit mourir de faim: Et moy au contraire: Car ie faisois bien traicter les siens. Sur cette colere ie fis vne entreprinse pour donner l'escalade à Piance, car i'auois esté aduerty, que le Roy d'Espagne auoit baillé Sienne au Duc de Florence, & tout ce qu'il tenoit en la Toscane, & que ledit Duc enuoyoit trois de ses compagnies à Piance, & vne compagnie de gens à cheual. Je preuoyois bien, que s'il y mettoit le pied, que nous ne la pourrions recouurer sans nous rompre avec

*Le Roy
d'Espa-
gne donne
Sienne
au Duc
de Flo-
rence.*

avec le Duc de Florence. Ce que ie n'auois iamais voulu faire , afin que M. de Guise ne fust contrainct d'affoiblir son camp, pour m'enuoyer secours. Et ainsi ie m'estois tousiours contenu avec le Duc de Florence sans rien gaster. Il faut en ces affaires aller prudemment & sagement : car peu de subiet sert pour rompre l'alliance des Princes , ce qui ne se peut apres reparer. Plusieurs ieunes fols ont mis pour leur indiscretion des Princes en guerre sans qu'ils eussent enuie d'y entrer.

Le capitaine Fauatau de Peyrouze , qui estoit dans Piance , m'auoit dit , qu'il y auoit vn trou à la muraille du costé de là où ie deuois venir de Montassin , qui estoit par là où sortoient les immondicitez de la ville , & que par cest endroit là où il y auoit deux murailles , celle de dehors estoit hors d'eschelle , & celle de dedans de quatorze ou quinze degrez. Et comme l'on estoit passé par ce trou , il falloit passer le ventre à terre , & dans l'ordure , on se trouuoit entre deux murailles. I'auois fait faire vne petite eschelle de la hauteur qu'il falloit : mais elle estoit foible , & deliée : afin qu'elle peust passer par ce trou : de

*Entre-
prinse du
sieur de
Montluc.*

forte que malaisément vn homme se pouuoit tenir dessus. Il y auoit dans ce pan de muraille vn bastion au coing de la ville, que Dom Arbre auoit fait acheuer, lequel estoit assez haut. Et entre le trou & le bastion il y auoit vne porte, que les ennemis auoient murée de brique, & ce auecques de la terre, sans s'estre souciez de la faire de meilleure matiere, pource qu'ils auoient fait par derriere vn rampart de terre. I'ordonnay que le Capitaine Blacon avec sa compagnie, & vne compagnie d'Italiens, que i'auois fait venir de Grossette, & le Baron de Clermon mon nepueu, avec ma compagnie & quelques vingt salades de celle du Comte Petilano, & trente ou quarante Gentils-hommes Siennois s'en iroient mettre entre Piance & Monte-pulsiane, pour combattre les gens du Duc de Florence, qui se venoient mettre dedans. I'auois fait venir trois cens hommes de Chusi, que le Duc de Somme m'auoit enuoyé, lequel s'en estoit reuenu du camp de Monsieur de Guise, pour quelque bruit qu'il auoit eu avec le Cardinal Carraffe. Et ceux là deuoient donner par le coing de la ville, du costé de

là où ils venoient : Le capitaine Bartholomé de Pezero droit à la porte , qui venoit de son costé de Montizel , laquelle les ennemis tenoient ouuerte , pour sortir & entrer. Ils deuoient mettre le feu à la porte , s'ils pouuoient : & moy ie donnois avec les eschelles au bastion , duquel les fosses n'estoient encore faits. Le haut de la porte murée flanquoit le bastion. Et avec moy i'auois les deux compagnies , Dabanson, & André Casteaux, c'est à sçauoir la moitié de chacune : car le reste ie l'auois laissé à Montalsin , & la moitié de celle du capitaine Luffan , qui estoit à Castetlotie. Estant le plus loing de tous , il fist si grande diligence , qu'une maladie le print par le chemin , de sorte qu'il fut contrainct de demeurer à l'Hospitalet. Il m'enuoya son fils , qui estoit son Lieutenant. Ledit capitaine Luffan mourust cinq ou six iours apres de ceste maladie. Il m'enuoya aussi la moitié de la compagnie du capitaine Charry : lequel i'auois laissé dans Montalsin à son grand regret , car ie n'auois homme pour y laisser à cause que le sieur Marioul estoit allé à Rome , & le Prieur son frere estoit allé iusques à

*Mort du
Capitaine
Luffan.*

leur maison. Bref ie pouuois auoir de mon costé en tout quatre cens hommes, & les trois cens qui vindrent de Chusi, & cent hommes qu'auoit le capitaine Bartholomé. Voila tout ce que i'auois à l'assaut.

*Auis
aux chefs.* Nous auions arresté tous ensemble, que les Italiens du Duc de Somme feroient de la partie, lequel Duc desiroit fort de s'y trouuer: mais ie ne le voulois mander, parce que Chusi, d'où il estoit gouuerneur, estoit de grande importance, & aussi que si i'estois tué, ie ne voulois pas que les places demeurassent sans quelque bon chef, qui peust tenir, iusques à ce que Monsieur de Guise eust enuoyé homme suffisant, pour commander le pays. Il faut tousiours pouruoir à tout, comme si on deuoit vaincre, & estre vaincu. Ainsi vous ne ferez rien mal à propos allant executer vne entreprise. Nous auions assigné de nous trouuer deux heures deuant le iour chascun au lieu qu'il deuoit combattre: & deuoient donner les gens du Duc de Somme & le capitaine Bartholomé plustost que moy: afin de diuertir les forces du costé, où i'attaquerois la place: pource que le costé,

où ie donnois estoit là plus fort , à cause du bastion & des flancs de dessus la porte. La muraille où estoit le trou faisant vn peu du coing. Je bailloy la charge de porter l'eschelle aux gentils-hommes , qui estoient à ma suite , que le Roy payoit : & les priay d'entrer par le trou. C'estoit le capitaine la Trappe , qui est auourd'huy pres monsieur l'Admiral , les Aufillons nepueux tous deux de ma feuë femme , le capitaine Cossail qui porte auourd'huy mon enseigne , le capitaine la Motte , CasterSagrat , le capitaine Bidonnet , le capitaine Bourg , qui est en vie , lequel a vne compagnie de gens de pied , & deux ou trois autres : & apres eux vingt Italiens , que le capitaine Faustin de Peyrouse , qui auoit esté rompu au sortir de Piance , auoit amené avec luy , tous hommes choisis qui deuoient monter l'eschelle , apres que les miens seroient montez. Ledit capitaine & vn autre des siens deuoient passer les premiers par le trou , & tirer l'eschelle , à cause qu'il scauoit ce qui estoit en ce lieu là , & ne faisoient pas les miens. L'arriuay à vn quart de mil pres la ville. Le Baron de Cler- *Ceux de*

*Pianca
attendent
le feur de
Montluc.*

mont & Blacon passerent outre, & s'allerent mettre à vn mil de la ville. fur vn chemin tirant à Montepulsi-
ne : & comme i'eus attendu vne heure là, sans attendre que les Italiens commençassent comme il auoit esté ordonné, cognoissant que le iour s'approchoit, i'enuoiay vne de mes guides recognoistre le plus secrettement qu'il pourroit faire, & mon vallet de chambre, qui est encore en vie, alla iusques à vingt pas du bastion, & n'ouyrent rien dans la ville non plus que s'il n'y eust eu personne. Vn petit chien seulement oyons nous aboyer. Ils sçauoient ma venuë dès la nuict, & m'attendoient ainsi sans faire aucun bruiet, le feu sur la serpentine. Je ne sçeus faire ma sortie si secrettement, encores que i'eusse fait fermer les portes trois heures auant, qu'il ne sortit quelqu'vn, qui les allast aduertir. Et comme ils m'eurent rapporté qu'ils n'entendoient aucun bruit, i'y voulois moy-mesmes aller avec eux deux : & comme nous fusmes vn peu en auant à quinze ou seize pas du bastion, i'aperçeus vn homme à cinq ou six pas de nous qui s'en alloit se baissant, & se retiroit vers le bastion : & croy

*Le feur
de Mont-
luc va re-
cognois-
tre Pian-
ca.*

qu'il rentra par ledit bastion , dans lequel nous ouïsmes alors parler : & nous sembla qu'ils parloient Alleman : mais c'estoit des Albanois : car le sieur Bartholomé de l'Esteffe en auoit en sa compagnie : lequel sieur Bartholomé auoit prins le bastion à deffendre. Et comme ie vis que bien tost le iour viendroit , ayant perdu l'esperance de nos Italiens , lesquels estoient arriuez comme ie sçeus depuis. Mais le Duc de Somme en auoit baillé la charge à quelqu'un , qui ne vouloit pas mourir des premiers , ou bien me vouloit faire cest honneur de me laisser donner le premier comme Lieutenant de Roy : mais cest homme de bien ne le faisoit pas par honneur. Le capitaine Bartholomé attendoit aussi que les vns ou les autres donnassent : & ainsi sur ce dilayement ie fus contraint de donner le premier , car encor qu'à ceste sentinelle perduë & à ce silence ie cog-nusse bien que mes gens auoient senti le vent , si est-ce que puis que i'auois prins la peine de venir , ie voulois tenter fortune.

Tous ces Gentils-hommes Italiens *Escalade*
& François , que i'ay nommez cy *au Bas-*
dessus , prindrent l'eschelle , & nous *tion.*

*Ordon-
nance du
sieur de
Montluc.*

autres prismes les autres eschelles ,
pour donner au bastion. Je les fis pren-
dre aux capitaines , Lieutenans , ser-
gens , caporals , & lancepassades. Et
ainsi marchay droit au bastion : & de
prime arriuée nous fut tiré vne grande
salue d'arquebuziers : mais pour cela
nous n'arrestasmes de dresser nos es-
chelles , & i'auois fait vne ordonnan-
ce que tous les commissaires des guer-
res & des viures , Tresoriers Control-
leurs eussent à auoir de grands che-
uaux & armes , car ces gens ont tou-
siours argent , lesquels i'amenois tou-
siours avec moy sous ma cornette ,
pour faire troupe & parade , & trom-
per l'ennemi. Monsieur de Guise auoit
enuoyé monsieur de Malassise , qui est
aujourd'huy Seigneur de Roissi , pour
estre superintendant des finances. Je
luy donnay vn cheual Turc : si i'en
auois maintenant vn semblable ie ne
le donneroie pour cinq cens escus. Il
me rendit fort mal ce plaisir , & de
l'amitié que ie luy portois , car il fit
tant , qu'il me mist en la mauuaise
grace de monsieur de Guise , comme
il fait bien aujourd'huy avec la Roy-
ne , tant qu'il peut , comme l'on m'a
escrit de la Cour. Aussi ie m'en suis
bien

bien apperceu , & voudrois que Dieu m'eust fait la grace de faire souuenir à la Royne , quel seruiteur ie luy suis , & quel i'ay esté le passé , là où les occasions se sont présentées , & les plus grandes que iamais Royne se trouuaist sur les bras : & sa Maiesté cognoistroit, qu'il ne faudroit pas qu'elle creust legerement mes ennemis , & ceux qui ne luy ont fait , ny ne feront iamais tant de seruices , que ie luy ay fait. Mais ie prendray patience avec Dieu , ayant ma conscience nette de cela , & de toutes autres choses concernant le seruice du Roy & de la couronne. Pour lors ie n'auois rien decouuert des menées dudit sieur de Malassise, qui pourchassoit , que mon-
Le Sieur de Malassise de Roissi en Tuscan.
 sieur de Guise m'appellast aupres de luy , & qu'il baillast ma charge à monsieur de la Molle. Car il auoit opinion qu'eux deux ensemble manieroient mieux les affaires que moy , & à leur profit. Le ne veux point icy mettre les raisons , pource que l'on pourroit dire , que c'est pour l'inimitié qu'il me porte , & moy par consequent à luy , qui suis mal endurant &
C'estoit le Connestable d'Angleterre
 qui porterois volontiers en ma deuise , si ie n'en auois vne autre , ce qu'un
Gaston de Foix.

316 *Comm. de M. B. de Montluc*,
de la maison de Candalle portoit, *Qui*
m'aymera, ie l'aymeray. Mais il y a beau-
coup de gens de bien, qui sont enco-
res en vie, qui sçauent l'occasion, &
s'ils la disoient elle ne seroit guere à
son aduantage.

Mais pour laisser ces propos ne me
souciant pas fort qu'il me vueille mal
ou bien, ie le laissay avecque le capi-
taine Charry, combien qu'il fist gran-
de instance de vouloir venir avec moy :
mais ie faisois estat que luy estant dans
la ville, si ie mourois, ayderoit fort
les citoyens afin de ne perdre cœur
attendant celuy que Monsieur de Guy-
se y enuoyeroit, car il est homme
d'entendement & persuasif. Pour re-
uenir à mes Thresoriers & commis ie
les fis rondoyer autour de la ville en
courant, (ils sont plus propres à faire
peur que mal) pour par ce moyen
diuertir les habitans d'un lieu à l'autre.
Or nous donnâmes l'escalade tous
Eschelles en camifades, & furent nos gens par
rompues. trois fois repoussez, & nos eschelles
rompuës, sauf vne ou deux. Il faut
dire à quoy seruit la prinse du trou.
Tous entrèrent par dedans iceluy l'un
apres l'autre. Et comme ils eurent
dressé l'eschelle à la petite muraille,

pour entrer dans la ville, les Gentils-hommes miens monterent, & de dessus la muraille en hors se iettent sur vn fumier. Et comme le capitaine Faustin & ses vingt hommes virent les nostres dedans, ils se voulurent haster de monter & chargerent tant l'eschelle qu'elle rompist. Souuent ces ardeurs inconsiderées perdent les entreprinſes. Le trou estoit à quatre ou cinq pas de la porte murée, & les ennemis qui estoient sur icelle ne s'attendoient à autre chose, qu'à tirer aux nostres, qui donnoient l'escalade au bastion: & tournant le dos aux nostres du trou, ils n'entendirent iamais aucune chose de l'entrée de nos gens. Les Italiens s'essayèrent de racoustrer l'eschelle avec des ceintures, mais il n'y eut ordre. Ils furent contraincts s'en sortir par le mesme trou. Et me vint dire le capitaine Faustin la mal-fortune de tous mes gens: & me voyla en desespoir, voyant que pour penser recouurer ceux qui estoient prisonniers dans la ville, i'auois esté si malheureux de perdre tous les Gentils-hommes de ma suite: & commençay à iouier à la desesperade. Le iour estoit desia, & le Les François repousser. soleil parroissoit à son leuer, & tous

nos gens repoussez derriere des murailles, qu'il y auoit. Et en mesme temps le capitaine Bartholomé me manda qu'ils estoient aussi tous de son costé repoussez. Je me jettay lors à terre, car ie n'estois encor descendu, & assemblay tous les capitaines, sauf Auanson fils de monsieur d'Auanson, qui auoit esté ambassadeur à Rome, qui fust blessé d'une arquebuzade à la main. Et là ie commençay à leur remontrer, que ie n'estois pas venu que pour prendre la ville, ou creuer, & que ie leur montrerois le chemin, s'ils me vouloient suiure: que resoluement ie tourneroie la teste contre ceux qui feroient les retifs, & en tuerois tant qu'il s'en trouueroit deuant moy. Allons donc mes amis, leur dis-je, suyuez vostre Capitaine, & vous verrez, que nous aurons de l'honneur. Lors ie baissois la teste ayant l'espée en la main, & mon page qui portoit mon halebarde aupres de moy tirant droit à la porte. J'auois douze Suisses de ma garde qui me suiuirent, aussi

*Propos du
sieur de
Montluc
aux siens.*

*Un chef
peut pres-
que tout.*

fit tout le reste. Et cogneus bien à ceste heure là, comme i'ay fait d'autres fois, qu'est-ce que peut le chef, quand il se met deuant, montrant le chemin

aux autres. Je me mis deffous leur porte, ou trois ou quatre hommes pouuoient demeurer à couuert des flancs du bastion. Les ennemis, qui estoient sur la porte, tiroient à grands coups de pierres sur nos gens. Les Suiffes auecques leurs halebardes faisoient leur deuoir contre ceste muraille de brique. I'auois l'espée à la main gauche, & la dague à la droite : & auecques la dague ie brisois & coupois la brique. Et comme nous eufmes fait vn trou, dans lequel ie pouuois mettre le bras, ie baillay mon espée & ma dague au capitaine de mes Suiffes : & mis mes deux bras dedans. La muraille n'estoit que de l'espeffeur seulement d'une brique : & y auoit encore bien peu de terre, car c'estoit comme vne muraille seche. Et comme auecques les mains i'eus trouué le bord de la muraille & espeffeur d'icelle, ie tiray à moy la muraille de telle roideur que tout le dessus d'icelle tomba sur moy, & me couurit tout, de maniere qu'il fallust que le capitaine de ma garde me tirast de deffous la brique, & me releuast. Et tout incontinent auecques les hallebardes acheuafmes de la mettre par terre. Ils n'a-

uoient pas acheué la terrasse qu'ils auoient mis derriere ceste porte : & s'en falloit environ deux pieds, qu'elle ne ioignit au haut de l'arc. Là me furent tuez deux Suiffes, & le capitaine blessé d'une arquebuzade à la cuisse, & quatorze ou quinze soldats morts ou bleffez. Je faisois encore donner aux enseignes l'assaut au bastion avec les deux eschelles, qui n'estoient pas rompuës : mais pour cela des flancs du bastion ils ne cessoient de tirer. Or du bastion à la porte, où ie combattois, il n'y auoit pas plus de trente pas. Je criay aux soldats, qu'ils m'allassent chercher les eschelles, qui estoient rompuës contre le bastion, & que les plus courtes seroient les meilleures : car la hauteur du terrain n'estoit pas plus que de deux aulnes, ny encore, ce croy-ie, de tant. Et tout incontinent ie les dressay coste à coste, & mis vn arquebuzier sur vne eschelle, & moy sur l'autre, & trois l'un apres l'autre apres le soldat premier, & deux de mes Suiffes apres ces trois-là. Je dis à celuy qui estoit deuant, & qui montoit le premier, que tout à vn coup il se dressast, & qu'il tirast vne arquebuzade dedans.

*Assaut au
bastion.*

Ce qu'il fit : & comme il tira , ie le prins par la fourrure de ses chausses , & le pouffay dedans. Ie luy fis faire vn fault , où il n'auoit pensé. Les deux eschelles se touchoient. Ie commençay à crier à ceux qui estoient dessus l'autre , & les pouffer , leur disant , sautez soldats , ie me ietteray apres vous dedans : & pouffe celuy-là & l'autre apres , & l'autre encore. Et comme ils estoient tombez dedans , celuy qui se pouuoit releuer , mettoit la main à l'espée. Mes deux Suisses se ietterent apres. Et alors ie sautay à terre de nostre costé , & recommençay à crier , pouffez capitaines , pouffez capitaines , nous sommes dedans. Et les voyla les vns apres les autres se ietter à coup perdu là dedans. Les gentils-hommes miens , qui estoient entrez par le trou , auoient esté aperçeus sur la pointe du iour , & chargez : & auoient gaigné vne maison , la porte de laquelle ils deffendoient. Ce qui me fit vn grand bien : car vne partie de ceux qui gardoient la porte , y estoient courus , ne pensant iamais qu'il fust possible , que i'entraffe par là. Et comme les ennemis qui donnoient l'assaut aux gentils-hommes ,

*Trait du
sieur de
Montlus.*

*Prinse de
la ville.*

entendirent le cry de France, France, derriere eux, ils les abandonnerent, & voulurent courir à la porte : les gentils-hommes sortent apres eux, lesquels entendant le mesme cry de France, France, ils cogneurent que nos gens estoient dedans. Et de fortune ils furent mis au milieu de nos deux troupes, & là tous tuez. Or apres en mesme instant que ceux-là furent tuez, vint vne Enseigne des leurs, qui estoit à la place, courant droit à la porte : & les gentils-hommes de ma fuite estoient desia raliez avecques ceux qui entroient. Ladite enseigne trouua bien à qui parler, & les accoustrerent comme les autres. Et en mesmes temps que nos gens entroient, ie leur criay, qu'ils donnassent l'assaut au bastion par dedans la ville, ce qu'ils firent : Mais ils y trouuoient vne bien grande resistance, à cause que la pluspart de la compagnie des gens de cheual estoit dedans qui combattoient à merueilles.

Or comme le cœur croist aux hommes, qui se voient en esperance de victoire, de n'oublier rien de leur deuoir à bien & furieusement assaillir. Les ayant encouragez ie laisse la porte,

& cours aux enseignes qui estoient sur les eschelles du bastion : & leur crie , que tous nos gens estoient dedans , & qu'ils se iettaient à corps perdu dans le bastion. Ce qu'ils firent. Et pour lors n'y trouuerent pas la resistance telle qu'ils cuidoient , pource que nos gens les tenoient de si court , qu'ils ne pouuoient respondre dedans & dehors. Et comme ie vis les enseignes dedans , ie remonte à cheual , & avecques les Commissaires & Tresoriers m'en allay au long des murailles : & tous ceux qui sautoient par dessus pour se sauuer , ie les faisois tuer. Et pour reuenir à nos premiers prisonniers , nos gens executerent iusques à la place , où ils trouuerent le sieur Bartholomé de l'Estephe avec le demeurant de sa compagnie , lequel ne fit pas grand' deffence. Car desia nos gens couroient tout au long des rues de la ville , & mesmement au long des murailles d'icelle. Les Italiens vindrent entrer par la muraille , qui n'estoit pas trop haute , & s'aydoient les vns aux autres. Le capitaine Bartholomé de Pezero auoit bien mis le feu à la porte , comme il auoit promis , mais il y fust blessé

324 *Comm. de M. B. de Montluc,*
d'une arquebuzade par les fesses, &
n'y auoit ordre d'entrer par là, à
cause du grand feu, qui estoit en
icelle porte. On auoit baillé dix huit
ou vingt Espagnols pour la garde des
prisonniers, qui estoient dans le Pa-
lais, en nombre de cinquante ou soi-
xante: & les auoient attachez deux à
deux, comme ils me dirent puis apres.
*Prison-
niers se
deliurent.* Et en mesme instant qu'ils entendirent le cry de France, France, France, en la place, à laquelle le Palais est ioignant, ils commencerent à se secouer les vns & les autres, & mesmes le capitaine Gourgue, qui se deslia le premier. Et s'estans destachez se mirent de telle furie sur ceux qui les auoient en garde, qu'avec leurs armes mesmes, & à coups de pierre, ils en tuerent sur le lieu la pluspart, & le surplus tindrent prisonniers, & les emmenerent avec eux. Et voila la deliurance heureuse, & non esperée de nos prisonniers.

Maintenant il reste sçauoir, quelle fut l'ysuë du commandement que i'auois baillé au Baron de Clermon, & au Capitaine Blacon. Les compagnies du Duc de Florence, de pied & de cheual estoient sorties de Monte-por-

tiano , & s'en vindrent à Piance , n'y ayant que trois mille de l'un à l'autre. Et comme ils furent à moitié chemin , & qu'ils entendirent l'arquebuzerie , enuoyerent six cheuaux courir tout au long du chemin , pour sçauoir que c'estoit. Les trois donnerent dans nostre embuscade , & furent prins : & les trois autres se sauuerent , qui firent tourner en arriere leurs gens plus viste que le pas : de sorte que le Baron de Clermon & le capitaine Blacon ne les peurent combattre. En ladite faction & prinse de ville , le Sieur Bartholomé de l'Estephe , son lieutenant , & son enseigne furent prins , le Gouverneur qui estoit Espagnol aussi : toutesfois son enseigne fut tué. Le capitaine Pistoye , lequel on appelloit ainsi , pour ce qu'il estoit de Pistoye , son Lieutenant , & son Enseigne pareillement furent prins , ensemble le Lieutenant & l'Enseigne d'un capitaine Italien qui s'appelloit Aldet Placit , qui estoit Siannois : lequel estoit party deux iours devant pour aller pourchasser leur payement , auant qu'ils fortiffent de la ville.

*Prinse de
Bartholo-
mé de
l'Estephe.*

Et voila l'exécution de l'escalade de Piance qui fut la nuit de S. Pierre ,

& de laquelle on a fait depuis en çà si grand cas par toute l'Italie. Tous les capitaines & foldats Italiens & François disoient, que i'auois prins moy seul la ville, & non eux. Et que si ie n'eusse fait ce que ie fis, & sans la hardiesse & resolution, en laquelle ils me virent, ils ne se fussent iamais plus approchez des murailles, en ayant esté repoussez par trois fois bien viuement. Et si Dieu eust voulu permettre que les gens que le Duc de Florence enuoyoit de Monte-pulsiano à Piance, fussent partis vn'heure plustost, ils n'eussent point entendu par le chemin le bruit de mon arquebuzerie: de sorte qu'ils fussent tombez dans la troupe que menoient lesdits capitaine Blacon, & le Baron de Clermon, lesquels estoient aussi bien en camifade comme le reste de mes gens, & les eussent aisément deffaits & taillez en pieces. Car incontinent qu'ils entendirent le rapport que leur firent les trois qui estoient eschappez, ils tournerent visage & se mirent en desroute tirant le chemin de Monte-pulsiano. Je laissay dedans pour commander le capitaine Faustin, qui y estoit auparauant, & auoit encores

*Retraicte
du se-
 cours.*

cinquante ou soixante soldats de sa compagnie, lesquels le capitaine Bartholomé Pezero luy auoit tousiours gardez. Et luy presta encores le capitaine Bartholomé son Lieutenant, avecques cent soldats de sa compagnie : & sur le midy, comme ie montois à cheual pour m'en retourner à Montalsin, & que ie r'enuoyois chacun en sa garnison, les capitaines avec leurs Lieutenans & Enseignes me menerent cent ou six vingts cheuaux de seruice, qui auoient esté gaignez en ceste faction, outre les courtaux & mulets, me priant d'en prendre ceux que bon me sembleroit. Et entre autres le capitaine la Trape me pria prendre vn coursier de Naples, le plus beau & le meilleur cheual qui fust en Italie. Je n'en acceptay de tous ceux qui me furent offerts, que celui du capitaine la Trape. Lequel depuis monsieur de Guise m'enuoya demander, & le luy donnay. l'arriuay à Montalsin avecques la moitié seulement des trois compagnies des gens à pied, que i'auois amenés, apres lesquels ie faisois marcher tous les capitaines prisonniers, & quelque peu de soldats aussi prisonniers : car il ne s'en

saaua pas beaucoup. Apres les prison-
niers, ie marchois, & tous nos capi-
taines avec leurs enseignes desplyées :
& derriere moy les gentils-hommes
de ma fuitte portoient la cornette de
gens à cheual, & les trois enseignes
gaignées. Et apres toute l'infanterie,
marchoit le Baron de Clermon avec-
ques ma compagnie & les gentils-
hommes Siennesois, qui estoient tous
à cheual derriere. Et croy qu'il ne de-
meura homme ny femme dedans la
ville : car tous sortoient dehors pour
me veoir entrer, sauf le capitaine du
peuple, le conseil & le magistrat,
vers lesquels i'auois enuoyé pour les
prier de ne bouger du Palais, au de-
uant duquel i'allay descendre. Et en-
tray dedans iceluy armé, lescdites en-
seignes gaignées deuant. & leur fis en-
tendre au commencement en peu de
mots, de quels moyens il m'auoit fal-
lu ayder pour venir à bout d'une en-
treprinse si hazardeuse, & comment
la ville auoit esté prinse, & cogneus
bien à leur contenance qu'ils auoient
en admiration vne telle execution.
Puis les exhortay de continuer en la
fidelité qu'ils auoient promise au Roy,
& ne perdre point l'esperance de re-

*Retour à
Montluc.
fin.*

couurer leur liberté & ville capitale, leur ayant Dieu monstre & tesmoigné par vne si bonne & heureuse iournée, qu'il ne les vouloit perdre ny abandonner, & moins ceux qui combattoient pour eux. Et pour les asseurer que ie portois les armes pour leurs vies, & pour le recouurement de leur patrie ie leur donnay la cornette des gens de cheual, & les trois enseignes gaignées, lesquelles, apres m'auoir remercié & loué, plus qu'ils ne firent iamais homme, ils les mirent à mesme instant dans la grand'salle du Palais toutes despliées. Ce qui n'amoindrist pas la reputation que i'auois acquise, soit parmy eux, soit à Rome, & par tout ailleurs, où les nouvelles de ceste entreprinse & execution coururent.

Depuis ne se presenta aucune occasion qui merite estre escrete, sauf deux, qui fut, que Dom Arbre alla assieger Chuzy, que le capitaine Morret Calabres, qui estoit à Montepes-
cayo, auoit desrobée par intelligence aux ennemis. Ledit Dom Arbre y auoit trente enseignes de gens de pied deuant, & trois canons, & six cens cheuaux. Je partis de Montalsin vn peu apres midy, avecques cinq en-

*Siege de
Chuzy.*

330 *Comm. de M. B. de Montluc* ,
seignes , & enuiron quatre vingts ou
cent cheuaux : & arriuay à Montepescayo sur le point du iour : & là
fis accoustrer de petits sacs pour porter de la poudre , iusques au nombre
de vingt , y pouuant auoir en tout
trois cens liures. De Montepescayo à
Chuzy y a six mille. L'artillerie ne
leur estoit pas encores arriuée , mais
elle arriva le matin que i'en partis :
& sur le midy ie partis de Montepescayo , & m'en allay camper vis à
vis de leur camp , à un quart de mjl ,
& autant de la ville , car ils estoient
campez deuant : & ne m'e vindrent
onques recognoistre. La place ne
valloit rien , car nous n'auions pas eu
loisir de la fortifier. & à l'entrée de la
nuict ie prins le Lieutenant du capitaine
Auanson nommé saint Genies ,
auecques trente picquiers & trente
arquebuziers , que ie voulus hazarder ,
veoir si i'auois moyen de la sauuer.
Et parce qu'il y auoit un petit ruisseau ,
qui ne contenoit trois pas entre eux &
moy , ie fis aller ledit saint Genies ,
& le capitaine Charry auec cent
arquebuziers pour l'accompagner : &
moy par le costé du camp , ie leur
allay donner l'allarme
auecque

avecque les gens à cheual & cent arquebuziers. Sainct Genies entra avecque la poudre, & tous les soldats, sauf quatre ou cinq picquiers. Et toute la nuict ie les tins en alarme, pour leur donner à penser que le matin ie me reposerois : & que m'ayant reconnu, ils me viendroient combattre, veu que ie n'auois autres forces, que cinq enseignes. Et sans reposer aucunement, sans sonner tabourin ny trompette, ie commençay à me retirer au long des bois, & prins mon chemin droit à Montalsin : & fis douze mille sans reposer. Et aupres d'un ruisseau, ie fis alte, où tous à pied & à cheual repeusmes des viures que i'auois fait apporter sur des asnes : où ne demeuray pas vn'heure & demie pour m'acheminer droit à Montalsin. Or le iour que ie partis de là enuiron midy, ils mirent leur artillerie en estat, sans pouuoir faire batterie aucune iusques au lendemain matin.

Le iour mesme que i'estois parti de deuant Chuzy, i'arriuy le soir à Montalsin, là où il y auoit trente mille, & toute la nuict ie fis apprester vn canon & vne grand'couleurine, que nous auions. Et enuiron neuf heu-

*Prinse de
l'Altesse.*

res ie m'en allay battre l'Alteſſe, qui eſt entre Bonconuent & Montalſin, vn chasteau fort. Et le battis par la porte, où ils l'auoient le moins remparé. Et ſur le ſoir ſe rendirent la vie ſauue ſeulement. Il y auoit ſoixante ſoldats. Puis lendemain matin i'allay prendre trois ou quatre chasteaux qu'il y auoit autour de là, qui n'eſtoient pas forts, & ſe conſeruoient à la faueur de la fortereſſe de l'Alteſſe. De tout ce iour l'artillerie ne bougea de l'Alteſſe. Cependant ie prins les chasteaux. On me conſeilloit d'aller battre Bonconuent. Ie l'allay reconnoiſtre, & fis faire des gabions promptement là deuant, faiſant ſemblant de l'assiéger. Ce que ie faiſois pour diuertir Dom Arbre à ne tirer plus outre : car ie craignois, qu'après qu'il auroit prins Chuzy, ce que ie penſois bien qu'il feroit, il allaſt aſſiéger Montepescaillo, où eſtoit le capitaine Moret, & deux ou trois autres places qui ſe conſeruoient à la faueur de Montepescaillo : & le iour que ie faiſois ſemblant d'assiéger Bonconuent, i'enuoiay le Sieur Marioul de Santa-Fior, le capitaine Serres, mon Lieutenant, & le Baron de Cler-

mon, mon Enseigne, courir iusques
deuant Sienne. Ils rencontrèrent vne
compagnie de gens de pied, qui estoit
fortie de Sienne pour s'aller mettre en
deux chasteaux qui estoient pres de
ceux que i'auois prins, laquelle ils
taillèrent toute en pieces, sauf le ca-
pitaine, & le lieutenant & l'enseigne,
qui se sauuerent à cheual. Tout cecy
fut fait en trois iours, comptant de-
puis le iour que ie partis de deuant
Chuzy. L'alarme fut si grande à Sien-
ne de cette deffaitte, que le Cardi-
nal Burguos manda en diligence à
Dom Arbre, qu'il laissast tout, pour
retourner à Sienne, & qu'il craignoit
que les Siennes se reuollassent, &
qu'ils me missent dedans, veu l'ami-
tié que les citoyens me portoient. Et
si ceux de Chuzy eussent peu tenir
vn iour dauantage, il les abandon-
noit : mais le deuxiesme iour apres
auoir fait vne grand'breche, car la
muraille ne valloit rien, & n'y auoit
gueres de gens, ils se rendirent. Le
Lieutenant du Capitaine Moret Ca-
labres estoit dedans avec vne partie
de la compagnie dudit Moret, &
environ cinquante cinq hommes, qui
entrèrent avec saint Genies : de sorte

*Defaitte
des Sien-
nois.*

qu'en tout n'y auoit que cent hommes. Lendemain matin que le Sieur Marioul eust deffait ceste compagnie, tous les capitaines qui estoient avecques moy, estoient d'opinion que i'allasse battre Bonconuent. Mais ie leur dis ces mots, vous sçauiez que depuis hier deux heures apres midy nous n'auons ouy tirer l'artillerie à Chuzy, laquelle nous oyons de l'Alteſſe en hors. Or faut donc dire, qu'ils ſont rendus ou bien prins par force. S'ils ſont rendus, Dom Arbre ne ſejournera pas là vn'heure, pour eſſayer ſ'il nous pourra ſurprendre en campagne: car il ne faut point doubter, qu'il n'aye eu l'alarme de ſes gens, que vous autres deſiſtes hier aupres de Sienne, & que le Cardinal Burguos ne l'aye mandé retourner pour conſeruer le demeurant des chaſteaux, qui ſont les plus pres de Sienne. Car ie faiſois en meſme inſtant que ie prenois les autres, le tout deſmanteler & ruiner, comme auſſi fis-ie l'Alteſſe. Or peſons vn peu les choſes, ſi nos gens ſont rendus, le camp ne demeurera deuant Chuzy plus de deux heures: ſ'ils ſont prins par force, la ville eſt pauvre, les ſoldats n'y auront

demeuré que cette nuit passée au fac : & à ce matin sera party deux heures deuant iour. Et encore qu'il y aye trenté mille, l'artillerie sera icy auant que ne soit midy : car Dom Arbre ſçait bien que ie n'ay point cent cheuaux en toute ma puiffance, ny plus de fix cens hommes, en ces cinq enſeignes. Parquoy la raiſon de la guerre nous donne aſſurance, qu'il doit faire ce que ie vous diſ. Par ainſi ie vous prie commençons à retirer noſtre artillerie, & l'infanterie. Et prenez vous en tous à moy, ſi vous ne voyez que les affaires iront ainſi. Le Lieutenant du capitaine Moret & ſainct Genies eurent telle compoſition qu'ils voulurent, pour la haſte que Dom Arbre auoit de tourner en arriere : car ils fortirent bagues ſauues. D'enſeignes ils n'en auoient point. Or fiſ- ie mettre le feu au demeurant de l'Alteſſe, qui ne s'eſtoit peu promptement ruyner : & laiſſay le capitaine Serres avecques vingt cheuaux ſur vn petit haut pres de l'Alteſſe qui pouuoient deſcouvrir iuſques à vn bois où eſtoit le chemin que Dom Arbre deuoit tenir pour s'en retourner. Et comme ie fus à vn mil pres Montal-

*Diligence
du Sieur
de Mont-
luc.*

fin , le capitaine Serres m'enuoya deux cheuaux à toute bride , me dire qu'il commençoit à descourir leur caualerie sortant du bois. le laissay les capitaines de gens de pied avecques des cordes , & les soldats pour ayder à tirer l'artillerie aux bœufs. Et retournasmes le Sieur Marioul & moy avecques nos gens à cheual.

Mais comme nous fusmes pres le capitaine Serres , sur vn autre petit mont , nous descourismes touté leur cauallerie desia en la plaine , qui auoit fait alte. le crois que c'estoit pour attendre vne troupe qui sortoit du bois. le laissay le Sieur Marioul là , pour soutenir le capitaine Serres : & manday au capitaine Serres , qu'il ne s'engageast point à combattre , ny se laissast approcher , ains commençast à se retirer peu à peu : & autant en dis-je au Sieur Marioul , & m'en courus à l'artillerie , laquelle ie trouuay à vn quart de mil pres la montée , & la fis haster : & comme ie l'eus sur le commencement de la montée de Montalsin , ie vis venir le Sieur Marioul au trot , & le capitaine Serres vn peu derriere luy , qui faisoit le semblable. le fis tirer tousiours l'ar-

tillerie contre-mont, & ne peust arriuer à cinquante pas pres de la porte de la ville, qu'il ne fallust faire oster les bœufs, & les ietter dedans la ville, & toute notre arquebuzerie au long des vignes, & dessus la muraille, & nostre cauallerie dans la ville: car elle ne pouuoit plus seruir de rien. Et vindrent les ennemis iusques au pied de la montagne. Voylà comme ie sauuy tout sans rien perdre, pour compasser le tems qu'il leur falloit à venir de Chuzy sur nous, & pour la grand'diligence que ie fis à ma retraicte.

Donc capitaines, souuenez vous, *Discours aux capitaines sur les retraictes.* quand vous vous trouuerez en lieu où il vous faudra retirer, & que l'ennemy sera beaucoup plus fort que vous, de compasser le temps qu'il luy faut à vous venir combattre: & mesurez-le avec vne grand'diligence, soit iour ou nuict, & vous ne serez aisément surprins. Prenez tousiours au pis: & croyez que votre ennemy veille pour vous surprendre, comme vous à luy. La raison de la guerre vouloit que i'en fisse ainsi: & faut tousiours estre aux escoutes, quand on est pres de l'ennemy. Et

s'il a trois heures pour venir à vous, redoublez le pas : & faictes en deux, s'il est possible, ce qu'il peut faire en trois. Ainsi ayant le deuant sans vous mettre en honteuse fuite, vous luy laisserez le logis vuide. Ouy, mais peut estre il ne viendra pas à moy, & cependant ie me retire sans veoir l'ennemy ? Si tu attens cela tu es deffait & perdu, mesmement lors que tu traines du canon, lequel tu ne peux abandonner, ton honneur sauue.

*Diligence
du Sieur
de Mont-
luc sur
vne en-
treprinse.*

Le fis vne autre diligence pour secourir monsieur de la Monioye vn mien parent, que i'auois mis dans Tallamon. Les galeres du Roy d'Espagne estoient parties de Gayette, pour surprendre ceste place : & vindrent se mettre contre le mont Argentan. Et comme monsieur de la Monioye les vid le matin à l'aube du iour, ayant donné sonde, me despescha vn homme en poste, pour m'aduerdir. Lequel fit si grand'diligence, qu'il fust à Montassin enuiron les quatre heures apres midy, encores qu'il y aye trente cinq mille. Sans seiourner vne heure, ie partis avecques quatre cents arquebuziers, &
ma

ma compagnie de gens à cheual : & marchay toute la nuict : & ne m'arrestay iusques à vn village , qui est trois mille pres Grossette , & fismes sans reposer vingt sept mille : de sorte que i'y fus au soleil leuant. Et là fis manger les soldats , & repaistre nos cheuaux. Je courus à Grossette , où i'entendis que les ennemis estoient autour de Tallamon : & soudain ie fis passer vne riuiere qu'il y a à demi mil de Grossette , trois cents arquebuziers de ceux de la garnison de Grossette , avecques asnes & cheuaux : de sorte que quand nos gens , que i'auois laissé repaistre , furent arriuez à la riuiere , les trois cents furent passez & acheminez. L'enuoiaiy deux hommes de cheual audit Sieur de la Monioye , l'aduertissant qu'il tint bon , que i'estois là pour le secourir. Lequel s'en esmerueillla comme il estoit possible , & pensoit que l'on luy mandast cela pour luy donner courage. Les ennemis auoient mis trois ou quatre cents hommes en terre : & deux galeres lui vindrent tirer force canonnades. Et comme i'entendis l'artillerie , ie me mis deuant avec mes gens à cheual , & les trois cents arquebu-

ziers qui estoient passez : & laissay le capitaine Charry , qui faisoit passer ceux que i'auois amené. Et comme ils virent que cela alloit à la longue , & que ie m'estois mis deuant avecque les trois cents , ils se ietterent tous dans l'eau , & ainsi passerent de ceste furie. Il faisoit grand chault : & prou en y auoit que l'eau leur venoit iusques au dessus de la ceinture. I'auois fait estat de les combattre forts ou foibles , car i'estois assure qu'ils n'auoient point de gens de cheual. Et trouuay que l'vne partie des galleres au dessus de Talamon , & au port ancien rembarquoient les soldats : & auant que i'y peusse estre ils furent tous rembarquez : & se mirent tous à la largue tirant au mont Argentan , où estoient les autres galleres , qui est vis à vis de Talamon. Et pense qu'ils cuydoient , que monsieur de la Monioye se rendroit pour les canonades , que les galleres luy tirerent : mais il estoit trop homme de bien , pour s'estonner si legerement , comme ils pensoient. Il a esté tué à Aubeterre en ces derniers troubles aupres de monsieur de Caussens , qui tesmoignera de sa valeur.

*Retraicte
des Impé-
riaux.*

Capitaines mes compagnons, il ne faut pas que vous trouviez estrange, si ie n'ay iamais esté desfait, ny surprins, où i'aye commandé, comme vous ne ferez, si vous voulez user d'une si grande prouidence & diligence, que i'ay fait toute ma vie. I'ay fait faire aux soldats ce que par aventure homme ne leur a fait faire iamais: car i'ay eu tousiours la parole à commandement, pour leur remon-
Exhorta-
tion aux
capitai-
nes sur la
diligence.
strer (quand i'estois en lieu, là où il falloit qu'ils fissent diligence) l'honneur & le service du Roy: & aussi que par diligence il nous falloit con-
seruer nos vies. C'est ce qui met les ailles aux talons, & le cœur au ventre, quand l'un & l'autre est necessaire. Toutes ces remonstrances ne me manquoient iamais: & s'il falloit faire vne grande couruée, ie faisois tousiours porter pain & vin, pour les rafraischir. Car si vous voulez faire faire grands couruées aux soldats, & n'apportez rien pour les substantier, les corps humains ne sont point de fer, il faudra qu'ils vous laissent par les chemins: ou bien quand vous viendrez au combat, ils seront si foibles, qu'ils ne vous pour-
Ff ij

342 *Comm. de M. B. de Montluc*,
ront seruir que de bien peu. Mais
apportant avec vous pour les rafraîs-
chir, accompagnez des remonstrances
vous ne les ferez pas seulement che-
miner, mais courir si vous voulez.
Et par ainsi il ne faut point que l'on
s'excuse iamais sur les soldats : car il
n'y a homme en la Chrestienté, qui
l'aye plus experimenté que moy. Et
n'ay veu iamais aduenir faute par eux,
ouy bien par les capitaines. Car vn
bon & sage capitaine rendra de bons
& sages solats. Parmi vne grande
troupe dix ou douze poltrons &
couars s'enhardissent, & se font vail-
lans : mais vn capitaine pour eux,
mal sage, & improuident pert tout
& gaste tout. Et voila en somme tout
ce qui s'est fait, tant que ie demeu-
ray à Montalsin.

*Monsieur de Guise se plaint du Sieur de Mont-
luc.* Monsieur de Guise estant aduerty
que i'auois cuidé estre surprins à l'Al-
tesse, m'escruiuit vne lettre pleine de
couroux : & me mandoit qu'il sem-
bloit que ie voulusse me perdre, &
le pays & tout, de sortir en ceste
sorte à chaque occasion qui se pre-
sentoit en campagne : & que si i'es-
tois desfait, le pays seroit perdu,
car il estoit desia si foible de gens,

qu'il ne pouuoit le secourir : & que c'estoit fait en bon capitaine , mais non pas en Lieutenant de Roy , qui ne se doit sans grande occasion , mettre en hazard. Auquel i'escriuis , *Ja res-
ponse* que i'estois contraint de ce faire , autrement Dom Arbre me prendroit tout pied à pied , & qu'il s'asséurast que ie me leuois si matin , & faisois si bonne diligence d'autre costé , que ie le garderois bien de me surprendre , & qu'il ne se mist point en peine de moy : car encores que Dom Arbre eust tousiours trente enseignes en campagne , & que ie n'en eusse que cinq ou six pour y respondre , ie ferois si bon guet & si bonne diligence , que ie le garderois bien de faire ce qu'il voudroit faire. Apres ie me retiray à l'Abbaye sainct Saluadour , qui est à quinze ou seize mille de Montalzin tirant vers Rome. A vn mil pres du chemin Romain y a vne petite villate fermée & vne Abbaye d'Augustins , que le petit Roy Charles fonda à son retour de Naples. On y seiourna quelque temps. Toute l'Eglise est couuerte de fleurs-de-lys , & la fondation estoit en parchemin , les Religieux fort gens de bien.

*Nouvel-
les de la
perte de
la batail-
le de S.
Quentin.*

Estant là ie receus vne lettre de
 monsieur le Cardinal de Ferrare, le-
 quel pour lors estoit à Ferrare. Il
 m'escriuoit la triste nouvelle de la
 desfaite de monsieur le Connestable
 à saint Quentin, & qu'il estoit plus
 de besoing que ie penffasse plus que
 iamais aux affaires du Roy, & que
 si Dieu n'aidoit le Roy, tout estoit
 perdu en France : car toutes les for-
 ces que le Roy auoit, s'estoient per-
 duës avecque monsieur le Connesta-
 ble. Je partis tout incontinent, &
 m'en allay à Montalsin, pour crain-
 cte que les Siennes ne se desconfor-
 tassent du tout : & par remonstrance
 & persuasions ie les aßeuray tant
 que ie peus, & apres i'essaïay à me
 consoler moy-mesme. I'en auois bon
 besoin, car ie tenois le Royaume
 pour perdu. Aussi fut-il plus conserué
 par la volonté de Dieu qu'autrement.
 Car Dieu osta par miracle l'enten-
 dement au Roy d'Espagne & au Duc
 de Sauoye, de ne suiure leur victoire
 droit à Paris, car ils auoient assez de
 gens pour laisser au siege de S. Quen-
 tin contre monsieur l'Admiral, &
 poursuiure leur victoire : ou bien en-
 core apres qu'ils eurent prins saint

*Discours
sur ceste
route.*

Quentin, ils auoient autant de temps que iamais : & ne sceurent prendre le party qu'un simple capitaine eust fait. Et par ainsi il nous faut tous confesser, que Dieu aymoit nostre Roy, & ne vouloit perdre le Royaume. Je ne faisois pourtant aux Siennois le mal si grand qu'il estoit : & leur disois que les aduis que j'auois de France asseuroient la perte petite. Que le Roy y dresseoit vne belle armée en personne. Monsieur de Guise estant à Rome, parce que le Roy l'auoit rappellé pour le venir secourir, me manda le venir trouuer. Ce que ie fis en poste : & là il me demanda ce que j'auois besoin qu'il me laissast pour conseruer ce que nous tenions de la Toscane. Je luy respondis que j'auois besoin de ce qui n'estoit en sa puissance de me bailler : car il n'auoit argent pour me laisser, ny guere de gens qui ne fissent plus de besoin en France, qu'en la Toscane : mais que ie ferois comme Dieu me conseileroit : & que j'esperois tant en Dieu, qu'il ne m'abandonneroit point, non plus qu'il auoit fait iusques icy, & que ie le suppliois tres-humblement s'en aller en France le

plus hastiuement qu'il pourroit : car si Dieu ne sauuoit le Royaume, les hommes y pouuoient bien peu, veu que toutes les forces estoient perduës. Monsieur le Mareschal de Stroffi trouua ma responce fort sage, & m'en loüia fort : parce que plusieurs eussent demandé & hommes & argent, dequoy i'auois bon besoing : mais la France pesoit plus au Roy que la Toscane, où ie voulois essayer à tirer moyen du Pays, & avec la guerre, faire la guerre. Je fis requeste à monsieur de Guise, de supplier tres-humblement le Roy de m'enuoyer querir pour m'en aller en France ayder à deffendre le Royaume : car ie n'auois rien à perdre en la Toscane, & avecques grandes requestes & prieres il me promist de faire en sorte que le Roy m'enuoyeroit querir, avec promesse qu'il me fit faire que dès que ie serois en France, ie me rendrois aupres de luy. Il n'auoit pas adiousté foy à tous faux rapports, il me cognoissoit trop, & m'a tousiours aymé tant qu'il a vescu. Ce que ie luy promis faire. Et ainsi il s'alla embarquer à Ciuitauechia, & ramena en France ses forces

*Requeste
du Sieur
de Mont-
luc à M.
de Guise.*

entieres , en quoy il monstra que c'estoit vn grand & sage capitaine. Quant à moy ie m'en retournay à Montalsin.

Auant que mon congé vint à la requeste du capitaine Carbayrac , que monsieur de Guise auoit enuoyé à Grossette pour gouuerneur (car il en auoit tiré monsieur de la Molle avec sept ou huit compagnies de gens de pied qu'il auoit) & l'enuoya à Ferrare : & en lieu de luy me fit venir monsieur de Giury avec treize compagnies de gens de pied , qu'il auoit : le ne perdis au change , ie m'en allay en diligence à Grossette veoir vn desordre qui estoit aduenu , c'est que toutes les munitions de bleds que i'y auois mis , où il y en auoit pour plus d'un an , se trouuerent desrobées : & en tout ne se trouuoit pas cent sacs de bled. Il y auoit vne garde des munitions , qui s'appelloit Louberiat , lequel chargeoit monsieur de la Molle. Je manday en poste à monsieur de la Molle ce que l'autre auoit depose : monsieur de la Molle au rebours chargeoit ledit Louberiat. Je couchay la nuit dans vn lit , duquel les draps estoient humides , & c'estoit en hyuer n'ayant

*Maladie
du sieur
de Mont-
lus.*

pour lors porté mon lit de camp, pource que ie laissois seiourner mes mulets pour m'en venir en France : & là ie prins vne fievre continuë, laquelle dans dix iours me mist iusques à perdre la cognoissance de mes seruiteurs propres. Et sans ma maladie i'eusse gardé Louberiat de desrober iamais les munitions du Roy, aussi bien que ie fis à Sienne celuy qui les auoit en garde, qui en auoit fait autant. Et comme ie commençay vn peu à prendre cognoissance des hommes, mon congé arriua : & m'escriuit sa Maiesté, que ie passasse à Ferrare, & que ie fisse seiour aupres de monsieur le Duc, pour le conseiller en ses affaires, car il auoit la guerre sur les bras. De la grand ioye que i'eus voyant mon congé arriué, ie prins courage de telle sorte, que quatre iours apres ie partis, & me fis porter sur vne chaire à six hommes à Montizel, où estoit le capitaine Bartholomé de Pezero : & là demeuray trois iours attendant vne litiere, que le sieur Marioul de Santa Fidor m'enuoyoit. Et ainsi m'en allay ne pouuant faire que cinq ou six mille le iour, iusques à Pezero, où ie

*Congé du
sieur de
Montluc
pour re-
tourner en
France.*

trouuay le Duc d'Vrbin, qui m'en-
uoya cinq ou six gentils-hommes au
deuant, pour me faire venir loger
en son chasteau. le fis responce que
ie m'en allois descendre à la maison
du capitaine Bartholomé de Pezero,
car ledit capitaine auoit escrit à sa
mere, que i'yrois loger là, & que
ie le remerciois tres-humblement. le
trouuay la mere du capitaine Bartho-
lomé, vne bien fort honneste da-
moiselle, & autant estimée dans la
ville que gentille femme qui y fut.
Comme i'arriuois au logis on me
mettoit dans le lit, car i'estois si fort
extenué, que ie n'auois que la peau
& les os, & mourois tousiours de
froid, quelques foureures que l'on
me sceust mettre dessus. Monsieur le
Duc incontinent me fist cet honneur
de me venir voir: & me voyant si
mal, encores me contraignit de se-
journer là quatre iours: & ne voulust
que ie dependisse vn sol: & me fit
tousiours seruir à deux plats de son
chasteau en hors. Il me sembla que
i'estois vn peu amendé, & renuoia y
la litiere au Sieur Marioul. Monsieur
le Duc voulut que ie prinse vn cour-
sier de son haras, vn des plus beaux

coursiers que i'aye guere iamais veu,
 & des plus forts selon sa hauteur :
 & voulust prendre de moy vn petit
 Frison fort de sa taille , & fort beau ,
 & ainsi me mirent sur vne petite hac-
 quenée , que monsieur de Giury me
 donna à mon partement de Montal-
 sin , où il commanda iusques à ce
 que le sieur Dom Francisco d'Est fust
 arriué , lequel le Roy fit son Lieu-
 tenant general , comme i'estois : &
 ainsi me traîsnay iusques à Ferrare , là
 où ie fus aussi bien venu & receu de
 messieurs les Duc & Cardinal , & de
 madame la Duchesse , que si i'eusse
 esté leur frere propre. Ils voulurent
 que ie logeasse dans le chasteau , me
 faisant servir de sa cuisine comme sa
 personne propre.

*Arriué à
 Ferrare.*

Quatre ou cinq iours apres mon ar-
 riuée , i'eus enuie d'aller voir mon-
 sieur le Cardinal de Tournon & mon-
 sieur de Dax , lequel sieur de Dax
 estoit ambassadeur à Venise : & de-
 meuray quatre iours avecque eux re-
 grettant fort que ie n'auois la santé pour
 pouuoir voir toute la ville de Venise ,
 car i'estois encor si mal , qu'à peine
 peus-ie aller iusques à l'Arcenal : puis
 m'en retournay à Ferrare. A present

A Venise.

que tout est mort ie ne feray tort à nul d'escire ce que i'ay veu faire , qu'est que monsieur le Cardinal de Mantouë se monstra grand amy de monsieur le Duc de Ferrare : car il l'aduertist que le sieur Dom Ferrand son frere alloit assieger Versel , & ^{Dessu du siege de Versel.} qu'il auoit fait partir six canons d'Alexandrie , avec lesquels auoit prins le chemin droit à Cremone , menant grande quantité de poudres & boulets : & luy asseuroit que c'estoit pour Versel : & par deux fois queuë sur queuë luy donna cest aduertissement. Il fut aduerti aussi de Cremone en hors , que le sieur Dom Ferrand faisoit aprester encore d'autre artillerie , & auoit fait arrester quatre vingts grands bateaux des marchands trafiquans sur le Pau , sur lequel Versel est assis , comme Cremone : & que partie des compagnies Espagnolles , qui estoient vers le Piedmont commençoient à marcher droit à Cremone , & qu'il se faisoit des compagnies Italiennes aux enuirs de Milan. Le Duc de Ferrare ayant reçu tous ces aduertissemens se trouua fort fasché , n'estant la place encores en gueres bon estat pour se deffendre , car il n'y

352 *Comm. de M. B. de Montluc*,
auoit nul bouleuart couuert, & les
courtines fort basses, comme aussi
estoyent bien les esperons, n'estans que
demi terrassés, ny encores demi rem-
plis, tous les flancs descouverts. Mon-
sieur le Duc aduertit du tout monsieur
le Prince son fils, qui estoit à Reges
auecques son camp, & luy mandoit
qu'il enuoyast le sieur Cornelio Benti-
uolle se mettre dedans. Monsieur le
Prince luy manda, que si le sieur Cor-
nelio estoit hors d'aupres de luy, il
ne pouuoit donner ordre à son armée,
car le sieur Cornelio commandoit en
son absence, & n'auoit autre soulage-
ment que de luy : mais qu'il luy
pleust de faire election de quelque
autre. Monsieur le Duc despescha in-
continent vers monsieur de la Molle,
qui estoit au camp pres monsieur le
Prince, le priant d'y vouloir aller,
pour deffendre la place : monsieur de
la Molle luy fist responce, que le Roy
ne luy auoit pas commandé de s'en-
fermer dans aucune place ; mais bien
faire sa charge à la campagne. Ledit
sieur Duc se trouua fort fasché, com-
me estoit aussi monsieur le Cardinal
son frere, qui est aujourd'huy, pour
n'auoir nul homme auquel il se fut sur

L'heure fié, pour la deffence de ceste place.

Je commençois à recouurer vn peu de force, & ces allées & venuës se faisoient fort secrettement, tellement que ie n'en entendois aucune chose.

A la fin vn gentil homme de monsieur le Duc auquel il auoit commandé se tenir pres de moy, pour voir si i'auois besoin de quelque chose, me descouurit le tout vn soir bien tard : & me dit en outre, que monsieur le Duc tenoit presque la place pour perduë : car celuy qui estoit dedans gouuerneur n'estoit pas soldat, ny n'auoit iamais porté les armes en faction de consequence : bien estoit il homme de bien : & monsieur le Duc ne se desioit aucunement de sa loyauté, mais bien de son experience, & qui pis estoit, nul ne se presentoit à monsieur le Duc pour se mettre dedans. Toute la nuit ie prins conseil avecque ma santé, car de bonne volonté ie n'en auois que trop. Il me sembla le matin que i'auois quelque peu de force, & m'en allay trouuer monsieur le Duc, lequel trouuay au lit, car il se leuoit tard. Il auoit commandé qu'à quelque heure que i'arri-

*Peine des
Duc de
Ferrare.*

passa à la porte de sa chambre, qu'on m'ouurist, encore qu'il fut dedans le lit. Je heurtay, & par vn de ses valets de chambre fut ouuert, & le trouuay dans le lit & deux secretaires qui escriuoient sur vne petite table tout aupres de son lit. Et comme ie luy eus donné le bon iour, ie luy dis ce que l'on m'auoit dit le soir, ne nommant point celuy de qui ie le tenois. Il me raconta tout ainsi que le gentil-homme m'auoit dit, & la peine en quoy il estoit, & ne me voulut pas nommer le Cardinal de Mantouë iusques à mon retour, de qui il tenoit les plus asseurez aduertissemens. Et

*Le sieur
de Mont-
luc s'offre
au Duc
de Ferrar-
re.*

alors ie luy dis en ceste maniere, Monsieur, vous voudriez - vous fier à moy de la garde de vostre place? Il me respondit, en vous Monsieur de Montluc, ouy plus qu'en homme qui soit aujourd'huy en Italie. Or doncques monsieur leuez vous : & promptement escriuez à monsieur le Prince, qu'il me baille vne compagnie de François, celle que ie luy demanderay, & quelques gens de cheual, pour m'accompagner à mettre dedans. Et escriuez au sieur Pierre Gentil qu'il s'accorde bien avecques moy.

moy pour la deffence de la place : &
 que vous ne m'y enuoyez pas pour
 luy oster le gouuernement : mais pour
 ce que ie suis plus experimenté en
 telles choses que luy , & qu'il face
 faire promptement tout ce que ie luy
 ordonneray. Alors il tendit ses bras ,
 & m'embrassa au col bien estroite-
 ment , me tenant le visage contre sa
 poitrine , & dit à vn de ses valets de
 chambre , qu'il allast chercher mon-
 sieur le Cardinal son frere , qui estoit
 logé en son Palais bien loin du chas-
 teau. Le valet de chambre y courust ,
 & luy dit ce qu'il auoit entendu. Mon-
 sieur le Cardinal fust incontinent à
 nous : & dès son arriuée il m'estendit
 ses bras , & m'embrassa , me disant
 ces mots , ô monsieur de Montluc ,
 que tous tant que nous sommes de
 ceste maison , vous serons tenus. Et
 alors commencerent à faire leurs let-
 tres : & ie m'en allay aprester pour
 partir , car il se falloir haister , pour ce
 que Versel est assis en tel lieu , que si
 vn camp est deuant , il est impossible
 d'y entrer ; pourueu que l'on aye seu-
 lement deux ou trois bateaux sur la
 riuere. Et m'en allay coucher à Final ,
 & le lendemain disner à Modene , &

*Des sieurs
 de Montes-
 luc au se-
 cours des
 Versels.*

356 *Comm. de M. B. de Montluc*,
coucher à Reges, où monsieur le Prince estoit avec son camp. Lequel me bailla le Baron Daurade avecques sa compagnie, celuy qui fust tué à la fenestre de la chambre de monsieur de Nemours à Vienne, & vne compagnie de gens à cheual. En cest equipage arriuasmes enuiron vne heure apres midy. Il y auoit dedans vne compagnie de Suisses, & cinq d'Italiens, & puis celle du Baron Daurade, qui fut bien aise de venir avecques moy, & fut la septiesme. Le Duc de Parme, depuis qu'il se fut racointé avecques le Roy d'Espagne, auoit rappellé ses deux compagnies de cheuaux legers, qui estoient avecques nous à Rome, que les Capitaines Bartholomé & Ambrois commandoient. Et sept ou huit iours deuant le capitaine Ambrois auoit esté prins & mené prisonnier dans le chasteau de Versel: & le trouuay prest à s'en aller, pour ce que monsieur le Prince l'auoit changé avecques vn autre. Il fut tout esbahy de me voir là, & luy dis que nous portions, n'auoit gueres, ensemble la croix blanche, & à ceste heure ie le voyois avecques la croix rouge. Il me respondit, *que besognaua*

far ie commandamento del suo padrone , & me demanda , qu'est-ce que ie voulois faire là. Le luy dis , que i'estois là pour leur seruir de Marefchal de camp: & que ie leur aprefterois les cartiers pour loger leur camp à leur aise. Le capitaine Pierre Gentil luy dit & asseura que i'estois venu là pour defendre la place. Alors il dit , O queste non sono baye dunque a la fede che io portero catine noue al mio patrone , & ainsi me dit Adieu.

Or le Duc de Parme tenoit vne place assiegée du Duc de Ferrare dependante de Reges , à cinq ou six mil pres de Versel. Je ne trouuay foin ny paille ny chose du monde à manger pour les cheuaux , ny farine aucune , & bien peu d'outils pour trauailler , ny vin , sinon quelque peu qu'on bailloit aux Suisses , & bien peu de farines & bleds. Et crois que ce deffaut amenoit plustost le sieur Dom Ferrand à l'assieger , qu'autre occasion. Il me sembla que i'estois arriué encores vn'autre fois à Sienne , que tout me faudroit en vn coup. Le matin la compagnie de gens à cheual s'en vouloit retourner , car ils n'auoient rien mangé de toute cette nuit. Il y auoit

*Defectus
inuestitus &
Versel.*

358 *Comm. de M. B. de Montluc* ,
trois bourgs assez grands sur le che-
min qui tiroit à Parme : & me semble
qu'on m'a dit qu'ils estoient au sieur
de saint Sourin , que j'ay veu à la
Cour portant le bonnet rond : &
estoient à demy mille l'un de l'autre ,
& à deux mille de Versel : & y auoit
quelques soldats Italiens en garnison ,
pour garder que ceux de Versel n'en
tirassent aucune commodité. Je sortis
auecques la compagnie des Suisses ,
celle du Baron Daurade , trois cens
arquebuziers Italiens : & fis que le
sieur Pierre Gentil commandast que
tous les hommes , femmes & enfans
me suiussent , & tous les cheuaux qui
estoient dans la ville auec force cor-
des & sacs. Et m'en allay droit au
premier village. Les ennemis qui y
estoient l'abandonnerent , & se retire-
rent à l'autre : & moy tousiours à les
suiure. Ils abandonnerent tout , & se
retirerent en diligence vers Parme.
J'auois deffendu à peine de la vie , que
personne ne saecageast rien que les
viures. Et laissay le Baron Daurade &
la compagnie de gens à cheual au
premier village tirant à Parme , les
arquebuziers Italiens au second , les
Suisses au troisieme tirant à Versel ,

*Annuitail-
lement
par les
habitans
mesmes.*

ayant tous charge de ne laisser passer chose aucune que victuailles : & moy i'allois d'un village à autre , pour faire haster : car ie ne pensois iamais sortir de là sans combattre. Les bourgs n'estoient pas fermez , & y auoit grands viures. Il y eust tel homme qui fist cinq & six voyages à porter viures dans Versel : & à la fin n'y demeura personne qui ne vint chercher des viures. Et embarquions les vins sur des batteaux , & les portions au long d'une petite riuere , qu'il y a : ie crois que c'est vn bras du Pau : & l'allions descharger à demy mille de Versel contremont , car ce ruisseau n'approchoit plus dudit Versel. Cecy dura depuis le soleil leuant iusques au couchant. I'oserois dire qu'il ne demeura que bien peu de toute sorte de viures dans ces villages. Les hommes & les femmes estoient là tous estonnez. Je leur promettois de les faire recompenser : & ainsi se passa tout le iour : & y fust porté tant de viures pour les hommes & pour les cheuaux , que de trois mois nous n'en pouuions auoir faite. Et alors le capitaine des gens à cheual voulust demeurer encore quelques iours avecques moy : & le len-

demain le sieur Pierre Gentil sortit
 avecques tous les hommes, femmes
 & enfans de huiet ans en sus, & s'alla
 ietter sur vn taillis à demy mille de
 Versel, faire faire des fassines, & les
 apporter deuant la ville. Cela ne fas-
 cha aux gens de la ville d'y aller : &
 y mena les Suisses & presque tous les
 soldats Italiens, & ie luy tenois es-
 corte avecques le Baron Daurade &
 la compagnie de gens à cheual. Et
 firent aussi grande diligence à ce tail-
 lis, comme ils auoient fait le iour
 deuant au village, des viures, & ve-
 noient descharger à vn traict d'arba-
 leste dans la taillade à la veuë de no-
 stre artillerie, & portée de nostre ar-
 quebuzerie. Et iusques à ce que la
 nuit nous en ietta, nous ne cessasmes :
 & deux iours apres nous y retour-
 nasmes tousiours : & cuide qu'en ces
 trois iours il fut fait plus de soixante
 milliers de fassines : puis nous les al-
 lions prendre enseignes desplyées :
 & les mettions dans la ville : & en
 remplisimes l'Eglise & beaucoup de
 murailles vuides. Et commençasmes
 à fortifier tous sans nul excepter : &
 portions le sieur Pierre Gentil & moy
 le bayart, pour donner exemple à

*Diligence
 de ceux
 de Ver-
 sel.*

*Le sieur
 de Mont-
 luc porte
 le bayart
 aux forti-
 fications.*

tous les autres. Je ne scaurois dire mal de ce gentil-homme là: car ie cogneus bien qu'il n'auoit pas faute de bonne volonté, ains seulement d'experience. Tout ne se peut acquerir sans estre mis en besongne. Et comment voulez-vous iuger d'un homme s'il n'est mis à l'essay? Peut estre que si on l'eust attaqué, il eust fait son deuoir: mais qui n'a veu iamais siege, s'estonne fort quand il entend vne telle sonnerie: & luy estonné tout est perdu. Et comme nous eusmes nos faffines dedans, ie fis vne autre entreprinse d'aller saccager les viures de deux villages aupres de Gastaalde, qui est au sieur Dom Ferrand, dans lequel y auoit deux compagnies d'Allemands, & trois d'Italiens. L'enuoyay le capitaine des gens à cheual, & tous les gentils-hommes qui estoient avecques moy courir iusques au deuant de la Gastaalde. Et le Baton Daurade, qui leur tenoit escorte au long d'une haye. Et moy avecques les Suisses & quatre cens Italiens m'attendois à faire charger les viures. Ils enuoierent douze cheuaux courir deuant la Gastaalde, & le reste estoit mis en embuscade aupres, en vn petit bois. Les capitai-

nes Allemans sortirent, & grand nombre de gens, & donnerent la chasse à nos coureurs. Nostre ambuscade se descouvrit trop tost : car autrement tous les capitaines estoient prins, & les chasserent iusques dans la ville : & y fut tué quarante ou soixante Allemans : car le Baron Daurade s'y trouua, & l'ambuscade des gens de pied & gens de cheual pres l'une l'autre. Et prindrent prisonnier vn qui portoit vne enseigne des Allemans : & vingt ou vingt quatre Allemans : & ainsi nous nous retirasmes avecques les viures, que nous auions chargez : & le lendemain ie donnay congé à la compagnie de gens à cheual, pour s'en retourner : car ie craignois que monsieur le Prince fust marry de ce qu'elle demeueroit tant. Quand à eux ils ne se faschoient point de demeurer aupres de moy : car ils eussent bien voulu y demeurer. Je les eusse souvent mis aux mains avec les ennemis.

*Advis du
sieur de
Montluc.*

P'ay tousiours tasché à ne laisser les soldats ou gendarmes croupir : & forts ou foibles les mettre aux prises avecques les ennemis, pour les faire recognoistre. Il y faut aller prudemment pour ne perdre : mais qui se tiendra
tousiours

toufiours sur cela , le ne veux perdre mes gens , trouuera enfin qu'il ne fait pas grand cas. Il en faut prendre & en faut donner.

Monsieur le Duc de Parme estoit toufiours deuant ceste place , qu'il battoit : & cependant ie faisois mes affaires. Le capitaine Balferniere , & vne autre compagnie Françoisse estoient dedans , qui firent si bien , qu'ils les amuzerent dix ou douze iours. Le sieur Dom Ferrand , qui estoit à Cremona , estant aduertiy des viures & des fassines , que nous auions mis dedans , & du grand deuoir que nous faisons , refroidit son entreprinse : car comme i'ay dit cy deuant , ie luy auois fait teste à Cazal , & sçauoit bien l'ordre & diligence , que ie faisois en la fortification. Pareillement il se ressouuenoit de ce que ie luy fis à Benne , & à S. Damian. Tout cela luy donna à penser qu'il n'emporteroit pas ceste place aisément : & retira ses munitions & artillerie , qui estoit sur le bord de la riuere du Pau prest à l'embarquer : & licentia les batteaux qu'il auoit retenus pour embarquer l'artillerie , & les gens de pied. Car le camp du Duc de Parme se deuoit

Dom Ferrand en double.

joindre avec luy deuant Versel. Et encore que cecy soit à ma loüange, si diray ie, que M. le Duc de Ferrare disoit publiquement, & me donnoit bien ceste gloire, que ma presence arresta l'ennemy, qui ne voulut rien hazarder, sçachant bien comme i'ay dit, ce que ie sçauois faire, pour la garde d'une place. C'est beaucoup d'acquiescer ceste reputation, de se faire craindre & estimer à son ennemy. Ledit sieur Dom Ferrand estoit bon capitaine, il ne vouloit tanter ceste place, où i'eusse remué terre. Aussi ayant dequoy manger ie luy eusse fait souffrir vne honte.

*Le Duc
de Ferrare bon
François.*

Pendant ce temps là le Duc de Florence pourchassoit la paix du Duc de Ferrare enuers le Roy d'Espagne, par le bon aduis & consentement du Roy: car autrement ledit Sieur Duc ne l'eust fait, pour mourir. Il estoit trop François. Et comme la paix vint, qui fut au bout de vingt cinq iours que i'estois entré dans Versel, ie m'en retournay à Ferrare, & prins congé de monsieur le Prince à Rege: & ne faut point demander, si ie fus le bien venu de monsieur le Duc, de monsieur le Cardinal, & de madame la Duchesse.

Car ie ne pense point qu'ils caressassent iamais homme , de quelque estat que ce fust , & sçauoir estre , plus que moy. Et quand il mourut , ie pouuois bien dire , comme ie fais encore , que i'auois perdu vn des meilleurs amys que i'auois en ce monde : & quand ie partis de Ferrare pour aller à Versel , monsieur le Duc s'informa d'un mien secretaire , si i'auois gueres d'argent , il trouua que ie n'auois que deux cens escus. Il enuoya cinq cens escus à mondit secretaire , qui faisoit ma despence : & trois iours apres mon retour ie prins congé de luy , de monsieur le Cardinal , & de madame la Duchesse. Ledit sieur Duc voyant que i'auois beaucoup de gentils-hommes signalez aupres de moy , cogneust bien que ie n'auois pas assez d'argent pour faire mon voyage , qui fut cause qu'il m'en enuoya encore cinq cens. Et voyla comment ie m'en vins riche de ma charge , que i'auois en Toscane : cest argent me mena iusques à Lyon , où ie trouuay deux mil quatre cens francs , que le Roy m'auoit fait payer de deux années de mon estat de gentil-homme de la chambre , que Martineau m'apporta audit Lyon entre

*Present
du Duc
de Ferrare
au sieur
de Mont-
luc.*

les mains de Cathelin Iean maistre de la poste, qui me conduit iusques à Paris. Et estant arriué i'allay baiser les mains au Roy qui estoit à Cressi; & fus aussi bien venu de sa Maiesté comme quand ie reuins de Sienne. Et fust fort aise de ce que i'auois fait pour le Duc de Ferrare. Monsieur de Guise qui ne m'auoit encore veu m'en embrassa deux ou trois fois, deuant le Roy mesmes. Sa Maiesté commanda audit sieur de Guise de me faire bailler mil escus pour m'en retourner à Paris seiourner vn peu. Ce que ledit sieur fit promptement. Et voyla mon retour de l'Italie en France, la derniere fois que i'y ay esté, & les seruices que i'y ay faits; desquels ie ne puis mentir: car il y a trop de gens, qui sont encores en vie, qui en porteront vray tesmoignage.

*Remon-
strance
aux ca-
pitaines.*

Or Capitaines, vous deuez icy prendre exemple, qu'est-ce que c'est de la reputation, laquelle quand vous l'avez acquise, vous ne deuez perdre, ains plustost mourir. Et ne faites pas comme aucuns qu'il y a, qui dès qu'ils l'ont attainte vn peu, s'en contentent & pensent, que quelque chose qu'ils fassent, l'on les estimera tousiours.

vaillans. N'en croyez rien : car d'heure à autre les gens ieunes deuiennent grands , & ont le feu à la teste : & combattent comme enragez. Et comme ils verront que vous ne faites rien qui vaille , ils diront que l'on vous a donné ce tiltre de vaillant iniustement , & vous estimeront moins , & parleront de vous à leur plaisir , & avecques iuste raison. Car si vous ne voulez continuer tousiours de bien faire , & entreprendre de plus en plus , il vaudroit mieux pour vostre honneur , que vous vous retirissiez à vostre maison , avecques la reputation que vous avez acquise , & non suiure encore les armes , pour la perdre , & estre aux escoutes lors que les autres sont aux prises. Si vous desirez monter au bout de l'eschelle d'honneur , ne vous arrestez pas au milieu , ains degré par degré taschez à gagner le bout , sans penser que vostre renom durera tel que vous l'auez acquis. Vous vous trompez , quelque nouveau venu le vous emportera , si vous ne le gardez bien , & ne taschez à faire de mieux en mieux.

Le mesme iour que ie partis de Cressi , monsieur de Guise en partist ,

*Monsieur
de Guise
Lieute-
nant ge-
neral en
France.*

pour s'en aller à Mets, pour executer l'entreprinse de Tiomuille. Le Roy l'auoit choisi pour estre son Lieutenant general en tout son Royaume dès qu'il fut arriué d'Italie. Auant mon arriuée, ie trouuay qu'il auoit prins la ville de Calais, & renuoyé les Anglois de là la mer, ensemble Guines : & que lors il estoit sur le dessein de ce siege de Tiomuille. Il ne tarda pas deux iours, que le Roy me manda de le venir trouuer à Cressi, sans me mander qu'est-ce qu'il vouloit faire de moy : & ouys dire que le lendemain matin que i'en fus party, le Roy auoit fait prendre monsieur Dandelot, sur quelque responce, qu'il luy auoit fait touchant la religion, & comme ie fus arriué sa Maiesté me fit venir en sa chambre, où estoit monsieur le Cardinal de Lorraine, & deux ou trois autres, il ne me souuient de leur nom, bien me semble, que le Roy de Nauarre & monsieur de Montpensier y estoient. Et alors le Roy me dit, qu'il falloit que i'allasse trouuer monsieur de Guise à Mets, pour commander les gens de pied, desquels monsieur Dandelot estoit colonnel. Le luy fis tres-humble requeste de ne me vou-

*Le Sieur
Dandelot
prison-
nier.*

loir point faire exercer la charge d'autrui, & que ie m'en yrois plustost luy faire service aupres de monsieur de Guise comme soldat priué, ou bien que ie luy commanderois les pionniers, plustost que de prendre ceste charge. Le Roy me dit que M. de Guise mesmes me demandoit pour commander en ladite charge, apres qu'il eust esté aduerty de la prise dudit sieur Dandelot. Et comme ie vis, que ie ne gaignois rien en excuses, ie luy dis que ie n'estois pas encore guery d'une dissenterie, que ma maladie m'auoit laissé, & que ceste charge requeroit la grand' santé & disposition, pour l'exercer, & que cela ne pouuoit estre en moy. Sa Ma-
iesté me dit, qu'il tiendrait mieux ceste charge bien commandée de moy en vne lictiere, que d'un autre qui fust bien sain, & qu'il ne me la bail-
loit pas pour l'exercer pour vn autre, car il vouloit que ie l'eusse pour tousiours. le luy respondis alors, que ie le supliois tres-humblement, ne trouuer mauvais si ie ne la voulois point. Alors sa Maiesté me dit ces mots, le vous prie prenez là pour l'amour de moy. Et M. le Cardinal me dit alors,

*L'opinion
que le
Roy Hen-
ry auoit
du sieur
de Mont-
luc.*

c'est trop contesté contre sa Maïesté :
 c'est trop contesté contre son maistre.
 Alors ie luy dis , que ie ne contestois
 point pour mauuaïse volonté , que
 i'eusse à son seruice , ny que ie n'eusse
 volonté d'aller trouuer M. de Guise :
 car dès que i'estois arriué à Paris i'a-
 uois baillé de l'argent pour m'achepter
 quelques tantes & autre équipage ,
 pour m'aller rendre aupres dudit Sieur
 de Guise , luy ayant promis à Rome
 de me rendre aupres de luy. Alors le
 Roy me dit , qu'il n'en falloit plus
 parler , & qu'il falloit que i'y allasse.
 Surquoy ie ne sceus plus que dire :
 car il me semble que le Roy de Na-
 uarre & monsieur de Montpensier se
 meslerent au propos , pour me faire
 prendre ceste charge , pour ce qu'il me
 souuient que le Roy me dit , Il n'y a
 plus d'excuse : car vous voyez que tout
 le monde est contre vous. Et com-
 manda à M. le Cardinal de me faire
 donner autrés mil escus , pour m'ay-
 der à achepter l'equipage qu'il me fal-
 loit. Ce qu'il fit promptement. le m'en
 retournay à Paris , & n'y demeuray
 que deux iours , pour me pouruoir
 de ce qu'il me falloit , puis allay trou-
 uer monsieur de Guise à Mets. le le

*Le sieur
 de Mont-
 luc colon-
 nel de
 l'infante-
 ris.*

trouuay qui montoit à cheual pour aller recognoistre Tiomuille, & ne voulust que i'y allasse, pource que i'auois fait vne grande traite. Et à la verité ie n'estois gueres sain, & y retourna le soir mesmes, & me dit, que si Dieu nous faisoit la grace de la prendre, qu'il y auoit à gagner de l'honneur. Il m'appelloit tousiours, se ioüant à moy, Monseigne: & me dit en riant, courage, monseigne, i'espere que nous l'emporterons: & le matin partismes: car tout son cas estoit prest. Je veux dire vne chose, & à la verité, sans flaterie, que c'estoit vn des plus diligens Lieutenans de Roy, que i'eusse encore seruy, des dix-huit soubz qui i'auois fait seruice au Roy. Il auoit vne imperfection, qu'il vouloit escrire presque toutes choses de sa main, & ne s'en vouloit fier en secretaire qu'il eust. Je ne veux dire, que cela soit mal fait, mais cela le tenoit vn peu en longueur. Et les affaires de la guerre requerent la diligence si soudaine, qu'aucune fois vn quart d'heure fait beaucoup de mal de la perdre. Vn iour ie venois des tranchées, pour luy demander quatre enseignes d'Allemans, pour entrer en

garde avec nous , & nous tenir escorte , car nous commençons fort à approcher de la ville. Et à cause que l'artillerie l'auoit tiré hors de son premier logis, il s'estoit logé en vne petite maisonnette basse, là où il n'y auoit qu'une petite chambre , qui avoit vne fenestre , qui sortoit sur la porte , & là ie trouuay monsieur de Bourdillon , qui depuis a esté Marechal de France , auquel ie demanday , où estoit monsieur, il me dit qu'il escriuoit. Alors ie dis au diable les escritures : il semble qu'il vueille espargner ses secretares , c'est dommage qu'il n'est greffier du Parlement de Paris : car il gagneroit plus que du Tillet , ny tous les autres. Monsieur de Bourdillon se mist fort à rire , pource qu'il cogneust , que ie ne pensois pas qu'il m'entendist : & pour ce qu'il voyoit que monsieur de Guise m'entendoit , il m'aiguillonnoit tousiours pour me faire parler sur ce greffier. Alors monsieur de Guise sortist en riant , & bien monseigne , serois-ie bon greffier ; iamais ie n'eus tant de honte , & me courroussay contre monsieur de Bourdillon , de ce qu'il m'auoit fait ainsi parler : mais ils n'en faisoient que rire :

& me bailla le Comte Rocquendolf avec quatre enseignes. Mais pour retourner à sa diligence, il n'y auoit homme, qui ne le iugeast vn des plus vigilans & diligens lieutenans de Roy, qui ait esté de nostre temps : au reste si plein de iugement à scauoir prendre son party, qu'apres son opinion, il ne falloit pas penser en trouuer vne meilleure. C'estoit au reste vn Prince si sage, si familier & courtois, qu'il n'y auoit homme en son armée, qui ne se fust volontiers mis à tout hazard ; pour son commandement, tant il scauoit gagner le cœur. Ses depesches l'amusoient vn peu, quelquefois trop. Je croy, qu'il craignoit estre trompé : car ceste maniere de gens nous fait bien du mal. C'est vne chose rare d'en trouuer vn fidele.

Louables parties de monsieur de Guise.

Or il assiegea la ville du costé de delà l'eau, la riuere entre deux, laquelle il fit sonder, si elle estoit guere profonde, par cinq ou six soldats, que i'amenay : & ne fusmes que cinq ou six avecques luy dont monsieur de Bourdillon & monsieur de Ciré en estoient : & trouuasmes qu'aucuns y en auroient iusques à la braye, & d'autres iusques à la ceinture. Je luy

Siege de Tiomuil-le.

dis que si de ce costé là estoit le plus foible, qu'il n'arresta point d'y faire la batterie : car ie ne craignois pas, que ie n'y fisse passer les soldats, pour aller à l'assaut : & que moy-mesmes leur monstrerois le chemin. La nuit apres nous mismes les gabions sur le bord de la riuere : & le matin au point du iour l'artillerie commença à tirer à la tour, laquelle fut ouuerte du costé de main gauche tirant à vn ravelin, qui flancoit ladite tour, & aussi fust ouuerte vne petite tournelle, qui estoit entre la grand' tour & le ravelin. Voy-la tout ce qui se peust faire en cest

*Contre-
batterie.*

endroit là. Les ennemis mirent dix ou douze grosses pieces vis à vis de nostre artillerie : & commencerent à faire vne contre batterie sur les vnze heures auant midy : & auant les deux ils nous eurent mis tous nos gabions en pieces, sauf vn & la moitié d'un autre, là où nous nous tenions le ventre en terre dix ou douze que nous estions. Car tous les soldats & pionniers furent contraincts de s'oster de là & s'aller mettre derriere vne autre tranchée, plus de six vingts par derriere nous : & si les ennemis se fussent hazardez de passer l'eau, ils nous

estoyent l'artillerie , & l'eussent peu
jetter à leur aise dans la riuere : car
les soldats , qui s'estoyent retirez à
l'autre tranchée , ne nous pouuoient
venir secourir , qu'à la mercy de leur
artillerie , & de leur arquebuzerie :
d'autant que la riuere n'estoit pas de
plus de soixante & dix pas de large :
& alloit à quatre pas de la muraille.
Monsieur le Marquis d'Elbœuf ne m'a-
bandonna iamais , & quatorze ou
quinze gentils hommes de la suite de
monsieur de Guise. Et ainsi demeuras-
mes iusques à la nuit , que l'on ren
autant de gabions ; & les doublâmes :
mais ce fut pour neant , car nous ne
pouuions faire aucune chose à la mu-
raille de nostre batterie : parce qu'elle
auoit de grandes terrasses par derriere ,
de sorte que deux ou trois charrettes y
pouuoient aller de front & tout à l'en-
tour de la ville, Je ne vis iamais forte-
resse mieux pourtraitte que celle-là ;
Monsieur de Guise tint conseil : & fut
tout le monde d'opinion , qu'il deuoit
oster l'artillerie de là , & loger toute
nostre infanterie & Allemans delà la
riuere , & faire commencer les tran-
chées au plus pres , qu'elles se pour-
roient faire. Ledit sieur faisoit faire vn

376 *Comm. de M. B. de Montluc,*
pont à extreme diligence : & passas-
mes la riuere par dessus iceluy, en-
core que les aix ne fussent pas encore
clouez. Et nous campasmes en vn vil-
lage, qui pouuoit estre à cinq ou six
cens pas de la ville, tout plein & tout
descouuert, de façon qu'un oyseau ne
pouuoit parroistre, qui ne fust veu.
Et nous battoient à coups de canon
dans le village : de sorte qu'il n'y lais-
soit maison qu'il ne mist par terre : &
estions contraincts de nous tenir dans
les caues. I'auois mis entre deux mu-
railles mes pauillons : mais ils me
rompirent & les murailles & les pa-
uillons. Le ne vis iamais vne plus fu-
rieuse contrebatterie. La nuit ensui-
uant monsieur le Marechal de Strossi
passa la riuere avecques monsieur de
Guise, & commençasmes à faire les
tranchées au long de ceste plaine, &
demeurasmes sept ou huit iours auant
que nous fussions à deux cens pas de
la ville, pource que les nuits estoient
courtes : & dès que le iour venoit, ils
nous fouldroyoient dans les tranchées,
& n'y auoit ordre d'y trauailler que
la nuit. Monsieur le Marechal n'en
bougea iamais, sinon que quelquefois
il alloit à ses pauillons qui estoient

*Furieuse
contrebat-
terie.*

demeurez delà l'eau pour changer d'habillemens , & cela pouuoit estre de trois iours en trois iours. Il me laissa faire les tranchées à ma fantaisie , car nous les auions au commencement commencées vn peu trop estroites , à l'appetit d'vn ingenieur. le faisois de vingt pas en vingt pas vn arriere coing , tantost à main gauche , & tantost à main droite : & le faisois si large , que douze ou quinze soldats y pouuoient demeurer chacun avecques arquebuzes & hallebardes. Et cecy faisois-ie , afin que si les ennemis me gaignoient la teste de la tranchée , & qu'ils fussent sautez dedans , que ceux qui estoient au riere coing les combattissent : car ceux des arriere coins estoient plus maistres de la tranchée , que ceux qui estoient au long d'icelle. Et trouuerent monsieur de Guise & monsieur le Marechal fort bonne ceste inuention. Monsieur de Guise me dit , qu'il falloit que i'enuoyasse recognoistre ce qu'auoit fait nostre artillerie à la tour , & que ce fust par des gens bien asseurez. Je prins les capitaines Sarlabous , le ieune Millac , S. Estephe , Cipierre , & mon fils le capitaine Montluc , & y allasmes. Et com-

Tranchées.

Reconnaissance.

me nous estions pres de la tour, il nous falloit passer de petits ponts, que les ennemis auoient fait pour passer le marés, & pour approcher de la tour. A laquelle estans arriuez trouuâmes vne pallissade de bois, comme la cuisse, qui alloit depuis la tour iusques à sept ou huiët pas dans la riuie-re, & falloit aller au long de la pallissade iusques au bour par l'eau, & puis par delà la pallissade reuenir à la tour. Nous auions fait porter deux picques à deux soldats. Je ne me mis point dans l'eau : mais tous, reserué moy, passerent de ceste maniere la pallissade. Et l'vn apres l'autre reconnoissoient la batterie, qu'auoit esté faite à la tour ; & y firent descendre vn soldat avec vne picque, & trouuerent que dans la tour y auoit eau iusques au dessous les esselles. Et pour ce que la riuere faisoit bruit en cest endroit là, à cause de la pallissade, leurs sentinelles n'entendoient rien, encore que la tour fust à quatre pas de la muraille de la ville. Cè'a fait,

M. de Guise ne se contente de la reconnoissance fai- nous nous en retournaâmes. Et le matin i'allay rendre compte à monsieur de Guise de ce qu'auions veu, lequel ne trouua pas bonne nostre reconnoissance ;

fance : & me dit qu'il ſçauoit bien <sup>te par M.
de Mont-
luc.</sup> qu'il n'y auoit point de palliffade : & que des gens, qui n'aguères eſtoient partis de là, l'en auoient aſſeuré, & qu'il falloit la nuit enſuiuant la faire mieux recognoiſtre. Je fus fort faſché de ceste reſponce : & ne luy reſpondis, ſinon que le teſmoignage des capitaines me ſembloit eſtre ſuffiſant : mais puis qu'il ne s'en contentoit, qu'on recognoiſtroit mieux la nuit enſuiuant. Il me dit, qu'il n'entendoit pas que i'y allaſſe moy meſmes. Je luy dis, qu'aussi ne ferois-je. Monsieur le Mareſchal cogneuſt bien que i'eſtois faſché. Et dit au ſieur Adrian Baillon, & au Comte Theophile, Je cognois que Montluc eſt faſché de la reſponce que luy a fait monsieur de Guiſe. Et vous verrez s'il ne va ceste nuit recognoiſtre d'une terrible ſorte : car ie cognois la complexion de l'homme.

MONSIEUR de Guiſe retint ce ſoir là monsieur le Mareſchal : & comme il fuſt nuit, ie prins quatre cens picquiers tous corſelets, & quatre cens arquebuziers, & allay mettre les quatre cens corſelets le ventre à terre à cent pas de la porte de la ville, & ie m'en allay avec les quatre

*Nouvelle
reconnois-
sance.*

cens arquebuziers droit à la pallissade. Les capitaines mesmes qui auoient recogneu, estoient autant faschez de la responce que m'auoit fait monsieur de Guise, que moy-mesme. Ils passerent les premiers la pallissade. Or ie cuide que les ennemis le matin s'estoient apperceus qu'il estoit passé des gens par le bout de la pallissade, car nous y trouuâmes vn corps de garde de vingt ou vingt-cinq hommes, desquels la pluspart furent tuez, & le reste se sauua dans le ruelin, où nos gens les poursuiurent : & entrèrent dedans apres eux : Mais la porte du ruelin qui entroit dans la ville, estoit fort petite, & n'y pouuoit passer qu'un homme. Qui fut cause que nos gens s'arrestèrent : car les ennemis deffendoient la porte. Si est-ce qu'ils ietterent vne moyenne hors du ruelin en terre de nostre costé. Et pource qu'apres de la tour nostre artillerie, qui auoit battu delà la riuiere, auoit abbaissé la muraille, de sorte qu'avecques quelques picquiers qui estoient venus avecques nous, nous vinsmes aux mains : & dura plus d'une heure le combat. Monsieur de Guise qui voyoit tout de l'autre costé de la

riuiere, enrageoit de ce qu'il voyoit. Monsieur le Marechal estoit avecques luy, qui rioit avecques le sieur Adrian, & Comte Theophile, & leur disoit, ne vous disois-ie pas qu'il en feroit vne? l'auois fait porter cinq ou six coignées aux soldats: & pendant que le combat duroit ie fis couper toute la pallissade ou arracher, & ne nous fallust plus entrer en l'eauë pour nous en retourner, car l'eauë s'escoula. Le capitaine saint Estephe y fust tué, & l'enseigne de Cipierre, & vne autre enseigne: non pas qu'ils eussent les drapeaux, car ie n'en auois point apporté, & dix ou douze soldats, qui furent morts ou blesez. Le capitaine Sarlabous est encore en vie, & plusieurs autres, qui attesteront que si nous eussions porté avecques nous cinq ou six eschelles de la hauteur de sept ou huit pieds seulement, nous estions dedans. Car ils faisoient mauuaise garde de ce costé, & en cest endroit là, se fiant au corps de garde qu'ils auoient mis dehors. De façon qu'ils demeurerent vn long temps auant venir deffendre cest endroit: & monterent cinq ou six soldats sur la muraille, s'aidant les vns aux autres.

Et ne falloit que mettre les eschelles sur la muraille, qui estoit demeurée de la batterie, & monter sur le terre plein. Je croy que la fortune nous eust ry : car on dit qu'elle aime les audacieux.

Le matin j'enuoyay dire à monsieur de Guise par le capitaine Sarlabous, ce que nous auions veu, car ie n'y voulus pas aller, estant certain qu'il estoit mal-content. Monsieur le Marechal estoit tousiours aupres de luy, & disoit, Voulez-vous mieux recognoistre vne bresche qu'en donnant vn assaut ? C'est vn trait de Gascogne que vous ne sçauiez pas. Ce qui estoit occasion que monsieur de Guise estoit mal-content, estoit que l'on manderoit au Roy que nous auions donné l'assaut, & que nous auions esté repoussez : car autrement il ne s'en fut pas soucié. Son incredulité & mon despit firent perdre là de bons hommes. Et comme nous fusmes à cinquante pas de la tour, vn matin à la poincte du iour, monsieur le Marechal se voulust retirer pour aller changer de chemise, & moy aussi. Or comme nous vinsmes à nous approcher de la ville, ie faisois tousiours faire les

arriere-coins de main droite vn peu longs , afin qu'il y peust entrer en deux vne compagnie. l'auois tousiours opinion que les ennemis feroient vne sortie sur nous : mais iamais monsieur le Marechal ne le peust mettre en son entendement : & me disoit tousiours , voulez-vous qu'ils soient si fols de sortir pour perdre des gens ? Iamais gens d'entendement ne le firent. Et ie luy respondis , pourquoy ne voulez-vous qu'ils sortent ? car en premier ils defendront leurs gens de la muraille en hors à leur retraite : d'autre costé ils sont douze enseignes de gens de pied , quatre cens Espagnols choisis parmy toutes les compagnies Espagnolles , vn bon chef qui les y a amenées , qui est Ioan Gaytan , homme qu'ils estiment plus que nul autre capitaine , cent hommes à cheual. Et la ville seroit bien gardée seulement avecques la moitié des forces qui y sont. Iamais il ne luy peust entrer en l'entendement. Je ne sçay pourquoy : car la raison de la guerre estoit pour moy. Ce matin là i'auois mis le capitaine Lago l'aîné aux deux arriere-coings longs à main droite. Et les y faisois entrer deuant le iour , afin que les

Ioan Gaytan Espagnol.

ennemis ne s'en aperçeussent. Et estoit autant comme par maniere de parler, vne embuscade. Les capitaines qui entroient en garde, auoient charge si les ennemis faisoient sortie, & s'ils donnoient à la teste de la tranchée qu'ils se iettassent à la campagne: & qu'ils courussent leur donner par flanc. Et ceux de la teste de la tranchée auoient aussi charge, que s'ils venoient donner aux arriere-coings, y fortissent & donnassent pareillement par flanc. Nous auions tous les soirs quatre enseignes d'Allemands, là où nous auions commencé les tranchées pour nous secourir au besoing: & ne me sçauoit souuenir quel regiment estoit ceste nuit là de garde. Et auant que nous fussions au bout des tranchées le iour commença à estre clair. Monsieur le Marechal s'amusa vn peu à parler avec vn capitaine des Allemands: & aussi pour attendre vn cheual que ie luy auois enuoyé apprestier, pour aller repasser le pont, & s'en aller à ses tentes. Et comme nous fumes aupres du village à l'endroit d'vne croix de pierre, arriua le cheual que ie luy prestois. Et comme mon laquais descendoit, tout à coup nous ouïsmes vn

grand bruit : & vismes les ennemis à la teste de la tranchée aux mains avecques les nostres : & sautoient à corps perdu dans les tranchées , & sans les arriere-coings ils nous auoient gaigné les tranchées. Avec eux estoient sortis cinquante ou soixante cheuaux. Le capitaine Lago monstra là qu'il estoit vaillant homme , & bien auisé : car il cria à son Lieutenant qui estoit à l'arriere-coing derriere luy , qu'il courust à la cauallerie les picques baissées : & luy courust au flanc des ennemis , qui combattoient la teste de la tranchée. Le montay sur le cheual , & monsieur le Marechal demeura à la croix , voyant le tout : & n'arrestay que ie ne fus avec les nostres qui estoient pesle mesle avec les ennemis. Et comme Lago arriua à eux , ils se voulurent retirer : & tous nos gens sortirent des tranchées , & leur coururent sus. Et ainsi les menasmes battant & tuant iusques aupres de la ville qui estoit à main droite. Le renuoyay incontinent le cheual à monsieur le Marechal , lequel trouua monsieur de Guise , & tous les gentils-hommes qui estoient logez pres de luy à cheual , qui nous venoient secourir , mais il

*Sortie des
assiegez.*

leur dit qu'il n'estoit nul besoing : & qu'il auoit veu tout le combat , & que la victoire nous estoit demeurée. En nous retirant tout le demeurant de leur arquebuzerie estoit sur les murailles. Il sembloit que ce fust vne saluë d'arquebuziers sur nous. L'estois seul à cheual au milieu de nos gens. Je laisse à penser à vn chacun , si Dieu par miracle ne me sauua parmy tant d'arquebuzades , veu la prinse qu'ils auoient sur moy. Les capitaines me crioyent de prendre le large , mais ie ne les voulus point abandonner. Et arriuay auecques eux iusques sur le bord des tranchées , là où ie descendis , & promptement baillay mon cheual à mon lacquais pour l'amener à monsieur le Marechal , comme dit est : & me iettay dans les tranchées comme les autres : & trouuay vn capitaine & vn Lieutenant des nostres morts , il ne me souuient de leurs noms , car ils estoient François , & n'y auoit pas long temps que ie commandois , & douze ou quatorze morts dans la tranchée des nostres , ou des leurs. Et quelque salue d'arquebuzerie qu'ils tirassent de la muraille , nous n'eusmes pas dix hommes de blesez.

Et

Et voilà comme leur sortie ne nous porta pas tant de dommage , pour beaucoup à nous qu'à eux.

Les capitaines peuuent prendre icy vn bon exemple pour les tranchées , & pour l'ordre que ie tenois pour la sortie que pouuoient faire les ennemis : & le profit qui nous en vint. Car n'allez pas philosopher : les tenants ont besoing d'hommes ; doncques ils ne sortiront pas pour forcer vos tranchées. Si vous vous endormez là dessus , vous serez surprins. Prenez garde aussi quand vous ferez faire vos tranchées , qu'elles soient hautes & en baissant : & qu'il y ait des encoigneures , pour pouuoir loger des gens : car ce sont comme des forts pour rembarrer l'ennemy. Il ne se parla plus de la colere de monsieur de Guise contre moy , car monsieur le Marechal & luy ne tindrent autre propos en leur disner , que du combat , & sur tout de la prouidence , dont i'auois vsé. Et disoient qu'il estoit bien difficile que ie fusse iamais surprins. Aussi à la verité le plus souvent ie veillois lors que les autres estoient en repos , sans crainte du froid , ny du chaud. l'estois endurcy

Instruction aux capitaines.

à la peine. C'est à quoy les ieunes gentils-hommes qui veulent paruenir par les armes, se doiuent estudier, & à souffrir : afin que lors qu'ils se feront vieux, ils ne le trouuent pas si insupportable. Car depuis que la vieillesse est du tout arriuée, Adieu vous dis.

Or dans deux ou trois nuits apres nous enſmes conduit noſtre tranchée iuſques au pied de la grande tour. Et apres monsieur de Guiſe amena ſes mineurs voir ſi la tour ſe pourroit miner : mais il trouua qu'il eſtoit impoſſible : & commencerent leſdits mineurs à percer la muraille à deux ou bien trois pieds de terre : & comme les ennemis entendirent que nous perçions la muraille, ils commencerent à faire par dedans la tour des caſemattes : de ſorte que leurs canonieres reſpondoient à noſtre trou. Et demeurames trois nuits à pouuoir percer la muraille. Et en meſmes que les mineurs picquoient par le dehors, les ennemis picquoient par dedans à leurs caſemattes. Et toutes les nuits monsieur de Guiſe nous enuoyoit quatre gentils-hommes pour nous aider à veiller. Et me ſouuient que monsieur de Montpezat, & monsieur de Ren-

dan y vindrent coucher vne nuict. Et comme le trou fut presque percé, monsieur de Guise me fit amener vn canon pour aider à percer la muraille : car nous cognoissions bien que le picquer qu'ils faisoient c'estoit des casemattes. Et que dès que la muraille de la tour seroit percée, qu'ils nous tiroient des casemattes. Le iour deuant que le canon fust amené, monsieur le Marechal de Strossi s'en estoit allé à ses tentes delà l'eauë pour se rafraichir, & changer de chausses & de chemise, car nous estions tous terre.

Monsieur de Guise dès que les mineurs commencerent à picquer la muraille, fit venir quantité de pionniers, & commença à faire vne trauerse de terre & fascines droit contre-mont la tour, & y faisoit laisser vn petit chemin : de sorte que ladite trauerse fust aussi-tost acheuée, comme le trou de la tour. Les ennemis y auoient mis grande quantité de tables sur la tour en maniere de tranchée. Et le soir deuant que nous donnissions l'assaut, montant par ce petit chemin de la trauerse, & avec des eschelles, nous en portasmes les tables de leur tranchée du haut de la tour, qui nous fist

plus de mal que de bien. Car comme les tables furent ostées, la grande plate-forme qui estoit tout ioignant la tour, n'y ayant que cinq ou six pas d'entre deux, nous voyoit dès que nous monstrions la teste. Or comme j'ay dit, monsieur le Marechal s'estoit allé rafraischir : mais monsieur de Guise le fit soupper avecques luy, & à grande instance l'arresta ceste nuict là, qui fut son malheur : car monsieur de Guise l'arrestoit, pour le lendemain voir où ils mettroient quatre couleurines du costé où ils estoient pour battre aux deffences, quand nous donnerions lendemain l'assaut. Monsieur le Marechal le pria plusieurs fois l'en laisser retourner : & luy disoit, s'il me venoit ceste nuict-là quelque affaire, il auroit grand desplaisir s'il ne s'y trouuoit. Et à grand regret enfin ledit sieur Marechal demeura : de sorte que comme il fut retiré en ses tentes, il demanda au sieur Adrian Baillon, & au Comte Theophile, s'ils auoient le mot du guet pour passer par les Allemans, car pour les nostres il ne s'en soucioit point, & passeroit bien sans mot. Ils luy dirent qu'ils ne l'auoient point. Et

*Monsieur
de Guise
arreste
M. de
Strossi.*

leur dit ces mots : Il me vient en l'esprit que monsieur de Montluc aura ceste nuict des affaires , & que les ennemis le viendront assaillir par dessus la contr'escarpé du fossé de la ville. Et si cela aduenoit , ie regretterois toute ma vie que ie ne m'y fusse trouué. Les autres luy respondirent , Il ne faut pas que vous ayez crainte de cela : car il met vn corps de garde de quatre cens hommes iusques à vingt pas de la porte de la ville. Et faudroit qu'ils combattissent cela auant que venir à luy. Alors monsieur le Marechal leur dit , ie ne sçay que c'est : mais il me prend vne opinion de quelque malheur ceste nuict icy. Les autres luy ostoient cela de la teste tant qu'ils pouuoient : car il faschoit au sieur Adrian de repasser la riuiera , & venir la nuict à la tour : à cause qu'il auoit esté fort malade , & n'estoit gueres sain encores. Car s'il eust dit , comme eux-mesmes me dirent apres , qu'il passeroit bien par les Allemans sans mot , estant cogneu de tous les capitaines Allemans aussi bien que des nostres , il se fust mis en chemin , quelque promesse qu'il eust faite à monsieur de Guise : mais quand l'heure

est venuë, ie crois que Dieu veut que la mort s'en ensuiue, on a beau fuir & se cacher. Il leur dit ces mots, monsieur de Montluc n'est pas bien cogneu du Roy ny de la Royne, encores bien que le Roy l'aime fort : Mais si i'eschappe de ce siege, ie feray cognoistre au Roy & à la Royne ce qu'il vaut. Et comme lendemain il fut mort, le sieur Adrian & le Comte Theophile me dirent que i'auois perdu le meilleur amy que i'auois en ce monde. Ce que ie creus bien, & le crois encore. Et pouuois dire qu'ayant perdu le Duc de Ferrare & luy, i'auois perdu les deux meilleurs amis que i'auois en Italie & en France. Il fut tuë le lendemain regardant avec monsieur de Guise où ils mettroient les quatre couleurines. Ils y auoient regardé deuant disner longuement : mais monsieur de Guise eut opinion d'y retourner apres disner, pour mieux reuoir, ayant monsieur de Salcede aupres d'eux deux. Vne mousquetade le tua venant d'un petit boulevard qui estoit tout au coin de la ville, qui tire vers Mets au long de la riuere. Et voilà comme quand l'heure est venuë, nous ne la pouuons esuiter.

*Mort du
sieur de
Strossi.*

Ce pauvre Seigneur estoit passé par plus de six mille cannonades ou mousquetades, & plus de cinquante mille arquebuzades, lesquelles ne luy sceurent donner la mort : & ceste meschante mousquetade luy fut tirée de plus de cinq cens pas, étant monsieur de Guise pres de luy. Or le Roy y perdit vn bon seruiteur : & mourut vn vaillant homme, s'il y en auoit en la France. Deux heures apres monsieur de Guise vint à la tour : & defendit qu'on ne me dit point sa mort. Et comme ie vis le sieur Adrian & le Comte Theophile, ie leur demanday où il estoit, ils me dirent qu'il s'estoit trouué mal la nuict passée : mais qu'il viendroit ceste nuict-là. Et ayant veu monsieur de Guise tout triste, & tous ceux qui estoient avecques luy, le cœur me iugea qu'il y auoit quelque mal-heur. Et comme monsieur de Guise s'en fut retourné, & m'eust laissé monsieur de Bourdillon en la place de monsieur le Marechal, ie le priay de me dire qu'estoit deuenu monsieur le Marechal. Alors il me dit, aussi si vous ne le sçauiez aujourd'huy, vous le sçauriez demain. Lors il me conta sa mort, & comme monsieur de Guise

leur auoit deffendu de me le dire ,
 craignant que le regret que i'aurois ,
 me gardast de faire le lendemain ce
 que ie deuois au combat. Alors ie luy
 dis , qu'il n'y auoit homme deffous le
 Ciel qui le regretast plus que moy :
 & que ie mettrois peine de l'oublier
 pour ceste nuit là , & pour lende-
 main , mais que tant que ie viurois
 apres ie ne me sçauois tenir de le
 regretter. Le Comte Theophile & le
 sieur Adrian demeurèrent avecques
 moy toute ceste nuit , durant laquelle
 nous passâmes ensemble nos regrets.
 Et à la pointe du iour nous com-
 mençâmes à faire tirer le canon au
 trou. Monsieur de Guise auoit fait
 faire des engins de table espoisse de
 plus d'un grand pied , pour mettre
 deuant le canon quand il auroit tiré :
 afin que les ennemis estans aux case-
 mates ne tuassent nos canonniers. Il
 y auoit deux petites rouës à chaque
 bout qui touchoient en terre : & avec-
 ques vne petite cordette l'on tiroit
 cest engin , & courrit le deuant du
 canon : de sorte que les arquebuzades
 ne pouuoient passer. Et ainsi tirâmes
 quinze ou vingt coups à ce trou : si
 bien qu'un homme tout à son aise y

*Engin
 pour ga-
 rantir les
 canon-
 niers.*

pouuoit passer. Le canon ne pouuoit porter dommage à leurs casemattes, pource qu'elles estoient vn peu à main droite, & homme ne pouuoit s'approcher du trou sans estre blessé ou mort. Monsieur de Guise me manda que ie regardasse si ie pourrois logger trois ou quatre cens hommes depuis la tour iusques au ruelin, & qu'il m'enuoyoit des gabions & des pionniers. Il auoit fait faire des mantelets pour mettre depuis la tour iusques à la riuere, où il y pouuoit auoir sept ou huiët pas. Et de là nos arquebuziers tiroient à ceux qui se monstroient à la courtine. Nos enseignes se mirent au long de la muraille depuis la tour iusques au ruelin. Et ceux de la plate-forme voyoient au long de la courtine : & les nostres, qui estoient contre ce ruelin à costé de la canonniere leur tiroient. Et moy ie faisois tirer de derriere les mantelets. Monsieur de Neuers pere de ces trois filles qui sont en vie, estoit venu là, & se tenoit contre ceste trauerse au pied de la tour. Monsieur de Guise estoit de l'autre costé de la riuere à l'artillerie. Poton Seneschal d'Ageinois, commandoit l'vne des quatre

396 *Comm. de M. B. de Montluc* ,
couleurines , qui faisoit de fort bons
coups , & nous faisoit vn grand bien :
car il tiroit tousiours au haut de la
courtine , & à la plate-forme , à ceux
qui monstroient la teste , pour tirer à
nos gens contre bas. Cela dura plus
de quatre ou cinq heures. Monsieur
de Guise me manda par monsieur de
Cipierre , que ie regardasse si l'on
pourroit mettre les gabions qu'il m'a-
uoit enuoyez entre la muraille & le
trou : mais tous ceux qui se mon-
stroient , pour poser les gabions ,
estoiient morts ou blesez. Je m'adui-
say de mettre cent ou six vingrs pion-
niers dans l'eauë contre le bord de la
riuiere , pour faire vne tranchée au
long d'icelle tirant au ravelin. Mon-
sieur de Cipierre vid la grand' diffi-
culté & impossibilité qu'il y auoit ,
& trouua le capitaine la Bordeziere
mort , son enseigne blessé , qui mou-
rut apres. Vous n'eussiez veu que
soldats blesez , lesquels on amenoit
panser , les mantelets tous en pieces
de coups de pierre : de sorte que nous
estions tous au descouuert , tirant les
vns contre les autres , comme l'on
tire à la butte. J'auois bien rangé nos
affaires , car j'auois fait mettre la plus-

part de l'arquebuzerie à centaines. A mesure que nos gens n'auoient point de poudre, i'en faisois tousiours venir d'autres. Et tout le peril & mal tomboit là où i'estois : car tant les couleuvres qui tiroient de l'autre costé de la riuiere, que ceux des nostres qui tiroient au descouuert, tenoient les ennemis en telle crainte, que nul n'osoit se hauffer, pour tirer contre bas aux nostres, estans contre la muraille : mais tiroient tousiours à nous, qui estions en butte. Monsieur de Bourdillon par le commandement de monsieur de Neuers, me vint prendre par derriere avec les deux bras, & me porta plus de six pas en arriere, me disant, He ! que voulez-vous ? he que voulez-vous faire ? ne voyez-vous pas si vous estes mort, que tout cecy est perdu, & que ces soldats perdront cœur. Alors ie me des-fis de luy, & luy dis, Et ne voyez-vous pas aussi que si ie ne suis là avecques les soldats, que tous abandonneront ce coing : & les ennemis tueront tout ce qui est au long de la muraille : Car lors ils se haufferont à leur aise pour tirer contre bas. Monsieur de Neuers me crioit aussi de l'autre costé du trou,

*Resolu-
tion du
sieur de
Montluc.*

pour me faire retirer. Ce que ie ne
voulus faire, & dis à Monsieur de
Bourdillon telles paroles; Il est dit au-
jourd'huy, ce que Dieu voudra faire
de moy, ie ne le puis eschapper. I'ay
beau fuyr, si ce lieu doit estre mon
tombeau. Sans dire plus mot, ie m'en
retournay au lieu, dont il m'auoit
tiré. Et soudain ie m'aduis de traiter
une entreprinse, disant au capitaine
Volumat, qu'il print six arquebuziers
& deux hallebardiers, & qu'il s'allast
mettre derriere vn canton de murail-
le, qui estoit resté de la tour, quand
on l'abatit: & qu'il aduisa tout à vn
coup partant du derriere de ceste mu-
raille, s'il se pourroit ietter à corps
perdu sur les casemattes, faisant mon
fondement qu'elles ne pouuoient estre
couuertes, que de tables, car ils les
faisoient tout ainsi, que nous faisons
le trou, ou bien qu'elles estoient des-
couuertes. Quoy qu'il en fust, ie le
priay qu'il se iettast, sans marchan-
der, dessus, l'assurant que i'allois
faire donner vn autre capitaine par le
chemin de la trauerse, qui montoit
iusques sur la tour, & que tous deux
se ietteroient à corps perdu, & en
mesme temps sur les casemattes. Ie

fis venir vn capitaine François, (il ne me souuient de son nom,) pour rafraischir les autres : & luy dis, presents monsieur de Neuers, & monsieur de Bourdillon, ce que i'auois dit au capitaine Volumat, & que soudain qu'il seroit monté, sans marchander il se jettast sur les casemates, disant à monsieur de Neuers, & à monsieur de Bourdillon, qu'ils donnaissent courage aux soldats de suivre ce capitaine, & que ie m'en allois faire donner au capitaine Volumat. Mais comme ce pauvre capitaine monstra seulement la teste, le voyla tue par ceux de la grand' plate forme, & vn autre apres luy, de sorte qu'ils tomboient entre les iambes de monsieur de Neuers, & monsieur de Bourdillon. Ie crie au capitaine Volumat, estans esloignez quinze pas l'un de l'autre, que le capitaine qui donnoit par la trauerse estoit desia au haut de la tour, pour le mettre en ialousie : car cela poinct ordinairement les bons courages. Ledit capitaine Volumat se dresse, car il estoit à genouil derriere ce canon de muraille, & court iusques sur le bord. Il y auoit vne autre muraille entre les casemattes & le canon

Les ennemis quittent la casemate.

de la tour : de sorte que quand bien il se feroit ietté là , il n'eust rien fait. Si est-ce que cela fut cause du gain de la place , car la casemate estoit toute descouuerte , & fort basse. Et comme ils virent le capitaine Volumat sur le bord , faisant semblant de se vouloir ietter entre deux ils abandonnerent les casemates , & se mirent en fuite au long de la courtine de la muraille , & du terre-plein , entre lequel & la muraille cinq ou six hommes pouuoient aller de front. Et alors vn soldat du capitaine Volumat en deux sauts fust à moy , & me dit hastiuement que les ennemis auoient abandonné les casemates. Tout à coup ie me iette au costé du trou , & prins vn soldat , & crie , saute dedans , soldat : ie te donneray vingt escus. Il me dit , que non feroit : & qu'il estoit mort , & sur ce il se vouloit deffaire de moy à toute force. Mon fils le capitaine Montluc , & ces capitaines , que i'ay nommez auparauant , lesquels me suiuoient , estoient derriere moy. le commence à renier contr'eux , pourquoy ils ne m'aidoient à forcer ce galand. Alors tout à vn coup nous le iettasmes la teste la premiere dedans , & le

fimes hardy en depit de luy. Comme
 ie vis que les casemattes ne tiroient
 plus, nous iettasmes deux autres ar-
 quebuziers dedans, partie de leur gré,
 partie par force, & leur prenions les
 flafques, & le feu, car il y auoit eau
 iusques deffoubs les aisselles : & tout
 à coup peu apres le capitaine Mont-
 luc se ietta dedans. Les capitaines Cos- *Capitai-*
 seil, la Motte, CastetSegrat, les Au- *nes Gas-*
 fillions, ayans tous rondelles, firent *cons.*
 le saut, pour sauuer mon fils, & trois
 ou quatre arquebuziers apres eux. Et
 comme ie vis qu'ils estoient neuf ou
 dix, ie leur criay, courage compa-
 gnons, monstrez que vous estes vrays
 soldats Gascons, donnez le tour aux
 casemattes. Ce qu'ils firent. Les enne-
 mis, qui estoient sur leur terre plein
 tiroient des pierres aux leurs, pour
 les faire retourner dans les casemat-
 tes. Et comme le capitaine Montluc
 fut aupres de la porte de la casematte,
 il rencontra les ennemis, lesquels y
 vouloient rentrer : & vn arquebuzier
 des nostres tua le chef, qui estoit armé
 d'une escaille couuerte de velours verd,
 vn morion doré en teste, & vne hal-
 lebarde dorée à la main. Deux autres
 y furent tuez de coups de main. Et

lors nos gens se ietterent dans la casemate, & me crierent par le trou de la canonniere, Secours, secours, nous sommes dans les casemattes. Alors Monsieur de Neuers & monsieur de Bourdillon m'ayderent promptement à mettre soldats dedans. Nous leur prenions leurs flasques & le feu : & comme ils estoient en l'eau : ils les reprenoient en la main, & passaient, se jettant dans les casemattes. Et depuis monsieur de Neuers m'appella tousiours son capitaine tant qu'il a vescu, disant qu'il m'auoit là seruy de soldat.

*Honneur
fait par
monsieur
de Neuers au
sieur de
Montluc.*

Il y auoit deux capitaines de la garnison de Mets nommés le Baron d'Anglure & Valen-ville qui auoient eu congé à ma requeste de monsieur de Guise, pour se trouuer à l'assaut, avecques chacun vingt-cinq arquebuziers, lesquels ie tins tousiours au deffoubs de la trauerse : ils n'auoient encore tiré. Ie les appellay, & à vn saut furent à moy, & se ietterent dans le trou, & leurs soldats apres. Et à mesure qu'ils entroient ie les faisois courir à la porte de la casemate, & entrer dedans. C'estoit vne porte fort basse & petite. Les ennemis n'osoient
plonger

plonger les arquebuzades contre-bas, pource que les nostres estans au long de la muraille les voyoient, comme ils se haussioient. Aussi faisoient bien ceux qui estoient là où i'auois tousiours demeuré. Ils ruoyent grand^e quantité de pierres : mais pour cela on n'arrestoit point d'entrer & sortir dans les casemattes. Or comme les soldats du Baron d'Anglure & de Valen-ville entroient en la casematte, ie faisois sortir ceux qui l'auoient gagnée, on n'y pouuoit demeurer plus de quarante ou cinquante personnes.

Et comme Dieu veut donner l'heur aux hommes, les Espagnols qui estoient en la ville, vouloient garder les casemattes : mais les Hannuuiers ou Flamans ne le vouloient souffrir, & voulut le gouuerneur que ceux de sa compagnie la deffendissent : & en demeura en prison long-temps : de sorte que le Roy d'Espagne le vouloit faire mourir : Car les Espagnols le chargeoient d'y auoir mis ses gens apostez, pour faire perdre la place. Le gouuerneur se deffendoit, & disoit qu'il auoit veu faire si mal à Ioan Gaytan, & à ses Espagnols, qu'il ne s'y estoit osé fier, Et ainsi se chargeoient les vns

*Disaient
avoir les
tenans.*

& les autres. Nous sceusmes tout cecy par des gens de monsieur le Connestable, & de monsieur le Marechal de saint André, quand ils sortirent hors de prison, lesquels laisserent en-

*Senevit^e
des Espa-
gnols.* cores ce gouverneur prisonnier. En mon temps i'ay tousiours veu les Espagnols seueres punisseurs de ceux qui par lascheté & cotiardiſe rendoient ou perdoient les places. Ce sera tres bien & sagement fait à vn Prince, de punir ceux qui commettront des fautes si importantes au public, au moins par le degradement des armes, qui est pis que la vie. Mais il en faut faire iugement sans passion: car i'ay veu souuent tel blasmé par celuy qui n'eust ſceu faire mieux.

Pour retourner à nostre ſiege, monsieur de Guise estant aux couleurines, & faissant tirer aux defences aperceust que les gens des tranchées couroient droit à la tour: c'estoient les deux capitaines Anglure & Valen ville, que ie faisois venir, & Lunebourg Colonel d'un regiment d'Allemands, qui estoit au commencement des tranchées; auquel ie manday qu'il m'en-uoyast cent arquebuziers des siens en diligence: car les nostres n'auoient

plus de poudre. Il courut luy mesmes avec cent arquebuziers & cent picquiers, à moy, qui estois à la tour. Monsieur de Guise le vid partir courant, & voyoit aussi les autres, qui estoient pres de la tour courir au trou. Il fit vn grand cry, comme l'on me dit apres, O mon Dieu la tour est prinse. Ne voyez vous pas que tout le monde y court? Et soudain monta sur vn courtaut bay, qu'il auoit là, & courut à toute bride passer le pont, & vint tousiours courant iusques aux tranchées. Soudain que ie vis, qu'Anglure & Valen-ville furent dans la tour, ie dis à vn gentil-homme, courez à monsieur de Guise luy porter les nouuelles, que la tour des Puces est prinse, & qu'à ceste heure ie croy qu'il prendra Tiomuille: mais iusques icy ie ne l'auois iamais creu. Le gentil-homme courut, & le trouua desia qu'il commençoit à entrer dans les tranchées. Le gentil-homme luy dit, Monsieur, Monsieur de Montluc vous mande, que la tour est prinse. Et en courant luy respondit, he mon amy i'ay tout veu, i'ay tout veu. Et à cinquante ou soixante pas de la tour, il mit pied à terre, & abandonnant

*Prinse des
la tour
des Puc-
ces.*

406 *Comm. de M. B. de Montluc,*
son cheual, vint à nous courant. Et
comme il arriua, ie me mis à sous-
rire contre luy : & luy dis, ho Mon-
sieur, c'est à ceste heure, que ie croy,
que vous prendrez Tiomuille. *Mas*
bous hazets trop bon marcat de nostre pet,
& de vostre monseigne. Il me ietta le bras
droit au col, disant telles paroles,
Monseigne, c'est à cest'heure que ie
cognois que l'ancien prouerbe est ve-
ritable, que iamais bon cheual ne de-
uint roffe. Or Lunebourg estoit desia
dedans, & quinze ou seize Allemans :
& les autres entroient à la file. Mon-
sieur de Guise se ietta dedans, & va-
entrer à la petite porte dans les case-
mattes. Et comme il fut dedans, il
me cria par vne canonniere, que ie
luy fisse mettre des pionniers dans la
tour, pour abbatre les casemattes,
& que ie gardasse qu'il n'entra plus
personne, car ils se touchoient tous
dedans. Alors ie iettay des pionniers
dans la tour, & commencerent à
rompre la muraille des casemattes. Et
comme les Allemans virent que ces
vilains ne trauailloient point de force,
ils leur prindrent les pies, & com-
mencerent à couper ladite muraille.
Monsieur de Guise fit sortir Lune-

*Belle di-
ligence
d'un
chef.*

bourg pour garder qu'il n'en entrast plus dans la tour , & qu'il hastast ses gens pour couper les casemattes. Et en moins d'une demie heure toute la casematte fut renuersée sur l'eau qui estoit dans la tour , laquelle ruine beut toute l'eau. Et lors fusmes au large , & tout le monde y entroit , qui vouloit. Monsieur de Guise en fortit , & fit sortir les Allemans , & retourner en leur lieu. Et alors ie retiray le Capitaine Sarlabous & tous ses compagnons , lesquels estoient au long de la courtine , & contre le ruelin , & se mirent dans les tranchées.

Or comme les ennemis virent la tour perdue , ils ne tiroient plus de bon cœur : & cogneusmes bien qu'ils estoient estonnez. Les mineurs Anglois , qu'auoit monsieur de Guise n'estoient iamais bougez d'aupres de moy. Monsieur de Guise auant qu'il partist de la tour , regarda avecques eux , où est-ce qu'ils pouuoient faire les mines , & trouuerent que c'estoit deffous la grand plate forme : & marquerent les lieux , où ils la deuroient faire , se retirant avec monsieur de Guise : lequel me dit , Monseigne , ie

m'en vois courant à mon logis pour aduertir le Roy de la prinſe. Et aſſeurez-vous, monſieur de Montluc, que ie ne luy celeray pas le deuoir que vous auez fait. Ie vous renuoye-
 ray les mineurs ſur l'entrée de la nuit. Ie vous prie, baillez leur des gentils-
 hommes, qui ne bougent d'aupres d'eux: afin que par eux il vous man-
 de, ce qu'ils auront beſoin. Et s'en alla deſpeſcher vn courrier au Roy: car il tarde aux grands, que les nou-
 uelles ne volent. Sa Maieſté faiſoit
 lire les preſages de Noſtradamus le
 iour deuant, & liſoient pour le len-
 demain bonnes nouuelles au Roy. Le
 courier y arriua ce iour meſmes: &
 lendemain y auoit ville-rendue. On
 dira que ce ſont des reſueries: mais
 ſi ay-ie veu pluſieurs telles choſes de
 ceſt homme. La tour fut prinſe entre
 les quatre ou cinq heures apres midy.
 Nous auions combattu depuis les dix
 heures, & comptions que le combat
 auoit duré de ſix à ſept heures. Ce
 combat, & celuy du fort de Camolia
 à Sienne ſont les plus longs, & les
 plus perilleux combats où ie me ſuis
 iamais trouué, bataille ou ſans batail-
 le. Car il y faiſoit bien chaud: auffi

*Preſages
 de Noſ-
 trada-
 mus.*

plusieurs y demeurèrent. A l'entrée de la nuict arriuerent les mineurs , & moy mesmes allay veoir le commencement. De toute la nuict ie ne dormis , pource que ie les voyois si diligens , que ie ne voulois pas que rien manquast , mais que tout leur fust baillé promptement : afin que pour faute de quelque chose , ils ne perdissent vn quart d'heure de temps. De forte qu'à l'aube du iour ils eurent fait deux mines , mis la poudre preste à y mettre le feu : & la troisieme deuoit estre preste sur les dix-heures. Ma presence ne seruit pas de peu à faire vne telle diligence , ayant non plus enuie de dormir , que de danser. Monsieur de Neuers , & monsieur de Bourdillon s'en estoient allez avecques monsieur de Guise , & retournerent le lendemain au soleil leuant. Ledit sieur de Neuers se fit apporter son disner sur les huit heures. Comme nous mangions sur trois tambours , où ses gens auoient mis la nappe , estans assis sur autres trois , à peine eusmes nous beu chacun vn coup que les sentinelles me vindrent dire , qu'au coin de la ville vn trompette sonnoit en chamade. Le baillay le tambour , sur

*Les te-
nans de-
mandent
à capituler.*

lequel i'estois assis , à son maistre , afin qu'il luy allast respondre. Le tambour me raporta , que le trompette luy auoir dit , que i'aduertisse monsieur de Guise , qu'ils vouloient parler : car ils scauoient que ie commandois là. Et comme monsieur de Neuers & monsieur de Bourdillon l'entendirent , ils laisserent le manger , & allerent monter à cheual , courant vers monsieur de Guise. Ledit Seigneur y enuoya incontinent vn sien trompette , auquel ils donnerent charge de dire à monsieur de Guise , que s'il luy plaisoit leur enuoyer quatre gentils-hommes pour parler , ils en bailleroient autre quatre pour ostages. Monsieur de Guise y enuoya monsieur de la Brosse , monsieur de Bourdillon , ou bien monsieur de Tauannes , & Esclabolle , & vn autre , dont ie ne suis recors. Ils firent la capitulation , qu'ils sortiroient avecques l'argent qu'ils pourroient porter sur eux : & pour ne mentir point il ne me souuient des autres articles. Je ne me suis iamais gueres meslé de ces escritures , estant assez empesché à pourueoir , que sur ces entrefaites , il n'y eut quelqu'un tué mal à propos ,
comme

comme il aduient souuent. Mais ils
 sortirent le lendemain , & veux dire ,
 que des quatre parts les trois estoient
 bleffez , & presque tous à la teste. Et
 cela se faisoit quand ils se haussioient
 pour nous tirer , là où i'auois affusté
 nos arquebuziers. Car à ceux , qui
 estoient contre la muraille , ils ne pou-
 uoient tirer , qu'ils ne monstassent de
 la ceinture en haut. Et tout leur mal-
 heur vint des nostres qui estoient con-
 tre le ruelin , & de ceux que ie com-
 mandois , où nous tirions en butte. Et
 dès le soir mesmes , que la capitula-
 tion fust faite , monsieur de Guise des-
 pescha monsieur du Fresne. Je ne scau-
 rois dire s'il estoit encores alors Secre-
 taire des commandemens , bien me
 vint dire adieu tout à cheual , & me
 demanda si ie voulois rien mander au
 Roy. Je luy dis , Vous mesmes auez
 veu comme tout s'est passé , & que
 i'auois tant de fiance en monsieur de
 Guise , qu'il ne le celeroit point à sa
 Maiesté. Alors il me dit , qu'il auoit
 charge expresse de compter tout par
 le menu au Roy , comme le combat
 estoit passé , qu'entr'autres choses il
 luy auoit donné charge de dire au
 Roy , que trois hommes auoient esté

*Reditio-
 de Thom-
 mille.*

*Honneur
 au sieur
 de Mont-
 luc par
 monsieur
 de Guise.*

cause de la prinse de Thiomuille, que que i'en estois l'un de ceux-là, qu'il m'en deuoit sentir bon gré. Et cogneus bien qu'il n'auoit rien celé au Roy : car il m'apporta lettres de sa Maiesté, par lesquelles il me mandoit beaucoup de bonnes choses : & entr'autres qu'il n'oublieroit iamais ce service que ie luy auois fait. Je ne veux pas desrober l'honneur des autres, contant ce que ie fis. Je croy que les Historiens qui n'escriuent que des Princes & grands en parlent assez, & passent sous silence ceux qui ne sont pas d'une si grande taille.

VOILA donc la ville de Thiomuille prinse. Aucuns qui n'aimoient guere monsieur de Guise, auoient mis en placards à la porte du Palais à Paris, & par les carrefours, qu'il ne trouueroit pas à Thiomuille, ce qu'il auoit trouué à Calais, n'y ayant trouué que les vilains. Cela estoit en rime, de laquelle il ne me souuient point. C'estoient des enuies qu'on portoit à ce braue & vaillant Prince, pour la charge honorable que le Roy luy auoit donnée : mais ie n'ay affaire de traicter cela : car ie ne me veux embroüiller en ces fuzées. Auant nous

*Enuie
contre
monsieur
de Guise.*

ces enuies ont regné , & regneront
encores apres nous , si Dieu ne nous
vouloit tous refondre. Il y en auoit
qui creuoient de despit que monsieur
de Guise eust eu ceste bonne fortune.
Car il y en a , & trop , de si bonne
paste , qui aiment mieux la ruine &
perte de leur maistre , que l'honneur ,
non pas de leur ennemy , mais de
leur compagnon. Et si quelque dis-
grace luy suruient , car les hommes
ne sont pas Dieux , ils se rient , &
font d'une mouche vn elephant. Laif-
sons les creuer leur saoul. Cependant
Thiomuille fut à nous avec beaucoup
d'honneur. Le soir deuant que les en-
nemis s'en fussent allez , monsieur de
Guise mit dedans la ville monsieur
de Vieille-ville , lequel n'y voulut en-
trer , que ie ne fusse avecques luy ,
pource qu'il ne seroit pas , disoit-il ,
maistre des soldats qu'ils n'entraffent
par force par dessus les murailles. Je
pris deux ou trois cens soldats , &
trois capitaines , & me mis dedans
avecques luy , ayant sa compagnie de
gens-d'armes : & toute la nuit nous
fallut faire la sentinelle , pour garder
que les soldats n'entraffent par la mu-
raille : & ne dormismes vne seule

goutte. Je m'estonne de ce qu'on lit aux histoires Romaines, de ceux qui avant le iour des batailles assignées, dormoient aussi profondement que si c'estoit le lendemain de leur nopces. Je n'ay iamais esté si peu apprehensif.

Chose notable.

Bien souuent ay-ie passé trois nuits de suite, & trois iours sans dormir, voire sans en auoir que peu d'enuie. Je conseillay le lendemain à monsieur de Guise de remuer son camp hors de là. Car autrement on ne pouuoit estre maistre des soldats. Et à la verité dire, ils meritoient qu'on leur donnaist le sac : car c'est leur oster le cœur, si on ne leur donne quelque curée. Et peu de chose qu'ils gagnent de l'ennemy, les contente plus que quatre payes. Mais monsieur de Guise disoit toujours qu'il falloit garder la ville pour le seruice du Roy : qu'à l'occasion de ceste ville, le Roy tireroit d'Allemagne toutes les forces qu'il voudroit, & que le Duc Iéan Guillaume de Saxe passeroit par là, & qu'il falloit qu'il y trouuast des viures : & en renuoya le camp, & le mit à demy lieuë de là. Monsieur de Vieille-ville y demeura dedans avec trois ou quatre enseignes de gens de pied, & la

compagnie de gens - d'armes.

OR capitaines, mes compagnons, *Discours
aux capi-
taines sur
la prise
de Thion-
ville.*
vous avez icy vn exemple, si vous
le voulez retenir, & cognoistrez de
quoy sert vne grande promptitude :
car ceste place se gaigna pour la hasti-
uité dont i'vsay incontinent que le sol-
dat du capitaine Volumat m'eust dit
que les ennemis abandonnoient les
casemattes. Je n'eus pas la patience
d'y mettre plus de neuf ou dix hom-
mes, sans les enuoyer combattre. Tout
aussi-tost ie fis mettre mon fils le pre-
mier, & les gentils-hommes qui m'a-
voient suivy au siege de Sienne & à
Montalzin. Il me seruit bien de me
haster, & les faire aller au combat :
car si i'eusse demeuré iusques à ce qu'il
y en eust eu autant dans la tour qu'il
en faisoit besoin par apparence, les
ennemis fussent rentrez dedans, & on
les eust promptement renforcez : de
sorte que iamais il n'eust esté possible
de la prendre. Je me suis trouué en
beaucoup de sieges : mais ie ne me
trouuay iamais sans quelque peu d'es-
perance de prendre la place, que celle-
là. Car ayant veu & touché auecques
le doigt tout ce qui s'y pouuoit faire
pour la prendre, ie m'en trouuay aussi

*L'honneur
de M. de
Guise.*

esloigné que du Ciel à la terre. Et ne faut point qu'on donne loüange de la prinse qu'à Monsieur de Guise seul, qui s'y opiniastra de telle sorte, que le combat dura six ou sept heures : & cuide que sans la sollicitation qu'il me faisoit d'heure en autre, nous nous fussions retirez, cognoissant qu'autant valloit combattre contre le Ciel. Il faut croire que par son heur & bonne fortune, & l'aide de Dieu, qu'il le voulust ainsi, elle se gagna, & non par la force des hommes. Estant certain qu'il fut tiré plus de canonnades par ceux de dedans, que nous n'en tirâmes dehors.

*Belles
parties
requises à
un capi-
taine.*

Doncques mes compagnons, comme vous verrez la commodité, hastez l'exécution : & ne donnez iamais loisir à l'ennemy de se recognoistre. Je le vous conseille. J'ay eu tousiours trois choses en moy, c'est de bien nombrer les gens. Iamais ie n'ay trouué sergent Major, ny autre qui m'ait surpassé en cela. Et pourveu que l'ennemy ne fust partie en pendant, & partie en plaine, encore que le bataillon fust grand, ie le nombrois à cinquante hommes près de demy mille loin : Et la seconde, de cognoistre à la façon de faire

des ennemis , s'ils ont peur , soit à
 leur desmarche , à leur train , ou à la
 façon de tirer : car de là vous tirez vn
 grand aduantage. Deslors que j'ap-
 perceuois mon ennemy tant soit peu
 en branle , ie le tenois pour perdu :
 Et la troisieme , la hastiuité de les
 combattre sur leur peur fort ou foible,
 Car si vous ne vous sçauiez aider de
 la peur de vostre ennemy , il ne vous
 faut esperer de sçauoir vous aider de
 la vostre. Et ay tousiours eu en ma
 teste la deuise d'Alexandre , encore
 que ie ne la porte pas , qui est *Ce que* *La dili-*
tu peux faire aujourdhuy n'attend au len- *gence re-*
demain. Et tiens qu'apres l'aide de Dieu *quise.*
 toutes les bonnes fortunes que j'ay
 eues , m'ont procedé de ces trois cho-
 ses. Que si vous n'avez le iugement
 voyant vostre point de presser & sol-
 liciter vos gens , & sans vser de con-
 sultation de gagner pais , vous ne
 ferez iamais rien qui vaille , ny pour
 vous , ny pour celuy que vous serui-
 rez. Ne craignez en vn faut perilleux
 d'hazarder la vie du soldat. Il n'y a
 ordre. Il faut que quelqu'vn se sacrifie
 pour le public , autrement le monde
 seroit trop peuplé , pourueu que
 ce soit en lieu , d'où il ne se puisse

retirer, comme ie fis aux soldats que ie pouffay dans les casemattes. Car lors se voyans perdus ils prennent courage : & font de necessité vertu. Si ie me fusse retiré lors que monsieur de Bourdillon me print par le faux du corps, ie croy que nostre entreprise eust esté remise. I'en ay veu bien souvent qui sont bien aises quand on les force se retirer, lors que l'hazard y est, & font les empressez ailleurs. Ie cognois ces gens à la mine. Mes compagnons, mes amis, apres auoir dit vostre *In manus*, ne vous souuenez plus que de bien faire. Si vostre heure est venuë, vous auez beau conniller. Puis qu'il faut mourir, il vaut mieux mourir en gens de bien, & laisser vne belle memoire de soy.

On ne
peut esui-
uer son de-
stin.

M. de
Vieille-
ville Ma-
reschal.

Ie perdis à la relation des capitaines plus de cinq cens soldats morts ou bleffez : & fismes apporter tous les bleffez à Mets, où monsieur de Vieilleville, qui est à present Mareschal de France, les enuoya recommander, car il estoit Lieutenant de Roy là : & leur fis distribuer de l'argent de l'Hospital, que monsieur l'Admiral auoit dressé, lequel a esté cause de la saluation d'un grand nombre de soldats.

bleſſez , & auſſi de faire hazarder les
 ſoldats plus hardiment au combat ,
 ayant eſperance que ſ'ils eſtoient bleſ-
 ſez , ils auroient ſecours de l'argent
 de l'Hospital pour ſe faire guerir. Cer-
 tes , Sire , & vous qui eſtes appelez

*Aduis au
Roy.*

aux grandes charges , vne des princi-
 pales choſes , dont vous deuriez auoir
 ſoin , c'eſt d'eſtablir des lieux pour les
 pauvres ſoldats eſtropiez & bleſſez ,
 tant pour les panſer , que pour leur
 donner quelque penſion. Pouvez-vous
 moins faire , puis qu'ils vous font pre-
 ſent de leur vie. Ceſte eſperance leur
 fait prendre le hazard plus volontiers.
 Certes vos ames en reſpondront , car
 elles n'auront pas plus de priuilege
 que les noſtres , & ſi vous en porterez
 encores plus : car vous nous faites
 faire les maux que nous faiſons , pour
 plaire à vos paſſions. Et ſi Dieu n'a
 compaſſion de vous & de nous , ce
 fera vne grande pitié. Sire , à l'hon-
 neur de Dieu pouruoyez aux pauvres
 ſoldats , qui perdent bras & iambes
 pour voſtre ſeruice. Vous ne les leur-
 auez pas donnez , c'eſt Dieu. Pouvez-
 vous moins faire que les aider à nour-
 rir ? Penſez-vous que Dieu n'oye pas
 les malediſtions qu'ils nous donnent .

puis que nous les rendons toute leur vie miserables : l'ay ouy dire que le grand Seigneur a vne belle police là dessus. Aussi est-il mieux seruy que Prince du monde.

*Auis
aux gene-
raux des
armées.*

Trois iours apres la prinse de Thiomuille, l'armée marcha droit à Arlon, qui est vne petite ville fort belle de ce qu'elle contient. C'est vne grande faute à vn Lieutenant de Roy, apres la prinse d'une place de sejourner, comme ie vois qu'on fait bien souuent. Cela acourage vos ennemis, & donne à vos gens loisir de se retirer, au lieu que l'honneur leur commande de demeurer lors qu'ils se voyent employez. l'entends si l'armée n'est du tout rompuë ou ruinée : car lors la necessité vous force. Mais de se reposer apres vne prinse, & perdre le temps tant petit soit il, cela est fort preiudiciable au seruice de vostre Majesté. Je campay tout à l'entour de ladite ville avecques nos gens de pied François. Monsieur de Guise campa vn quart de lieuë en arriere : & me dit qu'il estoit tout assoupy d'enuie de dormir, car il n'auoit dormy depuis le commencement du siege, ce qu'il auoit accoustumé de dormir en vne

nuict (& moy encores moins) me priant de faire les approches ceste nuict-là : & qu'il m'enuoyeroit les Commissaires de l'artillerie avecques quatre canons, pour aduiser là où il les faudroit mettre : & qu'il vouloit donner ceste ville à sac aux soldats en recompense de Thiomuille : & se retira dans des logis couuerts de paille où il se logeoit. Il y auoit dans la ville cent cinquante Allemans, & quatre cens Walons. Les Allemans gardoient vne porte, & les Walons l'autre. Et comme i'eus mis les sentinelles & les corps-de-garde bien pres les vns des autres, pource que l'on disoit qu'il y entreroit des gens ceste nuict-là, ils faisoient fort bonne mine là dedans. Ce qui nous faisoit penser qu'ils esperoient secours. Je commençay à faire faire l'esplanade par les iardins pour mener l'artillerie. Et voulois faire la batterie par la porte, & vn peu à main gauche, pour m'aider à l'assaut avecques des eschelles d'vne petite bresche qu'ils auoient faite, pour porter la terre sur la terrasse qu'ils faisoient en cest endroit là. Ils auoient fait des degrez dans la terre mesmes à la descente du fossé, & pareillement

*Forces
dans Ar-
lon.*

*Recon-
noissances.*

à la montée iusques sur le terrain. Je m'approchay iusques auprès du fossé de la ville, & iusques à vn petit fossé qu'il y auoit pres du chemin, lequel ie fis recognoistre par vn soldat. I'auois trois ou quatre capitaines avecques moy dans ce petit fossé. Le soldat trouua ces degrez, dans lesquels il descendit, puis en monta trois ou quatre autres de ceux qui montoient sur le terre-plein : & là s'arresta sans estre apperceu. Et comme il y eut demeuré vn peu, il retourne à moy, & me dit, qu'il n'y auoit point de sentinelle par le terre-plein : & qu'il pensoit que si l'on s'alloit ietter à coup perdu sur le terre-plein que nous emporterions la ville. Je fis approcher vn corps-de-garde qui estoit fort plus que les autres : à cause que ie voulois qu'il seruiſt à garder l'artillerie : & faisois venir le ventre en terre les soldats se mettre dans le fossé. Puis fis retourner le soldat au fossé & trois ou quatre arquebuziers, & deux capitaines avecques les rondelles, dont monsieur de Goas en estoit vn. La nuict estoit si fort obscure, qu'on ne voyoit point à vn pas l'vn de l'autre : ce soldat estoit Flaman. Il descend au fossé, les

capitaines apres luy , & trois ou quatre arquebuziers apres. Et comme ils estoient dans le fossé , ils se mettoient contre le bord d'iceluy deuers la ville , & au plus pres des degrez. Les ennemis entendirent le bruit & commencerent à crier , *vaer dar* , c'est-à-dire qui va là. Ce soldat leur respondit en leur langage , *frind* , *frind* , amis amis : & luy demanderent qui il estoit , il leur dit qu'il estoit Flaman , & qu'il regrettoit , pour estre de leur pays , leur perte : & qu'au point du iour toute l'artillerie qu'auoit Monsieur de Guise seroit en batterie , & qu'il ne falloit point qu'ils se fiasent aux Allemans qu'ils auoient avec eux : car ils estoient assurez de n'auoir aucun mal , & de n'estre aucunement offencés par les nostres , comme desia ils leur auoient promis , & qu'un Alleman estoit sorty à l'entrée de la nuit pour aller parler aux nostres : de façon que tout le meurtre tomberoit sur eux s'ils ne se rendoient , & qu'il ne seroit pas temps quand l'artillerie auroit tiré. Ils enuoyerent incontinent au quartier des Allemans , & trouuerent qu'un soldat , qui parloit Alleman , prés là où ils estoient , parloit

aux leurs. Et comme leur messager fut de retour, ce soldat entendit qu'ils estoient en garbouil là dedans : & commença à leur dire, s'ils luy vouloient donner à boire, ils luy dirent qu'ouy, & qu'il montaist sur leur foy, & à fiance. L'oyois tout cecy, car ie n'estois pas à six pas du bord du fossé : & fis aller les autres deux capitaines l'un apres l'autre dans le fossé, & puis trois ou quatre sergens avecques des hallebardes. Ce soldat monta les degrez iusques à ce qu'il fust sur le bord du terre-plein, & parloit à eux, disant que monsieur de Guise auoit fait bonne guerre à ceux de Thiomuille, & qu'il la feroit à eux : & les amusoit tousiours de paroles. Ils luy firent porter à boire. Monsieur de Goas estoit apres le soldat, & trois arquebuziers apres luy, les vns apres les autres : car ils n'y pouuoient monter que l'un apres l'autre. Ce soldat les couuroit de sorte qu'ils ne pouuoient voir au long du degré de la montée. L'autre capitaine se mit apres les trois arquebuziers, les sergens apres, de sorte que tout ce degré iusques au haut fut plein : Et comme monsieur de Goas vid qu'ils estoient tant, poussa le soldat

qui estoit deuant luy sur le terre-plein : & l'autre capitaine poussa les trois arquebuziers. Ce soldat commence à crier, *goutt Krich*, c'est-à-dire bonne guerre, bonne guerre. Les arquebuziers tirerent : les capitaines se ietterent sur la contr'escarpe, & tout le monde apres : & ces pauvres gens s'enfuirent tous à leurs logis, les soldats les couroient par les ruës. Je me iettay dans le fossé avecques tout le demeurant, montant les soldats les vns apres les autres. Les Allemans qui se virent prins par derriere, à la requeste de ce soldat qui parloit Alleman, ils ouurirent vne fausse porte, & se donnerent à la mercy des soldats : qui fut vn acte digne d'estre louié aux nostres, & que l'on peut bien cognoistre à cela qu'ils estoient vieux soldats. Car il ne se trouua pas quatre hommes de morts : ains eux mesmes menoiient les nostres faire butain par les maisons. Voylà comme la ville fut prinse.

Monsieur de Guise, qui auoit defendu qu'on ne l'esueillast point, mais qu'on le laissast dormir à son aise ceste nuict là n'en sceut rien, iusques au poinct du iour qu'il demanda, si l'ar-

*Surprise
d'Arlon.*

tillerie auoit encore commencé à tirer : & on luy respondit que la ville estoit desia prinse dès la minuit : & que l'on auoit retourné l'artillerie en son lieu , ce qui luy fit faire le signe de la croix , disant c'est aller bien viste. Ledit seigneur monta à cheual , & nous vint trouuer. Or par malheur le feu se print en deux où trois maisons , à cause de la poudre que l'on y trouua , & en la prenant le feu s'y mit & brusla quatre ou cinq soldats. Ceste ville là estoit presque pleine de lins prests à estre filez , le vent estoit grand , & n'y sceut-on iamais donner ordre , que plus de la moitié de la ville ne se brulast , qui fust cause que les soldats ne gaignerent pas tant , comme ils eussent fait. Le lendemain monsieur de Guise marcha avec tout le camp , & ne s'arresta iusques à ce qu'il fust à Pierre-pont. Il se logea dans la ville , & toute la noblesse de sa suite , laquelle estoit grande : & nous campames les vns delà l'eau , & les autres

*Duc de
Saxe.*

deçà. Et là arriuerent les Suisses & le Duc Iean Guillaume de Saxe , qui amena vne belle & grande troupe de Reistres avec luy , & me semble qu'il vint aussi avecques luy quelque regiment

ment d'Allemans. Le Roy y arriua aussi, & se logea à Marche, maison de Monsieur le Cardinal de Lorraine. Je croy que ce fut la plus belle & grande armée de cauallerie & d'infanterie, que iamais Roy de France eust. Car comme le Roy la vouloit voir toute en bataille, le camp duroit vne lieuë & demie. Et quand on commençoit à marcher par la teste, auant qu'on fust au bout & retourné il y falloit trois heures.

Deux heures auant iour Messieurs de Bourdillon & de Tauannes Marefchaux de camp se rendirent au lieu où tout le camp estoit assigné : & à mesure que nous arriuions, ils nous bailloient le lieu où il falloit que nous fussions : & auant que tout le camp fust en bataille, il fut plus de huit heures. Il faisoit vn grand chant. Monsieur de Guise se rendit à l'aube du iour : & aydoit à mettre en bataille l'armée. Je fus mis avec les François entre les Suisses & vn bataillon d'Allemans. Et passant monsieur de Guise pardeuant nostre bataillon, il dit, Pleust à Dieu, qu'il y eust icy quelque bon compagnon, qui eust vu flacon de vin & du pain pour boire vn

Bourdillon, Tauannes.

coup , car ie n'auray pas temps d'aller à Pierrepont dîner auant que le Roy

Le fleur de Mont- luc invite M. de Guise à dîner avec luy. soit arrivé. Je lui dis. Monsieur voulez vous venir dîner à mes tantes ? Il n'y auoit pas plus d'une arquebuzade. Je vous donneray de fort bon vin François & Gascon , & force perdriaux.

Alors il me dit , ouy , monseigne , mais les perdriaux seront de vostre pays , des aux & des oignons. Je luy respondis , que ce ne seroit l'un ny l'autre , mais que ie luy donnerois si bien à dîner , que s'il estoit dans son logis , & le vin aussi froid , qu'il en pourroit boire , & vin de Gasconne , & de bonne eau. Alors il me dit , ne vous moquez-vous point , monseigne ? & ie luy dis , non sur ma foy. Ouy , dit-il , mais ie ne puis laisser le Duc de Saxe. Je luy respondis amenez le Duc de Saxe , & qui vous voudrez. Il me respondit , que le Duc ne viendroit pas , sans ses capitaines. Et ie luy respondis , amenez capitaines & tout , car j'ay prou à manger pour tous. J'auois promis le soir devant à messieurs de Bourdillon & de Tavannes , de leur donner à dîner , apres qu'ils auroient mis le camp en bataille : mais ils n'y peurent venir ,

pour ce qu'une partie de la cavalerie ,
 qui estoit logée loin , n'estoit encore
 arriuée , & d'autre part i'auois vn des
 bons viuandiers de l'armée. Monsieur
 de Guise alla chercher le Duc de Saxe ,
 ensemble ses capitaines. l'envoyay en
 diligence à mon Maître d'hostel , afin
 que tout fust prest. Mes gens auoient
 fait faire vne caue dans terre , dans la-
 quelle le vin & l'eau y demeuroient
 aussi frais que glace , & de bonne for-
 tune , ie me trouuay force perdriaux ,
 cailles , paons d'Inde , leurauts , &
 tout ce que l'on eust peu souhaitter ,
 pour faire vn beau festin , avec patif-
 serie & tartes : car ie m'asseurois bien
 que messieurs de Bourdillon & de Ta-
 uannes ne viendroient pas seuls , les-
 quels ie voulois bien traicter : pource
 que i'estois bien aimé d'eux. Ils furent
 si bien traictez , que Monsieur de Gui-
 se demanda au Duc de Saxe par son
 truchement qu'est ce que luy sembloit
 du colonnel des François , & s'il ne
 nous auoit pas bien traittez & donné
 de bon vin ? Le Duc leur respondit ,
 que si le Roi leur eust donné à disner ,
 il ne les eust pas mieux traittez , ny
 donné de meilleur vin , ny plus frais.
 Les capitaines du Duc de Saxe ne l'es-

*Festin du
 sieur de
 Montluc.*

*Le sieur
 de Mont-
 luc colon-
 nel.*

pargnoient pas , beuans tousiours à nos capitaines François , lesquels i'auois aussi mené avec moy. Et encores que messieurs de Bourdillon & de Taunannes fussent venus , si ne m'eussent ils pas surprins. Car apres la table de monsieur de Guise , il n'en y auoit vne seule en tout le camp plus longue , ny mieux fournie que la mienne. Et tousiours i'en ay vsé ainsi , en quelque charge que i'aye été : car pour honorer les charges que i'ay eues de mes Maistres , i'ay voulu faire croistre ma despence. I'ay veu tousiours ceux qui ont véscu ainsi , estre plus en credit , que les autres , & mieux suiuis. Car tel gentilhomme est sorty de bon lieu , qui ne sçait bien souuent où aller dîner. Et sçachant quelque bonne table volontiers il s'y rendra. Et s'il vous suit à table , volontiers il vous suiura ailleurs , s'il est tant soit peu bien nay , & nourry. Pour retourner à mes hostes , quand ils sortirent de table , Monsieur de Guise me dit , comment mes gens pouuoient faire blanchir le linge , surquoy ie leur auoit donné à dîner. Ie luy dis , que c'estoient deux hommes , que i'auois , qui le blanchiffoient. Vrayement , dit-il , vous estes

feruy en Prince. Et là dessus entretint le Duc de Saxe, en disant plus de bien de moy, qu'il n'y en sçauroit auoir. Je dis à monsieur de Guise, qu'il me fist donner de l'argent au Roy, pour faire de la vaisselle d'argent, afin qu'une autre fois, quand ils me feroient cest honneur de venir manger à mes pavillons, ie les fisse servir, comme il leur appartenoit. Monsieur de Guise le dit au Duc de Saxe, lequel dit, qu'il le vouloit dire au Roy : & comme ils voulurent monter à cheual, pour retourner au camp, on leur vient dire, que le Roy estoit party de Marches, qu'il s'en venoit au camp. Eux deux s'en allerent au deuant : & nous tournasmes chacun en sa place, tant les capitaines du Duc que nous autres, qui tous estions ie vous assure bien fous, & la teste pleine. Ils rencontrerent le Roy à vn quart de lieue des batailles. Sa Maiesté leur demanda s'ils auoient dîné. Monsieur de Guise luy respondit qu'ouy, aussi bien qu'ils eussent fait il y auoit vn an : & pource qu'ils venoient deuers les batailles, sa Maiesté leur dit, qu'ils n'auoient pas dîné à Pierrepont. Monsieur de Guise luy dit, vous ne sçauriez deuiner, qui

nous a donné à dîner, ny qui nous a si bien traittez. Alors le Roy luy demanda, Et qui? C'est, respond monsieur de Guise, Montluc. Je croy qu'il vous a donné des viandes de son pais, dit le Roy, des aulx & des oignons,

Le Duc de Saxe demande au Roy de la vaisselle d'argent pour le sieur de Montluc.

& le vin bien chaut. Surquoy monsieur de Guise luy compra, comme ils auoient esté traittez. Le Roy le demanda au Duc par son truchement, lequel respondit, que si sa Maiesté leur auoit donné à dîner, il ne leur eust sceu donner de meilleures viandes, ny de meilleur vin, ny plus frais: que puis que i'estois si bon compaignon, qu'il falloit que sa Maiesté me donnast de l'argent pour faire de la vaisselle d'argent: car rien ne leur auoit manqué que cela: & que monsieur de Guise & luy m'auoient promis de luy faire ceste demande. Le Roy leur promit, qu'il le feroit, & que puis que ie dependois si honorablement il m'en vouloit donner le moyen, plus qu'il n'auoit fait iusques à ceste heure là.

Conseil aux gens de guerre.

Encores que cecy ne serue de rien à mon escriture, si l'ai-ie voulu dire pour faire cognoistre à vn chacun, que l'auarice ne m'a iamais tant dominé

qu'elle m'aye gardé d'honorer les charges que i'ay eües de mes Roys & maistres : & vous conseille , capitaines mes compagnons , qui commandez à beaucoup de gens d'en faire de mesmes , & que l'auarice ne vous commande. Ce peu que vous dépendrez vous acquerra beaucoup. La table honneste d'un capitaine attire d'honnestes hommes , & mesmes celle du Lieutenant de Roy , où la Noblesse se iette , pour estre incommodée de logis. Peut estre souuent d'autres incommoditez les pressent , que si le Lieutenant de Roy est chiche & auare , on le suiura comme vn vilain. Je n'ay iamais fait ainsi , & au contraire plus dependu que ie n'auois , ayant cogneu que cela , m'y a plus profité que nuy , non seulement en cela , mais aussi à donner des cheuaux & des armes , & bien souuent à tel qui auoit mieux dequoy que moy. Si le Roy vous cognoist de cest humeur ou le Prince qui vous commande , il ne faudra à vous donner aussi , scachant que vous estes liberal , & que vous n'avez rien qui soit à vous.

*On fuit
vn Lieutenant de
Roy auare.*

Or comme ie fus à nostre bataillon, & chacun de nos capitaines en leur

*Le sieur
de Mont-
luc met le*

*Premier
les armes
en main
à M. le
Prince de
Joinville
Et au fils
de M.
d'Au-
malle.*

place, le Prince de Joinville, qui est
à présent monsieur de Guise, vint à
la teste de nostre bataillon, & le fils
de monsieur d'Aumalle, tous deux
jeunes enfans, beaux à merueilles,
ayant leurs gouverneurs avecques eux,
& trois ou quatre gentils-hommes
apres. Ils estoient montez sur de peti-
tes haquenées. Je leur dis, çà, çà mes
petits Princes, çà mettez pied à terre :
car j'ay esté nourry en la maison, de
là où vous estes sortis, qu'est la mai-
son de Lorraine, où j'auois esté page.
Je veux estre le premier, qui vous
mettra les armes sur le col. Leurs gou-
verneurs descendirent & les firent met-
tre pied à terre. Ils auoient de petits
robons de taffetas, lesquels ie leur
ostay de dessus les espaules, leur met-
tant la picque sur le col, & leur dis,
i'espere que Dieu vous fera la grace
de ressembler à vos peres, & que ie
vous porteray bonne fortune, pour
être le premier, qui vous a mis les
armes sur le col. Elles m'ont esté ius-
ques icy fauorables. Dieu vous rende
aussi vaillans que vous estes beaux, &
fils de tres-bons & genereux peres.
Ainsi ie les fis marcher coste à coste,
les picques sur le col, à la teste du
bataillon.

*Propos
du sieur
de Mont-
luc aux
deux
princes
Lorrains.*

bataillon estant au deuant , & retourner au mesme lieu. Leurs gouuerneurs estoient si aises , & tous nos capitaines de veoir ces enfans marcher , comme ils faisoient , qu'il n'y auoit nul qui n'en eust bon presage. Mais i'ay failly en l'un , qui est celuy de monsieur d'Aumalle , car il mourut bien tost apres. Et toutes-fois , à ce que l'on me dit , ce petit Prince estoit aussi sain dans le corps que enfant pouuoit estre. Mais ie croy que les medecins tuent les Princes pour les vouloir trop difficilement traiter en leurs maladies. Ils sont hommes comme nous : & toutesfois on veut qu'ils ayent quelque chose de plus particulier que les autres. Monsieur de Guise est en vie , i'espere qu'il accomplira ce bonheur , que nous luy desirâmes ce iour là. Le commencement en est bon , i'espere que la fin le couronnera. Et ainsi il sera demeuré heritier de la bonne fortune , qu'alors nous souhaîtâmes à son cousin & à luy , puis que Dieu en a voulu prendre l'un. I'ay tousiours fort esperé en ce peu , que ie l'ay cogneu , de ce ieune Prince. Aussi n'y eust il iamais de poltron en ceste braue race. Ce qui ne se void gueres , quand il y

*Presage
à M. de
Joinville;*

436 *Comm. de M. B. de Montluc* ,
a grand' multitude. Bref nostre armée
fut tres belle , & à laquelle le Roy
print tres-grand plaisir.

Quelques iours apres sa Maiesté fut
aduertie que le Roy d'Espagne mar-
choit avec son armée , & faisoit grand'
diligence. Le Roy se douta, qu'il alloit
surprendre Corbie ou Dourlan , ou
bien Amiens , où il n'y auoit en gar-
nison que deux enseignes en chacune.
Le soir que ces nouuelles luy vindrent,
ils ne firent que disputer sur les moyens
de les secourir : mais ils trouuoient ,
qu'il estoit impossible , veu que le
Roy d'Espagne estoit fort avant. M.
de Guise demeura ceste nuit là à Mar-
ches , & en renuoya messieurs de Ta-
uannes & de Bourdillon à Pierrepont.

*Costume
du sieur
de Mont-
luc.*

Ma coustume estoit d'aller donner le
matin le bon iour à M. de Guise ,
puis m'en retournois à mes pauillons :
& de tout le iour ie ne m'esloignois
de ma charge , & ne m'amusois à faire
la cour. Ce n'a iamais esté mon mes-
tier , dequoy le Roy , M. de Guise ,
& tous les Princes du camp m'en esti-
moient d'auantage, disans que de nos-
tre costé , il ne pouuoit venir aucun
desordre. Or donc le lendemain ma-
tin ie m'en allois donner le bon iour

à M. de Guise , pensant qu'il fut retourné le soir à Pierrepont : mais à l'entrée de la ville ie trouuay monsieur de Bourdillon , de Tauannes & d'Estrée à cheval , & leur demanday où ils alloient : ils me dirent qu'ils retournoient au Conseil à Marches , & que le soir deuant ils n'auoient peu resoudre sur les moyens de secourir Corbie : Car le Roy d'Espagne marchoit en grand'haste en cest endroit-là : & que M. de Guise estoit demeuré ceste nuit là à Marches. Alors ie leur demanday combien il y a d'ici iusques à Corbie. Il me semble qu'ils me dirent trente lieues ou plus : alors ie leur dis ie vous prie picquez au galop , & dites au Roy , qu'il n'est point temps de s'amuser à conseils , ni consultations , & que peut estre cependant qu'il s'amuse à discourir sur le tapis , l'ennemi marche : mais que *Advis* promptement il se faut resoudre , & *du sieur* que s'il luy plaist ie prendray sept en- *de Mont-* *luc.* seignes , & m'en iray iour & nuit me mettre dedans. Dites luy que ie l'assure de faire si grande diligence que i'y arriveray plustost que le Roy d'Espagne , ni son camp. Et dites à M. de Guise que ie ne luy demande

438 *Comm. de M. B. de Montluc* ,
que vingt-cinq mulets chargez de
pain. Je feray mener quatre cha-
rettes de vin de marchans volontaires
qui sont à nostre regiment , pour faire
manger & boire les soldats en che-
minant sans entrer en ville ny village :
& qu'il mande à monsieur de Serres ;
que promptement il m'envoye les
mulets chargez de pain. Je m'en vois
courir au regiment , pour eslire les sept
enseignes , & à vostre retour vous me
trouvez tout prest à partir. Mais il
faut que vous couriez en diligence ,
& que le Roy se resolve en poste : &
que si promptement on ne prenoit
entiere resolution , ie ne le voudrois
entreprendre sans vser de remise. Alors
M. de Bourdillon me commença à
dire que le Roy trouveroit difficile ,
que le secours y peust estre si tost , que
le camp du Roy d'Espagne. Et lors ie
fautay en colere , & dis en iurant , ie
voy bien que quand vous autres serez
là , vous mettrez tout le iour en dis-
pute : en despit des disputes & con-
sultations , que le Roy me laisse faire :
ie creueray , ou ie le secoureray. Mon-
sieur d'Estrée dit alors allons , allons ,
laissions le faire : car le Roy ne le trou-
vera que bon : & se mirent à picquer

droit à Marches : & moy droit à mon regiment. Et soudain ie fis eslection de sept enseignes , lesquels promptement repeurent : & leur dy , que sans bagage , il falloit partir pour faire vn bon service. le ne leur donnay pas demy heure de temps à manger : puis les fis mettre tous sept à la campagne , vne partie de l'arquebuzerie deuant & une autre à la queue des picquiers. le prins quatre charretées de vin de ceux qui avoient les meilleurs cheuaux : & les mis à la tête des capitaines : & puis commanday aux charretiers d'apporter deux ou trois sacs d'auoine , sur les poinçons de vin , & un peu de foin : puis m'en courus à mes tentes , lesquelles estoient derriere le regiment : & commençay à manger , & amenay les capitaines des sept enseignes manger avecques moi. Messieurs de Ta- uannes , de Bourdillon & d'Estrée al- lerent à si grand' haste qu'ils trouuerent le Roy , qui ne faisoit que sortir du liēt : & promptement luy propose- rent le party , que ie leur auois dit. Le Roy voulut appeller tout le Con- seil : monsieur d'Estrée commença à renier , à ce qu'il me dit apres (car il s'en sçait aussi bien ayder que moy)

*Diligence
du sieur
de Mont-
luc au
Roy.*

440 *Comm. de M. B. de Montluc* ,
& dit , Montluc nous a bien dit , Sire ,
la verité , que vous mettriez tout au-
jourd'hui à disputer , s'il se peut faire
ou non. Et si vous vous fussiez au soir
resolu , & promptement , comme il
s'est resolu , le secours seroit à dix
lieuës d'icy. Il m'a dit que si promp-
tement on ne luy enuoye ce qu'il de-
mande , il se desdira : car il ne veut pas
que les Espagnols triomphent de luy.
M. de Guise embrassa chaudement
cette affaire , messieurs de Tauannes
& Bourdillon pareillement : & tout à
coup , sans autre conseil , M. de Guise
manda à M. de Serres de m'envoyer
les vingt cinq mulets chargez de pain
à toute diligence. Le Roy me manda
par monsieur de Broilly , qui suivoit
M. de Guise , qu'il avoit trouvé bonne
mon opinion , sauf qu'il ne vouloit
point que i'y allasse : car il n'avoit
personne , pour commander les regi-
mens , s'il luy falloit donner bataille ,
car on ne scauoit si le Roy d'Espagne
la viendroit presenter , faisant mine
de vouloir attaquer quelque chose ,
mais qu'ils alloient faire election d'un
qui ameneroit le secours , & que ce-
pendant ie fisse tout aprestre. Ledit
Broilly s'en retourna en poste dire au
Roy , qu'il auoit veu toutes les sept

enseignes aux champs, pour marcher,
 & que ie n'attendois sinon le pain. Et à
 mesme que Broilly retournoit vers le Roy, les vingt & cinq mulets arri-
 uerent : & sur son chemin trouua le capitaine Brueil
 gouuerneur de Ruë, & beau-frere de Salcede, qui lui dit,
 que le Roy l'auoit esleu pour amener le secours.
 Ledit capitaine Brueil ne mangea que quatre ou cinq morceaux
 attendant deux siens seruiteurs qu'il auoit mandé querir, qui arriuerent
 incontinent : & ainsi s'achemina. Ie les accompagné plus d'une grand
 lieuë parlant tousiours à luy, & aux capitaines, leur remonstrant que Dieu
 leur auoit présenté vne belle occasion, laquelle ils deuoient achepter
 de la moitié de leur bien, pour monst-
 rer au Roy, la bonne volonté qu'ils portoient à son seruice, & aussi pour
 faire voir leur valeur : & qu'ils auoient en main le moyen de se faire
 remarquer au Roy, qui seroit prest pour les secourir, & donner vne ba-
 taille, plustost que les laisser perdre.
 Ie trouuay tousiours à leurs responce,
 qu'ils y alloient d'une grande gayeté de cœur, puis m'en allois au long des
 files des soldats, & leur remonstrois,

*Capitai-
ne Brueil
amène le
secours à
Corbie.*

*Remons-
trance du
sieur de
Montlus
aux sol-
dats.*

qu'il ne tiendrait qu'à eux, qu'ils ne se signalassent pour jamais : & que le Roy les cognoistrait tant qu'il viuroit : & que ie leur avois fait un grand honneur de les eslire par dessus les autres du regiment, les priant de ne me faire perdre la bonne opinion que i'avois d'eux : que ie donneroie le nom au Roy, de ceux qui feroient leur devoir, pour obeyr à ce qui leur seroit commandé. le leur fis hauffer la main, & iurer que tous chemineroient iour & nuict. Et ainsi les accompagnay plus d'une grande lieue : puis m'en retournay à la teste embrasser le capitaine Brueil, & tous les capitaines, & lieutenants : & leur promis d'aller incessamment dire au Roy l'election, que i'avois faite d'eux. Et si ie laissay les capitaines ioyeux & bien resolu de faire cette coruée, i'en laissay autant ou plus, les soldats. Souvenez-vous, leur disois-je, mes amis, des diligences, que vous m'avez veu autrefois faire en Piedmont & en Italie : car plusieurs auoient porté les armes sous moy, & croyez que de vostre diligence depend vostre vie & vostre honneur. Et pource que ie ne suis pas du pays, & que ie n'y fus jamais

qu'alors , ie ne ſçauois limiter la traitte qu'ils firent : mais le Roy , & tous ceux qui cognoiſſoient le pays , diſoient que iamais gens de pied n'avoient fait une telle coruée. Et n'entrèrent iamais en ville ny village : mais comme ils rencontroient quelque ruiſſeau le iour ils faiſoient alte : mangeoient , & ſe rafraichiſſoient deux heures au plus , dormant vn peu , mais ils cheminoient toute la nuit. Ils ne demurerent que deux nuits dehors : & arriuerent au Soleil leuant à vn quart de lieuë de Corbie : & trouuerent vn gentil-homme , qui alloit aduertir le Roy en toute diligence , que le camp du Roy d'Eſpagne arriuoit deuant la ville , & qu'ils couruſſent , s'ils y vouloient entrer : car le cauallerie commença deſia à arriuer. Ils ſe mirent au grand pas & au trot. Le gentilhomme retourna iuſques aupres de la ville , pour ſçauoir dire au Roy , s'ils eſtoient entrez : Et comme ils furent à deux ou trois cens pas de la ville , la cauallerie de l'ennemy commença à ſe monſtrer : & les noſtres de courſe ſe ietterent deuant la porte , & ſur le bord du foſſé : & là firent teſte. Ils tuerent ſept ou huit

444 *Comm. de M. B. de Montluc,*
soldats sur le derriere, qui n'auoient
peu courir tant que les autres. Et voila
tous nos gens dans la ville: & ne per-
dirent rien des mulets, ny des char-
rettes du vin: car ils acheuerent de
manger & boire ce qu'ils auoient
à quatre lieues de là, & les auoient
renuoyez. Je leur auois baillé vn de
mes six coffres, que i'auois fait faire
pour porter de la poudre, que trois
cheuaux tiroient. Il arriua aussi tost à
la porte de la ville, que les soldats.
Il y a des Princes & seigneurs qui
estoit au conseil du Roy, qui por-
teront tesmoignage, si ie dis verité,
ou non: & sur tous messieurs de Ta-
uannes & d'Estrée, qui apporterent
au Roy ma deliberation.

*Remon-
strance
aux Ca-
pitaines
sur le se-
cours de
Corbie.*

Mes compagnons, quand le Roy
ou son lieutenant vous baillera à faire
vne diligence, pour secourir vne place,
vous ne deuez perdre vn seul quart
d'heure. Car il vous vaut beaucoup
mieux trauailler vostre corps & vos
jambes jusques au dernier de vostre
force, & entrer dedans la place & de-
meurer en vie, que d'aller à vostre
aise, & estre tué, & n'y point entrer.
Car vous mesmes estes cause de vostre
mort: & que la place sera perduë: &

comme vous gagnerez une grande reputation avecque vostre diligence, vous finirez vos iours & vostre renommée ensemble allant à votre aise. Et ne vous excusez iamais sur les soldats, ny ne leur faites iamais l'entreprinse difficile : mais tousiours facile. Et sur tout faites que vous ayez tousiours des prouisions, & principalement du pain & du vin avecques vous, pour leur donner quelque peu de rafraischissement. Car comme i'ay desia dit cy-deuant, le corps humain n'est pas de fer. Parlez tousiours par les chemins ioyeusement avecques eux, leur donnant tousiours grand courage, & leur mettez au deuant le grand honneur qu'ils gagneront, & le grand seruice qu'ils feront au Roy. Et ne faites point doute, que les hommes ne fassent tousiours plus de chemin que les chevaux. Je ne vous conseille chose que ie n'aye faite, & fait faire plusieurs fois, comme vous trouuerez dans ce livre. Car apres que les cheuaux sont recreus, vous ne pouuez à coups d'esperon leur faire faire un pas : mais les hommes sont portez du cœur. Il ne leur faut tant de temps pour se rafraischir. Ils mangent en cheminant, & se

Les hommes font plus de diligence à pied qu'à cheval.

446 *Comm. de M. B. de Montluc* ,
resiouissent. Il ne tiendra qu'à vous ,
capitaines : faites comme i'ay fait sou-
uent. Quittez la botte , & à beau pied
à la teste de vos gens , monstrez leur
que vous uoulez prendre la peine
comme eux. Il n'y a diligence que
vous ne fassiez : & ferez suivis failans
enfler le cœur & redoubler les forces
aux plus recreus.

*Nouvelle
au Roy
du se-
cours de
Corbie.*

Deux ou trois iours apres , le Roy
s'achemina avecques son camp droit
à Amiens : & à la premiere iournée
ou bien à la seconde, arriua vn gentil-
homme du Gouverneur de Corbie ,
qui trouua sa Maiesté en campagne
marchant avecques le camp : & lui
porta les nouvelles comme le capi-
taine Brueil estoit entré dedans Cor-
bie : qui donna vne grande ioye à
sadicte Maiesté, & à tout nostre camp,
pour sçavoir ceste place asseurée. Sa
Maiesté se iouant , disoit à monsieur
de Guise, qui sera le premier, qui dira
à Montluc cette nouvelle ? Le ne la lui
veux pas dire : ny moy aussi , disoit
monsieur de Guise : car comme il l'en-
tendra , il crierà apres nous. Ils di-
soient cecy , pour ce qu'ils auoient eu
toufiours opinion qu'il estoit impos-
sible que les soldats fissent vne si gran-

de coruée. Le lendemain apres sa Ma-
iesté fut aduertie , que le Roy d'Espa-
gne auoit fait alte à vne petite lieuë
de Corbie : & qu'il ne faisoit nul sem-
blant d'assieger la place. Le Roy pen-
sa , qu'à cause du secours il ne l'assie-
geroit pas : & promptement il print
opinion , qu'il marcheroit droit à
Amiens. Il n'y auoit qu'une compa-
gnie ou deux dedans. Et fit partir
monsieur le Marquis de Villars , qui *Marquis*
est auourd'huy en vie , avec trois *de Vil-*
cens hommes d'armes , pour s'aller *lars.*
ietter à extreme diligence dedans : &
me commanda de faire partir autres
sept enseignes , pour s'en aller apres
luy à toute haste. Ce que prompte-
ment ie fis : & baillay la charge de les
conduire au capitaine Forcés , qui est
encores viuant. Et comme les capi-
taines & les soldats auoient entendu
la louïange que le Roy & tout le camp
donnoit au capitaine Brueil , de la di-
ligence qu'ils auoient faite allant se-
courir Corbie , ils voulurent faire le
semblable : & arriuerent aussi tost à
Amiens que ledit sieur Marquis. Il
n'y a rien qui picque tant les gens de
nostre mestier , que la gloire , ou l'en-
uie de faire aussi bien , ou mieux qu'un

tel n'a fait. Deux ou trois iours deuant sa Maieſté en auoit enuoyé trois ſe ietter auſſi dans Dourlan : & par ainſi il pourueuſt facilement au tout.

*Pour parler de
la paix.*

Comme le Roy arriua à Amiens, le camp du Roy d'Eſpagne arriua à vne lieuë pres, la riuere entre deux : & là ſe commença à traiter la paix, de laquelle monſieur le Conneſtable & monſieur le Mareſchal ſainct André auoient fait l'ouuerture. Et me ſemble qu'il ſe fit quelque temps de trefue, pource que de leur coſté, ny du noſtre on ne fit rien, à tout le moins, que i'en aye ſouuenance. Car ie vins fort malade d'une fiebure double tierce, pour les excez que ie faiſois, non en plaiſirs & dances, mais à paſſer les nuicts ſans dormir, tantost au froid, tantost au chaud, touſiours en action, iamais en repos. Il m'a bien ſeruy d'eſtre fort & robuste : car i'ay mis autant mon corps à l'eſpreuue, que ſoldat ait fait de mon temps. Apres toutes ces allées & venuës, qui durerent plus de deux mois, la paix ſe fit, au grand malheur du Roy principalement, & de tout ſon Royaume. Car ceſte paix fut cauſe de la redition de tous les pays & conqueſtes, qu'a-

*Malheurs ad-
uenus à
cauſe de
la paix.*

uoient fait les Rois François, & Henry, qui n'estoient pas si petites, qu'on ne les estimast autant, que la tierce partie du Royaume de France. l'ay leu dans vn liure escrit en Espagnol, que le Roy auoit rendu cent quatre-vingts dix-huict fortereffes, où le Roy tenoit garnison. le laisse à penser à chacun, combien il y en auoit d'autres sous l'obeyffance de celles-là. Nous tous, qui portons les armes, pouuons dire à la verité, que Dieu nous auoit donné le meilleur Roy, *Loüange du Roy Henry.* pour les soldats, qui eust iamais commandé en ce Royaume. Et quand à son peuple, il luy estoit si affectionné, que nul n'espargnoit ses moyens, pour l'aider à soustenir tant de guerres qu'il auoit sur les bras. le ne veux pas blasmer ceux qui la firent: car chacun peut bien penser qu'ils la firent à bonne fin, & que s'ils eussent sceu que ceste paix eust porté tant de malheurs, ils ne l'eussent iamais faite. Car ils estoient si bons seruiteurs du Roy, & l'aimoient tant avec bonne & iuste raison, qu'ils se fussent plustost laissë mourir dans la prison, que de l'auoir faite. le dis cecy, parce que monsieur le Connestable en fut le

450 *Comin. de M. B. de Montluc* ,
premier motif , & monsieur le Maref-
chal de saint André. Eux - mesmes
ont veu la mort du Roy : & eux-mes-
mes ont eu leur part des malheurs ,
qui sont aduenus en ce miserable
Royaume : & y sont morts l'espée en
la main. Peut estre seroient-ils aujour-
d'huy pleins de vie. Et par là peut on
bien iuger qu'ils ne firent pas la paix ,
pensant qu'elle portast tant de mal-
heurs , comme elle a porté. Il faut que
nous considerions quelle bonne for-
tune Dieu auoit enuoyé à ce Royau-
me , luy donnant vn tel Roy , si har-
dy & magnanime , volontaire à con-
querir , & le Royaume riche , aimé
de ses suiets , qui ne luy pouuoient
rien refuser , pour l'aider en ses con-
questes : tant de grands capitaines , la
pluspart desquels seroient aujourd'huy
en vie , s'ils ne se fussent entre-mangez
en ces guerres ciuiles. O que si ce bon
Roy eusse vescu , ou si ceste paix ne se
fust faite , qu'il eust bien rembarré les
Lutheriens en Allemagne. Au reste
nostre bon Maistre auoit quatre en-
fans masles , Princes d'vne belle espe-
rance , si que sa Maiesté chargée d'an-
nées pouuoit esperer trouuer en eux
le repos de sa vieillesse , & des instru-
mens

*Deplora-
tion de la
mort du
Roy Hen-
ry.*

mens propres pour executer ses hautes & genereuses entreprises. Les autres Rois ses voisins ne se pouuoient vanter de cela : car le Roy d'Espagne n'auoit qu'un seul fils, duquel on n'a jamais eu guerres d'esperance, comme il s'est cogneu par sa fin. Le Royaume d'Angleterre estoit en quenouille. Le Royaume d'Escoffe voisin, tenoit pour nous, & estoit à nous, ayant la France un Roy Dauphin. Chacun peut iuger, qui si la paix ne fust aduenue, le pere ou les enfans eussent dominé toute l'Europe. Le Piedmont seroit à nous, où tant de braues hommes se sont nourris. Nous aurions vne porte en Italie, & peut estre le pied bien auant. Et n'eussions veu tout renuersé, sans dessus dessous. Ceux qui ont braué & rauagé ce Royaume, n'eussent osé leuer la teste, ny remuer, ny seulement penser à ce qu'ils ont executé depuis. Mais cela est fait, il ne s'y peut aucunement remedier : & ne nous en demeure que la tristesse de la perte d'un si bon & vaillant Roy, & à moy d'un si bon Maistre, & des mal-heurs qui sont aduenus dans ce miserable Royaume. Ainsi le pouuons nous appeller miserable, en contré-

*Compara
raison du
Roy aux
Princes
ses voi-
sins.*

change de ce que nous l'appellions par le passé le plus grand & le plus opulent Royaume en armes, en bons capitaines, en obeyssance de peuple, & en richesses, qui fut en tout le monde.

*Le fleur
de Mont-
luc peu
aimé de
la maison
de Mont-
morancy.*

Après ceste mal-heureuse & infortunée paix, le Roy se retira à Beauvais: monsieur de Guise demeura encore au camp, pour licentier l'armée. Avant que sa Maiesté en partist, ie luy remis la charge qu'il m'auoit fait prendre par force. Et ne faut pas trouuer estrange si tant ie contestois, à ne la vouloir accepter. Car ie me doutois bien qu'il m'en aduiendroit, ce qui m'en est aduenue, qui est d'en auoir pour tout iamais la mal-grace de la maison de Montmorancy, plus que de celle de Chatillon, à qui le fait touchoit plus qu'à eux. Mais il n'y a ordre, on ne peut viure en ce monde, sans acquerir des ennemis. Il faudroit estre Dieu. l'accompagnay monsieur de Guise iusques à Beauvais, & me retiray à Paris, m'ayant promis ledit seigneur, qu'il me feroit auoir mon congé pour m'en aller en Gascogne, & qu'il me feroit donner de l'argent pour m'y conduire, estant bien certain que ie n'auois pas vn sol. Ce que

ie m'asséure qu'il eust fait : mais comme il arriua à Beauuais , il trouua vn nouveau changement , c'est que d'autres s'estoient mis en sa place touchant le credit. Ainsi va le monde : & fut vn changement bien soudain. Et le trouuay estrange autant que ceux qui l'auoient suiuy aux conquestes qu'il auoit faites , ayant rabillé tout le defastre qui estoit aduenu aux autres , & montré au Roy d'Espagne , que ny la perte de la bataille de S. Quentin , ny celle de Grauelines , n'auoit pas rendu le Roy en tel estat , qu'il n'eust encore vne ou deux armées plus fortes , ayant au reste conquis des places presque imprenables. Mais à eux la dispute. Ce sont choses qui aduiennent souuent en la Cour des Princes. Je ne m'estonne pas si i'en ay eu ma part , puis que les plus grands ont passé par là , & passeront à l'aduenir.

M. de Guise se recule de son credit.

Or le Roy de Nauarre auoit mené quelque entreprinse en Biscaye, qui se trouua à la fin double. Il supplia le Roy de me donner congé pour aller avecques luy , & que luy mesme la vouloit executer , ayant opinion que monsieur de Burie l'auoit faillie par son defect : & ainsi m'en vins avec-

Le Roy de Nauarre amene le sieur de Montluc en Guienne.

ques luy, sans en rapporter que promesses, & à la verité vne bonne volonté du Roy mon maistre. Mais on le destournoit de me faire du bien, & à d'autres, qui l'auoient aussi bien merité, & peut estre mieux que moy. Nous allasmes à Bayonne, & trouuasmes que celuy qui auoit mené ceste marchandise, qui s'appelloit Gasmure, la traittoit double, & qu'il vouloit faire prendre le Roy de Navarre mesme. Il renuoya monsieur de Duras avecques les Legionnaires, lequel il auoit fait venir, & aussi les Biarnois. I'auois amené soixante cinq gentils-hommes tous armez & montez, qui estoient venus pour l'amour de moy. Et comme ie fus de retour à ma maison, bien peu de iours apres m'arriua le don que le Roy m'auoit fait de la compagnie de gensd'armes, pour la mort de monsieur de la Guiche : & cousta prou au Roy de se pouoir demester des traueses, que l'on me donnoit à me garder de l'auoir : toutesfois le Roy s'en fit aceroire plus par colere, qu'autrement. Car à la fin il fut contrainct de dire qu'il m'auoit promis la premiere vacante, & qu'il me la vouloit tenir : & qu'homme

ne luy en parlaſt plus. Je fis ma premiere monſtre à Beaumon de Loughmaigne , de laquelle vn nommé la Peyrie eſtoit commiſſaire.

Pendant ce temps ſe firent ces malheureuſes nopces , & ces infortunez triomphes & tournois à la Cour. La ioye fut bien courte, & dura bien peu. Car la mort du Roy ſ'en enſuiuit courant contre Mongommery : que pleuſt à Dieu , qu'il ne fut iamais né , auſſi n'a-il fait que mal , & malheureuſe fin. Eſtant vn iour à Nerac le Roy de Nauarre me monſtra vne lettre , que monſieur de Guiſe luy auoit eſcrit , par laquelle il l'aduertiſſoit des iours du tournoy , & que le Roy ſ'y trouuoit , & eſtoient des tenans avecques luy Meſſieurs les Ducs de Guiſe , de Ferrare , & de Nemours. Je n'ay iamais oublié vne parole que ie dis au Roy de Nauarre , que i'auois tout iamais ouï dire. Que quand vn homme penſe eſtre hors de ſes affaires , & qu'il ne ſonge qu'à ſe donner du bon temps , que c'eſt lors qu'il luy vient les plus grands malheurs , & que ie craignois la ſortie de ce tournoy. Il n'y auoit iuſtement que trois iours iuſques au iour du tournoy , contant par

*Mongom-
mery tué
le Roy.*

la datte de la lettre, ie m'en retour-
 nay le lendemain chez moy : & la
 nuict propre venant au iour du tour-
 noy, en mon premier sommeil, ie
 songeay que ie voyois le Roy assis sur
 vne chaire, ayant le visage tout cou-
 uert de gouttes de sang. Et me sem-
 bloit que ce fut tout ainsi, que l'on
 peint Iesus-Christ, quand les Iuifs luy
 mirent la couronne, & qu'il tenoit ses
 mains iointes. Je luy regardois, ce
 me sembloit, sa face, & ne pouuois
 descourir son mal, ny voir autre
 chose, que sang au visage. I'oyois,
 comme il me sembloit, les vns dire,
 il est mort, les autres, il ne l'est pas
 encores. Je voyois les medecins & chi-
 rurgiens entrer & sortir dedans la
 chambre : & cuide que mon songe
 me dura longuement : car à mon res-
 ueil ie trouuai vne chose, que ie n'a-
 uois iamais pensée : C'est qu'un hom-
 me puisse pleurer en songeant. Car ie
 me trouuay la face toute en larmes,
 & mes yeux, qui en rendoient tou-
 siours : & falloit que ie les laissasse
 faire : car ie ne me peus garder de
 pleurer longuement apres. Ma feuë
 femme me pensoit reconforter : mais
 iamais ie ne peus prendre autre reso-

*Songe du
 sieur de
 Montluc.*

lution sinon de sa mort. Plusieurs qui sont viuans , sçauent que ce ne sont pas des contes : car ie le dis dès que ie fus esueillé. Quatre iours apres vn courier arriua à Nerac , qui porta lettres au Roy de Nauarre , de monsieur le Connestable , par lesquelles il l'aduertissoit de la blesseure , & du peu d'esperance de sa vie. Le Roy de Nauarre me despescha vn sien valet de chambre , pour me dire le malheur , & qu'incontinent ie montasse à cheual. Il estoit party sur l'entrée de la nuict , & bien tost fut à moy : car il n'y a que quatre lieuës de Nerac chez moy : & me trouua que ie me mettois au liët. Je partis incontinent , & allay prendre sur mon chemin vn mien voisin nommé monsieur de Beraud , & nous en allasmes le grand trot droit à Nerac. Il est en vie. Je luy dis & predis tous les malheurs au plus pres , & tout ce que i'ay veu venir depuis en la France. Et autant en dis au Roy de Nauarre : & ne demeuray à Nerac que deux heures , & m'en retournay passer mes tristesses en ma maison. Et ne tarda pas huiët iours , que le Roy me manda sa mort , à laquelle ie n'ay rien gagné. Car depuis ie n'ay eu que

*Tout mal-
heursui-
uy le sieur
de Mont-
luc de-
puis la
mort du
Roy Hen-
ry.*

traverses, comme si i'eusse esté cause
d'icelle, & que Dieu m'ait voulu pur-
nir. A grand'peine en fusse-ie esté cau-
se : car i'ay souhaitté cinquante fois la
mienne depuis qu'il fut mort. Et tou-
siours m'est allé au deuant, que ie
n'aurois iamais plus que malheurs.
Comme à la verité ie n'ay eu autre
chose. Car depuis on me soupçonna
que i'estois de l'intelligence du Roy
de Nauarre, & de monsieur le Prince
de Condé. Je ne fus à ma vie de leur
conseil, ny n'auois iamais cogneu ce
qu'ils auoient dedans le cœur. Je l'ay
bien monstré au bon du fait. Bien se
plaignoient souuent ces deux Princes
à moy du mauuais traitement qu'ils
receuoient. Quand ils m'en parloient,
ie leur reiettois le tout si loing que ie
pouuois. Dieu par sa sainte grace m'a
aidé à faire cognoistre à tout le mon-
de, que ie n'ay eu iamais intelligen-
ce, qu'avecques le Roy & la Royne,
& avecques ceux qui les ont seruis fi-
dellement & loyaument. Et ay veu
que ceux qui auoient le plus receu ce-
ste opinion, ont esté & sont encores
les meilleurs seigneurs & amis que
i'aye eu, ni que i'aye encores. Il y
en a qui sçauent les propos que ie
tins

*Me/ con-
tentement
du Roy
de Na-
uarre &
de son
frere.*

tins à monsieur le Prince de Condé , à ce beau colloque de Poissi , qui se fit depuis , lorsqu'il me vouloit attirer à son party. Apres les premiers troubles la Royne de Nauarre s'en alla à Roussillon , qui apporta à leurs Maiestez vn sac d'informations , là où il ne se parloit que de trahisons & intelligences que i'auois avec le Roi d'Espagne pour lui mettre la Guienne entre ses mains , forcemens de femmes & filles , concussions , impositions , pillages des finances du Roi. Toutes-fois leurs Maiestez estans venus à Toulouse & en Guienne , ne trouuerent *Soupçon contre le sieur de Montluc.* iamais homme ni femme d'vne Religion , ni d'autre , qui se plaignit de moy. Et trouuerent la Guienne si remplie de viures , que toute la Cour le trouuoit estrange , veu qu'en Languedoc tout le monde y estoit cuidé mourir de faim , comme Monsieur le Chancelier mesme disoit , & qu'il auoit demeuré trois iours en Languedoc , que son maistre d'hostel ne lui donna en ces trois iours qu'vne poullaille : & le disoit en table , là où il donnoit à disner à quelques Presidens & Conseillers. Monsieur le Premier lui dit , qu'il trouueroit la Guienne

toute pleine de viures. Et lui respondit : Et que veut dire cela : car l'on a voulu faire entendre au Roi & à la Royne, qu'ils ne trouueroient rien à manger en la Guienne, & que monsieur de Montluc auoit ruiné tout le pais. Alors tous ceux qui estoient à table, lui attesterent du contraire, & qu'il trouueroit le pais bien policé, comme il fit à son dire propre. La Royne aussi, qui craignoit que les viures lui faillissent à Bayonne, vid qu'à la fin il fallut ietter les chairs par les ruës. Et auant leur venuë, la Grauiere Senechal de Quercy reuenant de la Cour passa à ma maison de Stillac, où il se coëffa si bien du bon vin que ie luy donnay, qu'il songea la nuict que ie lui auois dit, que ie voulois rendre la Guienne au Roi d'Espagne, & que monsieur le Cardinal d'Armagnac, messieurs de Terride, de Negrepelice, & beaucoup d'autres estoient de mon intelligence : & que s'il en vouloit estre, ie le ferois le plus grand homme de sa race. Et s'en alla avec ce bonnet de nuict dire cela à monsieur de Marchastel, lequel despescha incontinent Rappin à la Cour, pour porter ces nouuelles au Roi, &

Le Senechal de Quercy accuse le sieur de Montluc.

fut creu pour quelques iours : car la Royne me despeseha du Plessis en poste, pour m'aduertir que ie ne me misse point en crainte, car ils n'en auoient rien creu. Desia en auois-ie esté aduerty. A quoy ie ne faisois pas grand fondement, ayant tant de fiance en la Royne, qu'elle ne croiroit pas legerement cela. Le Plessis valet de chambre du Roi me trouua à Agen, que ie dansois (encores se faut-il quelquefois donner du bon temps) en compagnie de quinze ou vingt damoiselles, lesquelles estoient venuës voir ma belle fille, madame de Caupenne, laquelle encores n'estoit venuë en ce Pays. Et voilà comme ma trahison se trouua veritable. Nous en demandames raison à leurs Maiestez : mais nous ne la sceusmes iamais auoir. Et voilà pourquoy il se trouue tant de rapporteurs & calomniateurs en ce Royaume: car l'on n'en fait iamais au-

*Calomniateurs
pres des
Rois.*

cune iustice, non plus qu'aux Cours de Parlement des faux tesmoins. Mais j'espere que Dieu en donnera quelque iour la cognoissance au Roi du tout, & en fera couper tant de testes, qu'il reglera son Royaume, & chassera toute cette vermine. Encores que toutes

choses , qui m'ont esté supposées & soient trouvées fausses , & sans nulles apparences de verité , ayant mes faits tesmoigné tout le contraire, tant du passé que du present: si n'a-on iamaïs peu faire que la Roynie n'en aye creu quelque chose , ou à tout le moins elle s'est mise en doubte : car ie m'en suis bien resenty. Ie croy toutesfois, que c'estoit pour ne me faire donner aucune recompense au Roi des services que i'ay faits , lesquels elle sçait bien. Et sçait bien aussi que ie ne suis pas Espagnol, & n'ay nulle pratique hors le Royaume , ni autre que pour le service du Roi. Elle ne croyoit pas cela , lorsqu'elle m'entretint à Toulouse avec larmes sur un coffre , où elle estoit assise , entre messieurs les Cardinaux de Bourbon & de Guise. Sa Maïesté s'en souviendra , s'il lui plaist , car encore que beaucoup de choses passent par sa teste , elle a bonne mémoire. Ce fut elle-mesme qui me dit , qu'ayant receu la nouvelle de la perte de la bataille de Dreux (car quelque braue lance fuit des premiers , & alla porter ceste fausse nouvelle) elle entra à part soy en conseil , qu'est-ce qu'elle feroit. Enfin elle print resolu-

tion, si le boiteux portoit nouvelle certaine de ceste perte de se desrober à peu de troupe avec le Roi & Monsieur: & tascher de gagner la Guienne passant par l'Auvergne, pour l'esperance qu'elle auoit en moy: car aussi la Guienne estoit nette: & puis que le Roy & elle eussent aisément eu secours d'ailleurs. Dieu soit loué, que leurs Maiestez n'en sont pas venuës là. Mais cecy se verra mieux cy-apres. Si faut-il que sa Maiesté sçache, que iusques icy ie ne l'ay pas fort pressé de demandes, ni eux aussi ne se sont pas fort tourmentez de m'en donner, m'ayant refusé la Comté de Gaure (qui ne vaut que douze cens liures de rente) apres les premiers troubles. un chacun sçait le seruice que ie fis au Roi, & à la conseruation de la Guienne, non que ie me plaigne de sa Maiesté: car son pere & lui m'ont fait plus d'honneur & plus de bien que ie ne merite. Je n'eus iamaïs esperance d'estre recompensé de seruice que i'eusse fait, ni que ie sçauois faire, ayant esté respondu à vn personnage qui est encores en vie, que i'estois delia trop grand en ce pays, lors qu'on parloit pour moy. Ce que ie confesse, non

Le fleur de Montluc bien aimé en Guienne. pas en bien, mais en amitié de tous les trois Estats de la Guienne, pour la loyauté & fidelité qu'ils ont cogneu, que i'ay tousiours porté au seruice du Roi, & à sa Couronne: & aussi que i'ay tousiours tasché de soulager le pays de garnison, & tous autres subides, là où i'ay peu auoir le moyen de les garder. Et espere qu'au retour des Commissaires qui sont par deça, se verra la verité. Je ne les ay pas gaignez: car ie n'ay pas seulement voulu parler à eux. Qu'ils fassent à pis faire. Et quant à estre riche pour les biens, il y a cinquante ans que ie commande, ayant esté trois fois lieutenant de Roi, trois fois Maistre de camp, Gouverneur de places, Capitaine de gens de pied, & de gens de cheual: & avecques tous ces estats, ie n'ay iamais sceu tant faire, que i'aye acquis que trois mestairies, & racheté un moulin qui auoit esté de ma maison. Et tout cela ne monte que de quatorze à quinze mille francs. Voilà toutes les richesses & acquisitions que i'ay iamais fait. Et tout le bien que ie possède aujourd'huy, ne pourroit estre affermé à plus de quatre mil cinq cens francs de rente. Je voudrois bien que

l'on m'eust reproché que j'estois trop grand pour les grands biens que le Roi m'auoit faits , & non pour ne m'en auoir donné , & estre demeuré pauvre , comme ie suis. Dieu soit loué du tout de ce qu'il m'a fait homme de bien : & m'a tousiours maintenu portant la teste leuée. Je ne crains homme qui soit dessus la terre. Je n'ay iamais fait acte que d'homme de bien, & loyal suiet, & seruiteur de mon Roi: & ne l'ay iamais seruy en masque , ni en dissimulation : car mes faits & ma parole ont tousiours cheminé par un chemin. Et n'eus iamais intelligence ni amitié avec les ennemis de mon Roi & Maistre. Et qui sera roigneus , si se gratte hardiment : car ie ne me demange ni dans le cœur , ni dehors , ayant tousiours porté les ongles si accoursies , que ie n'ay eu iamais besoin d'elles. Dont j'en louë Dieu , & le remercie tres-humblement , qui m'a conduit & aidé iusques icy , sans reproche aucun. Et espere qu'il me fera ceste grace , que comme il a accompagné ma fortune aux armes iusques icy, il accompagnera ma renommée iusques à mon enterrement. Et apres ma fin mes parens & mes amis

n'auront point de honte de m'auoir esté parens, amis, & compagnons. Et espere qu'avec cette belle robe de fidélité & loyauté, ie me marqueray pour iamais en despit de ceux qui m'ont tousiours porté enuie. Tant y a que si le Roi Henry mon bon maistre eust vescu, tous ces malheurs ne me fussent pas aduenus, ni au Royaume, qui est pis. Je laisserai donc ces propos, estant, peut estre, entré trop en colere, pour la mort & perte du meilleur Roi que la France aura iamais.

*François
second.*

Ie ne me veux mesler d'escrire les inimitiez, & rebellions, qui ont esté faites depuis, iusqu'à la mort du Roi François second, encores que i'en sceusse bien escrire quelque chose, pour estre de ce temps-là. Car ie ne

*Pourquoi
le sieur
de Mont-
luc a es-
crit.*

suis point historien, ni n'escriis ce li-
ure par maniere d'histoire: mais seu-
lement afin que chacun cognoisse que
ie n'ai pas porté les armes si long-
temps inutilement. Et aussi afin que
mes compagnons & amis prennent
exemple en mes faits. Il y en a prou,
dont ils se pourroient bien aider,
quand ils se trouueroient en telles af-
faires. Et aussi que mon escriture sera

cause, que ma mémoire ne mourra pas si tost. Qui est tout ce que les hommes, qui ont vescu en ce monde, portant les armes en gens de bien, & sans reproche doiuent desirer. Car tout le reste n'est rien. Tant que le monde durera, ie crois qu'on trouuera nouuelles de ces braues & vaillans capitaines, de Lautrec, Bayard, de Foix, de Brissac, de Strossi, de Guise & de tant d'autres qui ont vescu depuis l'aduenement du Roi François premier à la couronne, parmy lesquels peut estre, le nom de Montluc pourra estre en credit. Et puis que Dieu m'a osté mes enfans, qui sont tous morts faisant seruice aux Rois mes maistres, les ieunes Montlucs, qui en sont sortis, tascheront de deuancer leur ayeul. Je ne veux donc rien escrire du regne du Roi François second : & comme on ioüa au boutehors à la Cour, aussi ne fust-ce que rebellions & seditions. I'en sçay bien des particularitez, pour auoir esté fort privé du Roy de Navarre, & de Monsieur le Prince de Condé : mais comme i'ay dit, ie laisse ce suiet aux historiens, pour paracheuer le reste de ma vie. Et commenceray à escrire les combats, où ie

468 *Comm. de M. B. de Montluc, &c.*
me suis trouué durant ces guerres ci-
viles, esquelles il m'a fallu, contre
mon naturel, user non seulement de
rigueur, mais de cruauté.

Fin du second Volume.









i 1823499f



